

დიდებული მესხეთი

იასონ კერესელიძის გამოცემა.



ქ. გორი.
ელექტრო-მბეჭდავი სტამბა „ქართლია“.
1914

ალექსანდრე ფრონელი

დიდებულნი მესხეთი

იასონ კერესელიძის გამოცემა



ქ. გორი.

ელექტრო-მბეჭდავი სტამბა „ქართლი“

1914

ორმა გარემოებამ გაგვაბედვინა ამ კრებულის დაბეჭვდა.

პირველი ისაა, რომ ქართულმა ყოველდღიურმა პრესსამ სამართლიანად დიდი ყურადღება მიაპყრო მესხეთს, ესე იგი სამხრეთ საქართველოს. ამ მშვენიერ კუთხეს უპირობენ მოკვეთას, მოწყვეტას. ჯერ-ჯერობით დანამდვილებით ვერ გაიგებს ადამიანი, ვინაა ამ ქირურგიულ აპერაციის მომხრე: მტერი, თუ მოკეთე.

ასეა თუ ისე, სამხრეთი საქართველო, ანუ მესხეთი, მოწყვეტილი საქართველოს, შეჩვიდმეტე საუკუნის დასაწყისში, შემოერთებული კვლავ მეცხრამეტე საუკუნეს, საღღესო საკირ-ბოროტო საგნად შეიქმნა.

მეორე გარემოება ისაა, რომ გამაჰმადიანებული ქართველი თვის ისტორიულ „სახეს“ ჰპოულობს და საჯაროდ აცხადებს, რომ მიუხედავად რჯულისა მეც იგივე ქართველი ვარ, როგორცაა ღვიძლი ქართველი ქრისტიანიო.

ამ კრებულის გამოცემით, რომელშიაც გადმოვბეჭდეთ სამი წერილი: დიდებული მესხეთი, ნახული და გაგონილი და სამშობლო ქვეყანა, გვსურს ინტერესი გაუღვიძოთ საზოგადოებას მესხეთისადმი. იგი გაიგებს, რა ნატურის თვალს და ობოლ მარგალიტს დაჰქარგავს, თუ ენიცობაა გაიმარჯვა მტერმა და ღუშმანმა და ეშმაკეული განძრახვა აისრულა. ჩახვდება იმასაც, თუ რა ხიფათი მოვლის იმ ეროვნულ გამოტყობილება-გაღვიძებას,

რომლის ნიშანიც, ჩვენდა საბედნიეროდ, ასე თვალსაჩინოა შეიქმნა.


თუმცა გამაჰმადიანებული ქართველი პირს იბრუნებს სამშობლოსაკენ, მაგრამ პირადად ჩვენ მესხეთის დღევანდელი ვითარება ძველებურად გულს გვიწყლულებს. დიდი, ფრიად დიდი ეროვნულ-კულტურული მუშაობაა საკირო, თუ გვინდა, რომ სამშობლო შოთა რუსთველისა ხელიდან არ წაგვივიდეს.

ერთად ერთი საბაბი და მიზეზი ამ კრებულის დაბეჭდვისა სწორედ ისაა, რომ მოაგონოს ქართველს— დროა ვიფიქროთ და ვიზრუნოთ სამშობლოს იმ კუთხეზე, რომელმაც გვაჩუქა კანონმდებლნი: ბეჟა და ალბულა, შეუდარებელი შოთა, ღვთისმეტყველნი: ექვთიმე დი გიორგი და ნეტარი მამა გრიგოლ ხანძთელი, ეს საკვირველი მნათობი ქართულ სინასი.

ავტორი.

1 მაისს 1914 წ.

ქ. ტფილისი.



დიდებული მესხეთი

Sic transit gloria mundi.

ლათინური ანდაზა.

I

ვინ გაკადნიერდება და იტყვის, რომ მესხეთი ძველად დიდებული არ იყო? ისტორიაში ჩახედული ამას არ იტყვის, ხოლო უეიცი და რეგენი, ან განძრახ თვალეზამბული ამას არ შეიწყნარებს და არა მკითხე მოამბესავით ბევრს უკადრის შეჰკადრებს რუსთველის სამშობლოს, მაგრამ რეგენთა და ბრმათათვის არა ვსწერთ ამ წერილს. ჩვენ კარგად გვახსოვს სიბრძნე ანდაზისა: მგლის თავზე სახარების კითხვა ცუდა შრომააო.

ისტორია, გეოგრაფია, არქეოლოგია და საეკლესიო არქიტექტურა ცხადადა ჰყოფს მესხეთის დიდებას¹⁾. აწყურიდან მოყოლებული მესხეთის კალთა შვე ზღვასა

¹⁾ ისტორიულ მესხეთის ნაწილებია: ახალციხე, ჯავახეთი, აკარა, ქობულეთი, შვეშეთი, ერუშეთი, ლივანა, კანეთი, ანუ ლაზისტანი, ტაო, კლარჯეთი და კოლა. ცოტაოდენი ქართველობა საქრისტიანო სარწმუნოებისა შერჩა მხოლოდ ახალციხესა და ჯავახეთს. დანარჩენი ერი გამაჰმადიანებულია.

სცემდა, ფრთანი კი აზრუმსა, ტრაპიზონსა და იმერეთს. ზეკარიდან იმერეთს ისე დაინახავდა მესხი, თითქოს ეს ტურთა ბუნებიანი ქვეყანა ხელის გულზე აქვს გადაშლილიო.

ასე მოხაზული და მოფარგლული მესხეთი ისტორიულ ქართლ-კახეთის სივრცეს სპარბობდა. წარსულში ამ ლონიერ მანძილზე სიკოცხლე სდულდა და გადმოდიოდა. პოლიტიკური ცხოვრება იმ ზომამდე განვითარდა, რომ პირველად იურისპრუდენციამ მესხეთში იჩინა თავი. ბექა და აღბუღას კანონები მესხეთის ნიადაგზე აღმოცენდა, გაბრწყინდა და მიეცა ერს სახმარად და სასარგებლოდ²⁾. საქართველოს ისტორიის მშვენიება, მზე და მთვარე ქართველის ერისა, მეფე თამარ, აქ, მესხეთის ნიადაგზე ხშირად ატარებდა დროსა, ვარძიის მონასტრის გამოქვაბულ კლდეთა შორის ბკობდა სახელმწიფო კაცთან ერთად, ვინ იცის, ეგებ ისეთ დიდებულ საქმეზედაც, როგორიც იყო საქმე ტრაპიზონის იმპერიის დაარსებისა და იქ საქართველოს ერთგულის კაცის გამეფებისა. აქ, მესხეთში, ღვთისმეტყველება ისე აყვავდა და გაძლიერდა, რომ თითქმის გაუთანასწორდა მაშინდელ დასავლეთ ევროპას, ანუ ბიზანტიის ღვთისმეტყველებას. მარტო ხახულისა და ფარხალის მონასტერთა ხსენებაც. საკმარისია ამ აზრის შესაწყნარებლად. წმინდა ექვთიმე და გიორგი მთაწმინდელნი, ეს უდიდესი ღვთისმეტყველნი საშუალო საუკუნოთა, ამ ქვეყნის ღვიძლი შვილნი არიან. მაგრამ ყველა ეს მკრთალი ნა-

²⁾ ბექასა და აღბუღას კანონებამდე დაიწერა „ძეგლის-წერა“ და „ძეგლის-ღება“. პირველი სასულიერო კანონმდებლობაა და მეორე მხოლოდ მთიულთათვისაა დადგენილი. მაშასადამე ორთავეს განსაკუთრებული ხასიათი ჰქონდა.

თელია იმ სავსე მთვარისა, რომელიც გამოსცა მესხეთმა პოეზიის სახით. ბედმა მესხეთს არგუნა წილად ერთი უდიდებულესთაგანი მსოფლიო პოეტთა შორის, შეუდარებელი და სხიოსანი, შოთა რუსთაველი, რომლის წყალობით ქართული პოეზია აყვავდა და გაიფურჩქნა ვით მაისის ვარდი, რომლის მეოხებით ქართული პოეზია გაბრწყინდა ვით ვარსკვლავი და რომლის პოეზიამ - დილის ნიავსავით“ დაჰბერა ქართულ ტლანქს და უგემურს შაირ-ლექსობას.

ერიც პურადი, მხნე, გულადი და დარბაისელი ჰყავდა მესხეთს. ვის არ გაუგონია მშვენიერი თქმულება ხალხისა: „პირველ თქმულია ძველთაგან სიდარბაისლე მესხისაო“.

დღეს მესხეთს ველარ იცნობთ, აჩრდილი და ნატამალია წარსულისა. ჩონჩხი რა არის, ჩონჩხისთვისაც კი ვერ შეგვიდარებია რუსთველის, ბექასი და აღბუღას სამშობლო, ისე დაკნინდა ეს მშვენიერი და სიციხლით სავსე მხარე ძველის ერთიანის საქართველოსი. დღევანდელი მესხეთი ერთი რაღაც შემზარავი, თვალგადუნვდენელი და უსამზღვრო სასაფლაეოა. ქართველი მოგზაური, ქართულის ისტორიის ცოდნით შეიარაღებული, სწორედ დასწვლდება აუარებელ ნანგრევების ხილვით. დღევანდელ თითოეულ სოფელს სამი-ოთხი ნასოფლარის ადგილ-მამული უჭირავს. ნასოფლარს რუსები „дворин“-ს ეძახიან. ყურთა სმენა წაიღო სწორედ ამ რუსეთში, რომელიც მხოლოდ, ძალა-უნებურად, სიკვდილსა და უბედურობას მოგაგონებს. მერე ნეტა თითო-ოროლას ლამაზი სახელი მაინც არ ერქვას! მაგალითად: ვარდის-უბანი, თიეთიკა, მეშურნეთი, ტბასაწოლი და სხვა. აფსუსია ასეთი სოფლების გაქრობა და

დედა-მიწის პირიდგან აგვა-აწმენდა. ზოგ ნასოფლარის, ანუ ვერანას სახელი ისეა გადამახინჯებული, რომ დიდი მეცადინეობა დაგჭირდება, ვიდრე მიხვდები პირვანდელ სახელწოდებას. აი ორიოდე მაგალითი: ირმის-ქალა ასე მოუნათლაეთ: „კრიჩალა“; საწერეთლო, „საცერეტ“; ბრალი, „ბრალა“; ყანის-უბანი, „კანუბალ“. ერთის სიტყვით, მოგზაური აქ თვალს წყალს ვერ დააღვეინებს. მწარე მოგონება გულსა ჰშხამავს და ცეცხლს უკიდებს.

ბორჯომის ხეობას გამოსცდები თუ არა, თვალწინ აგეყუდება ოდესმე ძლიერი აწყურის ციხე, რომელიც საუკუნოებით დარაჯობდა ვიწრო ხეობას. ციხის გვერდით, შიგ შუაგულ გამაჰმადიანებულ ქართულ სოფელში, კიდევა სდგას უხარ-მაზარი ტაძარი, ხოლო სახურავ გადახდილი და ალაგ-ალაგ კედლებ ჩამოქცეული. ახალციხეს რომ უახლოვდები, ასე შეიდი-რვა ვერსიდგან, ს. წნისიდგან, დაინახავ საფარის მონასტერს, სადაც კაი ხანია რუსის ბერები დაბინავდნენ, რადგან ქართველებმა მოვლა-პატრონობა ველარ შესძლეს სილატაკის გამო. მონასტრის ზღუდეთა შორის მოსჩანს ერთად-ერთი კედელი, თლილის ქვით ნაშენი, ათაბაგების სამთავრო საზაფხულო სრა-პალატისა. ვინ იცის, იქნება ამ ხავს-მოკიდებულ და დაბზარულ კედლის სიახლოვეს იწერებოდა ბექასა და აღბულას მიერ სამცხე-საათაბაქოს უკვდავი კანონები! ევროპაში დიდებულ კაცთა ფეხსაცმელსაც მოწიწებით ინახავენ მუზეუმებში, მტვერი რა არის, იმასაც არ აკარებენ, ჩვენ კი ჩვენი კანონმდებლების მიერ აგებული პალატნი მინგრეულ-მონგრეული გვაქვს და, საუბედუროდ, ძალაც აღარ შეგვწევს პატრონობა გაუწიოთ. ბექასა და აღბულას სურათნიც ვერ შევინახეთ. ჯერ იყო და ახალციხის ბიჭ-ბუჭებმა თვალები ამოსჩიჩქნეს და შემდეგ

უვიცმა რუსის ბერებმა კირით შელესეს ვითომდა „ბლა-ლოლეპიის“ გულისთვის.

საფარისა და ათაბაგთა პალატის ნანგრევთა ხილვით გულნატკენი მგზავრი დარდის გადაყრას ვერ მოასწრობს, რომ უფრო სამწუხარო, გულ-სატკენს და სამგლოვიარო სურათსა ჰნახავს. ესაა სოფელი რუსთავი. ერი ამბობს, რომ აქ დაიბადა შოთა რუსთაველი, ესაა მისი სამშობლო სოფელიო. გული ნაღვლით აგვესება, როდესაც წარმოიდგენ, რომ პარნასის ღმერთთა სწორის, გენიოსი პოეტის სამშობლო არე-მარე ასეთ, ენით გამოუთქმელ, სიბინძურეს შეუპყრია. დღევანდელი რუსთავი ერთი უხვირო, ოთხ-ხუთ კომლიანი სოფელია, რომელსაც აწ-შვენებს მხოლოდ სასუქის უშველებელი ზვინები. რუსთავეში ბინადრობენ ქურთნი, თუ თარაქამანი, ადამიანი ვერას გაიგებს მათსას. მიწური სახლები ამ ყოველ კულტურას მოკლებულ ველურ ტომისა სულ მთლად ასახიჩრებს სოფლის სურათს. ქალნი და კაცნიც სოფლის შესაფერისნი არიან. იმდენი ქუქყი დასდებიან პირსა და სახეზე, რომ თითქოს დაწყვი-დაბადებიდგან იქვე ახლოს მოდუდუნე მტკერის წყალი მათ არ მიჰკარებიანო. ასეთია მათი სამოსელიც, დასტამალად ქცეული. დღეს შოთა რუსთაველის მომხსენებელნი ეს ქუქყიანი და პირუბანელი თარაქამა, თუ ქურთინები არიან!.. უბედურნი! სიზმრადაც არ მოვლანდებათ, თუ რა კაცის ნასახლარზე ბინადრობენ...

რუსთავი ტიტველა, ხრიოკ მთის კალთაზეა შეფენილი. წინ მშვენიერი პოხიერი ველია დაცემული. პატარაა, მაგრამ ლამაზი და ტურფა. ორი არ მეგულება ამისთანა მომცემი და ნაყოფიანი ველი მთელს ამ მხა-

რეს. მახსოვს, ერთხელ როგორღაც ქრისტიან მუსხელებს გამოველაპარაკე რუსთავის ველის შესახებ²⁾).

— კაცო, რა ღმერთი გაგიწყრათ, ძილი რომ ღმერთს გაუჩინია, განა მარტო ქართველებისთვის? რატომ თავისს დროზე თვალი არ გაახილეთ და ეს ნაღებივით მსუქანი ველი არ დაიჭირეთ? რუსთავის ველზე არ გერჩინათ დასახლება, ვიდრე აქ, მთასა და კლდეზე! განა რა ნახეთ სახარბიელო, რომ ცხვრის ფარასავით შეფენილხართ მწირსა და გატრუსულ გოხებსა და ხრიაკებზედ?

— ბატონო, ბარემ თვალი ჩვენც გვეკირა რუსთავის ველზედ, მაგრამ ვინ გვაღირსა! ჩვენი თავგადასავალი რომ იცოდეთ, მაგ საყვედურს აღარა ბრძანებთ. წინად, თათარი რომ გვეძალებოდა, თხუნელასავით სოროებში ვძვრებოდით, მზეზე გამოვსვლა უბედურებას გვაყენებდა. კოლშვილს ისე გეტაცებდნენ, როგორც ქორი წიწილებსა. იმ უბედურ დროს ქრისტიან ქართველს მხოლოდ კლდესა და ღრეში თუ შეეძლო სულის მობრუნება, თორემ შარა გზის პირას როგორ გაბედავდა ბინა გაეჩინა. რუსობა რომ შემოვიდა და აშკარად ქრისტიანობა დავიწყეთ, ვითხოვეთ რუსთავის ველი, მაგრამ ჩინოვნიკებმა უარი გვითხრეს.

რუსთავის პატარა ველზე ერთად-ერთი პატარა გორაკია, თითქოს განგებ აქ ვიღასაც მიწა დაუყრილა. სიმაღლით ორი-სამი საეენია, სიგანეც სულ ათიოდე საეენი ექმნება. სწორედ ზედ გამოქრილი ბეკია ძეგლისა-

²⁾ თუმცა კარგა ხანია, რაც ს. მუსხეში სკოლა არსებობს, მაგრამ არც მუსხელებმა იციან, ვინ იყო რუსთაველი. რა ნუხბი, განა სხვა ქართველმა სოფელმა კი იცის, ვინც იყო შოთა!..

თვის. აქ რომ შოთა რუსთაველს ძეგლი, ან ობელისკი დაედგას, მშვენიერება იქნება. ბეჟი მტკვარს ზედ თავ-ზედ დასცქერის, იქვე შარა გზაა, შოსსე, გამვლელ-გამოვლელი თვალს ვერ აარიდებს ძეგლსა, ისიამოვნებს იმ ფიქრით, რომ შვილნი უმადურად არ მოჰქცევიან სახელოვანს მამას და იმასაც ხომ გაივლებს გულში, რომ გავერანებული მესხეთი ოდესმე ბედნიერი ყოფილაო.

ნუ თუ დღევანდელი ქართველი ისე დაქინდა, ისე დაძაბუნდა, რომ მკირედი ფასის ძეგლიც ვერ მოუხერხებია შესანიშნავი პოეტისათვის? ერთმანერთის ძიძგნამ და ქორიკანობამ სული ამოგვართვა და განა დრო არ დადგა ერთსულად მოქმედებისათვის? იცოცხლეთ რომ დროა ზურგი შევაქციოთ ჩვენს დამღუპველს საეროვნოსენს, მაგრამ სადაა!..

ბოროტი დედი-ნაცვალივით ისტორიამ დიდად გვაწამა, მაგრამ რა უყოთ! ამბობენ, მშობელ დედას ყველაზე ძრიელ შვილებში მახინჯი და საზოგადოდ ქირსა, წვალემა და ტანჯვას გამოვლილი შვილი უყვარსო. ბრძენთა ნათქვამი მოვამბრუნოთ, ჩვენ დედად გადავიქცეთ და შევიყვაროთ ისტორია, როგორც მახინჯი შვილი. სიყვარული კიდევ როგორიც უნდა იყვეს, მსხვერპლს მოითხოვს. უამისოდ სიყვარულს სიყვარული არ ეთქმის. მაშ შეესწიროთ ისტორიის სიყვარულს მკირედი მსხვერპლი და აუგოთ შოთას რუსთავის ლამაზ ველზე პატარა ობელისკი მაინც!

რუსთავიდან ჯავახეთის შარა-გზას რომ გაჰყვებით, ხერთვისს ახვალთ. ხერთვისიდან ასე 18—20 ვერსის მანძილზე ვარძიაა. ამ დიდებულ მონასტერს წარსულისა ნასახიც აღარ ეტყობა. კლდეებში გამოქვაბულ მღვიმე-მალაროებს დღეს სამი, თუ ოთხი ქართველი ბერ-მონა-

ზონი შექვიზენია და შიმშილით იხოცებიან. ესეც საკმარისია იმის სათქმელად, თუ რა შევიწროებაშია და რა გაკირვებაშია ვარძიის მონასტერი. ასე გაშინჯეთ მტკვარზე ხიდიც ვერ გაუდღვიათ¹⁾, რომ მლოცველი და მოზილველი მონასტრისა უვნებლად წყალში გავიდეს, ნახოს ვარძია და ორიოდე გროში გაილოს თვისის სიუხვიდგან მონასტრის სასარგებლოდ „სულის საოხად და მოსახსენებლად“.

ან კი ვინ უნდა მოვიდეს ვარძიას, როდესაც გარს ქართველი საღვთისავეთ არ არტყია, ვინ უნდა ჩაჰბეროს მონასტრის გაყინულ კედლებს მხურვალე ლოცვასთან ერთად ცეცხლსავეთ აღგზნებული სული, ვინ მოიტანს სანთელს-საკმელს და საწირავს, რომ გავერანებულ მონასტერში ძველებურად სიკოცხლე ადუღდეს? ორ-სამს დაჩაგრულ ქართველთა სოფელს გარდა მონასტერს გარს შემორტყმია: თათარი, გამაჰმადიანებული და გაფანატიკებული ქართველი, აზრუმელი სომეხი, ქურთი, თარაქამა, ბოშა, ეზიდი, ანუ ეშმაკის თაყვანისმცემელი და სხვა ათასი მიღეთის ხალხი. ამბობენ, სამარიამობოდ, შორიდან ბერძნები რომ არ მოდიოდნენ სალოცავად, მონასტერს კარები გამოეკეტება.

¹⁾ მახსოვს, ამ ათიოდე წლის წინად ტფილისის განაენებულმა ვაჰარამა მიქელაძემ ხუთასი მანეთი უანდერძა ვარძიას ხიდის გასაკეთებლად. მაშინდელი ტფილისის ინტელიგენცია გოცდა ამ შეწირულობით. ვგონებთ, ეს პირველი მაგალითი იყო, რომ ქართველმა ნაწილი თვისის ქონებისა საერთო, საზოგადო საქმეს შესწირა და არა თავისს ნათესაებს, რომელნიც, ჩვეულებრივ, ნანდერძევს ორ-სამ წელიწადს მტკვრად აქცევენ ხოლმე. მაშინ გვეგონა, ახლა კი ღმერთმა მოგვხედა და სომხებისაგან ჭკუა ვისწავლეთო... ნეტა სადაა განსვენებულ მიქელაძის 500 მანათი?

გავკადნიერდებით და გიამბობთ ერთს შინაურს ამბავს. შარშან, შემოდგომის პირზე, რუსეთიდან ორი განათლებული მოგზაური: ჟუკოვსკი და მარკევიჩი ეწვია მესხეთს. ბარათი მომიტანეს ტფილისიდან თ. დ. ზ. მელიქიშვილისა, რომელიც მწერდა, — ჟუკოვსკი ჩემი კარგი მეგობარია და გთხოვ არ დაიზარო და მესხეთი აჩვენო. დიდ მწუხარებაში ჩამავლო ამ თხოვნამ. რა უნდავაჩვენო-მეთქი, ვფიქრობდი. რაც დარჩა მესხეთში, ან ჩვენი აღარაა, ან თუა ჩვენი, სულ მინგრეულ-მონგრეულია. ერი მაინც რომ დარჩენილიყო ჩვენი, კიდევ ჰო, მაგრამ, საუბედუროდ, ქართველობაც აღარაა. გზაში, რასაკვირველია, შეგვხვდებოდნენ ჩალმოსანნი მაჰმადიანნი, ან ბოხობ-ქუდიანი თარაქამები. ხომ ვერ ვეტყვადი ცნობის მოყვარე ტურისტებს, (მერე რა უღმერთონი არიან! ყველაფერს გაფაციკვებით ადევნებენ თვალსა, ყველაფრის კვლევა-ძიებაში არიან, ყვეოათრის გაგება და შეტყობა ჰსურთ ხოლმე!) — აი ესენი არიან თქვენი კარგი ნაცნობის, ტფილისის მარშლის, თავად მელიქიშვილის, თანამემამულენი-მეთქი!

ტურისტებმა მთხოვეს, ვარძიაში წაგვიყვანე, ბევრი რამ გაგვიგონია ამ შესანიშნავ გამოქვაბულ მონასტრისა და იმის ნახვა გვსურსო. გვიბრალა ღმერთმა და კოკის პირული წვიმა წამოვიდა, ორ დღეს აღარ გადაიღო. ვარძიას ვერ წავალთ, გადაკრით გამოვუცხადე დაღონებულ ტურისტებს, მტკვარზე ხიდი არაა, წვიმისაგან მტკვარი აღიდებულია და ფონშიაც ვერ მოვახერხებთ გასვლას. დაკმაყოფილდნენ ამ პასუხით, სათარა მოიარეს და ტფილისს დაბრუნდნენ. რომ მიმეყვანა ვარძიაში, სწორედ სირცხვილით დავიწვოდი, — ისეთს სიღარიბესა, სილატაკესა და აოხრებასა ჰნახავდნენ მოგზაურ-

ნი. მე კი ამგვარად გადავრჩი ეროვნულ მწვავე სირცხვილსა და თუ, მაინცა და მაინც, თავიდან ვერ ავიცილებთ ჩვენი სიბეჩავის და აოხრების გამოაშკარავებას, დეე სხვამ, ჩემზე ბედნიერმა, და, შეიძლება, ნაკლების ეროვნულის გრძნობით გამსკვალულმა ქართველმა იკისროს სამწუხარო მოვალეობა და უამბოს უცხო ტომის კაცს—თუ რანი ვიყავით გუშინ და რანილა ვართ ამჟამად.

ჯერ-ჯერობით მესხეთის დანარჩენ ნანგრევებს თავი დაეანებოთ და სხვა საგანზე ვიბაასოთ.

II

ვინც კი ღრმად ჩაუკვირდება ირაკლი მეორის ცხოვრებასა და მეფობას, უეჭველია, შეამჩნევს, რომ სახელოვანი მეფე დაადგა დაფლეთილ და დაწიწკნილ საქართველოს შეკრებასა და შეერთებას სწორედ იმ სახით, რა სახითაც მოკმედობდნენ რუსეთის დიდნი მთავარნი, ესრედ წოდებულნი რუსეთის შემკრებელნი. განსხვავება მხოლოდ ხერხსა და სახსარშია. დიდნი მთავარნი მოკმედობდნენ თავისის ძალ-ლონით, ნელ-ნელა, მაგრამ მედგრად მიდიოდნენ წინ და გზას არ უხვევდნენ. ირაკლის კი ჰსურდა სხვისი დახმარებით გაეკეთებინა ერთბაშად ისა, რაც საკუთარის ძალ-ლონით უნდა გაკეთებულიყო ნელა-ნელა და აუჩქარებლივ.

ამგვარად პოლიტიკური იდეალი ირაკლისა საქართველოს შეკრება იყო. მისი მეფობა მალე ქართლ-კახეთის შეერთებით გაბრწყინდა, მაგრამ ქართლ-კახეთს ჯერ კიდევ ბევრი აკლდა. კახეთს მტერმა ზოსწყვიტა კახი, საინგილო, ქართლს კიდევ მთელი მესხეთი. ეგები

ქართლ-კახეთს ეს ვარამი ღროებით მოენელებინა და აეტანა, მაგრამ არა ხერხდებოდა, რადგან, საუბედუროდ, მტერი სწორედ ამ ორი კუთხიდან ასმევდა საქართველოს სამსალას და შხამსა. ამისათვის ირაკლის მუდმივი ფიქრი და საზრუნავი ამ, მტრისაგან გატაცულ, საქართველოს სამკვიდროს დაბრუნება შეიქმნა. სამწუხაროდ, ირაკლის პოლიტიკური იდეალი ლიხის ქედს ვერ გადასცდა და კორტოხზე გაჩერდა. მისი ფიქრი ვერ შესწვდა დავით აღმაშენებელის ღროის გაერთიანებულ საქართველოს და როცა მარჯვე ღრო მიეცა — იმერეთიც შემოეერთებინა და მთელი მაშინდელი საქართველო თვის სიკბიტრას ქვეშ შეეკრიბა, ყოყმანი დაიწყო და უკან დაიხია. ამნაირად ირაკლის დარჩა მხოლოდ მცირედი პოლიტიკური იდეალი — გაერთიანება აღმოსავლეთის საქართველოსი და არა სრულიად საქართველოსა, რაც დღე და ღამ განუყრელ პოლიტიკურ ფიქრად და მისწრაფებად უნდა ყოფილიყო მაშინდელ საქართველოს გვირგვინოსნისათვის ⁵⁾).

რაკი ირაკლიმ ვერ მიაღწია თვისი ძალ-ღონით ვიწროდ შემოთარგლულ პოლიტიკურ იდეალის განხორციელებას, ჩრდილოეთის ბუმბერაზს დაუწყო ცქერა. რუსეთის დახმარებით ჰფიქრობდა ირაკლი განეხორციელებინა თვისი ვიწრო, მაგრამ მაინც საქართველოსთინ სახეირო იდეალი. ესაა უმთავრესი საგანი და დედა აზრი 1783 წელს დადებულის ტრაქტატისა, ესაა მიზეზი, რის გულისთვისაც ირაკლიმ ნებაყოფლობით ხელი

⁵⁾ Вь словах Иракліи. ამბობს ზურაბ ავალიშვილი, ახალციხის დაბრუნების გამო, звучить надежда на исполнение заветной национальной идеи. Присоединение Грузии... 33. 123.

აილო მრავალ სამეთო უფლება-პრეროგატივაზე და ვას-სალად გაუხდა რუსეთის თვითმპყრობელთ. პროფესორ ალექსანდრე ცაგარლის მიერ დაბეჭდილი რუსულ-ქართული დოკუმენტები მზესივით ნათელსა ჰქენს ამ მოსაზრებას. ჯერ ისევ 30 დეკემბერს 1771 წელს ირაკლი ატყობინებს იმპერატრიცა ეკატერინე მეორეს—თუ რა პირობითა ჰსურს მიიღოს რუსეთის მფარველობა. აქ, სხვათა შორის, აი რა სწერია: „ველად ვედრებით მოვახსენებ თქვენს ყოვლად მოწყალებასა, რათა ამავე გაზაფხულსა არ უტევონ დაუპყრობელად ქვეყანა ახალციხისა და უკეთუ შერიგება მოხდეს სულთანისა, მაშინაც გარეთ არ დარჩეს ქვეყანა ახალციხისა, ვინაიდგან საქართველოს შინა არის და ქართული ენა აქვსთ და მრავალნი ქრისტიანენი არიან იმათში და სხვანიც ახალნი გარდაქცეულნი არიან მაჰმადიანობაზედა“).

1772 წლის გაზაფხულზე ჰფიქრობდა ირაკლი ახალციხის დაპყრობას რუსების დახმარებით, მაგრამ იმედი გაუტრუვდა. დამთხვეულ და ბოროტ გრაფ ტოტლებენის და უნიკო გენერალ სუხოტინის წყალობით საქართველოში მყოფმა რუსის მხედრობამ ვერა გაარიგა-რა. საქმე ისე წაიყვანა ამ ორმა გენერალმა, რომ რუსები კი არ ეხმარებოდნენ ქართველებს ოსმალების გასადევნად, თვით რუსები საკიროებდნენ ქართველების შეწვენადან დახმარებას. ჯარი რომ სრულიად არ გაწყვეტილიყო, მთავრობამ იგი ლინიაზედ დაიბარა. გაზაფხულის პირს რუსის კორპუსი დაიძრა იმერეთიდგან და 1772 წ. აგვისტოს თვეს უკვე მოზღოკს მივიდა.

6) იხ. Грамоты и другіе историческіе документы, относящіеся до Грузіи, т. II, выпускъ I, стр. 83—84.

ერთხელ, ორჯელ, თუნდ სამჯერაც არაფერია იმედის გაცრუება იმისთანა კაცისათვის, რომელიც გატაცებულია რომელიმე დიადი საგნით. ასეთი ადამიანი, ფანატიკად გადაქცეული, ვერ მოისვენებს სიცოცხლის დასასრულამდე და სულ იმის ფიქრსა და ზრუნვაში იქნება, თუ როდის მიაღწევს საყვარელ აზრის განხორციელებას. ასე დაემართა ირაკლისაც, რომელსაც მესხეთის დაბრუნება, ანუ მისი ერთი ნაწილისა, სახელდობრ ახალციხისა, იდეა—ფიქრად გადაექცა.

სხვას ვერავის ანდო და პირობანიც ირაკლიმ გაუგზავნა იმპერატორიკას ბატონიშვილ ლევანის და კათალიკოზ ანტონის ხელითა⁷⁾. ეს საპატიო ელჩები დიდხანს გააჩერეს აქ, აშტრახანში, არც პეტერბურგში წასვლის ნებას აძლევდნენ და არც მიზეზს ეუბნებოდნენ, თუ რატომ არ უხსნიან პეტერბურგის გზას. უფრო დიდ გაკირვებაში იყო ირაკლი. შვილისა და ძმისაგან არაფერი ამბავი მოსდიოდა, არც არაფერს მთავრობა სწერდა ირაკლის კარზე მყოფ მინისტრ-პრეზიდენტს ი. ლ. ლვოვს. მეფეს მოთმინება გამოეღია და 16 მარტს 1773 წელს წერილი მისწერა გარეშე საქმეთა მინისტრს გრაფ ნ. ი. პანინს. წერილი ფრიად საინტერესო და საყურადღებოა. უმეტესმა მწუხარებამ გამაბედვინა თქვენი

⁷⁾ უდროოდ გარდაცვალებული ბატონიშვილი ლევანი მშენება იყო ირაკლის ოჯახისა. დიდი იმედი ჰქონდა ირაკლის ლევანისა და მისმა უდროოდ გარდაცვალებამ მეტის-მეტად მოუკლა გული ათას კირსა და ვარაშში მყოფს მეფესა. საქართველოს მზე ეხლა დაუბნელდაო, ამბობდნენ მახლობელნი მეფისა ლევანის გარდაცვალების გამო. კათალიკოსი ანტონი I, ძმა ირაკლისა, შესანიშნავი ღვთისმეტყველი და ფილოსოფოსი იყო.

შეწუხებაო, ბოდის იხდის ირაკლი პანინის წინაშე. ამოდენა ხანია ვაახელ იმპერატრიცას ძმა, კათალიკოსი ანტონი და ძე ჩემი, ბატონიშვილი ლევან და საქამოდესაც ვერ მივემთხვიე მოწყალების რეზოლუციასაო. ამის გამო გვედრება პანინს, დახმარება გაგვიწიე, რომ საქმე კეთილად დაგვირგვინდესო. ირაკლი იმასაც ატყობინებს პანინს, შვილისა და ძმის ამბავი არაფერი ვიცი, რადგან ასტრახანიდან გამოგზავნილი ლევანისა და ანტონის მიერ კაცი დაეკირათ ახალციხიდან დაღესტანს მიმავალ „ქურდ ლეკებს“.

საქმის დასაჩქარებლად ასეთ ამბავსაც ატყობინებს ირაკლი პანინს: „გვონებო, არა უმეცნიერნი იქმნებით, ვითარ ჟამითი-ჟამათ გვემატებიან ბარბაროსთა თესლთაგანნი, ქრისტიანობის ნათესაობის მტერნი და მარადის გვაყვედრებენ უგუნურობითა თვისითა წარმართნი, მეზობელნი ჩვენნი, რომ დაგდებული ვიქმნებით, რომელ ანათებს ყოველსა ქვეყანასა, რუსეთის ტახტისაგან, და წარმოგზავნილნი ჩემგან ძმა და ძე ჩემი იმყოფება საქამოდე ასტრახანს და შეწყნარებულიცა არ იქმნებიანო— ეთბამად ხედვენ ვითომ ვე იყოს მის ნიშანი“^{*)}.

ეტყობა, მეზობელ მაჰმადიანთა ხანები ნიშნს უგებდნენ ირაკლის, რომ რუსეთმა ჯერ ჩაითრია საქართველო თვის პოლიტიკის სფერაში და რაკი-ღა უკან დახევა აგრე ადვილი აღარ იყო, საქმეს აქიანურებდა და ელჩებს განზრახ ასტრახანში აჩერებდა. ასეთი შიშმა-მოთქმა მეზობელ ხანებისა, რომელთაც აგრე რიგად არ ეპიტნავებოდათ რუსების გაბატონება საქართველოში, დიდად აშფოთებდა ირაკლის და სწორედ ამ მწუხარები-

*) Грамоты, т. II, н. I. гв. 89--90.

სა და შიშის გამოხატულია წერილის უკანასკნელი სიტყვები, დიპლომატიის პილპილით შეზავებული.

ბოლოს, როგორც იყო, ელჩებმა მიაღწიეს უშუალოდ კარსაჲ. 27 აპრილს 1773 წელს მთავრეს პანინს მოხსენება, თუ რა პირობითა ჰსურს საქართველოს რუსეთის მფარველობა (ПОКРОВИТЕЛЬСТВО). დედანში ამ სიტყვებითაა გამოხატული ირაკლის ოცნება-იდეალი მესხეთისა და საინგილოს დაბრუნებისა: | -თუ კახეთის მამულები (ესე იგი საინგილო. ა. ფრ.), რომელიცა წართმეული აქვს, დაიპყრობს, იმათგანაც თვითოს გლეხის სახლითგან ათოთხმეტი შაური სახელმწიფოდ მიერთმეოდეს ყოველს წელიწადს და კვალად ორასი ფუთი აბრეშუმი... დიდის უქვემოესის ვედრებით ითხოვს (ირაკლი), რომ არ დაშთეს ამის უფრო გრძლად დაუპყრობელად ქვეყანაი ახალციხისა, რომელიც ჩვენი ადგილი იყო, და თუ შერიგება იქნება, (ამ დროს რუსეთს ოსმალეთთან ომი ჰქონდა), მაშინაც თურქის სახელმწიფოდ არ დაშთეს, არამედ გამოერთვას, რადგან საქართველოს მიწა არის და მრავალნი ქრისტიანენი არიან მას შინა, და ყოველს წელიწადს მძლავრებით მაჰმადიანად მრავალს გარდააქცევენ.

ეს მუხლი უპირობისაჲ ნათლად გვიჩვენებს, რა საწარტრელ საგნად გადაქცეოდა ირაკლის ახალციხის დაბრუნება.

ან კი ვინ დაუწუნებს ირაკლის ამ ოცნებას? რომელ ქართველს არ აუკენესდება გული ირაკლისავით დღესაც? ხუმრობა ხომ არ არის, ჰხედავდე, თუ როგორ უყოველს წელიწადს მძლავრობით მაჰმადიანად მრავალს გარდააქცევენ - და შეელა კი არ შეეძლოს? ჯერ მაგალითი არა ყოფილა, რომ ღვიძლის შვილის მოკვითა

ადვილი ასატანი ყოფილიყვეს რომელიმე დედისათვის. ჩრაკლის კი დედაზე მეტად უყვარდა თვისი პატარა საქართველო. ვისაც გამაჰმადიანებულ საქართველოში არ უცხოვრია, ის ვერ წარმოიდგენს იმ სევდასა და გულის კენესას, რასაც ახლად, შუაგულ საქართველოდან მოსული ჰგრძნობს მაჰმადიან ქართველის მაყურებელი. პანტა რა ხილია, მაგრამ მისი მოქრაც და წახდენაც სევდასა ჰგვრის ბუნების მოყვარე კაცსა და აქ კი მთელი მესხეთი, საქართველოს საუკეთესო ნახევარი, მაჰმადიანობამ სამუდამოდ მოჰკვეთა და მოსწყვიტა სამშობლოს. სარწმუნოებასთან ერთად მაჰმადიანობამ სული და გულიც ისე შეუცავლა ქართველს, რომ დღევანდელ მაჰმადიან ქართველს ვძულვართ ჩვენ, მისი სისხლ-ხორცი და სულ იმის ნატვრაშია, როდის იქნება მოგვშორდეს, გაგვეცალოს და გადიხეწოს შორს, ოსმალეთს, სადაც მხოლოდ ცივ სამარესა ჰპოულობს, მაგრამ მაინც სამოთხედ მიაჩნია ერთმორწმუნე ოსმალეთი. ირაკლის დროს მრავლად მაჰმადიანდებოდნენ ქართველნი. სულ რაღაც ასმა წელიწადმა გაიარა მას შემდეგ. მაჰმადიანდებოდნენ მესხნი მეცხრამეტე საუკუნის დასაწყისშიაც. თითო-ოროლას შერჩათ ნიშანი ქართველობისა—ენა-ამასაც ჰკარგავენ ჩვენ თვალ-წინ. მოხუცებულებს თუ ახსოვთ რაჲმ კიდევ ქართულისა, თორემ ყმაწვილ-კაცობამ სიტყვა აღარ იცის. მიუწდომელი სიმძლავრე გამოიჩინა ჩვენზე უცხო რელიგიამ, ამ, მასხარად აგდებულმა თანამედროვე მწერალთაგან ისტორიულმა ფაქტორმა.

ჰუნგართა ცხოვრებაში იყო ერთი ხანა, როდესაც კაცის მკვლელს სიკვდილით არა სჯიდნენ, თუმცა ასეთი სასჯელი იყო დაწესებული,—საეროვნო ბრძოლაში ავაზაკიც გამოგვადგებაო, ამბობდნენ ჰუნგარნი, რიცხვით

კოტანი ვართ და ყოველი მარჯვენა, თუნდ შებღალუ-
ლი კაცის მკვლელობით, ჩვენთვის საკირო იქნება გან-
საცდელის დღესაო. თუ ჰუნგარნი ასე უფრთხილდებო-
დნენ ავაზაკსაც კი, ირაკლის როგორ აეტანა და მოეთ-
მინა მაშინდელ ქართლ-კახეთის ოდენა საქართველოს
გამაჰმადიანება და სამუდამოდ დაკარგვა მესხეთისა? ეს
ხომ კიდევ იმის მომასწავებელი იყო, რომ საქართველო
თავის დღეში პოლიტიკურად ვერ მოღიანიერდებოდა და
სხვის ხელში ბურთივით სათამაშო უნდა ყოფილიყო.
მშრალ და უგემურის ენით დაწერილ დოკუმენტებიდგან
ნათლად იხატება მწუავი ფიქრი და აზრი ირაკლისა მეს-
ხეთის შესახებ. ეგ სულის ვითარებაა სწორედ მიზეზი, რომ
ირაკლი დაჟინებით თხოულობდა—შეეტანათ უსათუოდ
ტრაქტატში პირობა მესხეთის დაბრუნებისა.

ზურაბ ავალიშვილი საყვედურით აესებს ირაკლისა
და რუსეთსაც, — დიდი პოლიტიკური შეცდომა ჩაიდინ-
ეს, რომ მოკავშირეთ ეს მუხლი ტრაქტატისა საქვეყ-
ნოდ გამოაცხადეს, რადგან ამის შემდეგ საყიზილბაშო
და საოსმალო აშკარად გადაეკიდა ირაკლისაო^{*)}). მარ-
თალია, გამოცხადებით არ უნდა გამოეცხადებინათ მო-
კავშირეთ დასახელებული მუხლი ხელშეკრულობისა, მაგ-
რამ ჩაწერით კი უსათუოდ უნდა ჩაეწერათ მფარველო-
ბის პირობაში. უამისოდ რა ბედენა იყო ირაკლისთვის
1783 წლის ტრაქტატი? ტოტლებენის მოსვლამდე ირაკ-
ლი მშვიდობიანად სცხოვრობდა სპარსეთთან და ოსმა-

*) იხ. ზ. ავალიშვილი. Присоединение Грузии къ Рос-
сiи. стр. 147. „Объявлять о такихъ замыслахъ предъ ли-
цомъ всего свiта было грубой ошибкой со стороны зак-
лючавшихъ трактатъ“.

ლეთთან. ალა-მაჰმადის დროს სპარსეთი ცოტა მოცოცხლდა, ნაპერწკალსავეით იფეთქა, მაგრამ ეს აფეთქება წუთიერი იყო. როგორც ბურბუშელასავეით აპრიალდა, ისევე მალე ჩანელდებოდა. სუსტდებოდა აგრედვე ოსმალეთი. როგორც თავდაღმართზე დაგორებული ქვა, ისე მიდიოდა უკან-უკან ოსმალეთი მას შემდეგ, რაც რუსეთმა ომიანობა დაუწყო. მაშასადამე, ირაკლი ავად თუ კარგად, ორთავე მეზობელ მაჰმადიანთა სახელმწიფოს თავისი ძალღონით გაუძლებდა და თუ მაინცა და მაინც რუსეთს ხელშეკრულობით შეეკრა, მხოლოდ იმისთვის, რომ მტრისგან მოწყვეტილის საქართველოს მამულდებული დაებრუნებინა.

„უმთავრესი აზრი 1783 ტრაქტატისა ისააო, — ამბობს ზ. ავალიშვილი, რომ საქართველოს მოეპოვებინა საშუალება და საღსარი სპარსეთის მოსალოდნელ შემოსევის წინააღმდეგ, შემოსევისა, რომელიც უსათუოდ მოხდებოდა, რაკი სპარსეთი სულს მოითქვამდა და იშოვიდა იმისთანა ბატონსა და მბრძანებელს, ვისაც ძალა შესწვდებოდა აღედგინა სიძლიერე ირანისა და განევრცელებინა სფერა წარსულის გავლენისა“. ეს აზრი პატევკემულ ავტორისა არ ეწინააღმდეგება ჩვენ მიერ ზემოდ აღნიშნულ მოსაზრებას, რომ ირაკლის ტრაქტატისა და რუსების შემწეობით ჰსურდა დაებრუნებინა საქართველოსთჳინ მისი სამკვიდრო. ირაკლის თვისი იდეალი რომ განეხორციელებინა, „სპარსეთის მოსალოდნელი შემოსევა“ კი არა, თვით ნამდვილი თავდასხმაც არ შეაძრწუნებდა. შეკრეფილ საქართველოს ძალღონით ირაკლი ადვილად მოიგერიებდა მოსეულ მტერს და ექვს გარეშეა, რომ მეფე-მეომარი არეზამდისინაც მივიდოდა. საქმე სანახევროდ გაკეთებული იყო, ერევანი და განჯა

ხარკს აძლევდა საქართველოს და საქმეს მხოლოდ დაგვირგვინება აკლდა, მაგრამ ჩარხი სხვანაირად დატრი-
ალდა.

ათ წელიწადზე მეტმა გაიარა „პირობათა“ დაწერის შემდეგ და მხოლოდ 24 ივლისს 1783 წ. დადებულ ტრაქტატში ამ სახით აღიბეჭდა სურვილი მეფე ირაკლისა: „არტიკული მეოთხე სეპარატისა. დიდებულება იმპერატორებისა მისისა აღჰსთქვამს, რათა დროსა ბრძოლისასა იხმარომსცა ყოველი შემძლებლობაჲ მეცადინეობისა ღონითა საქურუპლისათა, ხოლო დროსა მშვიდობისასა დაზავებისა მიერ უკოპცევისათვის ქუცყანისა და ადგილითა მტერთაგან ქონებულთა და ძუძლადვე სამეფოჲსა მიმართ ქართლისა და კახეთისა შერაცხილთა ესენი უკუც დაჰშთებიან სამფლობელოდ მუნებურთა მეფეთა საფუძუპლისა ზედა თქმულთა ჰაზრთასა, რომელნიცა ითქუნენ მფარუპლობისათჳს და უზენაესისა ხელმწიფებისა ყოველისა რუსეთის იმპერატორთა“¹¹⁾).

აზრი ამ უცნაურის ენით დაწერილ არტიკულის (მუხლი) მეოთხე სეპარატისა (კერძო) ისაა, რაზედაც ზემოდა გვექონდა საუბარი. რუსეთის თვითმპყრობელი აღთქმასა სდებს, რომ ბრძოლის დროს ყოველ ღონესა

¹¹⁾ იხ. Грамоты... т. II, н. I, გვ. 109.

¹²⁾ 1783 წლის 24 ივლისის ტრაქტატში ირაკლის ტიტული ასეა მოყვანილი: „ბეჰკვიდრე ხელმწიფე და მფლობელი ირაკლი მეორე წყალობითა ღვთისათა და თქუჩნის იმპერატორების დიდებულების კეთილ-ნებობითა ზეჲ ქართლისა, კახეთისა, შემკვიდრე მფლობელი სამცხე-საათაბაგოსი, მთავარი ყაზახისა, მთავარი ბორჩალოსი, მთავარი შამშადილისა, მთავარი კაკისა, მთავარი შაქისა და მთავარი შირვანისა, მფლობელი და მბრძანებელი გახჯისა და ერევნისა. ibid. გვ. 100.

და მეცადინეობას იხმარს იარაღის შემწეობით დაუბრუნოს საქართველოს მისივე სამკვიდრონი, ე. ი. სამცხე-საათაბაგო და სხვანი. მშვიდობის და ზავის შეკერის დროს კიდევ მოვალეა დიდად ეცადოს და დაუბრუნოს საქართველოს მტრისგან მოტაცებული ქვეყნები¹¹).

ანკარა წყაროსავით სუფთა ქართული ენა შოთასი და ვისრამიანისა, მეთვრამეტე საუკუნეში, სქოლასტიკის წყალობით ისე აირ-დაირია, რომ ყოველი ლაზათი და სიკეთე დაჰკარგა. ტრაქტატის ენა იმდენად ტლანქი და ბუნდოვანია, რომ უბრალო მომაკედავი ვერას გაიგებს, ძალიანაც რომ უნდოდეს მისი გაგება. კათალიკოზ ანტონ პირველმა საქართველოს თავზე მოახვია რუსეთში გაბატონებული სქოლასტიკა და ამით მეტი-მეტად გააუგემურა ტკბილი, მოხდენილი, ძალოვანი და თასმასავით მოქნილი ქართული სამწიგნობრო ენა. ნიმუში გადამახინჯებულ და შებღალულ ქართულ ენისა ზემოდ მოყვანილ ტრაქტატის ნაწყვეტია. პროფესორი ა. ცაგარელი ჰფიქრობს, რომ ტექსტი ტრაქტატისა დაწერილია რუსულად და შემდეგ ნათარგმნი ქართულად.

III

ირაკლის ნატვრა აღსრულდა. ტრაქტატში ჩასწერეს — რუსეთი პირობასა სდებს, რომ საქართველოს დაკარგულ ქვეყნებს დაუბრუნებს, მაგრამ ქალაღზე აღნიშვნა საქმისა სხვაა და მისი განხორციელება კიდევ სხვა — შუა უზის დიდი ზღვარი. ზურაბ ავალიშვილს რომ ჰკითხოთ, 1783 ტრაქტატი დაწერილებითი განხილვის ღირსი არ არის, რადგან უმთავრესის თვისის ნაწილებით ტრაქტატი ცარიელ სურვილთა და სიტყვათა რახა-

რუხი აღმოჩნდა, რომელთაც განხორციელება არ ეღირსათო (12). ირაკლი სიცოცხლეში ტფილისის აოხრებას კი მოესწრო, მაგრამ მტრისგან მოწყვეტილ საქართველოს მამულის დაბრუნებას ვეღარა. მისი ნატვრა ასრულდა სიკვდილის შემდეგ, როდესაც საქართველომ თვისი დამოუკიდებელი პოლიტიკური არსებობა დაასრულა და რუსეთს შეუერთდა.

ირაკლის ღალადისი და გოდება, რომ ახალციხის ქრისტიანებს ყოველს წელიწადს ზმძლავრებით მაჰმადიანად მრავლად გარდააქცევენოა, სრული კეშმარიტება იყო. მეცხრამეტე საუკუნის დასაწყისს სამცხე-საათაბაგოში ქრისტიანი მართლმადიდებელნი ხილულად და აშკარად აღარ მოიპოვებოდნენ. აქა-იქ ძლივს-ღა კივი-ვობდა თითო-ორიღა მართლ-მადიდებელი, რომელნიც მალულად წმინდა საიდუმლოებას ღამ-ღამობით მიიღებდნენ ერის კაცის ტანისამოსში გამოწყობილ მღვდელთაგან, ან კიდევ ქრისტეს შობას ღღესასწაულობდნენ ღორის ხორცის ნაჭრის მიღებით, რომელიც იმავე ერის ტანისამოსიან მღვდლებს სოფლიდან სოფლად ხურჯინებით დაჰქონდათ თავიანთ მრევლისთვის. ვინ მოიფიქრებს, რომ ასეთი დაჩაგვრა ქართველისა სულ რაღაც სამოცდა ათის წლის წინად ხდებოდა! ბევრს სიზმრად, ზღაპრად მოეჩვენება, მაგრამ სრული კეშმარიტება და სინამდვილე კია.

ღხენასა და ფუფუნებაში არც ქართველი კათოლი-

12) რუსულად: "... болѣе подробнаго размошрѣнiя трактать эшотъ не заслуживаетъ, такъ какъ, въ самыхъ главныхъ своихъ частяхъ оказался сочетанiемъ словъ и желанiй, не увидѣвшихъ своего осуществленiя". сб. Присоединенiе... გვ. 139.

კენი ბრძანდებოდნენ. მეთვრამეტე საუკუნეში ამათ წირვა ლათინურად ჰქონდათ, რომის ეკლესიის წესსა და რიგს მისდევდნენ. კვიანი და განათლებული რომის მისიონერნი და პატრები თავის დროზე შეეცადნენ და ქართველ მრევლისთვის ნება-რთვა აიღეს ჯერ ისევ 1757 წელს წმინდა კონგრეგაციისაგან, რომ სახარება და სამოციქულო წაეკითხათ „სამშობლო ქართულ ენაზედაც“. რაღა თქმა უნდა, რომ შორს გამკვერეტელმა კონგრეგაციამ კაპუცინის ორდენის მისიონერებს ხელი არ შეუშალა ამ სასარგებლო სურვილის განსახორციელებლად. სახარებისა და სამოციქულოს გარდა ეკლესიაში ჰსუფევდა აგრედვე ქართული გალობა. ოსმალოს მთავრობა მტრის თვალთ უყურებდა ლათინურსა და ქართულს წირვა-ლოცვას. ლათინური ევროპას აგონებდა, იმ ევროპას, რომელმაც არა ერთხელ წელში მოხნიქა ოდესმე ქედ-მაღალი ოსმალეთი, ქართული კიდევ შეუპოვარ გურჯისტანს, რომლის სრულიად დამხობა შეადგენდა მაჰმადიან ოსმალეთის პოლიტიკის და დიპლომატიის ანაბანას. ამისათვის გააფთრებულმა და გააღმასებულმა ოსმალეთმა სასტიკად დაუწყო დევნა ლათინურ და ქართულ ენაზე წირვა-ლოცვას და ღვთის მსახურებს. სომხური ენა კი მიჩნეული ჰქონდათ მაშინდელ ოსმალებს, სომხებისა არ ერიდებოდათ და დიდის თავაზიანობით ეკიდებოდნენ თვით სომხეთის ერსა *). წყვეტა, ელეტა და აოხრება სომხეთის ერისა დაიწყო მხოლოდ მეცხრამეტე საუკუნის მოერე ნახევრიდგან, როდესაც სომხო-

*) მწარე დღენი სომხებს წანადაც ბევრი უნახავთ, მაგრამ ეს ხდებოდა ხანდახანობით და არა სისტემატიურად, როგორც მე-XIX საუკუნეში.

ბამ გამოიღვიძა, მოითხოვა ეროვნული უფლებანი და ევროპას შეატყობინა — დიდ გაქირვებაში ვართ და პატრონობა გაგვიწიეო. ოსმალეთმა თვალები გააქყიტა, — ეს რა დაუძინებელი მტერი მყოლია შინაო. ევროპას პირობა მისცა — რეთორმებს შემოვიღებ სომხეთშიო და ამავე დროს თავისებურად დაიწყო პოლიტიკურ საგნის გადაწყვეტა. „თავისებურობა“ ოსმალეთისა ყველას მოეხსენება, რაშიაც მდგომარეობს. ოსმალეთმა სომხებს გააგებინა, აუტყვიარ თავს არ აფიქცივებ, ან მაჰმადიანობა მიიღეთ, ან დედა-ბუდიანად გაგაქრობო, ესე იგი ფიზიკურად არსებობას მოგისპობო. მოგეპყრობი სწორედ ისე, როგორც ვეპყრობოდი ქართველობას მესხეთშიო. სომხობამ ზოგმა მიიღო მაჰმადიანობა, მაგრამ უფრო ბევრმა არ უღალატა მამა-პაპურ სარწმუნოებას. უარის თქმას ენით გამოუთქმელი ამბები მოჰყვა. ანატოლიის სომხობა წიწილებივით ისრისება, ვინც მახვილს გადურჩა, გულგახეთქილი სამშობლოდგან სხვაგან გარბის. ამ ჟამად ანატოლიაში ისე მცირეა სომეხთა რიცხვი, რომ მათი ბედის საქმე პოლიტიკის საგნად იქნება ველარც კი გახდეს. ისტორიული სომხეთი დღეს თითქმის გეოგრაფიულ ტერმინად გარდაიქცა. ბედის სიმუხთლევ და ცვალებადობა სომხებმაც გამოსცადეს.

ასე არ იყო მეთვრამეტე საუკუნეში. მესხეთში რომ კოკის-პირულად ქართველთა სისხლი იღვრებოდა და ქართველთა მარტო სახელიც კი ზიზღსა და ბოროტებას უსახავდა გულში ოსმალოს, სომხობა განცხრომითა სცხოვრობდა და მოქალაქობდა. პატივს არც მესხეთში იყვნენ მოკლებულნი სომხები. თავისუფლად სწირავდნენ და ლოცულობდნენ სამშობლო ენაზე. დამშლელი არავინა ჰყავდათ.

ოსმალოს თვალის ასაბმელად და ქრისტიანობის დასაცველად ქართველ-კათოლიკეთ განიძრახეს შემოეღოთ წირვა-ლოცვა სომხურ ენაზე. სომხურად მლოცველი ქართველი-კათოლიკე თამამად ეტყოდა გამძვინვარებულ ოსმალოს, რა გინდა, დაწუნარდი, ხომ ჰხედავ, აღარც ლათინი ვარ და აღარც ქართველიო. მართლაც ამ დიპლომატიურმა ხერხმა გასკრა, ქართველ კათოლიკეთ შეინარჩუნეს ქრისტიანობა, მაგრამ დღეს ლამის ეროვნობა და ქართული ხალხოსნობა დაჰკარგონ. თუ სკოდნოდათ მაშინ, რომ გულუბრყვილო დიპლომატიური ხერხი მატლად გადაექცეოდათ, რომ პავლე და იაკოფი პოლოსად და აკოფად გადინათლებოდა, შესაძლებელია, რომ მაჰმადიანობაზე უარი არ ეთქვათ და სახიფათო, კისერმოსატეხ დიპლომატიისთვის არ მიემართნათ. ერთმა არღელმა, ესე იგი ს. არლიდან, ქართველ-კათოლიკე „ტიტია“ მალვენ თათეოზოვმა (იგივე თომაშვილი) ასეთის მარილიანი ქართულით დაასურათა ზემოდ მოხსენებული ისტორიული მომენტი: „თათარი სომეხს არ ერჩოდა“, და ჩვენ მამა-პაპათ იმისათვის მიიღეს სომეხ-კათოლიკეთა აღსარებაო.

მეცხრამეტე საუკუნის დასაწყისს, როდესაც რუსის მთავრობა დამკვიდრდა ქართლ-კახეთს, მესხეთს ქართველობისა აღარა ეტყობოდა-რა. მაჰმადიანობამ საესებით თვისი სუდარა გადააფარა დიდებულ მესხეთს, მამა-კაცს ქუდი ჩალმით შეუცვალა და დედა-კაცი ბოსლებში ცხრაკლიტით დაჰკეტა, ქალაქი ახალციხე კიდევ მხევალთა და მონათა უმთავრეს ბაზრად გახდა. იგივე მეცხრამეტე საუკუნე ეუდ ვარსკვლავზე დაებადათ ოსმალებს. წინად თუ ევროპელნი დასავლეთიდან ნაფლეთ-ნაფლეთად სტაცებდნენ ოსმალეთს დიდების დროს დაპყრობილ ქვეყ-

ნებს, ამ საუკუნის დასაწყისში რუსეთმა აღმოსავლეთით მიჰყო ხელი და ხანდახანობით ლუკმა-ლუკმა სტატიებს ჯერ ძველ საქართველოს ნაწილებს და შემდეგ ვინ იცის რომელ ისტორიულ ერის სამკვიდროს დაიპყრობს. ეს პროცესი ოსმალეთის დაგლეჯა-დაფლეთისა ჯერაც არ შეჩერებულა და არ დასრულებულა.

15 აგვისტოს 1828 წელს გრაფმა პასკევიჩმა შემუსრა ოსმალთს ჯარი ახალციხისა და სოფელ კლდეს შუა: ლორის ხორცის ქამია რუსების გაბატონება არ ეპრიანათ ოსმალთს მოხელეებს და გამაჰმადიანებულ ქართველობას მოღების, ამ ყოველად უვიცი და განუვითარებელი სამღვდელოების პირით, შეუთვალეს: ავიყარნეთ და ფადიშაჰის სამფლობელოში გადავსახლდეთო. ორი წლის განმავლობაში მრავალი გამაჰმადიანებული ქართველი გადიხვეწა მცირე აზიაში. ეხლანდელი ჯავახეთი და ახალციხის მაზრა მთლად გატიალდა და გავერანდა. უგლებ-კაცოდ დარჩენილ ქვეყანას გრაფმა პასკევიჩმა მალე უშოვნა მუშაკნი. აზრუმიდგან 100,000 სომეხი (გრიგორიანი და კათოლიკე) გადმოასახლა კარაჰქეტა ეპისკოპოზის წინამძღოლობით. სახლკარის მოსაწყობად და ბინის მოსაკიდებლად პასკევიჩმა იმპერატორ ნიკოლოზს ერთი მილიონი მანათი გამოსთხოვა გადმოსახლებულთა შესაწევად¹³⁾. გამაჰმადიანებულ ქართველთაგანი, ჯერ ისევ წმინდად ქართულად მოლაპარაკენი და მობაასენი, ვინც დარჩა სამშობლოში, ისინიც

¹³⁾ იხ. Е. Г. Зловъ. Спошения Петра Великаго съ Армянскимъ народомъ, გვ. СXXXVIII და СXXXIX. 1828—1830 წლებში გადმოსახლდა 14.000 სახლობა, სადაც ითვლებოდა 90,000 სული და ორი სომხის არქიელი. დამკვიდრდნენ იგინი ჯავახეთსა, გუმბრსა და ახალციხის მაზრაში.

მთავრობამ შეცდომით „თათრებად“ აღიარა¹⁴). ასე
ნელ-ნელა და სისტემატიურად ისპობოდა დიდებულ მეს-
ხეთში ქართველის სახსენებელი.

ყირიმის ომის დროს (1853---1854 წ.) ოსმალეთმა
ერაზხელ კიდევ სცადა ბედი და მოადგა ახალციხეს, მაგ-
რამ თავად ანდრონიკაშვილმა სასტიკად დაამარცხა ოს-
მალოს ჯარი სოფელ სხვილისთან (ეხლა დამახინჯებუ-
ლია სახელი ამ სოფლისა და ეძახიან სუფლისს)! ამის
შემდეგ, ვგონებთ, სამუდამოდ დაეკარგა ოსმალეთს იმედი
ახალციხის დაბრუნებისა. სამწუხაროდ, მცირედად დარ-
ჩენილ გამაჰმადიანებულ ქართველებმაც (ახალციხის მაზ-
რაში მაინც იგინი სქარბობენ სხვებს) სამუდამოდ ამოი-
რეცხეს გულ-დგან სამშობლოს სიყვარული და ბაწარ-
ალებით გარბიან ოსმალეთისკენ.

ოსმალეთის ორის საუკუნის ბატონობამ (1626 წლი-
დგან 1828 წლამდე) წარუხოცველი დაღი და ბეკედი
დაასვა მესხეთს. მკვიდრთაგანი ვინც კი დარჩენილა, ისე
დაბეჩავებულა, რომ მომეტებული სიბეჩავე ისტორიუ-
ლის ერისა ძნელი წარმოსადგენი-ლა იყო. სად აქარე-
ლი, თამამი, გამბედავი, მკვირცხლი, როგორც გურული
და სად აქაური, დაფლეთილ-დაბრანძული სამცხე-საათა-
ბაგოელი მკვიდრი¹⁵! როგორც მესხმა ოსმალოს გავლენ-
ის წყალობით ფერი და იერი იცვალა, ისევე შეიცვა-
ლა გარეგანი სახე ქვეყნისა. სანაქებო ვენახები სულ

¹⁴) იხ. Г. А. Вейденбаумъ. Кавказскіе Этюды. I, 33. 121.

¹⁵) აქარა შინაურ გამგეობაში თითქმის დამოუკიდებელი იყო. მამაცი აქარელი ქედს არ იხრიდა ოსმალოს წინაშე და იარაღით იცაედა თავისუფლებას. ესაა მიზეზი, რომ ენაც წმინდად შეინახა და ქართული ხნე-ჩვეულებაცა, დაკარგა მხოლოდ სარწმუნოება.

ამოვარდნილა და გადაშენებულა. მიწაში ჩაფლული ქვევრები და ქვიტკირის საწნახელნი-ლა ჰმოწმობენ, რომ აქაურ ქართველობასაც ძველად დანარჩენ ქართველებსავეთ კამკამა „უნუნათი“ ჰყვარებიათ ყელის ჩასველება და გულის გაგრილება. ძველი ჯავახეთი ტყით ყოფილა დაბურული, დღეს კი ისეა მოტრუსული, რომ ჩირგვი, ან ფშატი რა არის, ისიც კი არსად მოიპოვება, რომ ზაფხულის სიცხე-პაპანაქებაში კაცმა თავი შეაფაროს და მოიჩრდილოს. ძველად ტყე ისეთი ხშირი ყოფილა, რომ მაღალი ტანის ეკლესიებს ჰფარავდაო, რასაც ჰმოწმობს სამსარის გადმობრუნებულ ქვის წარწერა¹⁴⁾. ჯავახეთის დაბურული ტყეები აზრუმიდგან მოსულ სომხებს გაუკაფავთ. აზრუმში შეშას დახამებულნი ონავარ ფუტკარსავეთ მისევიან ტყეს და მკირეს ხანს სულ ძირს დაუციათ და როცა სულ გაანადგურეს, პურის გამოსაცხობად და საქმლის მოსახარშად ისევ მამა-პაპეულ ჩვეულებას მიჰმართეს, ესე იგი წივას.

მესხეთს დაძაბუნება ჯერ ისევ ირაკლის დროს შემჩნევია. მეფე ერეკლეს ბრძანებით აღწერიათ მოკლედ 14 ივნისს 1796 წელს ქვეყნები, რომელიც ქართლ-კახეთს გარს ეკრა. აღბად ეს აღწერილობა რუსის, მთავრობას თუ მიართვეს. აღწერილობაში ახალციხე ასეა დახატული: „ახალციხის ქვეყანა, რომელიც არის ქართლის ერთი ნაწილი, უკირავს ახლა ხვანთქარსა ძალითა და არიან გამაჰმადიანებულნი და ადგილ-ადგილ მცირედნი ქრისტიანენიც იპოვებიან, და ჰქვიან ადგილსა ამას საათაბაგო: აქა ზის ვეზირი სამ თულიანი და არს შემძლებელ თავისავე ადგილში ხუთის ათასის მეომრის

¹⁴⁾ იხ. Ив. П. Ростововъ. Ахалкалакскій уѣздъ, გვ. 99.

კაცის გამოყვანისა, მაგრამ ჯაბანნი და შეუბეღავნი არიან ომსა შინა¹⁷⁾. ეტყობა ნეთვრამეტე საუკუნეშივე გამქრალა ძველებური ვაჟკაცობა და სიღარბაისლე მესხისა. ოს¹⁷ალეთის სტიქიონურმა ძალმომრეობამ მოსპო და გაანადგურა ერთიცა და მეორეც. პოლიტიკურ თავისუფლებას მოკლებული მესხი და ბორცის ბატონის ხელშემატქერალი დაბეჩავედა, დაგლახაჲდა, ზოგი არსებობისათვის ბრძოლაში გაწყდა და ვინც გადარჩა, გახდა „მონა მზაკვარი“, როგორც იტყოდა ხოლმე ნეტარ ხსენებული „ვიცე-კანცლერი“ საქართველოს მეფეთა: ირაკლისა და სოლომონისა სოლომონ ლეონიძე.

დიდებულ მესხეთის ნასუფრალს რომ თავი ერთად მოუყაროთ, ხელს ეს-ღა შეგვრჩება. ეხლანდელ ჯაგახეთსა და ახალციხის მაზრაში სულ ქართველ-კათოლიკეთა რიცხვი 1901 წელს იყო 6408 სული ორთავე სქესისა. ქართველ-კათოლიკენი, რაღა თქმა უნდა, წმინდა ქართულის ენით ლაპარაკობენ, მხოლოდ საშინლად შეუბღალავთ წმინდა ქართული სახელები და გვარები სომეხ-კათოლიკეთა ეკლესიის აღსარების ზედგაველენით.

ზოგ ქართველ-კათოლიკეთა სამრევლოს მოძღვარი ჰყავს მკვიდრი სომეხი, რომელთაც ჩიქორთული ქართული მრევლში შეუესწავლიათ. წირვა-ლოცვა და დანარჩენი ღვთის-მსახურება სომხურადაა. ოფიციალურად და სხვა საბუთის ქალაქებში იწერებიან ასე: სომეხ-კათოლიკე. ეს ოფიციალური ტერმინი აღმნიშვნელია ქართ-

¹⁷⁾ იხ. Грамоты... А. Цагарели, т. II, в. I, გვ. 8. ეს საყურადღებო მოკლე აღწერა საქართველოს მეზობელ ქვეყნებისა ქართულადაცაა და რუსულადაც. რუსული ტექსტი გრამატების პირველ ტომშია დაბეჭდილი.

ველ-კათოლიკეთა სარწმუნოებისა, ანუ აღსარებისა, მაგრამ, სამწუხაროდ, სარწმუნოების აღმნიშვნელი ტერმინი ეროვნობისა და ხალხოსნობის აღმნიშვნელად გარდაიქმნა. მდაბიო ქართველ-კათოლიკს რომ ჰკითხავ, ვინა ხარო? გიპასუხებთ—სომეხ-კათოლიკეო. თუ წყრომისა, ან გაჯავრების კილოთი ჰკითხე, რას მიედ-მოედები, მამაპაპით ქართველი იყავ და სომხად როგორ გადაკეთდიო, მორცხვი პატარძალივით თავს ჩაღუნავს და მოკრძალებით გიპასუხებს: დიად, ამბობენ, რომ წინად ჩვენი მამაპაპანი ქართველები ყოფილანო. ქართველ-კათოლიკეთა მოძღვართა სახელებს წინ უძღვის სიტყვა „ტერ“ და მათი სახელები ასე გამოითქმის: ტერ-პოლოსი, ტერ-პეტროსი და სხვა.

ქართველ-კათოლიკენი დასახლებულნი არიან შემდეგ ადგილებში: ქ. ახალციხის ძველ ნაწილში, რომელსაც ძველადგანვე „რაბათს“ ეძახიან. რაბათის ზემო ეკლესიის მრევლი 529 სულია, რაბათისავე ქვემო ეკლესიისა—665, ივლიტისა—306. არის კიდევ რაბათის რომის კათოლიკეთა ეკლესია, რომელსაც განაგებდნენ პატრები და დღესაც ამ ეკლესიას განაგებს ქართველი პატრი, მამა ლაზარე გოზალაშვილი¹⁸⁾.

¹⁸⁾ ქართველ-კათოლიკეთა რაოდენობის ცნობა გადმოგვცა მამა ლაზარე გოზალაშვილმა. ახალციხისა და ახალქალაქის მახრებში არიან კიდევ კათოლიკენი, ზოგი ტომით სომეხი, ზოგი კიდევ ქართველი ჩამომავლობისა. უკანასკნელთ (ველელებს) არც სომხური იციან, არც ქართული, ლაპაოაკობენ ოსმალურად. იგინი გადმოსახლდნენ ს. ველიდან, არდაგანის ოლქიდან. სოფელნი: ხულგუმო, ტურსხი, კულიკამი და კართიკამი ამ ველელებითაა დასახლებული.

მრევლი მცირე ჰყავს პატრების ეკლესიას: ახალციხის მაზრის შემდეგ სოფლებში ბინადრობენ ქართველ-კათოლიკენი: 1) ვალე—750 სული. აქავე სცხოვრობენ; აგრედვე მართლ-მადიდებელნი ქართველნი და ქართველი-მაჰმადიანნი. 2) უდე—1562 სული. აქაც სცხოვრობენ ქართველი-მაჰმადიანნი. ქართველ-კათოლიკეთა მოძღვარი და ქართველ-მაჰმადიანთა მოლა ერთის გვარისანი იყვნენ ერთ დროს. 3) არალი—657 სული; 4) ბოლაჯური—58, უმრავლესობა ამ სოფლისა ქართველი-მაჰმადიანია. 5) ბნელა—42 სული. ჯავახეთში, ანუ ახალქალაქის მაზრაში, სულ ორი სოფელია, სადაც ქართველ-კათოლიკეთა ბინა შერჩენიათ და სადაც სუფთად ლაპარაკობენ ქართულად: 1) ხიზაბავრა—1698 სული და 2) ვარგავი—141, სულ მაშასადამე 6408.

მრავალი ქართველ-კათოლიკე ჩანთქა უღმობელმა ისტორიამ; ბევრიც წარსულს საუკუნეს გადაიხვეწა სტამბოლს, ტფილისს, ქუთაისს და ბათუმს. ასე რომ ნაშთი ქართველ-კათოლიკეთა სულ ეგ 6408 სული ორივე სქესისა გახლავთ. ამ მცირე ნაშთსაც ბ-ნი სარუხანა გვედავება—ეგენი მუდამ გვარ-ტომობით სომხები ყოფილან და დღესაც სომხები არიანო. თვით ბ-ნი სარუხანა ერისკაცია, ტომით სომეხი, სარწმუნოებით სომეხ-გრიგორიანი, ხელობით, კარგად არ ვიცით, ვაქარია, თუ ნოქარი. საოცარი აქ ისაა, რომ თითქოს არც ხელობა და არც წოდება ხელს არ უწყობს ბ-ნ სარუხანას ლიტერატურაში საეროვნო, ან საეკლესიო კითხვების ძიება-გამოკვლევას მისდევდეს, მაგრამ რას იზამთ. უჯობს და ლაპარაკობს. ბევრს ედავა თამამ ჰუმბლიცისტს ა. ხახანაშვილი, დაუმტყიცა სიყალბე საბუთებისა, ისიც კი გამოჰძებნა ხახანაშვილმა ბ-ნ სარუხანას, რომ ისტორიულ

დოკუმენტების წაკითხვის შნო და უნარი არა. გკონიანო, მაგრამ რა. ხახანაშვილის. დავას პრაქტიკული ნაყოფი არა მოაქვს-რა. ბ-ნი სარუხანა მეტის-მეტი გულქვავი და მკაცრი აღმძიანი ყოფილა. მისი საქრელი ასეთს სურათს მაგონებს: იყო მეფე სვიანი, მძლავრი და კეთილი, პორტირითა, ძვირფასი სამკაულით და გვირგვინით მოსილი. უკეთურთ შეიშურეს მისი დიდება-სვიანობა და გაძარცვეს, დაშთა მხოლოდ გაძარცულს მეფეს მცირე რამ სამაჯური და მკერდს ნაკიდი ძეწკვი, აღმნიშვნელი ძველის დიდებისა. ერთს უკეთურთა უკეთურთაგანს, ყმასა მზაკვარსა, ესეც შეშურდა მეფისათვის და უკანასკნელი სამკაულიც მოსტაცა.

სარუხანასთანა პუბლიცისტები სხვისაგან კაცთ-მოყვარეობასა და ლმობიერებას თხოულობენ, თვითონ კი ისეთი მადიანები ბრძანდებიან, რომ წარბ-შეუხრელად კაცს გადაჰყლაპავენ.

ახლა განვიხილოთ, თუ რამდენი დარჩა დიდებულ მესხეთის ბეთალმანზე ქართველი მართლ-მადიდებელი. მართლ-მადიდებელმა ქართველობამ თავი იჩინა მხოლოდ მესხეთის ორ ნაწილში: ჯავახეთსა და ახალციხეს (იგულისხმეთ ახალციხეს მხარე, ოლქი) რუსობის დამკვიდრების შემდეგ. მესხეთის სხვა ნაწილებში მართლმადიდებელ ქართველის სინსილა და სახსენებელი კარგა ხანია გასწყდა. ჯავახეთი საციციანო მთას აკრავს, ახალციხე კი გურია-იმერეთს და დღევანდელ ზემო-ქართლს. აღბად ამ სიახლოვემ შეუწყო ხელი, რომ ქრისტიანობა სრულიად არ ამოვარდა და ნაცრის ქვეშ ჰლუოდა ქრისტეს სიყვარული. ისიც უნდა გვახსოვდეს, რომ ქართლი-იმერეთიდგან ხშირად გადმოცვინდებოდნენ ხოლმე ქრისტიანენი სხვა და სხვა მიზეზის გამო. ს. კოთელიას, ხი

ზაბაერას და სხვაგან დღესაც არიან ისეთნი, რომელთაც კარგად ახსოვთ, თუ რამ აიძულა მათი მამა-პაპანი აყრილიყვნენ და აქეთ გადმოხვეწილიყვნენ. ერთმა კოთელიელმა მთელი ისტორია მიაგმო თვისის მამა-პაპის აყრაგადმოსახლებისა სოფ. ქარელიდგან.

1900 წელს ჯავახეთსა და ახალციხეს ითვლებოდა მართლ-მადიდებელნი ორისავე სქესისა სულ 10,088 სული¹⁹⁾. ამ რიცხვში ნაანგარიშეგია მცირეოდენი რუსობა და ბერძენნი სოფ. მიქელ-წმინდისა და ქ. ახალციხისა. მართლ-მადიდებელნი ბინადრობენ 1281 კომლად და შეადგენენ 13 სამრევლოს: 1) ახალციხისა, 2) წმ. მარინესი, 3) ახალქალაქისა, 4) ბარალეთისა, 5) აწყურისა, 6) ვალესი, 7) გოგაშენისა, 8) ზედათმოგვისა, 9) ქილდისა, 10) მუსხისა, 11) ტოლოშისა, 12) საროსი და 13) ერკოტისა.

აი სოფლებიც, სადაც ბინადრობენ მართლ-მადიდებელი ქართველნი: ახალციხის მაზრისა: 1) ვალე, 2) ტატანისი, 3) კობარეთი, 4) ღრელი, 5) ანდრია-წმინდა, 6) მუსხი, 7) ქუნცა, 8) ერკოტა, 9) ტობა, 10) როკეთი, 11) დადეში, 12) ძველი, 13) ტოლოში, 14) ზედათმოგვი, 15) აგარა, 16) აწყური, 17) ტყემლანა და 18) ქვაბის-ხევი. ახალქალაქის მაზრისა—1) ბარალეთი,

¹⁹⁾ მართლ-მადიდებელთა შესახებ ცნობანი გადმოგვცა დეკანოზმა დიმიტრი ხახუტაშვილმა. დღევანდელ ახალციხის მაზრაში ხუთი სოფელია, რომელთა მკვიდრნი ბორჯომის ხეობიდგან ამოვიდნენ მე-XIX საუკუნეს. ამ ხუთ სოფელში მხოლოდ ქვაბის-ხევი ეკუთვნის ახალციხის საბლალაჩინოს, დანარჩენნი: დვირი, ტაძრისი, დგვარი და საკირე ბორჯომისას. ბერძენები და რუსები რომ გამოვაკლოთ, ქართველ მართლ-მადიდებელთა რაოდენობა დაახლოვებით შეიძლება მივიღოთ 10,000 სული.

2) სარო, 3) ვარევანი, 4) ვარგაეი, 5) თოკი, 6) კოთელია, 7) ახაერეთი, 8) ბალანთა, 9) ჭიხარულა, 10) ფრთენა, 11) მურჯახეთი, 12, ჩუნჩხა, 13) ქილდა, 14) გოგაშენი და 15) აფნია.

როგორც ყველგან საქართველოში, იმერეთს გარდა, ქალაქად მკვიდრი ქართველი ძალიან ცოტაა. ახალციხეს კანტი-კუნტად კიდევ მოიპოვებიან, მაგრამ ჯავახეთის ახალქალაქი წმინდა სომხების ქალაქია. მახსოვს, აქ ერთი მოხუცებული მეწისქვილე იყო მართლ-მადიდებელი ქართველი და, ვგონებ, უძეოდ ესეც ამოწყდა. არის კიდევ ერთი ქართველი და, როგორც მითხრეს, იმერეთიდან გადმოსახლებულა. ასეთი ქართველი კი ანგარიშში არ არის მისაღები, როგორც მოსული დროებით ქართველი მოხელეობა.

ზემოდ დასახელებულ რიცხვში (10,088) სასულიერო წოდებისა 193 სულია, სამხედრო—102; ვაჭარი, ხელოსანი და მოქალაქე—201, გლეხი—9170.

მთლად მართლ-მადიდებელთა სამრევლოებში 1900 წელს დაბადებულა: 240 მამრი, 294 მდედრი, სულ 534. ქორწილი ყოფილა 109. გარდაცვლილა: 144 მამრი, 149 მდედრი, სულ 293. მაშასადამე „დიდებულ მესხეთის ნატამალს.. 1900 წელს უმატნია 241 სულით²⁰⁾.

„დიდებულ მესხეთის“ მთელი ავლა-დიდება დღეს სულ ეს არის. რაღაც 10,000 სული, ათას ორას ოთხ-

²⁰⁾ ვერ გამოვარკვიეთ, რა მიზეზია, რომ ქალები ასე სკარბოზენ მამა-კაცებს. დაბადებითაც მეტი დაბადებულან, სიკვდილითაც მამა-კაცზე მეტნი მომკვდარან. ყველგან მამა-კაცი სკარბოზენ, აქ კი ქალებს გაუმარჯენიათ. ეს ხომ არ არის მიზეზი მესხეთის დაკნინებისა? ხეშრობის გუნებაზე რომ ვიყოთ, სწორედ ამ მიზეზით ავხსნიდით მესხეთის ამოვარდნას..

მოცდა ერთ კომლად გაბნეული ორს მაზრაში. ამოდენა ხალხი ხომ სოფელ საგარეჯოშიაც იქნება და თუ ცოტა რამ დააკლდება, მიუმატეთ მეზობელი სოფელი პატარ-ძეული, ან ნინო-წმინდა და მიიღებთ: 1281 კომლს ქართველს. გარე-კახეთის ორისა, თუ სამის სოფლის ქართველობა. რაოდენობით უდრის მთელ მესხეთის ქართველობას, თუ, რასაკვირველია, ანგარიშში არ მივიღებთ სომხის ტიბიკონზე მდგარ ქართველ კათოლიკეთ და გამაჰმადიანებულ ქართველობას, რომელთაც ასე უწყალოდ და უღვთოდ აიკრუეს და აიყარეს გული მშობელ დედაზე და სამშობლოზე ²¹)... დაცინვია ბედისა, მაშ რა არის!..

1897 წელს იანერის თვეში ერთის დღის განმავლობაში აიწერა რაოდენობა ხალხისა რუსეთის იმპერიაში. ამ აღწერამ აღმოაჩინა, რომ ახალქალაქის მაზრაში ითვლებოდა 67,919 სული ორისავე სქესისა, ხოლო ახალციხის მაზრაში—53,757, სულ ორთავ მაზრაში 121,676 ადამიანი ²²). ქართველები: კათოლიკენი და მართლ-მადიდებელნი რომ ერთად შევავერთოთ, მივიღებთ 16,408. მაშასადამე ქართველობა შეადგენს მეშვიდე ნაწილზე ცოტა მეტს და მერვეზე ცოტა ნაკლებს, ანუ აქაურ ყოველ ას კაცზე ქართველი მარტო თორმეტ კაცამდე იქნება.

თუ მოისურვებთ და მეცნიერულ ელფერს მისცემთ

²¹) საბედნიეროდ, ამ ეამად 1914 წ., ქართველ-მაჰადიანებში დაიწყო ეროვნული მოძრაობა. ქართველი-კათოლიკენი ხომ აშკარად იბრძვიან ეროვნულ უფლებებისათვის. ამისი უტყუარი საბუთებია.

²²) იხ. კავკასიის კალენდარი 1901 წ. გვ. 23 შესამე განყოფილებისა.

ციფირებს, დაფინახავთ, რომ ქართველები შეადგენენ ახალციხისა და ახალქალაქის მაზრების მკვიდრთა საერთო რაოდენობისას 13,±8%.

ეს ყველა კარგი, მაგრამ საქმე ისაა, რომ მეზობლები გვედავებიან 6±08 კათოლიკეთ და ჯერ დავა საბოლოოდ არ გადაწყვეტილა. ჩვენ რომ ჩენი ვსტკვათ და იმათ თავიანთი, ამითი საქმეს არა ეშველება-რა, ვიდრე ავტორიტეტის მექონე დაწესებულება არ გადასწყვეტს დავასა. სანამდე კი, მეტი რა ჩარაა, სათვალავში უნდა ვიქონიოთ მხოლოდ მართლ-მადიდებლობის აღმსარებელი ქართველობა. ესენი, როგორც მოვიხსენიეთ, არიან 10,000 სული, ესე იგი 8,21% ორის მაზრის მკვიდრთა საერთო რიცხვისა, ანუ ყოველ ას კაცზე რვა მრთელი და ერთი მეხუთედი მართლ-მადიდებელი ქართველისა მოვა.

ყველა ნათქვამის შემდეგ ნუ თუ სრული, კანონიერი საბუთი არა გვქონდა ამ წერილების ეპიგრაფად გვეხმარნა ანდაზად მიჩნეული ბრძნული ლათინური თქმულება: *sic transit gloria mundi*²³⁾. ვფიქრობთ, რომ არც ერთ ქვეყანას ისე ზედგამოჭრით არ მიუდგება ეს ანდაზა, როგორც მესხეთს. განა გაგონილა სხვაგან სადმე ასეთი უკუღმართობა, ცვალებადობა და სიმუხთლე ბედისა? განა შესაძლებელია, ძველი დიდება ისე გაჰქრეს, რომ მისი ერთი სხივიც აღარ გვინათებდეს და გვათობდეს? განა გონებით მისაწვდენელია, რომ სამშობლო რუსთველისა, გიორგი და ექვთიმე მთაწმინდელთა, ბექასი და აღბუღასი ისე აოხრდეს, რომ კაცმა ველარ იცნოს? ას კაცზე რვა-ღა დარჩენილა ქართველი, თუ

²³⁾ ქარ-ულად ასეთიქმის: ასე წარმავალია დიდება ქვეყნისა.

გნებათ თოთხმეტი იანგარიშეთ. ცხადია, რომ ჩვენ უფრო სტუმრის სახელი შეგვშვენის, ვიდრე მასპინძლისა. ვაგლახი მაშინ იქნება, მასპინძელს თუ სტუმრიანობა მოსწყინდა და ანდაზისაებრ: დილით ოქრო ხარ, სტუმარო, საღამოს ვერცხლად იქცევი, თუ ხანი დაგიგვიანდა, სპილენძად გადაიქცევი, -- თავაზიანად გვიბრძანოს -- მიბრძანდით, სახლ-კარი გამინთავისუფლეთო.

ნახ-ული და გზგონილი.

I -

მიხეილ მეფისაშვილის გარდაცვალების გამო.

თერთმეტ იანვარს აქ, ახალციხეს, გარდაიცვალა მიხეილ მეფისაშვილი, ართვინის ოლქის უფროსად ნამყოფი. ბევრის მხრით იყო შესანიშნავი განსვენებული...

უკანასკნელ დროს ხშირად ლაპარაკობენ, ქართველ კაცს ნიქი, უნარი არა აქვს მართვა-გამგეობისა, უფროსობისაო. მაზრა რა არის, იმის პატრონობაც კი არ შეუძლიანო, ვითომ ისე დაძაბუნდა, ისე დალაჩრდა და დახურდავდა ქართველიო.

სრულიად მოკლებულია სიმართლეს განზრახ აჩემებული აზრი. მაგალითების საძებნელად შორს რომ არ წავიდეთ, მარტო განსვენებულის წარსულის მკირედად გახსენებაც საკმარისია, რომ ზემოდ აღნიშნულის აზრის უსაფუძვლობა დაეინახოთ.

მეფისაშვილს არც უნივერსიტეტი, არც გიმნაზია დამთვრებული არა ჰქონდა. მიუხედავად ამისა, მართვა-გამგეობის უნარიც ჰქონდა, ნიქიცა. მთელის ძველის მესხეთის ტერრიტორია არზრუმ-ტრაპიზონამდე რომ ჩაგე-

ბარბინათ, პირნათლად გაუძღვებოდა და ქვეყანას არავის ააოხრებინებდა. შესანიშნავის ზედმიწევნით იცოდა განსვენებულმა მთელი ეს კუთხე, ზნე და ჩვეულება მკვიდრისა და მისი სულიერი ვითარება. ამასთანავე სამშობლო ქართულის გარდა ზედმიწევნითვე, თითქმის ხელოვნურად იცოდა სომხური და ოსმალური. მისი სჯაბაასი ოსმალურად ბეგებთან ოსმალეთის დივან-ხანას მიგაგონებდა და ამის მნახველს უნებლიედ აზრი სტამბოლისაკენ გაგიტაცებდა.

ბუნებრივს ნიქსა და გამკრიახობას გარეგნობაც ხელს უწყობდა. წამოსადეგი და ახოვანი იყო მეტად. კილო საუბრისა ხომ ისეთი ძლიერი, მბრძანებელი და მორჩილების გამომწვევი ჰქონდა, რომ უნებურად იფიქრებდი, ეს კაცი მბრძანებელად არის სწორედ დაბადებული და არა სხვის ბრძანების აღსასრულებლად.

ასეთი კაცი პოვნაა მხედართ-მთავრისა და სარდლისათვის. აკი კიდევ იმიტომ მიაქცია ყურადღება მეფისაშვილს განსვენებულმა გრაფმა მიხეილ ტარიელის ძე ლორის-მელიქოვმა რუს-ოსმალოს ომის დროს. რუსები რომ იტყვიან, ეს კაცი ჩემი მარჯვენა ხელიაო, სწორედ ზედ გამოკრილია მეფისაშვილსა და ლორის-მელიქოვზედ. ლორის-მელიქოვმა აქარის გამგებელ შარიფ-ბეგ ხიშიაშვილთან სადიპლომატო მოლაპარაკება მეფისაშვილს მიანდო. ყველამ იცის, რითაც, ან როგორ გათავდა ეს მოლაპარაკება. ხიშიაშვილმა აქარა რუსეთს დაუთმო უომრად. მიწერ-მოწერა მეფისაშვილსა და ლორის-მელიქოვს ამ მაღალ-მნიშვნელოვან საგნის შესახებ ქართულად ჰქონიათ.

დიდის მწუხარებით უნდა აღენიშნო, რომ ლორის-მელიქოვის წერილები სამუდამოდ დაღუპულია ისტო-

რიისათვის. უბედურის შემთხვევის წყალობით წერილები-
დაიკარგა!...

განსვენებული მეფისაშვილი იყო კათოლიკე სარწმუნოებით. ამის გამო მიცვალებულს ანდერძი აუგეს სომეხ-კათოლიკეთა ტიბიკონისამებრ.—ბოდიშს ვიხდი განსვენებულის კირისუფლებთან, თუ აქ მეტი რამ მომივიდეს უნებლიედ.—ანდერძი დაიწყეს ქართულად, მაგრამ რადგან მღვდელთა შორის ზოგი ტომით ქართველი იყო და ზოგი სომეხი, ვერ შესძლეს ქართულად ბოლო გაეტანათ მწყობრად და არჩიეს სომხურად გადასულიყვნენ. წირვაც სომხურად გახლდათ, მხოლოდ სახარება იქმნა წაკითხული ქართულად.

ამბობენ, ძალიანაც რომ უნდოდეთ, ველარც კი მოახერხებენ ქართველ-კათოლიკენი წირვა-ლოცვას ქართულად, რადგან ქართული საღმრთო წიგნები აღარ მოეპოვებათ და ახლად ველარ ჰბეჭდავენო. თურმე აგერსამოცი წელიწადი სრულდება, რაც ქართულს სტამბას ქართველ-კათოლიკეთა აღსარების წიგნი არ დაუბეჭდია...

განსვენებული სიბერის დროსაც არწივს მოგაგონებდა, მართალია ფრთებ-მოტეხილს, მაგრამ მაინც არწივს...

განსვენებული დაკრძალეს ს. იელიტას. ამ სოფელში, ასე მითხრეს, რამდენიმე კომლი მაჰმადიანნი „ქართველი ტომისანნი“ და კათოლიკენი, ტომით სომეხნი, სცხოვრობენო. ეკლესიის გალავანში კი საფლავის ქვას ქართული წარწერანი აქვს. ეკლესიაში სომხურად აღიდებენ უფალსა და საფლავის ქვებს კი ქართულად უკეთებენ ზედწარწერას. ბედის დაცინვაა, მაშ რა არის ესა?

კარგს იზამდა ბ-ნი ილია ქავკავაძე, მესხეთისკენ გა-

მოესეირნა, ვიდრე „ქვათა ლალადი“-სის წერას შეუდგებოდა. აბა, აქ ჰნახავდა ნამდვილ ქვათა ლალადს!

მართალია, ბედი ცუდლუტი და ცვალებადია, მაგრამ არც ასეთი გადამეტებული სისასტიკე ვარგა. უკულ-მართმა და შავად და ბნელად მოსახსენებელმა მარტო-ოდენ საფლავის ლოდნი-ლა გვიწყალობა სანუგეშებლად. ძღვენი მწირია, მაგრამ რას იზამთ?

მეფისაშვილის საფლავის ქვასაც ხომ ქართულად დააწერენ ეპიტაფიას საბუთად იმისა, რომ აქ ქართველი ასაფლავია. ისტორიას ეს ქართული წარწერა-ლა დარჩება.

„კარგი რამ გკირდეს, გიკვირდეს, ავი რა საკვირველია“.

II

მაჰმადიან მართველების გადასახლება.

ერთი სურათი ენახე ამას წინად ბორჯომის სადგურზედ და უნებურად გამახსენდა მშვენიერი პატარა მოთხრობა განსვენებულის ჩენის ალექსანდრე ყაზბეგისა—ელისო.

სადგური საესე იყო ქართველ მაჰმადიანებით, ლამის პირველი საათი იქნებოდა, ბავშვები და დედა-კაცი კერებებივით ეყარნენ ცივ იატაკზედ. მამა-კაცთ არ ეძინათ, ხოლო ორიოდ დედა-კაცი აქა-იქ წამოყუნტულიყო და ბავშვებს ძუძუს აწოვებდნენ, თან რაც ძალი და ღონე ჰქონდათ ჩადრებს იფარებდნენ, რომ უცხოთა თვალთაგან დაემალათ პირისახე. კარგა ხანს ვუყურე ამ სვედრისა და დარდის ამშლელს სურათს, ვიდრე გო-

ნებამ ხელახლა არ გამიტაცა მოხუცი ანზორისკენ, ელისოსა და ვეჩიასაკენ.

სხვისა რა მოგახსენოთ და მე კი იმ აზრისა ვარ, რომ ყველაზე ძლიერი სევდა, ადამიანის დამაავადებელი და დამასნეულებელი ისაა, როდესაც ჰგრძნობ, რომ შენი ბედი შენს ხელში არ არის. ეს რომ ასე არ იყვეს, განა ამ სურათს წაეწყდებოდი? განა ამ საცოდაებს აქვე ვერ მოვაწყობდი? ხომ ცხადია, რომ ეს უბედურნი იქ, უცხოეთში, სამოთხეს ვერ იპოვიან და მხოლოდ პირი ცივი სამარისკენ მიუმართნიათ.

თვალი მოვკარი ნაცნობ გლეხსა.

— საიდა, შენა? ეს რა ამბავია, განა ასე მალე აიბარგეთ?

— დიახ, ბატონო, აკი იმ დღეს მოგახსენეთ, რომ წასვლას ვაპირებთო. ყველაფერი რაც რამ გვებადა, მიეყიდ-მოეყიდეთ, მატარებელს ველით, დაგვირდნენ, ცალკე ვაგონს მოგცემთ ბათუმამდინაო.

საუბარი შევწყვიტე. ან კი რალაზე გველაპარაკანა? მართლა, ორი კვირის წინად, ბევრი ვილაპარაკეთ, მე ჩემსას არ ვიშლიდი, საიდა თავისას. ბოლოს თავისი ისევ საიდამ გაიტანა და აიბარგა. იმასთან სხვაამაც ბევრმა მოშალა მამაკეული ფუძე.

საიდა და მისი მეზობლები ს. საკუნეთიდან არიან. ეს კარგა მოზრდილი სოფელი აწყურს აკრავს, ასე ნ—ნ ვერსი იქნება. შიგ მშვენიერი თლილი ქვის პატარა ქართული ეკლესია დღესაც კობტად გამოიყურება. ამბობენ და ბევრსაც სჯერა, რომ ეკლესიიდან ხანდახანობით, სადამო ეამს, ნათელი მოსჩანსო. ერთხელ, განსვენებულმა აწყურის ეკიმმა, შესანიშნავის გულის პატრონმა კაცმა ივანე ბარამიშვილმა კიდევაც წამიყვანა სა-

ღამო ხანს აწყურიდგან საკუნეთისკენ — ეგები დაინახობ
წათელიო, — მაგრამ ვერა დაინახეთ-რა.

საკუნეთს ძველად საყოველთა ერქვა ქართულადაო.
არ ვიცი, რამდენად მართალია ესა, ასე კი ამიხსნა ამ
სოფლის ერთმა ბატონთაგანმა. მთელი სოფელი დღე-
საც, დიდი და პატარა, წმინდად და სუფთად ლაპარა-
კობს ქართულად. ძველი ქართული გვარებიც ისევე
კარგად შენახული, როგორც შუაგულ ქართლსა და იმე-
რეთში.

სევედის ამშლელ სურათს მოვშორდი და ჩემს გზას
გავეუდექი. გზაში მომაგონდა ამ სოფლის მოძღვარი-
მოლა, ახალგაზდა, სანდომიანი, წმინდა ქართველური
სახის მეტყველებით. გაცნობის დროს გამოვკითხე მო-
ლას — სად მიიღო განათლება. ბევრი რამ მიაგებო საყუ-
რადლებო. ნაამბობმა ცხადად დამანახვა, თუ ასე უწყა-
ლოდ რად აიყარეს ჩვენზე გული ჩვენმა თანამემამუ-
ლეთ.

თორმეტი წლისა ვიყავი, როცა სტამბოლს გამგ-
ზავნეს სწავლის მისაღებადაო. საცხოვრებელი იქ არა
მქონდარა, სახლიდგან მარტო გზის ხარჯი გამატანესო.
მიეებარე სასწავლებლად სტამბოლის მოლებს და ვცხოვ-
რობდი ჩემთვისო.

— მოლა, რას ამბობ, განა მშვიერი არ მოკვდი უც-
ხოეთში, იმ უშველებელ ქალაქში, სადაც არც ნათესავი
და არც თვის-ტომი არ მოგეძევებოდა?

მოლამ იტყია.

— როგორ თუ უცხოეთი? განა იქ სულ ჩვენები
არ არიან? ქვეყანა დიდია, ძლიერი, მდიდარი, განა
აქაურ ფუხარებსა (ღარიბი) ჰგვანან? მაჰმადიანი იქ მშვი-
რი როგორ მოკვდება.

ამას რომ ამბობდა, ახალგაზდა ჯან-ლონით საესე მოლას სახე გაუბრწყინდა სიამაყითა და ამპარტავნებით, ასე რომ მევე შემრცხვა ჩემის გაოხრებულის და გატრიალებულის სამშობლოსი.

მოლამ ისიც მიაშბო, რომ ათი წელიწადი დავრჩი სტამბოლსაო. სახლიდგან საზრდო არა მომდიოდა-რა, მაგრამ საკიროც არ იყოო. რამაზანისა და ბაირამის დროს, აგრედვე სხვა დიდ დღესასწაულებში წავიდოდით სტამბოლს გარედ, სოფლად, ლოცვებს კვითხულობდით, ვგალობდით, აი ისე, როგორც ქართველები ქოონაზე დადიან ხოლმეო და იმდენს საშოვარს ვშოულობდით, რომ წლითი-წლობით თავზე საყრელი გვქონდაო.

მგონი ადვილად მიხვდებით ეხლა, თუ სადაა ამ უმაწილი მოძღვრის *alma mater*-ი, საით მიჰტრინავს მისი გონება და რა გუნებაზე უნდა იყვეს ან თვითონ ეგა, ან მისი მრევლი. დიდ სიღუბკირეს და უბედურებას ჩვენის დღევანდელის ცხოვრებისას ვილა იტყვის, როცა მკირედი ნაკლულევანება აუტრუევებს კაცს გულსა და დაატოვებინებს სამშობლო მიწა-წყალსა.

რალა ესენი და რალა ნარზე მჯდომარე ნიბლია ჩიტო!

ამ დღეებში, მეორე, ბოგელ მოლასთან მქონდა საუბარი. სოფელი ბოგა იგივე ქართველ მაჰმადიანებითაა დასახლებული და სუფთა ქართული შერჩენიათ. გადასათარგმნი მქონდა მკირე რამ თათრული. თარგმანს რომ მოვრჩით, მასლაათი გავაბით.

— თორმეტი წელიწადი ვისწავლე დიდურის მოლებთანო და შემდეგ ეგზამენი დავიკირე მოლის ხარისხის მისაღებად ტფილ ქალაქში მუფთიასთანაო.

დღევანდელ მესხეთში დიღურის სკოლას ხუმრობით „მაჰმადიანების აკადემიას“ ეძახიან. აქ ბლომად არიან ნასწავლი მოლები, იყვანენ შეგირდებს და ასწავლიან არაბულს და ყორანს. მთელი ავლა-დიდება ამ აკადემიისა ესაა, სხვა იქ არა მოიპოვება-რა.

სოფელი დიღური, რუსულად დგვირ, ფოცხოვშია, გარშემო სულ ქართული სახელებია სოფლებისა, როგორც მაგალითად: საიხვე, გული, კილვანა, პეტუბანი, ზეინდარი, საკირე, ხერთვისი, მერია, სამიხელია, გუნია, ჯაბორია, კოდისი, ტაბალა, ხონამისი, ფარხანა, ხეოთი, ალი, აგარა, წურწყაბი, სათლმალი და სხვა, მაგრამ სახელის გარდა ქართული აღარაფერია. სულ აღვიღა დედამიწის პირიდან ქართველის სახსენებელი.

მოგეხსენებათ, რომ მოლებიც კაცნი არიან და სმაჰჰმა უნდათ. შეგირდები ფულს არ აძლევენ, ათასში ერთხელ თუ მცირე ძღვენს მიართმევენ; მაგალითად შაქარსა და სხვა ამ გვარ ტყბილეულობას. მასწავლებელ მოლებს დიდ მფარველობას უწევდა და ასაზრდოებდა ფოცხოვის გავლენიანი და შემღებული კაცი შაქირ-ბეგი. იგი ენათესაებოდა კარგად ცნობილს, განსვენებულს ფეიზულა ბეგ-ათაბეგოვს — ქვაბლიანელს.

შაქირ-ბეგიც სხვებსავით შარშან აიბარგა ცოლ-შვილით, გადავიდა საოსმალოში, იყიდა მშვენიერი სახლი სტამბოლს და იქ დაესახლა. ესლა ვილა პატრონობს დიღურის „აკადემიას“, არ ვუწყით.

დიღურის „აკადემიიდან“ გუვერნიორებიც გამოდიან. ბევრგან ბეგების ოჯახში მინახავან მასწავლებელ-გუვერნიორნი დიღურის აკადემიისა. საზოგადოდ მოლას ნასწავლ-ნაკითხ კაცს ეძახიან. რამდენჯერ უთქვამთ ჩემ-

თვის გლებებს „კაი ნაკითხი“ მოლა გვეყავსო. ამ ჯურის გუვერნიორ-მასწავლებელნი ჯილდოდ შრომისათვის ფულს არ იღებენ. ასმევენ, აქმევენ, ბინას გაუჩენენ, მორჩა და გათავდა. ესენიც მწიგნობრობენ მთარველ ბეგის ოჯახში და ბავშვებს არაბულად წერა-კითხვას ასწავლიან. თუ შტატის მოლაა და მრველი ჰყავს, მაშინ, რასაკვირველია, მღვთის მსახურებასაც ასრულებენ და ემორჩილებიან სამაზრო ყაზის.

დარწმუნებით და მტკიცედ ვიცი, რომ მოზარდი თაობა დიდის გაქირვებით ითვისებს არაბულ ენას მოლების სკოლაში. უცნაური აზრი მომივიდა, მოდი და ამ ჩემს ბოგელ მოლას ეგზამენს ვუზამ, გამოვცდი, თუ რამდენად იცის არაბული-მეთქი. წიგნი არა მქონდა-რა, ნ. მარრის თხზულების გარდა: „Тексты и разыскания по армяно-грузинской филологии“, ტ. IV. გადაუშალე ლექსიკონი, საცა ბ-ნ მარრს მოყვანილი აქვს უცხო ენებიდგან ქართულში შემოტანილი სიტყვები. ასეთს ნასესხებ სიტყვებს არაბულად და სპარსულადაც უწერია გვერდით. მოლამ მკათიოდ წაიკითხა: ალამი, ათაბეგი, ალვა, ალი, ალმასი, ამბარი (ароматъ), ბაღა და სხვა.

--- მოლა, კარგად ყოფილხარ ნაკითხი, — მოვუწონე კითხვა; ქართულად ჩემსაებრ ლაპარაკობ და ნუ თუ ქართული წერა-კითხვა არ იცი?

— რად მინდა, ბატონო, ქართული, რაში უნდა გამოვიყენო? --- მკვირცხლად მომიგო აკადემიკოსმა მოლამ.

ამ პასუხიდგან ნათლად სჩანს, რა უღმობელის თანდათანობით ეყარება ფასი ქართულსა და გამოუხსადეგარი ხდება. მას შემდეგ, რაც მთავრობამ ქართველი მაჰმადიანი „თათრად“ აღიარა, სულ ბოლო ეღება ათას

წლოვან ქართულსა. ქართული ენის გადაშენების პროცესი ჯერაც არ შეჩერებულა და, ვერ წარმომიდგენია, ამ ფრიად საყურადღებო საგანს ასე გულ-გრილად რად ეკიდება ჩვენი ყოველდღიური პრესსა.

შარშან და შარშანწინ მთავრობამ მოახდინა რეფორმა ადგილობრივი მართვა-გამგეობისა აქარაში, სადაც დღესაც წმინდად ლაპარაკობენ ქართულს გურულის კილოთი. განმეორდა ბედშავი შეცდომა (поковая ошибка). აქარლების სამშობლო ენად აღვიარეს ოსმალური-თათრული, სწორედ ისე, როგორც ახალციხის აღების შემდეგ პასკევიჩის მიერ, მესხეთისა და ჯავახეთის ქართველ-მაჰმადიანობას უწოდეს თათრები. ასეთი ისტორიისა და ბუნების წინააღმდეგი შეცდომის გამო სასოფლო სამმართველოებში მოიწვიეს მწერლებად (писаря) ისეთნი, რომელთაც უეჭველად უნდა იცოდნენ სახელმწიფო ენის გარდა, ესე იგი რუსულისა, მხოლოდ თათრული. თათრულის მცოდნენი აღმოჩნდნენ ამ კუთხეში მარტოოდენ ბერძნები და სომხები და სწორედ ესენი გაამწესეს მწერლებად. მკითხველი ადვილად მიხედება, თუ რა ხერი დაეყრება ქართულ ენას აქარა-ქანეთ-ქობულეთსა და ტაო-კლარჯეთში. ბათუმიდგან ტრაპიზონამდე წკრიალით გაისმოდა ქართული და მისი კილო — ქანური, ხოლო ამ შეცდომის წყალობით, არ გაიელის 20—30 წელიწადი, რომ სრულიად მოისპობა შოთა რუსთველის ენა და მერმე, ვგონებ, ქართულის შესასწავლად მხოლოდ ~~სტრონის~~ ხეობანი-ლა დაგვრჩება, ვინაიდგან ეს ხეობანი შუაგულ ქართლშია და ჯერ-ჯერობით იერიშით აქ არავენ მოგვედგომია.

საუბრის დასასრულმა მოლასთან მკირედი იმედი მომცა საქმის გამოტრიალებისა, უკეთუ დიდი და პატა-

რა საესებით შევიგნებთ ჩვენს მოვალეობას და ერთმანეთში ლაფში ამოსვრის მაგიერ, ვიზრომებთ მედგრად და გავაკეთებთ, რის გაკეთებაც შეგვიძლიან, ან რის უნარიც გვიწყალობა უფალმა.

— რაკი შეიტყო ფოცხოვის უფროსმა მიხაკო ხერხეულიძემ, — სთქვა ბოგელმა მოლამ, რომ სკოლაჩი (ასე ამბობენ აქ მესხეთის ქართველ-მაჰმადიანნი) ქართულად მოლაპარაკე ბიჭები სწავლობენო, — იქ ხომ ქართული არავენ იცის, მაშინადვე მობრძანდა, მოგვიკითხა, ერთად დაგვაგროვა და სულ თავზედ ხელს გვისვამდაო. სახე სულ უცინოდა, მხიარულობდა და სტკებობდა ჩვენის ხილვით. უბრძანა ჩაფრებს დაეკლათ ჩვენთვის კრავი. მასწავლებელ მოლებს უბრძანა, თუ ეს ბიჭები გაგილახნიათ, აქ აღარავის გაბოგინებთო. ბევრჯელ ყოფილა კნიაზი ჩვენსას და პატივი უციაო.

ამ მხარეს თავადი მიხეილ ხერხეულიძე განთქმული ყოფილა უზომო, წმინდა ქართველური გულუხეობით, სტუმართმოყვარეობით და მასპინძლობით. დღევანდელს ქართველ ინტელიგენტს, ცოტა არ იყოს, ეხამღშება წრეს გადასული სტუმართმოყვარეობა, მაგრამ რას იზამთ, როდესაც ჯერ ჩვენთვის ჩვეულება რჯულზედ უმტკიცესია. მე პირადად კარგად არ ვიცნობდი თ. ხერხეულიძეს (მხოლოდ ერთხელ ვნახე ტფილისში, სადაც ბანკში დაგირავებულ მამულის საქმეს არიგებდა), მაგრამ დავრწმუნდი კი, რომ მისი შესანიშნავი გულუხეობა და პურმარული ბევრს დაჰვიწყებია და მარტო ირონიით მოუგონია წარსული ლხენა-ქეიფი^{*)}). დიახ, სწორედ რომ

^{*)} ერთხელ თურმე ფოცხოვს ეწვია მთავარ-მართებელი თ. დონდუკოვ-კორსაკოვი. ახლდა თავადს დიდი და ბრწყინვალე ამე-

საქიროა წინაღვე გავითვალისწინოთ ხოლმე, ვის ვუ-
ღებთ სახლის კარსა, ვის ვუმასპინძლდებით და ვის ვაძ-
ღვეთ საღამს. ეროვნების შესანახად და მის გასაძლიე-
რებლად სწორედ რომ საქიროა ყველა ესა და უპირვე-
ლესად კი ნიუთიერი ძალ-ღონე.

ამ ისედაც ყოვლის მხრივ რიგიანის კაცის პურ-
მარილი ბევრს „ნასწავლს“ დავიწყებია, არ დავიწყებია მხო-
ლოდ მისი ქართველური გული და სიყვარულით აღსავსე
ორიოდე ტკბილი სიტყვა ბოგელ მოლას.

— ბატონო, ეხლაც რომ მოვიგონებ კნიაზსა, პირ-
ზე ნათელი მადგებაო. რომ იცოდეთ, რა კაცი იყოო...
ასე ლაპარაკობდა მოლა.

მე კი ისე ვფიქრობ, რომ ეს წარუხოცელი კავში-
რი ამ ორ ადამიანს შორის გაუბამს სამშობლო ენას, მის
მიუწდომელს და უხილავს ძაფებს. გულს გული იცნობს
და სულს სულიო. ასეთი გაცნობა ხვედრია მხოლოდ
სამშობლო ენისა, უიმისოდ ერთმანეთისას ვერას გავი-
გებთ და სამუდამოთ დავშორდებით.

III

მთავარ-ღიაკონი ჯვარიძე.

ახალციხის მაზრის სოფელ ძველში (რუსულად Зып-
зе.П.) დღესაც სცხოვრობს ღრმად მოხუცებული მთავარ-

ლა. თ. მიხეილ ხერხეულიძემ ისეთი ნაღიმობა გაუმართა თ. დონ-
დუკოვს, რომ მთელი მესხეთი ააღაპარაჲა.—თ. ხერხეულიძე შემ-
დეგში ყარსში გადაიყვანეს პოლიცემისტრად. ამ მხიარულმა და
სტუმართ-მოყვარე კაცმა ტრაგიკულად დაასრულა დღენი თვისი-
თაჲი მოაკლა.

დიაკონი ანდრია ჯვარიძე. მოხუცებულს საკუთარს თვალით უნახავს თათრების (ასე ეძახის ხალხი ოსმალს და ენგიჩართა) რეჟიმი, მათი ბატონობა და პარკაში აკლებულ და აწიოკებულ მესხეთში. დიდი ხანია მსურდა ამ მოხუცის ნახვა და გაგება ძველის-ძველის ამბებისა, მაგრამ, სამწუხაროდ, ვერ ჩავიგდე ხელში ჩემთვის საინტერესო „სოცხალი არქივი“. ბოლოს რომ გამიპირდა, ანდრიას შეიღოს, ლევან ჯვარიძეს, მიემართე თხოვნით — გამოეკითხა მამისთვის ძველი ამბები, კარგად დაეხსოვნა და შემდეგ ჩემთვის გამბნა.

თხოვნა შემისრულეს და აი, რა უამბნია ანდრიას შეიღისათვის ჩემთვის გადმოსაცემად.

— დიდ გაკირვებასა და წვადადაგვაში ვიყავით შართლ-მადიდებელი ქართველები თათრების ბატონობის დროსაო. ძნელად თუ ვინმე მოახერხებდა თვისი ოფლით ნაშრომი და მონაღვაწი სარჩო ოჯახში მშვიდობით შეეტანა: მზა მომკილს ქინახულს გათამამებული თათარი არხეინად იტაცებდა და თავისთვის მიჰქონდა. თუ ვინმე გაჰბედავდა სიტყვის შებრუნებას, ან წინააღმდეგობას, წუთის სოფელს უნდა გამოსთხოვებოდაო. ამას არ აკმარებდნენ და სოლ-შვილსაც მოსტაცებდნენ და ახალციხის ბაზარზე დაჰყიდდნენო. გაუპატიურებული, დაჩაგრული და დამცირებული ქართველი საჩივარსაც კი ვერა ჰბედავდა ვერც ადგილობრივ მოხელესთან და ვერც უმაღლეს მთავრობასთან. ადგილობრივ საქმეებს, საჩივარსა და დავიდარაბას განაგებდნენ ყადები (казни) და ეფენდები (эфенди). ვინც კი მიჰმართავდა სასულიერო მოხელეთ, ან თვით ფაშას, უარესი დღე დაადგებოდათ ხოლმე და უფრო მეტად იწბიოებოდა და იჩაგრებოდაო.

თათარი მარტო ცარცვა-გლეჯით არ კმაყოფილდე-

ბოდა. ისეთი ხარჯი (გარდასახადი) დაგვადო კისრად, რომ მისი ატანა ყოვლად შეუძლებელი იყო. თითო სულ მამაკაცზე წლიური ხარაჯა ოცდა თხუთმეტ ყურუ-შამდე აღიოდა. მართალია, ყურუში დიდი რამ არ არის, ეხლანდელი შაურის ოდენაა, მაგრამ მაშინდელს დროს ძნელი საშოვარი იყო. დღეს თუმნის შოვნა უფრო ადვილია, ვიდრე მაშინ ერთის ყურუშისაო. ბევრი ქართველი ვერ შოულობდა ამოდენა ფულს და იძულებული ხდებოდა ხარჯის თავიდან ასაცილებლად მაჰმადიანობა მიეღო. ვინც გამაჰმადიანდებოდა, ხარჯისაგან იმ წამსვე ანთავისუფლებდნენ. ბევრნი კიდევ თათრების მოსაჩვენებლად სვინნათდებოდნენ (დაცვეთა) და აშკარად აღვიარებდნენ მაჰმადის სარწმუნოებას, სულით და გულით კი ქრისტიანობას მისდევდნენო.

მე თვითონ მოწამე და დამსწრე ვარ შემდეგი ამბებისაო.

— მამა ჩემი აღექსი და ბიძა ჩემი პავლე დასვინნათებულან თათრების მოსაჩვენებლად. მიზეზი ესა ყოფილა: ვიდრე ღონისძიება და შეძლება ჰქონიათ, უხდიათ თათრის ხარაჯა, როცა ძალზე გადარიბებულან და ხარაჯას გადახდის თავი აღარა ჰქონიათ, შემწეობა უთხოვნიათ ძველშივე მალულად მცხოვრებ მღვდელ მამა პავლე ზედგინიძისათვის. ზედგინიძესაც უჩუქებია ერთი წლის გადასახადი და ასე ამ გვარად ერთი წლობით კიდევ შეუნარჩუნებიათ ხილულად ქრისტიანობა.

მეორე წელიწადს მიმართეს თხოვნით ახალციხელ ქართველ კათოლიკე მღვდელს, ამასაც უჩუქებია წლიური გადასახადი. კათოლიკენი ხარჯისაგან თავისუფალნი იყვნენო. ამ წელიწადსაც, როგორც იყო, შეირჩინეს ქრისტიანობა. მესამე წელიწადს ხელი აღარავინ გაუ-

მართა, ან კი სად ექნებოდათ სხვისთვის გადასახდელი ფულიო. ხარჯის საშოვნელად დაიწყეს ს. ონგორაში (რუსულად Онгора. მე ვგონებ, რომ ეს სოფელი ორგორა უნდა იყვეს) კირის წვა და ზიდვა ზურგით ახალციხეს გასასყიდად (ახალციხიდან ონგორამდე 28 ვერსია). ზურგზე ორთავეს კირის ზიდვით ტყავი გადასძვრათ და მაინც ძლივ-ძლივობით იშოვნეს ერთის წლის ხარაჯა.

მეოთხე წელიწადი უფრო სამწუხარო და სავაგლახო დაგვიდგაო. ძალ-ღონე შემოვლიათ მამა-ბიძას და კირის ზიდვით მარტო ოცდა თხუთმეტი ყურუში იშოვეს, ესე იგი ერთი ადამიანის გადასახდელი. გაქირდა საქმე, ან ერთს უნდა მიეღო მაჰმადიანობა, ან მეორეს, მაგრამ რომელს?

— რომელსა, აღარ მახსოვს, მაგრამ იმ წელიწადს, დიდის ყოყმანისა და რჩევის შემდეგ ძმათა შორის, ერთი მათგანი ეახლა ყადის, მიართვა ძმის ოცდა თხუთმეტი ყურუში და განაცხადა, ხარჯიდგან მე გამანთავისუფლეთ, რადგან მისი ვალემა აღარ შემიძლიან და მაჰმადიანობას მივიღებო. თხოვნა აუსრულეს.

ამ გვარი ვაინაჩრობით კიდევ შეირჩინა ერთ-ერთმა ძმამ ქრისტიანობა ერთის წლით, მაგრამ როდემდის? მეორე წელიწადს ისიც დასვინნათდა და მაჰმადიანობა მიიღო. მამა ჩემს ალექსის „მურადაი“ დაარქვეს და ბიძა პავლეს „ბადალაი“. დღესაც ბიძა ჩემის ჩამომავლობას „ბადალაანთ“ ეძახიანო“.

არც მეორე ამბავია ყურადღებას მოკლებული და უფრო საოცარიცაა, რადგან მომხდარა რუსის შემოსვლის შემდეგ მესხეთში.

სოფელ აბს (ქ. ახალციხეს აკრავს. სხვა დანარჩენი ქართველი სოფლები: მარდა, მეორე მარდა, ურია, ჯა-

ნიანთ მარდა, მლაშის-ხევი, აბის გვერდით მდებარენი, სულ ამოვარდნილა და ეს ნასოფლარები დღეს ვერანები არიან) გათათრდა და დასვენნათდა ერთი ქართველი ზემორე აღნიშნულის მიზეზის გამო. სახელად უწოდეს „სულია“. ქართული სახელი აღარ მახსოვსო. მალულად მაინც ახალციხეს დადიოდა, აღსარებას ამბობდა განსვენებულ დეკანოზ გ. გამრეკელთან და წმინდა საიდუმლოს იღებდაო. სიკვდილის ეამი რომ ეწვია სულიას, კვლავ ჩამოსულიყო ახალციხეს და ზიარებულიყო, რის შემდეგაც გადაცვლილიყო თავის საკუთარ სახლში, სოფელ აბს. დეკანოზს დროზედ შეეტყო ეს ამბავი, საჩქაროდ დამიბარა და ვითარცა დიაჩოქი, თათრულის კარგი მცოდნე, თან წამიყვანა ს. აბს. ვიდრე ჩვენ მივიდოდით, მოლას კიდევ აესრულებინა ყოველივე წესი თათრულის სჯულისა, ესე იგი ებანებინა, შეესუდრა თავიანთ რიგისამებრ და წაეკითხა ყოველივე ლოცვები. მიველით თუ არა, დეკანოზმა მოლა დაითხოვა, თანაც აუხსნა, რომ სულია მართლმადიდებელი ქრისტიანია. შეუხსრულეთ ქრისტიანული წესი და იქვე დაეასაფლავეთო.

— დასვენნათებულნი ქართველნიო, — მოგვითხრობს იგივე მამა ანდრია ჯვარიძე, — დიდის გაქირვებით ნათლავდნენ ახლად შეძენილ ბავშვებს მალულად ხან სადა და ხან სადაო. სოფელ ძველში დღესაცაა მივარდნილ ტყეში (წინად ხშირი და დაბურული იყო) ერთი პატარა წყარო, რომელსაც სახელად ეძახიან „მონათლულ წყაროს“. აი სწორედ ამ წყაროზე ნათლავდა ბავშვებს ს. ძველის მღვდელი ჯერ მამა პავლე ზედგინიძე და შემდეგ მისი შვილი მამა ქრისტეფორეო.

— ძალუა ჩემი, რომელიც შარშან გარდაიცვალა

თითქმის ასის წლისა, შემდეგ მიაშობდა ხოლმე თვის ქორწინების შესახებო: ცხადად ჩემს დროს ჯერის-წერას ვერაინ გაბედავდა, უჯვარის წეროდ კი არაინ ქორწინდებოდაო. ამის გამო ქორწილი მალულად ხდებოდაო. საქორწინონი ახალს ტანისამოსს ვერ ჩაიცვამდნენ, რადგან თათრები შენიშნავდნენ, გახდიდნენ და უპატიურობასაც მიაყენებდნენო: მე სხვებსავით ფარულად წამომიყვანეს ს. ჩუნჩხილგან (ჯავახეთშია) ვაჟის ტანისამოსით და ჯვარი დამწერეს ჩუმად ს. ძველში ერთს შიგნი-შიგან მივარდნილ და ბნელ სახლში. ექვსი-შვიდი რძალ-პატარძალი იწერდა ჯვარსა ერთი და იგივე ლურჯი სამოსლის კაბით, ან თხოვნით, ან ყიდვითაო, ისე შევიწროებული ვიყავით თათრებისაგანაო.

ასეთია ეს სამწუხარო მოთხრობა მოხუცის მთავარდიაკენისა. სამოცდა თხუთმეტმა წელიწადმა განვლო მას შემდეგ, რაც პირველად ოსმალოს ბარბაროსობას მედგარი მეხი დასცა პასკევიჩ-ერევნელმა ქ. ახალციხესთან 15 აგვისტოს 1828 წ., სწორედ ზედ მარიამობა დღესა, მაგრამ ეხლაც არ გამთელებულია მისგან დაწყულულებული ქართველის გული *).

*) ნიშნად ამ ისტორიულ გამარჯვებისა აგებულია ძველი და პატარა საყარაულო მთავარმართებლის თავად ა. ი. ბარიათინსკის მიერ. ომში დახოცილ ათიერთა გვარებიცაა ამოჭრილი ძველზე. ქართველებსაც დაუნთხენიათ სისხლი მესხეთის გასანთავისუფლებლად. აი მათი გვარები: პორუჩიკი თ. ვაჩნაძე, პოდპორუჩიკი თ. სოლოლაშვილი, პრაპორუჩიკი თ. ანილახვარი. კიდევ ორი საეკვო გვარია: სიმონოვი და ბუენოვი. დანამდილებით ვერ ვიტყვით—ქართველები არიან ესენი, თუ რუსები. გიზეტტის წიგნი რომ გვქონდეს ხელში, ადვილად გამოვიკვლევდით ამ გარემობას, მაგრამ ყრუ პროვინციაში ვინ გვადირსებს ასეთს ბედნიერებას.

უნახავი და მოუვლელი არ დამრჩენია თითქმის არც ერთი კუთხე საქართველოსი და ისე დაჩაგრული ერი, როგორც მესხეთშია, არსად არ მინახავს.

მონობისა, შიშისა, მოკრძალებისა და უიმედობის ბეკედია გამოხატული მათს შუბლსა და სახეზე. არ იქნა, ვერ შევეჩვიე აქაური მკვიდრის სიტყვა-პასუხსა და სალამს. „გამარჯვების“ მაგიერ მძიმედ დაგიკრავს თავსა და დაიხრება სწორედ დედა-მიწამდინ. თუ სათხოვარი; ან საქმე აქვს რამე, ისე გთხოვს, როგორც შეჭფერის ჰარამხანაში აღზრდილს საქურისსა, ან მონას, რომელსაც თავის სიცოცხლეში მზე და მთვარე არ უნახავს, ან ღრეკით, ხევწნით, მუდარით და მლიქვნელობით თავს მოგაბეზრებს და აღარ მოგშორდება მეგრულ ციებ-ციხელებასავეით. არც ამაყობა, არც თავმოყვარეობა, აღარაფერი ეტყობათ. ვინც კი ევროპული განათლება იგემა, ან ასცილდა ნეტარ-ხსენებულ ბატონყმურ ატმოსფერას, სწორედ ტანში იშლება, როდესაც ასეთს სიტყვებს ისმენს: „ხელს გკოცნი, ბატონოვო, „აქ თქვენა და მალა ღმერთიო“. საქმის გაკეთება უქრთამოდ, უფეშქაშოდ ვერ წარმოუდგენიათ. თითქმის სამასი წელიწადი სკურავდა მესხი „ფეშქაშების“ მორევში და სხვა, რიგიანი წესი მართვა-გამგეობისა ველარ შეუთვისებია. — სახელოვანი ძველად მესხი დღეს ასეა დაძაბუნებული სულიერად და ხორციელად.

ღვთის წინაშე კი რომ ვსთქვათ, ან რა გასამტყუნარია. ეხლანდელ ვითარებაში ვინ შეუწყა ხელი, ვინ ეცადა, რომ მონობის უღელი მოეშორებინა მესხს, გალონიერებულებიყო ჯერ ნივთიერად და შემდეგ, რასაკვირველია, სულიერადაც. ხეც არ იზრდება მოუვლელად, უპატრონოდ და ადამიანს რა დაემართება, თუ

მამობრივი, მოსიყვარულე გულით გზას არავენ უჩვენებს, ცხოვრებასთან საბრძოლველ იარაღს დროზედ არ მიაწვდის. ჯერ არ მინახამს, ვინმე მოსულიყვეს სოფლად, ხელში სკეროდეს შტო მირტისა და ეთქვას: გეყოფათ ამდენი „მოიტა“, „მოიტა“, ახლა თქვენც მიიღეთ მცირედი რამე მის, ესე იგი „მოიტას“ მაგიერო. ასეთს ვითარებაში მაშ რა მოუვა დაბეგრილს კაცს, რომ არ დაბეჩავდეს და აკი დაბეჩავდა კიდევ *).

IV

შოთა რუსთაველი.

რუსეთის გამოჩენილმა სატირიკოსმა შჩედრინმა ერთს ნაღელითა და გესლით შეზავებულს წერილში გულის კენესითა სთქვა:

— მკითხველო, სადა ხარო?

მწერალი მწერლობს თავისთვის, მკითხველი კიდევ კითხულობს მის ნაწერებს. მორჩა და გათავდაო. არავითარი სულიერი კავშირი არ იკვანძება მათ შორის, არ ებმის ის უხილავი ძაფი, რომლის წყალობით გულის სიღრმიდგან ამონაკენესი სიტყვა მწერლისა უნდა მოხვდეს მკითხველსა.

შჩედრინი ისე მოკვდა, რომ ვერ ეღიროსა სანატრელის „მკითხველისა“ ხილვას.

ჩვენში უარესობაა. აგერ ბ-ნი დუტუ მეგრელი რანაირად სწუხს: მკითხველი საზოგადოება კი არა, თვით

*) ფრჩხილებში ჩასმული სიტყვები და უენიშენა ჩვენ გვეკუთვნის.

მწერალნიც არა გვყავსო და ჰფიქრობს, როგორმე გააჩინოს ეს ყოვლად საჭირო მოღვაწენი. გააჩენს თუ არა ავტორი მწერლებს იმ გზით, რა გზასაც დასდგომია, არ ვიცი, ის კი კარგად ვიცი, რომ ვინც ჩვენში ამ საპატრიო პროფესიას დასდგომია და, შეძლებისა დაგვარად, უმსახურნია, დრო-გამოშვებით მაინც, ვერაფერ გუნებაზე ბძანდებიან.

მართალია, ჩვენ შჩედრინთან ფეხს ვერ გავკიმავეთ, მაგრამ იმის თქმისა არ იყოს, დიდი უბედურებაა „მარტოობა“ მწერლისა, მისის სულის ობლობა.

რით ინუგეშოს მწერალმა, თუ მკითხველი არა ჰყავს, სად მოიპოვოს და მოიკრიფოს ძალა უმადურისა და ძნელის შრომისათვის? ხომ მაჯა დაუდუმდა უმკითხველოთ, ხომ დაუჩლუნგდა გონება და კალამი ხელიდგან დაუვარდა?

— სამშობლოს სიყვარულმა მოგცეს ეგ ძალაო, — ამბობს ბ-ნი პეტრე უმიკაშვილი.

თქვენ პირს შაქარი, უმაგისოდ რა გაკეთდება, მაგრამ სიყვარული ქვა და კლდე ხომ არ არის?! სიყვარულს, ნამეტნავად სამშობლოსას, ზრდა და ლოლიაობა უნდა. ეს კი არსადაა. ხელ-შეუწყობლად ისე ჩაქრება, როგორც წყალ-დასხმული ცეცხლი.

ღიად, მთქმელს გამგონე უნდა.

შარშან „უდიდებულის მესხეთის“ წარსულის თვალის გადავლებამ მკირე სევდა არ აგვიშალა. ამ სევდით შეგპყრობილმა საზოგადოებას მივმართეთ და ესა ვსთქვი: რუველა ეს მკრთალი ნათელია იმ სავსე მთვარისა, რომელიც გამოსცა მესხეთმა კოეზიის სახით. ბედმა წილად მესხეთს არგუნა ერთი უდიდებულესთაგანი მსოფლიო კოეტთა შორის, შეუდარებელი და სხივოსანი, შოთა

რუსთაველი, რომლის წყალობით ქართული პოეზია აღ-
ყვავდა და გაიფურჩქნა, ვით მაისის ვარდი, რომლის მე-
ოხებით ქართული პოეზია გაბრწყინდა, ვით ვარსკვლავი-
და რომლის პოეზიამ „დილის ნიავეივით“ დაჰბერა ქარ-
თულ ტლანქს და უგემურს შაირ-ლექსობას...“

„ერიც პურადი, მხნე, გულადი და დარბაისელი
ჰყავდა მესხეთსა. ვის არ გაუგონია მშვენიერი თქმულე-
ბა ხალხისა: „პირველ თქმულია ძველთაგან სიდარბაის-
ლე მესხისაო...“

დღეს მესხეთს ველარ იცნობთ, აჩრდილი და ნატა-
მალია წარსულისა. ჩონჩხი რა არის, ჩონჩხისთვისაც კი
ვერ შეგვიდარებია რუსთაველის, ბექასი და აღბუღას.
სამშობლო, ისე დაკნინდა მშვენიერი და სიკოცხლით.
სავსე მხარე ძველის ერთიანის საქართველოსი. დღევან-
დელი მესხეთი ერთი რაღაც შემზარავი, თვალ-გადუწე-
დენელი და უსამზღვრო სასათლაფოა. ქართველი მოგ-
ზაური, ქართულის ისტორიის კოდნით შეიარაღებული,
სწორედ დასწვლდება აუარებელ ნანგრევების ხილვით.
დღევანდელ თითოეულს სოფელს სამ-ოთხ ნასოფლა-
რის ადგილ-მამული უჭირავს. ნასოფლარს რუსები „ИУС-
ТОИИ“-ს ესახიან. ყურთა სმენა წაიღო სწორედ ამ „პუს-
ტოშმა“, რომელიც ძალაუნებურად, მხოლოდ, სიკე-
დილსა და უბედურებას მოგაგონებს...“

სათარის და ათაბაგთა პალატის ნანგრევთა ხილვით
გულ-ნატყენი მგზავრი დარდის გადაყრას ვერ მოასწ-
რობს, რომ უფრო სამწუხარო გულ-სატყენს და სამგ-
ლოვიარო სურათსა ჰნახავს. ესაა სოფელი რუსთავი,
ათასგვარ სიბინძურითა და სისაძაგლით სავსე. ერი ამ-
ბობს, რომ აქ დაიბადა შოთა რუსთაველი; ესაა მისი
სამშობლო სოფელიო. გული ნაღველით აგვესება, რო-

დესაც წარმოიდგენ, რომ პარნასის ღმერთთა სწორის, გენიოსის სამშობლოს არე-მარე ასეთ, ენით გამოუთქმელ სიბინძურეს შეუპყრია. დღევანდელი რუსთავი ერთი უხეირო, ოთხ-ხუთ კომლიანი სოფელია, რომელსაც აწ-შევნებს მხოლოდ სასუქის უშველებელი ზვინები. რუსთავში ბინადრობენ ქურთნი, თუ თარაქამანი, ადამიანი ვერას გაიგებს იმათსას. მიწური სახლები ამ ყოველ კულტურას მოკლებულ ველურის ტომისა სულ მთლად ასახიჩრებს სოფლის სურათსა. ქალნი და კაცნი სოფლის შესაფერისნი არიან. იმდენი ქუჩუი დასდებიანთ პირსა და სახეზე, რომ თითქოს დაწყვი-დაბადებიდგან იქვე, ახლოს მოდუდუნე მტკერის წყალი მათ არ მიჰკარებიანთო. ასეთია მათი სამოსელიც, დასტამალად ქცეული. დღეს შოთა რუსთველის მომხსენებელნი ეს ქუჩუიანნი და პირუბანელნი თარაქამანი, თუ ქურთინები არიან!.. უბედურების სიზმრადაც არ მოვლანდებათ, თუ რა კაცის ნასახლარზე ბინადრობენ...

რუსთავი ტიტველა, ხრილკის მთის კალთაზეა შეფენილი. წინ მშვენიერი, პოხიერი ველია დაცემული. პატარაა, მაგრამ ლამაზი. — ორი არ მეგულება ამისთანა მომცემი და ნაყოფიერი ველი მთელს ამ მხარეს...

რუსთავის პატარა ველზე ერთად-ერთი პატარა გორაკია ამართული, თითქოს განგებ აქ ვილასაც მიწა დაუყრიაო. სიმაღლით ორი-სამი საეენია, სიგანეც სულ ათიოდე საეენი ექნება. სწორედ ზედ გამოჰკრილი ბექია ძეგლისათვის. აქ რომ შოთა რუსთველს ძეგლი, ან ობელისკი დაედგას, მშვენიერება იქნება. ბექი მტკვარს ზედ თავზე დასცქერის, იქვე შარა გზაა, შოსსე. გამვლელ-გამომვლელი თვალს ვერ აარიდებს ძეგლსა, ისიამოვნებს იმ ფიქრით, რომ შვილნი უმაღურად არ მოჰქ-

ცევიან სახელოვანს მამას და იმასაც ხომ გაივლებს გულში, რომ გავერანებული მესხეთი ოდესმე ბედნიერი ყოფილაო...

ნუ თუ დღევანდელი ქართველი ისე დაკნინდა, ისე დაძაბუნდა, რომ მცირედი ფასის ძეგლიც ვერ მოუხერხებია შესანიშნავის პოეტისათვის? ერთმანეთის ძიძგნამ და ქორიკანაობამ სული ამოგვართვა და განა დრო არ დადგა ერთსულად მოქმედებისათვის? იცოცხლეთ, დროა ზურგი შევაქციოთ ჩვენს დამლუპველს საეროვნო სენს, მაგრამ სადაა!...^{*})

წერილი შოთას შესახებ თავდებოდა ასეთის მოწოდებით: „სიყვარული კიდევ, როგორიც უნდა იყოს, მსხვერპლს მოითხოვს. უამისოდ სიყვარულს სიყვარული არ ეთქმის. მაშ, შევსწიროთ ისტორიის სიყვარულს მცირედი მსხვერპლი და აუგოთ შოთას რუსთავის ლამაზ ველზე პატარა ობელისკი მაინც!“

წელიწად ნახევარი გავიდა მას შემდეგ, რაც ეს სტრიქონები დაიწერა და კრინტი, კრინტი რა არის, ისიც არავის დაუძრავს! ნუ თუ შოთა რუსთაველი ღირსი არ არის მცირედის ძეგლისა, ან ობელისკისა? სხვაგან მესამე ხარისხოვან მწერალთა, სამხედრო და საერო მოღვაწეთა ძეგლებით სავსეა მოედნები და ქუჩები, ჩვენ კი რუსთაველისათვისაც ვერ მოგვიხერხებია ძეგლის დადგმა.

მაშ, რამ აღზარდოს ეროვნული გრძნობა ახალთაობაში, რამ ანუგეშოს მოხუცთა თვალი, თუ რუსთაველის სახესაც ყოველ დღე არ დაინახავს? ეროვნული

*) იხ. „მოამბე“, 1902 წ. № 3. წერილი ა. ფრონელისა „დიდებული მესხეთი“.

გრძნობა, თავმოყვარეობა, სიამაყე, არც კიანი კაკალია და არც დამპალი კანკური, რომ თავის თავად ზეციდან ჩამოვარდეს. პატრონობა უნდა, თორემ ისე გაითვლება მთელი საქართველო, როგორც გაითელა შესანიშნავი ისტორიული მესხეთი, ეს საქართველოს ათინა. ეროვნულ გრძნობა-თავმოყვარეობის აღზრდა-გაფურჩქვნას კი ისე არა უწყობს რა ხელსა, როგორც დიდებულ წინაპართა ხსოვნა-მოგონება.

ნართალია, საზოგადოებამ და მკითხველმა ყური მოიყრუეს ჩვეულებრივ, არ გაგვამხნევეს ეროვნულ საქმისათვის, მაგრამ მაინც იმედს არა ვკარგავდით. თუ ვერ დაემთავრებდით განძრახულ საქმეს—ძეგლის დადგმას, დაწყებით მაინც დავიწყებდით. უიმედო, უოცნებო სიცოცხლე, მოგეხსენებათ, ჩირად არა ღირს. რა სიცოცხლეა ის სიცოცხლე, როდესაც სამშობლოს ბედნიერების იმედი ჩაგიქრება გულში და მარტოდენ იმით სულდგმულობ, რომ დღეს ხომ კარგად გიახელ ერთ კიქა არაყს, ნახევარ ბოთლ ღვინოს, ნაქერ მსუქან ღოშს იმერულ ღომით, სალიანის ხიზილალით, რუსულ ბორშჩს წითელის ბადრიჯნით და სხვა-და-სხვა; ხვალაც თუ ეს ულეველად მექნება, ღმერთს მადლობას შევსწირავ ამ სიტყვით: „გმადლობ, უფალო, რათა განმადღე მეო“. სწორედ რომ ფუქია ასეთი სიცოცხლე!

ღიად, იმას მოგახსენებდით, გულო არ გაგვტეხია და არც იმედი დაგვკარგვია. მართლაც ნატვრა აგვისრულდა და პირველი ნაბიჯი უკვე გადავსდგით.

ამ გაზაფხულის პირზე, ერთ პატარა კრებაზე კი ქართველის სახლში სიტყვა ჩამოვარდა რუსთველის ძეგლის შესახებ. დამსწრეთ სიამოვნებით მიიღეს წინადადება—შევაგროვოთ თანხა და საქმეს შევუდგეთო. ყველა-

ზე პირველად ჯიბეს გაიკრა ხელი ილია ზურაბის ძე გოპაძემ და გადასცა ა. ყიფშიძეს ოკლახუთი მანათი. უკანასკნელმაც ოკლახუთი მანათი გამოიღო და ამ გვარად შესდგა პატარა თანხა, სულ 50 მ. ნივთიერად ლონიერნი ქართველნი უფრო მეტს დაჰპირდნენ საქმის დამწყობს და შეიძლება მალე საქმარისი თანხა შეიკრიბოს. ფული, რასაკვირველია, უნდა ეგზავნებოდეს „წ. კ. გამაერცელებელ საზოგადოებას“ შესანახად და სათავენოდ.

არ ვიცი, რამდენი დასკირდება რუსთველის ძეგლს, ან ობელისკს. ესთხოვ ჩვენებურ მექანდაკეთ შეიმუშავონ გეგმა ძეგლისა, ან ობელისკისა და აღნიშნონ ვარაუდით რა დაიხარჯება ფულად. მე ჩემად სრულიად საქმარისად მიმაჩნია მცირე სასყიდლიანი ძეგლი. ეხლა მეტი არ შეგვეფერის. როდესაც ჩვენი სამშობლო წელში გასწორდება, გალონიერდება ნივთიერად და განათლებით, მაშინ იზრუნოს უფრო ძვირფას და რუსთველის ნიკის შესაფერ ძეგლზე. ჯერ-ჯერობით პატარაც გვეყოფა.

ფიქრობ, რომ გულგატეხილი საზოგადოება უგულებელს არა ჰყოფს ამ საქმეს და არ დაიშურებს წვლილს საეროვნო საქმისათვის. ოთხას-ხუთასი თუმანი იმაზე მეტად არ გაგვალარბებს, რაცა ვართ ახლა. რამდენსა ვხარჯავთ უაზროდ, აქ კი ერთი მანათიც ნამდვილ საქმეს მოხმარდება. იმედია „წ. კ. საზოგადოება“ უარს არ იტყვის და მიიღებს ფულს შესანახად, ვინც მოისურვებს და გადასცემს ამ საგნისათვის*).

*) რამდენიმე მასათი უკვე შეგროვილია რუსთველის ძეგლისათვის და ინახება „წ. კ. საზოგადოებაში“, მხოლოდ გამორკვეული არ არის, სად დაიდგას იგი.

ჩვენ პირადად კმაყოფილნი ვართ, რომ დიდის ხნის ნატვრა აგვისრულდა და საქმე იწყება. დანარჩენი საზოგადოების გულმხურვალებაზე ჰკიდია.

დასასრულად, შემდეგი უნდა მოვახსენო მკითხველსა. შარშან დაიბეჭდა წიგნი პროფესორის ნ. მარისა, სახელად: „Тексты и разысканія по армяно-грузинской филологіи, т. IV“. ბ-ნი მარი სკდილობს დაამტკიცოს ამ გამოკვლევაში, რომ პოემა „თამარიანის“ ავტორი თვით შოთა რუსთაველია და ჩახრუხადე მისი გვარიაო. მარი აი რას ამბობს რუსთაველის ლექსების დირსებაზე:

„И такъ, проникновенно выраженное въ чарующе звучныхъ стихахъ національное настроеніе грузинъ XII-го вѣка находитъ не замирающей откликъ въ длинномъ рядѣ поколѣній и продолжаетъ жить и тогда, когда преданъ полному забвенію самъ памятникъ (Тамаріани), содѣйствовавшій популярности въ Грузіи идеализованнаго образа грузинской царицы (Тамары). Храмъ забытъ и запущенъ, но звуки раздававшихся въ немъ близкихъ сердцу нѣснонѣній еще слышны, какъ дальнее эхо. Кто зодчій? Кто былъ такъ народенъ по духу, что въ придворныхъ одахъ далъ невольное выраженіе національно-государственнаго идеала? Кто былъ такъ властенъ надъ роднымъ язкомъ, что въ офиціально-торжественныхъ нѣсняхъ, сложенныхъ для развлеченія блестящаго двора, такъ ярко отразилъ простые, родимые звуки, дорогіе каждому грузину? Если-бы памятникъ (Тамаріани) дошелъ до насъ безъ рукописнаго преданія объ его авторѣ, то едвали бы кто сталъ оспаривать

его принадлежность тому неподобному художнику слова, который силой лишь чарующей музыкальности своихъ стиховъ сумѣлъ придать національный грузинскій обликъ персидской переводной повѣсти и сдѣлать ее народнымъ достояніемъ. Я имѣю въ виду Шоту Руставели, автора Барсовой кожи“ (გვ. 51).

მეორე ადგილს (გვ. 73) ბ-ნი მარი ასე იხსენიებს შოთას: „гениальный грузинскій поэтъ“.

ბ. მარს ემდურის ქართველი საზოგადოება, ჯერ დედანი არ გიპოვნია და რა საბუთით მიგაჩნია ვეფხისტყაოსანი ნათარგმნ პოემადაო, მაგრამ ესეთი აზრი პოემაზე არ უშლის პროფესორს დიდად აქოს რუსთველი, რაიცა ზემოდ მოყვანილ ამონაწერიდან ცხადადა სჩანს. მარიც, თავის მხრივ უკიეინებს ქართველობას: „большенно-острое желаніе видѣть въ поэмѣ цѣлкомъ грузинское народно-національное произведеніе“ (გვ. 55).

V

ვ ა რ ძ ი ა.

გაგონებით ბევრს გაგვეგონებათ ვარძიის სახელი, ნახვით კი, დარწმუნებულნი ვარ, ბევრს არ გენახვებათ. ქართველს არ უყვარს მოგზაურობა. მივლა-მოვლა და შესწავლა თვის მშვენიერის სამშობლოსი. საოცარია სწორედ ეს ამბავი. ძველად ჩვენები ხშირად ანებებდნენ თავს სამშობლოს და შორს მიდიოდნენ. მცირე აზია, ერუსალიმი, სინას მთა, დასავლეთი ევროპა, იტალია,

სტამბოლი, რუსეთი და სხვა, ყველგან მიდი-მოდრიოდნენ ქართველნი. საყიზილბაშოს ხომ ნულარ იტყვიოთ. თავრიზ-თეირანის გზა ისე ჰქონდათ გათელილი, როგორც დღეს. გოლოვინის პროსპექტი აქვთ გატყეპნილი უსაქმო ქუჩის მტკეპნელებს. მარტო მეფე გიორგი XI მოიგონეთეს საოცარი მეფე-რაინდი შავარდენივით დაჰქროდა სპარსეთის მაშინდელ ტერიტორიაზე რალაც ხუთასიოდე ქართველით. ძვლებიც იქ ჩაყარეს ვაჟაკებმა უნაყოფოდ და უსარგებლოდ თვისის დამწვარის და დადაგულის სამშობლოსთვის. ქართველს, როგორც სამხრეთის. მკვიდრს, ერთს ადგილს არ უნდა უყვარდეს ჯდომა, რადგან აწმორება იცის. მაგრამ მაინც ეხლანდელს ქართველს არ უყვარს მოგზაურობა, არ ეტრფის მიხედ-მოხედვას ევროპიელივით.

კარ-ჩაკეტილობა წინადაც არა გვეყვარებია, ვიყავით და ვართ სტუმართ-მოყვარენი, გულ-ახდილნი, ბუნებახელს გვიწყობს გავინძრეთ, თუ შორს არა, შინ მაინც მივინძრ-მოვინძრეთ, მაგრამ არა, არ იქნა, ვერ შევეჩვიეთ მოგზაურობას. ასე გასინჯეთ ქურნალი „მოგზაურიც“ დავაარსეთ, მაგრამ ვერც ამან შეგვაყვარა მოგზაურობა.

რა გაეწყობა, წუწუნით საქმე არ გაიჩარხება. მე მაინც ჩემსას არ დავიშლი და ხანდახანობით ნახულსა და გაგონილს გაგიზიარებთ. საგანი საუბრისა ამ ჟამად ვარძია გახლდება. ისტორიულს და გეოგრაფიულს ცნობებს ბევრს არას მოგახსენებთ. ეს ვისთვისაა საჭირო? სულ ერთია, სანახავად არავენ გამოიქცევა და ჩაშასადამე, ამ ცნობებს ვერ გამოიყენებს. ისიც კი უნდა მოგახსენოთ, რომ ვარძიის შესახებ ისე მცირეა ჩვენი ლიტერატურა, რომ სირცხვილით იწვი, ოდეს გაითვალის-

წინებ ამ გონების მკლე ნაწარმოებს. ქართულად მხოლოდ ერთი საკმაოდ ვრცელი წერილი მახსოვს ჯავახეთიდან გ. შატბერაშვილისა, რუსულად კიდევ პატარა წიგნაკი დეკანოზ დ. ლამბაშიძისა და ორიოდ სიტყვა ე. გ. ვეიდენბაუმს აქვს ნათქვამი რკვეკასიის გზის მაჩვენებელში“. მე მეტი არ ვიცი. შეიძლება რამე გამომეპარა, მაგრამ ვგონებ, რომ არა. მცხეთის ტაძარივით ვარძიას ჯერ საკუთარი-ნატროშვილი არ გასჩენია.

შარშან-წინ ორჯერ ზედი-ზედ ვნახე ვარძია. პირველად გზა ლეპისის სამამასახლისოდან გვეკონდა გასავლელი: ორი დღის სიარულმა ამ გახრიოკებულ და მელოტივით მოტიტვლებულ ქვეყანაში არდაგანის ოლქის სამზღვარზე, ტანში მოგეშალა. ზაფხულობით მზე ისე იკბინება, ცხარე, გავარვარებული სხივები ისე გვესობა სახეში, თითქოს განგებ ეკლითა გვიხვლეტენო. ნახი კანი ვერ უძლებს მხვლეტავ სხივებს, ბურცდება და სკდება. სახე თანდათან ილანძება და ილეწება. მტვერი და ქარი ზომ ისე შაშხავს აბურცებულს და ალაგ-ალაგ დახეთქილს კანს, რომ არ იცი, სად წაიღო და როგორ დაშალო ტანჯული პირი-სახე. ქალაქურ კოსმეტიკის ნაწარმოები, როგორც ვაზელინია და მისი მზგავსი ნაირ-ნაირი წამლები, აქ, ექვსი ათასის ფუტის სიმაღლეზე, ყოვლად გამოუსადეგარი და უძლურია. ბატის სუფთა ქონი არ მიცდია, მაგრამ ვგონებ, რომ ეს შინაური წამალი აჯობებს ვაზელინსა და გლიცერინს.

კლდეში გამოქვაბული ვარძიის მონასტერი მტკვრის, ვიწრო ხეობაშია, საცა ზაფხულობით ძალიან ცხელა, ზამთრობით თბილა. ზემოდ კლდის თავზედ 20--25 გრადუსიანი ყინვა იცის, ძირს კი ამავე დროს ზომიერი ჰავაა. ვარძიის ქვემოდ, სოფ. გოგაშნის პირდაპირ,

მტკვარი ისე მოჰქუხს, როგორც თერგი: საამოა მისი შხუილი და ბობოქრობა: წყნარ და მთვარით გაკაშკაშებულს ღამეს. აზვირთებულის თერგის „სიძლიერე“ და „სიცოცხლე“ ილია ქავეკავაძემ პოეტურად შეამკო. მის ზვირთებსა და ტალღებში პოეტმა „სიცოცხლის“ სიმბოლო დაინახა. აქ, ვარძიასთან; ან ზემოდ მტკვრის თერგისებური ხათქა-ხუთქი რომ ენახა პოეტს, მაშინ თერგის მაგიერ მტკვრის მოუსვენრობა გახდებოდა „სიცოცხლის“ სიმბოლოდ. ხომ სულ ერთია, მაგრამ, რაც უნდა იყვეს, გულს უფრო იამებოდა მტკვრის „გაპატიოსნება“, მისი სიცოცხლის აღნიშვნა, რადგან მტკვარი ჩვენია სათავიდან შესართავამდე. დღეს კი მარტო ნ. ბარათაშვილის „მოდუდუნე“ მტკვარი გვაქვს. გიჟმაჟობა ადამიანს ახალისებს, დუდუნი სევდასა ჰგვრის. მაგრამ რას იზამ, ასეთი ყოფილა ბედის წერა.

თერგივით მტკვარი შეზღუდულია მაღალის მთებით. ძირობებში ბაღებია გაშენებული. ზემოდ, მთის წვერებზედ და შემდეგ გაეკებულ მინდვრებზე, ჩირგვი არ მოიპოვება; აქ მტკვრის პირას, ხეხილია გაშენებული. კონტრასტი სწორედ დიდი და ძლიერია.

მონასტერი გამოქვაბულია მტკვრის მარცხენა ნაპირს მდებარე კლდის ფერდობაში. კლდე თანდათანობით კი არ ეშვება მტკვრისაკენ, არა, ისეა ჩაშვებული, თითქოს სარი დაურსვიათო. ამისათვის, სამხრეთ-ჩრდილოეთიდან ვარძიას მისასვლელი გზები ცუდი აქვს, აღმოსავლეთით (სოფ. ხერთვისიდან) და დასავლეთით (ჩილდირიდან, არდაგანის ოლქი) ვაკე გზებია.

პირველ გზობას სოფ. აგარიდან ჩავედით ვარძიას. ამ სოფლის მკვიდრნი ნახევარი მართლ-მადიდებელი ქართველია, ნახევარი გამაჰმადიანებული ქართველობა.

გვარები სულ იმერულია. ყური მოვკარ, ვითომც ეს ქართველობა იჩერეთიდგან იყოს გადმოსული. ისეთი სიბნელეა გამეფებული ამ უბედურს კუთხეს, რომ როგიაანად ვერას შეიტყობ. რორიოდრე ქართველთა სოფელს დღეს თარაქამა ახვევია გარსა. აბა თარაქამის ხსენებაზე სიბნელის მეტი რა უნდა წარმოიდგინოთ?

გზა რომ ვახსენე, მართლა გზა არ გეგონოთ. დაქანებულ მთა-კლდის ფერდობზე ზოლივით მიიკლაკნება მიხვეულ-მოხვეული საცალფეხო ბილიკი. დიდ ხანს ვიარეთ ამ უბედურისა და კისერ-მოსატეხი ბილიკით. ეხლაკ ვერ გამიგია, როგორ დადის ხალხი ზამთარ-ზაფხულ ამ საეშმაკო და სატარტაროზო გზით. საკმარისია მკირედათ ფეხი მოგისხლტეთ და დაეშვებით ძირს, უფსკრულში, სადაც ყვავ-ყორანიც ველარ მიაგნებს თქვენს დაფლეთილს ლეშსა. ვიდრე სამშვიდობოს ჩავიდოდი, მე ჩემი დამემართა. თავს ბრუ დამესხა, მუხლები ამიკანკალდა, გულმა აჩქარებით ძაგ-ძაგი დაიწყო. ჩემს თანამგზავრსაც ჩემსავით გასკირვებოდა ჩამოსვლა. ეს მერე გამოირკვა, წინ მილიოდა და მაშინ რას გაეიკებდი. ღმერთმა უშველოს აგარელებს. ზოგი წინ მიგვიძლოდა, ზოგი უკან და გაკირვების დროს შეგვეშველებოდნენ ხოლმე. ბატონს უჩიოდნენ და თურმე ეს იყო მიზეზი, რომ ბლომად გამოგვეყენენ და დიდხანს არ გეშორდებოდნენ. უნდოდათ დაენახებინათ ის საძოვარი, რომელიც ბატონმა ჩამოართვა. ცხვირწინ ვერას ვხედავდი, საძოვრისას რას გაეიკებდი. გაკვირვებით კი ეხლაკ მიკვირს, იმ კისერ-მოსატეხ კლდეებზე რა პირუტყვემა უნდა მოიკიდოს ფეხი, რომ მოსწიწწნოს დამქნარი ბალახი, ან რაა კაცის ბუნება, რომ სადაეოდ გახადო უმგზავსი კლდე და ააყაყანო მის გულისათვის ეს ბუნების შეილნი?

მეორე გზა ლეპისის სამამასახლისოდან ვარძიას ს. ზედათმოგვიდანაა. ამ სოფლის მკვიდრნიც მართლ-მადიდებელი ქართველობაა იმერულის გვარებით. სულ „ძე“, „შვილი“ არსადაა. ამ გზით არ მივლია, მაგრამ აგარისას არ ემჯობინება. მაზრის უფროს გაველო ამ გზით ჩემზე წინ და სულ ბედს იწყევლიდა. ეს ყველა კარგი, მაგრამ ვარძია როცა ჰყეავოდა, ნუ თუ მაშინაც ასეთი მისასვლელი გზები ჰქონდა? ეს შეუძლებელია. ვარძიიდან 10—12 ვერსის მანძილზე ს. კარზამეთია. დიდებული ტაძარი დაუწყვია თლილის ქვისა მაწყვერელს (აწყურის ეპისკოპოსს), საეენ ნახევარი აუტანია, მოსულან ოსმალონი და დარჩენილა ტაძარი დაუმთავრებელი. კარის თალზე ხუცური წარწერა გვიამბობს აღმშენებელის ვინაობას. განა შესაძლებელია, რომ ვარძიიდან 10 ვერსის მანძილზე დიდებული ტაძარი შენდებოდეს და გზა-კვალი კი არ ჰქონებოდა მონასტერს ლეპისისაკენ? ზეპირ-გადმოცემა ამბობს, რომ თამარ მეფეს ზედა სოფლებში (დღესაც კი საძოვრებია) დიდძალი ძროხა ჰყავდაო, იქ მოწვევლილი რძე მონასტერ-სასახლეში მიღებით ჩამოდოდაო. თუ ციცაბო კლდეზე მიღები დააწყეს რძის სადენად, უეჭველია, გზასაც გამოჰქვებამდნენ კლდეებში, ხოლო დრომ და ეამთა ვითარებამ ალბად დააქცია. ესლანდელი აგარისა და ზედათმოგვის ბილიკები კი „დღევანდელი“ ქართველის უნარია.

როგორც იქმნა, ჩავედით ძირსა, მტკვრის ნაპირას. მცირე მანძილი გავიარეთ და დავინახეთ მონასტრის დანგრეული ზღუდენი და დაზიანებული სამრეკლო. მონასტრის სენაკებს, ეკლესიებს და გალავანს მხოლოდ ერთის მხრიდან დაინახავთ კარგად, მტკვრის მარჯვენა ნაპირიდან. უფრო კარგად იმ მალლობიდანა სჩანს, სადაც და-

ფენილია ორი ქართველთა პატარა სოფელი: გოგაშენი და აფნია.

დღევანდელი ვარძია, კლდეში გამოქვაბული მონასტერი, ეს დიდებული ნაშთი დიდებულის წარსულისა, მინგრეულ-მონგრეულია, გავერანებული, პატივსა და დიდებას აყრილი, გვირგვინ-ახდილი და კერა-ჩამქრალი. უპატრონოდ დარჩენილს მონასტერს სტიქიონი უფლობს და ნულარ გაგიკვირდებათ, თუ მისი სენაკნი ხელიკითა და ღამურათა ბინად გადაქცეულა.

სიტყვით ვერ ვიტყვი იმ გულის სიმწვავეს, რომელიც ჩემს სულიერს არსებას მოედო, ოდეს ვიხილე ეს შეუბრალებელი გავერანება და გაოხრება-გატიალება. უნებურად, ოცნება-ფანტაზიამ გამიტაცა, ბურბუშელასავით დამტაცა ხელი და თავის დაუსრულებელ სამეფოში ამომაყოფინა თავი. ხილვა ვარძიისა, მისი შესწავლა სრულიადაც აღარ მეპიტნაებოდა, ფასი და გემო დაუკარგა დროებით მის ნანგრევებს, გონება ბურუსში გაეხვია, ხოლო ოცნება ცეცხლივით აპრიალდა. ნუ თუ ეს მინგრეულ-მონგრეული ვარძია სიმბოლოა დღევანდელის საქართველოსი? „ყაჩაღობა“ ხომ დღესაც არ შეწყვეტილა? გულისა და სულის ამომგლეჯი ყაჩაღი უფრო სასტიკი და საშიში არ არის, ვიდრე თოფ-იარაღიანი ფირალი? ვინც მახვილით პარპაშებს, მახვილივე დალუპავს. სულისა და გულის „ნადირს“ რილათი უნდა შეხვდე! ამის უებარი წამალიც არის. ესაა ხასიათის სიმტკიცე, სიკაჟე სულისა, გარჯა-მომჭირნეობა და თვით ცნობიერობა. ვაი რომ ვკოკლობთ და გვაკლია ეს თვისებანი, თორემ, იცოცხლეთ, ბუხსაც ვერავინ აგვიფრენდა.

კლდის მესამე სართულში სახელმწიფო საბჭოს დარბაზია, სიგრძით თორმეტი არშინი. ეხლა ამ დარბაზს

დივანხანას ეძახიან. შიგა სდგას სამეფო ქვის ტახტი, დარბაისელთა და მსაჯულთა საჯდომნი, რასაკვირველია, ქვა-კლდისავე, სხვა-და-სხვა ადგილს ამოკრილია თახჩები. ზოგი ხატების დასასვენებლად, ზოგი კანონთა დასალაგებელია. იქვე ცალკე პატარა ოთახია გადაწყვეტილ საქმეთა და სიგელ-გუჯართა დასაცველად, ანუ ეხლანდელი არქივი...

დივანხანის თავზე ცალკე ოთახია, სიგრძით 1) არ-შინი, სიგანით 6. ზეპირ-გადმოცემით თამარ-მეფის საწოლი და მოსასვენებელი ოთახი ყოფილა. საკუქნაო და სალოგინე ცალკეა, სადარაჯო ოთახი კიდევ ცალკე. ნეტა რა ხელმა და მარჯვენამ გამოჰკვეთა ეს აუარებელი ოთახ-სენაენი?

დარბაზი მტკვარს თავზე დასცქერის. ამ სიმალიდან მჩქეფარე, მაგრამ »უიღბლო« მტკვარი პატარა მდინარედ მოსჩანს. მისი შუილი, ძირს ძლიერი, ხოლო ზევით დანაზებული და მუსიკალური, დილაობით და ღამ-ღამობით, როცა ბუნება დაწყნარებულია, დარბაზს სწვდება და სიამოვნებას ჰფენს »სენაკთა სამეფოს«. სწორედ ნეტარებაა ამ დარბაზიდან აღმოსაველეთისკენ ექერა, ფანტაზიის შემწეობით თამარის მეფობის ხილვა, წარმოდგენა და გათვალისწინება ამ საკვირველის დედაკაცის ძლევა-მოსილებისა.

უნებურად, იმავე ცხოველ ფანტაზიის დახმარებით, მინგრეულ-მონგრეული, მტვრითა და ნაგვით სავსე დარბაზი, ანუ დივანხანა გავამშვენეიერე, მოვრთე, მოვკაზმე თამარის შესაფერად, სამეფო ტახტზე დავაბძანე თვით »ბრწყინვალე« მეფე, მდივანთა ადგილებზე. ჩავამწკრივე თამარის დროის დარბაისელნი: სასულიერო, საერო და სამხედრო მოღვაწენი და გავმართე ბკობა, თამარის თავ-

მჯდომარეობით. გონების თვალთ სულ ადვილად წარმოვიდგინე ყველა ის დიდებული საქმენი, რაც ამ ობობას ქსელით გაბლანდულს დარბაზში გაირკვა და გადასწყდა. ხომ ბავშვობაა ამის თქმა, მაგრამ მაპატივეთ. დანენანა, სწორედ გული მეტყინა, რომ მეც მონაწილეობა არ მიმიღია მაშინდელის სახელმწიფო საბჭოს საქმიანობაში, რათა სავსებით, სრულის მოქალაქობრივის უფლება-მოსილებით ერთი წუთი მაინც მეცხოვრა, ერთი წუთი მაინც გულ-მკერდს ლაღად ამოესუნთქა. მაგრამ მონობაში დაბადებული და აღზრდილი, მორჩილებას და დატუქსევას მიჩვეული, დაკნინებულის თაობის შვილი, იმ თაობისა, რომელსაც „სამშობლოდ“ ის სოფელი მიაჩნია, სადაც თვითონ დაბადებულა და რომელსაც „იმერი და ამერი“ სხვა ტომის და ერის კაცად მიაჩნია, ღირსი კი ვარ უმაღლესი სამოქალაქო ბედნიერებისა? გული გაგვიტყდა, სამშობლოსთვის თავ-დადებაზე ფიქრსა და ზრუნვას გადავეჩვიეთ. ჩემი თუ არა გჯერათ, აბა, მონისმინეთ, რასა სთხოვს მხცოვანი პოეტო აკაკი განსვენებულის პეტრე უმიკაშვილის სულსა: შეგვავედრე ზეცასაო,

„რომ ჩაგვიბეროს მალლით ძალი
ჩვენ აქ, დღეს გულ-გატეხილებს,
და გვასწავლოს სამშობლოსთვის
თავ-დადება შვილი-შვილებს“.

კარგად ვიცი, რომ მოქალაქობრივი ბედნიერება კიდან ჩამოყრილი მანანა არ გახლავთ. დიდი შრომა და გარჯაა საჭირო მის საშოვნელად. ნატვრით და ოცნებით ვერას გავხდებით, ფონს ვერ გავალთ. მაგონდება თავადი ბისმარკი, ეს რკინის კაცი, მისი ფოლადივით მაგარი, მკაცრი და თან გესლიანი, მხამიანი სიტყვა, რომ-

ლითაც ბერლინის კონგრესზედ მიჰმართა ერთს სამშობ-
ლოს აღმადგენელს სასულიერო წოდების მოღვაწეს.
ითაკილა „მოღვაწემ“ შხამიანი, მაგრამ მართალი სიტყვა,
გაებუტა ბისმარკს და მეორე დღეს სადილად არ ეწვია,
მაგრამ რაო? ბუტიაობით რომ „ჩატეხილი ხიდი“ კეთ-
დებოდეს, ან „დანგრეული ოჯახი“ შენდებოდეს, შენი-
მტერი, დღევანდელი მაკედონია „ბუტიაებით“ გაივსე-
ბოდა და მაშინ იქ კაცს აღარ გაეველებოდა.

VI

გზის მაჩვენებელი და ხელმძღვანელია საჭირო, თო-
რემ, თუ ის არა გვყავს, ვერას გახდები, სწორედ და-
იბნევი ამ აუარებელს გამოქვაბულს სენაკებში. მღვიმე-
სენაკნი რამდენსამე სართულადაა გამოქვაბული. ერთ
სართულიდან მეორეში ასვლა ადვილი არაა, და ცოტა
იყოს, სახიფათოა, რადგან ალაგ-ალაგ ქვის კიბენი გა-
ხეხილია, ჩარეცხილა და დამტერეულა. ღმერთმა უშვე-
ლოს დროებით ვარძიაში მყოფს, ერთს ქართველს ყმაწ-
ვილს! იმან გამიწია წინამძღოლობა და ყველაფერი მაჩ-
ვენა. დათვლით ვერ დავთვალე, რამდენი სენაკია, ზოგი
ამბობს ათასზე მეტიაო, ზოგი ნაკლებს ამბობს. სიგძე გა-
მოქვაბულ მონასტრისა თითქმის ერთი ვერსი იქნება.

გზის მაჩვენებელი წინ გამიძღვა და მიმიწვია— მომ-
ყეო. დალოცვილი ისე დახტოდა, თითქოს ქურციკი
იყოსო. ფეხებზე მესტის მსგავსი ნაზი ტყავი ჰქონდა აკ-
რული. მე კი... საცოდავი ვიყავ. ვერანა და მუდრეგი
საგზაო წაღებს რომ ეტყვიან, ის მეცვა. სიცხე-პაპანაქე-
ბისაგან ისე გაიფშიკა, როგორც ურიის მკედარი. მოდი
და მიჰყე ამ ფეხსაცმელით სიცოცხლით სავსე ჰაბუკს!

წინამძღოლი ერთს ციკაბო კლდეს მიადგა და გაჩერდა. შემომხედა, მობძანდით და ზემოდ აცოცდა. შიშით კინამ გული გამისკდა. ციკაბო კლდეზე საფეხურებისა მებუთედი აღარა სჩანდა. რალაც წვნიკი ხარიხა გაედოთ და ამ ხარიხის შემწეობით უნდა აესულიყავით. თაშარ მეფის სარდაფში. რას ვიზამდი. მივყე წინამძღოლს, მაგრამ ვაი ამ მიყოლას! სარდაფი საესეა ჩაკირულ ღიდ თუ პატარა ქვევრებით.

ღმერთო, ეს რა ძალაა, რა ცხოველი სიძლიერეა, რომ ხუთ სართულად კლდე დახვრიტო, ათასამდე საცხოვრებელი ოთახი, დიდი და პატარა, გამოჰკვეთო, რამდენიმე დიდი და პატარა ეკლესია გამოჰქვაბო წერაქვით და მაინც არ იკმარო, არ შედრკე! ქვევრების ჩასაყრელად ხელახლა გაუპიათ ცივი გული კლდისა!..

სენაკებს რომ მოვრჩით, ეკლესიები მოვიხილეთ. მღვთის მშობლის ეკლესიის გარდა, დანარჩენები, თაბორისა, მაგალითად, სიგძით შეიდი არშინია. სიგანით ოთხი. ეკლესიათა კედლები ბევრგან წაბლალულია რუსულქართულ-სომხურ წარწერებით. ჩაუკვირდი რუსულქართულ წარწერებს და გავოცდი. ბევრ ჩემ ნაცნობის სახელი და გვარი ამოვიკითხე და შემრცხვა მათ მაგიერყველაზედ დიდად მაშინ გავოცდი, როცა ვიპოვე აწ განსვენებულის თავ. თარხნიშვილის სახელი და გვარი. სწორედ ღვთის წყრომაა და უბედურება ჩვენს თავსა! აღბად, მართალი უთქვამს ცნობილს მოღვაწეს ქ. გორში: ქართველები ისე ავზნიანი და უბედურები იყვნენ ძველადვე, რომ ღვთის მშობელმა ხელი აიღო და აღარ მობრძანდა ქრისტიანობის საქადაგებლად, თუმცა ეს ქვეყანა ჰხედა წილადაო.

განსვენებული თ — შვილი განვითარებული, შესმე-

ნილი კაცი იყო, ყველას საყვარელი, რიგიანი და საპა-
ტიო თანამდებობის პატრონი და ნუ თუ არ ეყურებო-
და, რომ შეითიხვნა, შებღალვა წმიდა კედლისა, წმიდა
სახლისა, სადაც თამარ მეფე საათობით იდგა, ლოცუ-
ლობდა წმიდის გულით და ავედრებდა ღმერთს თვის
ერსა, უდიდესი დანაშაულია სამშობლოს წინაშე?! ნუ
თუ არ ესმოდა რომ დიდებულის წარსულის ნაშთს
მუხლ-მოდრეკით და მოწიწებით უნდა ეუმზერდეთ? არ
მესმის რა მარჯვენამ უნდა აიღოს ნახშირი და გაგლი-
სოს წმიდა ნაშთი თვისის გვართა და სახელით, რომე-
ლიც არავისათვის არაა საინტერესო, მეგობართა და მახ-
ლობელ ნათესავთა გარდა. ვილაც ნინო აგულოვისა და
ს. ყიუშიბაშოვი რაღა გავამტყუნო, როდესაც შესვენა
თ. გ. თ—შვილს არა ჰქონია. დიდად მეწყინა და ხმა
მალლა ცუდად მოვიხსენიე განსვენებული და ის წყეული
გარემოება, რომელიც ასე გვამახინჯებს ეროვნულად.
სიცოცხლეში კი სიამტკბილობისა და სიყვარულის მეტი
არა გვეთქმოდა-რა მე და განსვენებულს. ვარძიის ნანგ-
რევებზე გავიცანით ერთმანერთი და აქ გავსწორდით,
მაგრამ ვაი და ვუი ამ გასწორებას. ვისთვისაა საჭირო?..

ბევრჯელ მითქვამს და კიდევ მოგახსენებთ, დიდი
უბედურობაა, რომ ეროვნულს აღზრდასა ვართ მოკლე-
ბული. თ-დი გ. თ—შვილი რომ სხვათრივ ყოფილიყო
აღზრდილი, ეროვნულს მკრეხელობას არ მოიქმედებდა
და სხვასაც ნებას არ მისცემდა წაებილწნათ ვარძიის კედ-
ლები.

სხვები ჩვენსავით არ იქცევიან, განათლებულს ევ-
როპელებს თავი დავანებოთ. ამათ საოცრად იციან თა-
ვიანთ მოპირნახულეთა სიყვარული და პატივისცემა.
გვეყვანან ისეთი მეზობლებიც, რომელნიც თითქმის უმი-

ზეზოდ განგაშსა სცემენ ხოლმე და რწყილს აქლემად აქ-
ცვენ. ამათაც თავი დაეანებოთ, ღმერთმა საბედნიეროთ
მოახმაროსთ თავიანთი საქონელი. მაგალითად ავიღოთ
პატარა ფინლანდია. ისტორიაში ამ ერის ღვაწლი არა
გამიგონია-რა და ვგონებ ვერაფრით მოიწონებენ თავსა.
რიგიანი თითქმის დამოუკიდებელი არსებობა, ისიც ნაწ-
ყალობევი, სულ რაღაც ოთხმოციოდე წელიწადი ჰქონ-
და წარსულს საუკუნეში. ბუნება ამ პატარა ქვეყნისა
მკაცრია და მწირი, მაგრამ დაღვრემილმა ფინმა, ეროვნულ
დაწესებულებათა წყალობით, ბევრი რამ გაიჩინა
და, სხვათა შორის, ეროვნული პოეზიაც დაჰბადა. ფი-
ნებს ჰყავდათ პოეტი რუნებერგი. პოეტმა დიდი სახელი
გაითქვა სამშობლოში, გარედ კი აგრე რიგად თვალ-
საჩინი არ გახლავთ. ხომ ასეა, მაგრამ ის სახლი, სადაც
პოეტი სცხოვრობდა და გარდაიცვალა--ქ. ბორგო,
სათაყვანებელი გახდა ერისათვის. მთავრობამ შეისყიდა ეს
სახლი (რუნებერგის სიცოცხლის დროს ფინლანდიის
სენატი შეზღუდული არ იყო), ყველაფერი ისე დას-
ტოვა, როგორც პოეტის სიცოცხლის დროს იყო.
დღეს თურმე ბორგოს სახლი ფინნების საეროვნო სამ-
ლოცველოდ გარდაქცეულა და თვითოეული ფინი მო-
ვალეობად სთვლის, ისე არ მოკვდეს, რომ რუნებერგის
სახლი არა ჰნახოს.

ჩვენ, ქართველებს უფალმა არ მოგვცა ეს 'შნო და
უნარი.

ჩემის აზრით, რუნებერგის პოეზია ვერანაირად ვერ
შეედრება აი თუნდ ვაჟა-ფშაველას პოეზიას. სიღარიბით
ტანჯულს პოეტს ისეთი მარგალიტები მოეპოვება სალა-
როში, რომ რუნებერგი კი არა, ბევრი, მეგობართა შემ-

წეობით გაბერილი და სახელ-მორკმული პოეტი, იძულებული უნდა გაჰხდეს ქედი მოიხაროს მის წინაშე, მაგრამ სადაა პატრონი, სადაა გამკითხავი! რუნებერგს ჰყავდა ისეთი მეგობარი, როგორცაა ი. გროტი. სახელოვანმა მეცნიერმა რუნებერგის ბევრი ლექსი სთარგმნა რუსულად და ამით სახელი მოუპოვა სამშობლოს გარედ. ჩვენს პოეტებს კი ჩვენ, ქართველები, ვყვეართ მეგობარ-მოჭირნახულეთ! ერთხელ ხომ სამსალა ვასვით ვაჟა-ფშაველას, დღეს პოეტი სიმშლით იღევა. აი როგორ დალიდინებს ვაჟა-ფშაველა ქართულ რედაქციას;

„მომეკით ფული,
გაწყალდა გული;
თვე არის სრული
ამოდის სული,
ზაც რედაქციას...
გარშემო უფლი...
რადა, რისთვისა?
—ავიღო ფული“.

ნურც რედაქციას დავემდურებით. რედაქცია, მოგხსენებათ, ზარათხანა არ გახლავთ, თუ არა შემოუარა, თანამშრომელს რას მისცემს? ჩვენი მკითხველი ისე გაურბის ქართულ მწერლობას, როგორც ურია ღორის ხორცს. ან კი ვინ გაამტყუნებს!.. სიბრძნით და ნიჭით სავსე „ტიფლიცკი ლისტოკს“ ვილა წაიკითხავს მერე?

მოკლედ ე. გ. ვეიდენბაუმი ასე მოიხსენიებს ვარძიას:

„მტკვრის ღრმა ხეობაში, რომელსაც აქ ხერთვისისა ეწოდება, მდებარეობს ოდესმე საქართველოში სახელოვანი მონასტერი ვარძია. კლდეში გამოქვაბულია რამდენიმე ეკლესია, მრავალი სენაკი და სხვა შენობანი. ამ-

ბობენ, დიდად უყვარდა აქ დროს გატარება თამარ-მეფესაო, რომელმაც გააღიდა და გაათართოვა მღვიმე-ქალაქი და ააშენა ეკლესია მღვთის მშობლის სახელზედ. ამ ეკლესიის კედლებზედ ფერადი საღებავით დახატულია სურათი სახელოვანის დედოფლისა. პირველად როდის აშენდა, ან რა დროს გავერანდა, არ ვიცითო“.

მღვთის მშობლის ეკლესიაში დღესაცაა წირვალოცვა და მღვთის მსახურება ქართულად. ჩრდილოეთის კედელზე დახატულია თამარ მეფის სურათი უშველებელ საყურეებით. სურათი ისეთივეა, როგორც ბეთანიის მონასტერში. მაგრამ აქ უკეთაა შენახული. განახლების შემდეგ ბეთანიის მონასტერი აღარ მინახავს, ეგებ იქაც გაასუფთავეს სურათი.

მღვთის მშობლის ეკლესიას ბევრგან ამჩნევია ნატყვიარი. ქურობები თურმე ნიშანში იღებდნენ კედლებზე და თალში დახატულს წმინდანების სურათს და თოფის ტყვიით ხვრეტდნენ. ის ველურნი, ან ახალციხის ბიკბუქები, რომელთაც თვალები დასჩიჩქნეს საფარაში ათაბეგთ ბექასა და აღბუღას, როგორ გავამტყუნო, როდესაც ჩვენ თვითონ, განათლებულნი ქართველნი, უარესა ვკადრულობთ.

მოდუშული, პირ-უღიმარი, სევედა-მოწოლილი, მკაცრ ბუნებასთან ბრძოლით გამწარებული, თითქმის დაბალ მოდგმის ჩამომავალი ფინი ქ. ბორგოში დაიარება ეროვნოლ პოეტის ნადგომ სახლის სანახავად, რათა დასტკბეს განსვენებულის რუნებერგის ნივთების ცქერით, ამ ხილვით გამოწვეულ მოგონებით, ჩვენ კი იმას ვკისრულობთ, რასაც ქურობნი სჩადიან უგუნურობითა და ველურობით. ეს კიდევ რაა?! ვის ეკადრება ფინი რუნებერგი და ან რა სახსენებელია შოთა რუსთველთან?

მაგრამ რუნებერგს მრავალი ძველი აუგეს თოვლყინულთან თინლიანდიაში და შოთას სამშობლო სოფელი კი ქუქუიან და მურდალ ქურთთა სადგურად და ბინად გაეხადეთ. დღევანდელს საქართველოს ქურდ-ბაცაცასავით შემოეპარა ველურობა და ბარბაროსობა, შთანთქა ძველი კულტურა და მისი ნაშთნი და თამამად პარპაშებს.

დიდ ეკლესიის ჩრდილოეთის კედლიდან ზემოდ კლდეში მიდის გრძელი ხვრელი. 81 საფეხური დავთვალე. საფეხურები კარგადაა შენახული, მაგრამ ჩემს წინამძღოლს რომ მივდევი, სულს ძლივს ვიბრუნებდი. ტანში უნებურად ჟრუანტელი მივლიდა. ღამურები ზედ სახეზედ მასკდებოდნენ და იმათი ცივი ფრთების შეხება და ხახუნი ცივ რაფლს მასხავდა. ხვრელში საშიშო არა მომელოდა-რა, მაგრამ მაინც უხერხულად ვგრძნობდი თავსა. ერთი რომ იგრიალოს, მოზღვავდეს ეს უხარმაზარი კლდე, ხომ მოარჩა და გათავდა ყველაფერი და გამოეთხოვე წუთი-სოფელს!

ხვრელი რომ გავლიეთ, გავედით შედარებით ფართო მოედანზე. მტკვარი უფრო პატარად მეჩვენა, მაგრამ თერგივით მაინც სჩქედდა და ცოცხლობდა. მოედნიდან იწყება ბერთა სენაკები, ვგონებ, მეოთხე სართულისა. ვარძია მარტო მონასტრად არა ყოფილა. ციხე-ქალაქადაც ითვლებოდა. დიუბუას სიტყვით, გამოქვაბული სენაკები ზოგი საჯინიბო ყოფილა, ზოგი საცხოვრებელი და მალაზია და ზოგიც დუქანი.

მოგეხსენებათ, რომ მონგოლებმა და ყ ზილბაშებმა დაამხეს საქართველო და ტურტლიანის ხელით შებლალეს სული და გული ამ პატარა ერისა. მას აქეთ ქვეყანამ ველარ იხეირა და ცოცხლობს წელკავიანივით. მათ სიბილწესა და სიმურდლეს ვერც ვარძია გადარჩა.

მეთუთხმეტე საუკუნეში მონგოლებმა ააოხრეს ეს უზენა-
ნიშნავი გამოქვაბული. ციხე-ქალაქი, მეთექვსმეტე საუკუ-
ნეში ყიზილბაშები სწვევიან ვარძიას სტუმრადა და ყი-
ზილბაშურადაც მოჰქცევიათ. მუსულმანთა მწერალი ის-
კანდერ მუნჯი ასე მოგვითხრობს ვარძიის აკლესიის ამ-
ბაჲს: „1551 წ. შაჰ-თამაზი შეესია საქართველოს. ერი
გაიხიზნა მთებში, კეთილშობილნი ჩაიკეტნენ ციხე-სიმაგ-
რეებში. რამდენიმე თავადი გაიხიზნა დარნარის მიუდ-
გომელს ადგილს, ან დერმარ-ქილისაში (მღვთის მშობ-
ლის ეკლესია). შაჰ-თამაზის სარდალმა ზიად-ოღლიმ და-
იქირა მღვთის მშობლის ეკლესია, მამა-კაცნი ამოსწყვიტა
და დედა-კაცნი და ბავშვები ტყვედ გაირეკა, სიმდიდრე
და ძვირფასი ნივთები მშვენიერის ეკლესიისა სულ გაზღ-
და. ეკლესია წარმოადგენდა, ამბობს ისკანდერ მუნჯი,
ადამიანის ხელის საოცარს და საკვირველს ნაწარმოებ-
საოც. (დეკ. ღამბაშიძის წიგნაკიდანაა ამოღებული მუნ-
ჯის სიტყვები).

დიდხანს არ გაუვლია ვარძიის გაძარცვის შემდეგ
და მესხეთს ოსმალეთი შემოესია (1625 წ.). ოსმალთ
მესხეთს მუსრს ავლებდა და ვარძიის განახლება-განსპე-
ტაკებისთვის არ იფიქრებდა. 1828 წელს პასკევიჩმა მეს-
ხეთის ნაწილი ოსმალეთს წაართვა და ვარძიაც საქრის-
ტიანოს დაუბრუნდა, მაგრამ რადგან პატრონი და გულ-
შემატკივარი არავინ გამოსჩენია, ქურთებმაც თავისებუ-
რად გამოიყენეს თამარ მეფის საყვარელი მონასტერი.
უამინდობის დროს საქონელს აბინავებდნენ ვარძიის გა-
მოქვაბულ სენაკსა და ეკლესიებში და გულის გადასაყო-
ლიებლად წმინდანებს ტყვიით უხვრეტავდნენ თვალებს.

ტანჯულს საქართველოს ასე მუხთლობს ბედი დაწყი-
დაბადებიდან. არც გარეული, ვინც უნდა იყოს იგი,

ბიზანტიელია თუ რომაელი, სპარსია, მონგოლია, თუ თურქი, არაბია, თუ სომეხი, და არც შინაური მეცადინეობას არ აკლებენ, რომ შემუსრონ ბედ-შავი ქვეყანა და წაბილწონ მისი სიწმინდენი. არა, მათის გულის გასასივებლად, ისიც კი უნდა ითქვას, ღვთის წინაშე, რომ ვერ მოახერხეს საბოლოოდ გათელვა საქართველოსი-მოყვარეთა სანუგეშოდ ვიტყვი, რომ ეგები მალე სი-ცოცხლის ნაპერწკალი გაჩაღებულ ცეცხლად გადაიქცეს.



VII

ვარძიის ნატამალს გუშაგობას და პატრონობას უწევს არქიმანდრიტი მამა სიმონი, ერობაში თავადი წულუკიძე-დღეს ქართველობას ბერობა თითქმის აღარა გვყავს. იგი წარსულს რეჟიმს სამუდამოდ თან გაჰყოლია.

მამა სიმონი ახოვანი ტანისაა. ღმობიერის სახისა, ძალზედ მოხუცი, მაგრამ მხნე და სიცოცხლით სავსე-ეტყობა, დადად უყვარს ვარძია. აქ შიმშილს ამჯობინებს სხვაგან განცხრომა-ფუფუნებას. მამა სიმონი ძველის ტიპის ბერია, რუსული სწავლა-განათლება არ მიუღია, საუბარი სასოებინანი და ქართული მარილიანი აქვს.

არქიმანდრიტს ორი მორჩილი ჰყავს, ვგონებ ერთი იმერია და მეორე—ამერი. ერთი პატარა ბიჭიკაა, ასე 12—13 წლისა, ცოცხალი როგორც ჩიტი და მარდი როგორც ნიბლია. მამა არქიმანდრიტს ხელზე ემსახურება, ჩაის უკეთებს, სუფრას უშლის და ქვეშაგებს უმზადებს. ბავშვი იმერეთიდანაა ჩამოყვანილი. მისი წკრიალა ხმა ზარბით გაისმის ამ მინგრეულ-მონგრეულ მღვიმეთა შორის. მარტოდენ ეს ბაღლია სიცოცხლის წარმომადგენელი და გამომსახველი. დიდხანს გასძლებს თუ არა

ეს მალხაზი ქოჩორა ჩიტი სიცოცხლეს მოკლებულ საეანეში, ძნელი გამოსაცნობია.

არავითარი საღსარი ცხოვრებისა მამა სიმონს კრებულით არა აქვს. დღესაც არ ვიცი, რითი საზრდოობს დიდებულისა და სახელოვანის ვარძიის გუშაგი. ქონება არავითარი, არც მოძრავი, არც უძრავი. კრებულს ჰყავს ერთად ერთი სახეღარი ფქვილისა და შეშის საზიღაღად. ჰყოლიათ ერთი ცხენიცა და, რადგან ვერ გამოუყვებიან, გაუბარებიან.

კოტაღდენი შეწირულობა მოუგროვებია მამა სიმონს და განუზრახავს წისკვილი დაებრუნებინა მტკვარზე. სამი ქვა კიღეც მოეტანა ქუთაისიღდგან, რუ გაეხზარა დიღის წვალებითა და ტანჯვით, მაგრამ წისკვილი ჩემს იქ ყოფნის დროს წესიერად ვერ მუშაობდა, წყალი ღონიერად ვერ სცემდა და წისკვილს უგემურად გაჰქონდა ღრიტინი. მაშასადამე, ეს განზრახული წყარო საზრდოს შოენისა ჯერ-ჯერობით დაშრეტულია.

ვარძიას ძველად, რალა თქმა უნდა, დიდი მამული ექნებოდა. დღეს შიშველ-ტიტველია ვითარცა ხე ციფს და ყინულიან ზამთარსა. ეურნალ „მოგზაურში“, ნომრები: VI და VII, 1901 წ., კაბადონი 536, აი რასა ვკითხულობთ: „ვინმე მესხი გვარამაძე ვარძიის შესახებ შემდეგსა სწერს: კარწახი (ახლა სომხები სცხოვრობენ), ზეღა-ვარძია და ამათი მოყოლება მტკვრის გაღმა-გამოღმა მხარი, სულ ვარძიის შეწირულობა ყოფილა, ვენახებით, ბოსტნებით და ბაღჩებით; მეფის სამსაჯულოსთან სამწირველო ტრაპეზზედ ყოფილა წარწერილი მხედრულად, მაგრამ მტრებს ამოუმტვრევიათ, რამდენიმე სტრიქონი ნაწყვეტ-ნაწყვეტი კიღევ ეტყობა. ამის გუჯარიც ყოფილა. ეს გუჯარიც ინახებოდა პატარა თო-

ნელ თევდორე მღვდლის მანველიძის სახლში; ადრე კათოლიის მღვდლად ყოფილა. 1846 წელს მღვდლის შვილმა სვიმონ მანველიძემ გოგაშნელებს (სოფელი გოგაშენი მდებარეობს ვარძიის პირის-პირ, მტკვრის მაღალ კედლებზე) გარდასცა ეს გუჯარი. სამაგიეროდ ბედაური ცხენი აჩუქეს გოგაშნელებმა, ხოლო სიგელი ბლადოჩინს გ. გამრეკელს მიართვეს სიხარულითა. ერთს ხანს მიწერ-მოწერა გაიმართა, მაგრამ მალე ჩაყრუვდა საქმე-ბლადოჩინი გამოიცვალა და საქმე საბლადოჩინოში დარჩა, თუ ტფილისის საექსარხოზოს არქივში; აღარა ისმის-რა. ამბობენ, სომხების კარაპეტ ეპისკოპოსს შეუსყიდა იგი 18,000 მანეთად. ვისგან შეუსყიდა, ეგ კი არ არის ცხადი.

სიტყვა-სიტყვით ამოვწერეთ „მოგზაურიდან“ ვინმე მესხის ნათქვამი. შეიძლება ეს მართალი იყოს, შეიძლება ტყუილიც. ამას კარგი და რიგიანი გამოკვლევა უნდა. ურიგოს არ იზამენ ჩვენის წარსულის მკვლევარნი, კარგად მოჩხრიკონ დაკარგული სიგელი, ან დანამდვილებით შეიტყონ მისი თავგადასავალი.

კარაპეტა ეპისკოპოსი კარგადაა ცნობილი ისტორიაში. პასკევიჩის დროს მისის წინამძღოლობით დიდძალი სომხობა გადმოსახლდა არზრუმიდან და დაბინავდა მესხეთის ვერანა სოფლებში. ორი ქალაქი: ახალციხე და ახალქალაქი გადმოსულებმა დაიკავეს. კარაპეტა ეპისკოპოსმა საეკლესიო ფულით წმ. მაცხოვრის სახელობაზედ (ეს ეკლესია ახალციხეშია) იყიდა ჯავახეთში სოფლები: კარწახი, სულდა, ყური-დადეში და სხვა, გოგდალის საძოვარი მთები. ამ ეამად ჩამოთვლილ სოფლებსა და მთას შემოაქვს წელიწადში 22,000 მან. კერძოდ

კარწახიდან, სულ ცოტა, შემოვა 5,000 -- 6,000 მა5ეთი. ეხლა ეს მამულები მთავრობის განკარგულებაშია.

ეპისკოპოსმა კარაპეტამ იათად იყიდა მამულები, სულ რაღაც 2,500 მან. გრამოტები რომ იწერებოდა, სულდელები ახირდნენ, სოფ. სულდის წინანდელი ბატონი ბეგი, ან ალა არა ყოფილა, „მუეიკი“ იყო ჩვენსავითა და ამის გამო სომხის ეკლესიას, როგორც „მუეიკის“ მემკვიდრეს, ნება არა აქვს თავისუფალი მამული დაიტოვოს და სულ ჩვენ უნდა მოგვეცეს „ნადელში“, რაც სულდის ფარგალშია მოქცეულიო. წინანდელი ბატონი ბეგი რომ ყოფილიყო, კანონით გლეხების ასეთს პრეტენზიას ლაგამს ამოსდებდნენ. სულდელებმა თავისი გაიყვანეს, სენატმა სამართლიანად იცნო მათი ახირება, წინანდელი მფლობელი ბეგად არ აღიარა და ბრძანა: მიეზომოს სულდელებს, თითო სულზე ხუთ-ხუთი დესეტინა სულდის ვერანებიდანაო.

ეს ამბავი იმას გვასწავებს, რომ ვინ იცის, ეგები სულდის ვითომდა მებატონემ სხვისი სამკვიდრო მიჰყიდა ეპისკოპოსს კარაპეტას. სოფ. კარწახი მოსამზღვრეა სულდისა. უკეთუ ამ ექვს რაიმე საბუთი აქვს, მაშინ ადვილად მივხედებით, რომ ჭკვიანი და გონიერი წინამძღოლი გადმოსახლებულ სომხებისა, ეპისკოპოსი კარაპეტი შეეცდებოდა როგორმე ხელში ჩაეგდო კარწახის სიგელი. ფულსაც, რაღა თქმა უნდა, არ დაიშურებდა ამ საქმისათვის. მართალია, სიგელის პოვნას პრაქტიკული მნიშვნელობა არ ექმნება ვარძიის მონასტრისათვის, მაგრამ კრწმარტებისა და სიმართლის აღდგენა ცოტა რამედ არა ღირს. ვარძიის გუშავი მოხუცი არქიმანდრიტი სიმონი კარწახის საამოდ გაშლილ ველ-მინდვრებს რომ მოავლეს თვალს აგარის მწვერვალებიდან, მელანქო-

ლორად გაიფიქრებს: ასე წარმავალია დიდება ქვეყნი-
საა! გუშინ ეს ველ-მინდორი ვარძიისა იყო და დღეს კი
სხვას უჭირავსო. შემდეგ მხურვალე ლოცვითა და მარ-
ხულობით დარღს გადიყრის და მიუტევებს, ვითარცა
დიდ-ბუნებოვანი ადამიანი, უკეთურს სოღვასა და შეც-
დომილებას, სიავესა და სიხარბეს.

რითი საზრდოობს ვარძიის ეხლანდელი კრებული,
ძნელი გამოსაცნობია. მონასტრის მიდამო გოხები, სათიბ-
საძოვარნი გამიჯვნის დროს ბაიბურთლებმა და ბაგრა-
ტუნოვებმა (არზრუმიდან არიან მოსულნი) „კანონიერის
წესით“ დაისაკუთრეს. მონასტერს დარჩა მხოლოდ რა-
ღაც 50--60 დესეტინა გახრიოკებული კლდეები. ცხვრის
გასასეირნებლად თუ ივარგებს ეს კლდეები, სხვაფრივ რა
ჰყრია მათში. შემოსავალი ბევრი-ბევრი 30—40 მანათი
იყოს წელიწადში. კრებულს ეს შემოსავალი ვერ დაა-
პურებს, თუ სული წმიდა არ მოეშველა.

ვარძიას რკინის რგოლივით გარს არტყია მაჰმადიან-
ობა; ნეტა ოსმალონი მაინც იყენენ, ან ჩვენი აქარლე-
ბი, ვინ რას იტყვის კიდევ. უვარგისი წარმომადგენელ-
ნი მაჰმადიანობისა: ქურთნი, თარაქამა, მუტრუფნი, ბო-
შანი გაბნეულან ვარძიის გარშემო. ქართველთა მარტო-
ოთხი სოფელია: აფნია, გოგაშენი მტკვრის მარჯენივ,
აგარა და ზედათოგვი—მარცხნივ. ეს სოფლები ერთ
მცირენი არიან, ლარიბნი და დაჩაგრულნი, უნიადაგონი
და განუვითარებელნი. ამათ რა უნდა გაიმეტონ მო-
ნასტრისათვის? მაინც და მაინც ისევ ისინი თუ ჩამოვ-
ლენ ათასში ერთხელ ვარძიას, ილოცვენ და შეიძლება
ორიოდე აქაური ქადა-ნაზუქი დაუტოვონ კრებულს.
(ქართლურ შესანიშნავ ნაზუქს მიჩვეული ვერც კი მიე-
კარება აქაურს ერბოთი გაელენთილს და ურძეო ნაზუქს).

მორჩილნი აღბად მათხოვრობენ, თეფშით აგროვებენ ხორბალს და ისე თუ იკვებებიან. მთავრობა მონასტერს არაფერს ულუფას არ აძლევს, აღბად შტატ გარეშე თუა დარჩენილი, როგორც სხვა ჩვენი მრავალი ძველად შესანიშნავი მონასტერი.

ამ სიღარიბესა და უილაჯობას რომ ეუცქეროდი, ფიქრმა უნებლიედ შავი ზღვის პირას გადამიტანა. მოკლედ თვალი მოვაღლე ახალ-ათონის ისტორიას. ჯერ ისევე უკანასკნელ რუს-ოსმალთან ომამდინ ძველ ათონიდან მოვიდნენ ბერები და შეუდგნენ მონასტრის აშენებას. ომის დროს ოსმალთ და აფხაზებმა ბერების ნაცოდ-ლარი მიანგრ-მოანგრიეს და ქვა-ქვაზე არ დასტოვეს. დასრულდა ომი. ბერები ისევ მოვიდნენ და უფრო მხნედ შეუდგნენ მოღვაწეობას, მაგრამ რას გახდებოდნენ მარტო მხნეობით, თუ დახმარებაც არ ყოფილიყო. დახმარებაც მთავრობამ აღმოუჩინა. ნამესტნიკად მაშინ ბრძანდებოდა დიდი მთავარი მიხეილ ნიკოლოზის ძე, რომელიც დიდ მნიშვნელობას აძლევდა რუსთა კოლონიზაციას ამიერ კავკასიაში. ეს საქმე პირველად ნამესტნიკმა თავადმა ვარანცოვმა დაიწყო, მაგრამ სრულიად მოულოდნელად დასრულდა მისი განზრახვა-მეცადინეობა. გადმოსახლებულნი გაქართველდნენ. განსვენებული ეველიჩკო რომ შეუდგა ამ საქმეს ჩვეულებრივის მხნეობით და გაბედულობით, ბერს ეგონა ამან დაიწყო პირველად ეს საქმეო. არა, დედა აზრი თ. ვარანცოვისაა და დიდის მთავრის მიხეილ ნიკოლოზის ძისა, ხოლო ეველიჩკომ მათი შეცდომანი არ გაიმეორა, ესე იგი ღონიერ ჯგუფებად უნდა დაესახლებინათ კოლონისტები, უსათუოდ თან მოყოლილი მღვდელი ჰყოლოდათ, ეკლესია აეგოთ და სამრევლო სკოლა გაემართათ. ახალ-

შენელებს ცოლებიც თან უნდა მოეყვანათ, თორემ თუ ჩვენი თინია-დარეჯნები გაერეოდნენ ახალშენელებში, „საკმე წახთებოდა“, იმერულად რომ ვსთქვათ.

მაგონდება ერთი სასაცილო ამბავი. ხალხის ყრილობას დავესწარი. მოხელეებს ირჩევდნენ, ყურთა-სმენა წაიღეს, ისე ღრიალობდა ხალხი; გიო, გიო გვინდაო. ვინაა ე გიო, ერთი თვალით გვაჩვენეთო, უბრძანეს უფროსებმა. მოიყვანეს.

— ბიკო, ვინა ხარ?

— გიო, შენი კირიმე.

— გვარი?

— მარტინენკო.

სახტად დავრჩი. ჩემ წინ გამოკიმული იდგა ტიპიური ქართველი ტეტია, შალის ჩოხით, წინდა-ქალამნით.

მართალია, გიო მარტინენკო კროლა იყო, მაგრამ განა ცოტაა კროლანი ჩვენში? ერთი ჩემი კარგი ნაცნობი ისეთი კროლაა, რომ შაგისთანა „ანტიკა“ კროლას შიდა რუსეთშიაც ვერ იპოვნია.

დიალ, იმას მოგახსენებდით, რომ ახალს ათონს უბვად უწყალობეს სახნავ-სათესი, მდინარენი, მთანი და ტყენი; უბოძეს აგრედვე მონოპოლია თევზის ჰერისა შავ ზღვაში დიდ მანძილზე. მკაფიოდ აღარ მახსოვს, რამდენი რა იყო, მამა დეკანოზ ვოსტორგოვის ფელეტონები, გაზეთ „კავკაზში“ დაბეჭდილი, ხელთ არა გვაქვს ამ ჟამად. მლოცველიც დიდძალი ჰყავს ათონს და გაიყსო სიმდიდრით.

კარგა ხანია, სიკაბუკის დრომ, როცა რელიგიური გრძნობა ცხოველია, განვლო, და მას შემდეგ ეკლესიამონასტრებისთვის შესაწირავი არ გამიღია. როგორღაც

შემთხვევა არ გვეძლეოდა. ვარძიის კრებულის სიღარიბე და სილატაკე რომ ვიხილე, გულმა აღარ მომიტმინა და ორჯელ, ზედი-ზედ, შესაწირავი მივართვი. ეს საქმე ისე ბუნებრივად, კანონიერად და სამართლიანათ მეჩვენა, რომ ერთს წუთსაც არ მიუცუმაანია. ვგონებ უპირველესი მოვალეობაა ყოველის ქართველისა გაიღოს მცირე რამ იმათ შესანახად და საზრდოთ, ვინც ესეთის სიყვარულით, თავგამოდებით და ბედის წინაშე მორჩილებით დღე და ღამ გუშაგობენ დიდებულ თამარის საყვარელ ციხე-ქალაქსა და მონასტერსა. იქ, სადაც ფორთოხალის და ლიმონის ბაღებს ჰმართავენ, ან იხეთა და გედთა საქყუმპალაოდ მარმარილოს აუზებს აგებენ, შეიძლება არავითარმა სხვა ემოციამ არ შეგიპყროს; გარდა ესტეტიკურისა: რასაკვირველია, მაშინ საბერო-სამონასტრო შესაწირავს ადგილი აღარ ექნება და შეგიძლიანთ არხეინად დოინჯ-შემოყრილმა ისეირნოთ და, მშვენიერებით დამტკბარმა, თუ გუნებაზე მოხვალთ, კიდევ ილიღინოთ.

მამა სიმონს ჰყვარებია ქართულის კითხვა. ჩემსობას „ივერიას“ მოვკარი თვალი არქიმანდრიტის სენაკში. საწყენია, თუ ფულით იწერდა. საიდან უნდა გაიღონ ერთი თუმანი? კარგს იზამს რედაქცია, თუ უსასყიდლოდ გამოუგზავნის გაზეთს. ნუ დაივიწყებს გაზეთი, რომ ეს სამი-ოთხი ქართველი-და დარჩა ძველის საქართველოს წარმომადგენლად ამ გამაჰმადიანებულს და გასომხებულს მხარეს. ვსთხოვ „ცნობის ფურცელსაც“ და „მოამბეს“, ნუ დაიშურებენ ეურნალსა და გაზეთს ვარძიისათვის, ხოლო ნახატებიანი დამატება საკირო არაა, ვინაიღგან ვარძია იტალია არ არის და მამა სიმონი იმ ბერთა ჯგუფს არ ეკუთვნის, რომელნიც ბოკაჩიოს დროს სცხოვრობდნენ. შიშველა

ქალთა სურათნი „დეკამერონობას“ გასწევენ და რა ხელსაყრელია, რომ უდაბნოში ჩვენსავე ხელით შევიტანოთ „ემშაკეულობა“ და „ავი სული“. საჭიროა პური არსობისა და გონების საზრდო და არა სულისა და გულის მატუნებელი. ესენი სხვა ჯურის ბერთათვის და ნერვებმოშლილ ინტელიგენციისათვის დაგვილოცნია.

VIII

15 აგვისტოს იცის ვარძიობა, ანუ ჩვენებური მარიაობა. მინდოდა ამ დღეს მონასტრის ნახვა და კიდევ ავისრულე სურვილი. ჯავახეთის მრავალი სოფლები გავიარე და სოფ. გოგაშენს შევისვენე ჩვენებურ ქართლელ მღვდლის მ. გიორგი კარბელაშვილის ოჯახში. გოგაშნიდან ვარძია ისე სჩანს, თითქოს ხელის გულზე გაქვს გადაშლილიო. სულ ბევრი მონასტრამდე სამი ვერსი იყოს სასიარულო, მაგრამ უშველებელი დაღმართია და მისი ჩავლა ცოტა არ იყვეს მალონებდა. ერთხელ რაკი გამოვცადე ს. აგარიდან ვარძიას ჩასვლა, სწორედ მიძნელებოდა საქმე, თუმცა გამოცდილი მხლებელი, ს. აფნიიდან საპოლიციო დარაჯი, გზას მიაღვილებდა, გოგაშნელებს ხომ სიცილადა არ ჰყოფნიდათ ჩემი ექვი და შიში.

— ბატონო, რა ზორბა თქვენა ბრძანდებით, თუ გაგიჭირდებათ, სულ ხელით ჩაგიყვანთო.

მართლაც, ბილიკი შედარებით აგარისასთან ღვთისნიერი აღმოჩნდა. მაინც მუხლთ მეკეცებოდა და წელი მწყდებოდა. ხშირი ბინდი იყო, მონასტრის აღმართს რომ შეეუდგე და დაღლილობისაგან სიარულს ვეღარ ვახერხებდი. არ ვარგივართ ეხლანდელი ინტელიგენტნი,

რაკი ევროპელივით მიჩვეული არა ვართ ფეხით სიარულს, ორ ნაბიჯს გადაედგამთ თუ არა, ვაისა და ვუის უნდა მოვყვეთ.

მხლებლისა და თარაქამის დახმარებით, როგორც იყო, მივალწიე მამა სიმონის სენაკს და კუტივით დავევდე ტახტზე. ეხლაც კარგად მახსოვს მოღიშარე სახე ამ ახოვანის თარაქამისა. შორიდანვე შეატყობ, რომ ბუნების მოუხეშავი შვილია და ნეტა რა ძალან მოიყვანა ვარძიას ღამის სათევად? ღვინოს ეგ არა სვამს და არაყს, ქრისტე მაგას არ მიაჩნია და ვარძია; მაშ რა იზიდავს?.. უნდა გენახათ, რანაირად გაუბრწყინდა სახე, ნაცნობი ნიკო (ჩემი დარაჯი) რომ დაინახა.

„ხოშ გივალდიო“, მხიარულად მიესალმა და მაგრად ხელი ჩამოართვა. ნიკომ უკმეხად რალაც წასჩურჩულა ოსმალურად, ალბად ამცნო ჩემი ვინაობა, და თარაქამს მხიარული სახე უცბად შეეცვალა. ნიკოსავე თხოვნით, მეორე იღლიაში მტაცა ხელი და ციმ-ციმ მიმიტანეს არქიმანდრიტის სენაკთან.

ხალხი ბუზივით ირეოდა ღვთის მშობლის ეკლესიის გარშემო მღებარე მცირე მოედანზე. საოცარია, რატომ არავენ იჩეხება აქედან? მოაჯირი რომ ჰქონდეს სამხრეთიდგან, კიდევ ჰო, მაგრამ მოედანი შემოუზღუდავია, უბრალო ხარისხაც არა აქვს შემოვლებული და მაინც უბედურება არა მომხდარა-რა მარიამობას.

სიბნელის გამო ვერ ვარჩევდი სენაკის ფანჯრიდან, რა ეროვნების ხალხი ირეოდა ეკლესიის წინ. ყველაზედ წინ ამის გამოცნობა მაინტერესებდა. ნუ თუ შორიდან ქართველობა დაიძრა ვარძიის თაყვანის საცემლად და თან ღროს გასატარებლად? მაგრამ არა, შემდეგ გამოირკვა რომ ყველაზე ნაკლებ ჯავახეთის ქართველობა

იყო, უფრო კი ქურთები, თარაქამა, სომხობა, მაჰმადიანობა, ბერძნები და სხვა. ასე გასინჯეთ, ერთი ახალციხელი ებრაელიც კი ვნახე მეორე დღეს.

მამა სვიმონი სენაკში არ გახლდა, ეკლესიაში ხალხს ამწყალოებდა. ეხმარებოდნენ გოგაშნელი მოძღვარი გ. კარბელაშვილი და საროელი ს. უსტიაშვილი (ქახელია), სოფელ საროდან (20 ვერსია) შვილით ფეხით მოსულნი. როგორღაც ვკითხე მამა სოლომონს, რა გაჭირვება გადაგა, რომ ამ სიცხე-პაპანაქებაში ფეხით წამოსულხარ-მეთქი. წმ. დავით გარეჯელის უდაბნოში აღვიზარდე, იქ ვისწავლე ღვთის-მსახურობა და გალობა და ვერ გავბედე ეტლით, ან ცხენით ვარძიას მოსვლაო. დღევანდელი „განათლებული“ კურსოვნიკები, „გაწაფულნი“ ხრიკებით აფერადებულ ბლაჯენაში, თქმა არ უნდა, ამ გვარ პასუხს არ გვაღიროსებენ. ვერც მოიცილიან ღვთის წინაშე, შემოსავლიან „პრიხოდების“ ძებნას უნდება მათი ღრო და ენერგია.

მამა სოლომონი წინადაც მენახა. ს. ტოლოშს ხალხი იყო დასაფიცებელი. ფიცის ქაღალდი დავიწყებოდათ, როგორც იყო, მოკლედ და უთავბოლოდ გარდასცეს შინაარსი ფიცისა მ. სოლომონს. სწორედ დასტკებოდით, რომ გენახათ, რა ღრმა და წმინდა ქართულით დააფიცა მ. სოლომონმა ხალხი. ახალ სკოლის „კურსმა“ ჯერ შებლაღა და შემდეგ ცივ სამარეში ჩაჰფლა ღრმა და სასოვებიანი ქართული.

არქიმანდრიტის სენაკში ვიგრძენ სულის „ობლობა“. ნაცნობი ინტელიგენტი, ან ისე ცოტათი მაინც განათლებული ჩემიანი არაეინ იყო, რომ საუბრით წარსულსა და აწმყოზე გული გადაგვეყოლებია. სენაკში ბლომად შეიკრიბნენ ფალავეანიშვილები (ფრონელები

არ გეგონოთ), მაგრამ რა? ამათ ქართული არ იციან, მე კიდევ ოსმალური. გულზე მოწოლილ ბოდმა-დარდს მხოლოდ სამშობლო. ერთ იტყვი, უცხო ენა არ უბღება.

საუბარი რომ გაჩაღდეს, საქირო ისიცაა, რომ მომუსაიფეს შენსავით შენი დარდი გულს უსერავდეს და ულარავდეს. თუ შენი დარდი და ქირი, ან აღფრთოვანება და ტრფიალი მომუსაიფეს არაფრად მიაჩნია, საუბარი „სალონურ“ უსულ-გულო ყბედობად გარდაიქცევა. ასეთს მუსაიფეს ისევ ისა სჯობია, იგი დარდი გულის სიღრმეში ჩაიკლა.

მეც სწორედ ასე მოვიქეცი. ფალავანდიშვილებში ერთი ახალგაზდა ბეგი ერია, ხარკოვის უნივერსიტეტის საექიმო ფაკულტეტის სტუდენტი. გავაბით უაზრო წყალწყალა ლაპარაკი, სწორედ ისეთი, როგორც აი ჩვენმა „ინსტიტუტებმა“ იციან აესა და კარგს ტაროსზე. ყბებსა და ტუჩებს ვაცმატუნებდით, მაგრამ, ვგონებ, ერთმანეთისა არა გვესმოდა-რა. მე სულ იმას ვფიქრობდი: უცნაური ყოფილხარ, ჩვენო ბედო. ვინ იცის, ამ ყმაწვილის რამდენმა წინაპარმა რაოდენი სისხლი დაანთხია, რაოდენი ტანჯვა-ვაება გამოიარა ვარძიისა და საქართველოს საბედნიეროდ! დღეს კი აგერ ეს სასიამოვნო სახის ქაბუკი (ჯავახეთის ფალავანდიშვილები ახოვანი უზარმაზარი ტანისანი არიან), უმაღლესი სწავლა-განათლებით შემოსილო, სდგას ჩემ წინ, მიყურებს პატივისცემით, თითქმის მოკრძალებით, რადგან ბედმა და შემთხვევამ მცირედად ცხოვრების ზედა პირზე შემასკუპა, მაგრამ ჩემი დარდი არ ესმის, გულმწვაფი სიტყვა, ვერ უთქვამს და ჩემგანაც მარილიანი, მხნე და გულის მისაწვდომი პასუხი ვერ მიუღია. ვართ ისე თითქოს ახლო, მაგრამ ისე და-

შორებულნი, რომ ერთმანეთისათვის სიტყვა ვერ მიგვიწვდენია. ვხედავ, რომ მისი აზრი თავს ევლება ბაქოში. თალიევის მიერ ახლად დაარსებულს რუსულ-თათრულს სკოლას, სადაც მუსულმანთა ქალნი იზრდებიან (ფალანდიანთ ქალნიც სწავლობენ), აზრი და ფიქრი კიდევ ვერ განშორებია ვარძიის წარსულს „დიდებას“ და ღღევანდელს „სილაჩრეს“, ოდეს ჩვენს „მხნე ქალებს“ ერთი საქალემო სკოლა რა არის, ისიც ვერ გაუმართავთ, რომ ქართველი ქალი „ქართულად“ გაზარდონ. ერთის სისხლისა და ხორცისანი ვართ მე და ეს კაბუკი, მაგრამ შეხეთ მუხთალ ბედსა, რანაირად დაგვაშორა ერთმანეთი! ნეტა დაიბადება ჩვენში ისეთი გენიოსი, რომელმაც შესძლოს გასდოს ჩვენ შორის შემაერთებელი ხიდი? სწორედ უხილავს; მაგრამ ჩაუქრობელს ლამპარს აანთებს ყოველი ქართველის გულში ის „დიდებული“ ხუროთმოძღვარი, ვინც შეიძლებს ისეთი ხიდის აშენებას, რომელზედაც შეეძლოთ სიარული ერთად, ძმურად ერთის ეროვნულ საქმისათვის ტომით და სისხლით ქართველებს, ხოლო სარწმუნოებით სხვა და სხვას.

თორემ, აბა, რასა ჰგავს ესა? რამოდენა ქართველს უყო პირი სარწმუნოებამ „ჩვენ დამლუპველს ოსმალეთისკენ?“ ისევ მომაგონდა პოეტი. ქართველი ერის გულთა მხილავნი სწორედ ესენი არიან, ისე მკაფიოდ და სიტყვის მოჭრით აღნუსხავენ ხოლმე მის კირსა და ტრფიალს, ზოგი ლექსით, ზოგი კიდევ პროზით. აბა მოისმინეთ, რა სევდა მოსწოლია პოეტს, ქართველი იანიჩარი რომ უხილავს.

აგერ რაზმიდან ისკუპა ყარაბაღულმა მერანმა,
შორსა გაჰფანტა თრთოლით ხმა მისმა რახტისა ჯღერამა...
მიჰქრის, მიჰფრინავს, მიჰეკავს, უკან მისდევს მტერისა ბუკი,

მასხედ ჰზის ივერიელი კაბუკი ვინმე ჩაუკი.
აგერ უეცრად რაღაცამ ჰაერში დაიკრიალა,
თურმე მან თოფი თავისი შეაგდო, შეატრიალა,
მერე ლამაზად ხან მარცხნივ, ხან მარჯვნივ გადმოწეებოდა,
ხან ცხენიდანა ჰხტებოდა, ხან ზედვე შეჭჭრინდებოდა.
ჰშვენოდა იგი კაბუკი ცხენზედა ვით ალვა რგული,
მაგრამ მე მის მკვერეტელს ნაღვლით ამერია სული გული...
ვსტკვი, თუ ვისთვის შენ კისკასობ, ვისთვის იჩენ სიმარდესა?
შენი რაა, რომ ამშვენებ შენ დამღუპველს ოსმალეთსა?
შენს სიმარდეს, სიჩაუქვს კართლი შენი არ დაჰყურებს,
მეფე შენი თავის ქებით კაბუკს გულს არ გიხალისებს...
ი. ჰავკავაძე.

ლამის თორმეტი საათი იქნებოდა, სენაკში რომ შე-
მობრძანდა მამა არქიმანდრიტი. ბეგები დიდის თავაზით—
მოწიწებით ფეხზე წამოუდგნენ, მიეგებნენ მოკრძალებით
და ოსმალურად სალაში უძღვენეს. მისალმების შემდეგ
შიართვეს ძღვენი, ხილი და წაყიდნენ ბინაზედ ლამის
სათევად. რაღა მოხსენება გინდათ, რომ ბინა გამოქვა-
ბულ სენაკში ჰქონდათ. ზედი-ზედ ძიღმა გამოქვაბულ
კლდეში უნებლიეთ მომაგონა ქრისტიანობის პირველი
დრო. ქრისტე გამოქვაბულ კლდეში დაიბადა; პირველი
ქრისტიანენი გამოქვაბულებში იკრიბებოდნენ სალოცა-
ვად და ღეთის სადიდებლად. მაშასადამე, ნათელი ქრის-
ტესი და ის შესანიშნავი უმაღლესი საქრისტიანო ზნეო-
ბა, რომელსაც „ქრისტიანობას“ ვეძახით, ქვეყანას გა-
მოქვაბულიდან მოევლინა. ამ გვარად გამოქვაბულს ქრის-
ტიანობასთან დიდი კავშირი აქვს. ჩვენც, ქართველები
ძალიან ადრე გავხდით მონაწილენი საქრისტიანო სწავლა-
მოძღვრებისა. ეს კავშირი ხომ არაა მიზეზი, რომ კე-
თილ-მორწმუნე მეფენი, მამა-შვილი, გიორგი და თამარ,
დიდის გულ-მოდგინებით შესდგომიან კლდის გამოქვაბ-

ვას, ეკლესიისა და სენაკების აშენებას? თუ ეს მოსაზრება ცოტათაც არის სიმართლეს არაა მოკლებული, მაშინ აშკარა ხდება, რომ ვარძია გამოუქვაბავთ ზეციურის მოძღვრების და საქრისტიანო სწავლის განსამტკიცებლად და გასაერცვლებლად. ისიც უქვეელია, რომ წარსულში ვარძიას დიდი მნიშვნელობა ექმნებოდა ქრისტიანობის ჯერ გავრცელებაში და შემდეგ მის მტკიცე შენახვაში. ხოლო ამ ეამად აი რაა საფიქრებელი. ერთად ერთი გუშაგი ვარძიისა ღრმად მოხუცებული ბერია, რომელიც, უფალმა დიდხანს აცოცხლოს, მაგრამ ბუნების კანონს და ღვთის განგებას უნდა დამორჩილდეს წიაღსა შინა აბრაამისასა სამუდამო განსასვენებლად. მაშინ ვარძიის გამოქვაბულნი სამუდამოდ შეიკერენ პირსა და მოგვესპობა გამოქვაბულიდან მოვლენილი ნათელი ქრისტესი, სწორედ ისე, როგორც მოგვეაკლდა ნათელი და ნუგეში ზარზმისა, კულესი, კუმურდოსი, წყაროს-თავისა და სხვანი.

იმედი მაქვს, რომ მკითხველი ადვილად მიხვდება ჩემ ფიქრთა დენას და მიმიხვდება, რომ ამ საუბრის დროს ქრისტიანობა და ეროვნობა მკიდროდა მაქვს შეკავშირებული და განუყრელი. ძველდაც ასე იყო, დღესაც ასეა მესხეთ-ჯავახეთში. ქართველი სინონიმია ქრისტიანობისა. თუ ვარძიას უკანასკნელი დარაჯი და ქირი-სუფალი მამა სიმონ მოაკლდა, მაშინვე ამ ეამად უხილავი მტერი მოგვეტაცებს გამოქვაბულს და, მაშასადამე, უკანასკნელი სიმბოლო ჩვენის ეროვნებისა და მასთან შესისხლხორცებულ ქრისტიანობისა გააქრება ამ კუთხეში.

მწარე ფიქრებით შეწუხებულმა გულწრფელად ეინატრე: ბარემ ჩამოინგრეს ეს უზარ-მაზარი კლდე, ლორღითა და ქვით ამოავსოს გამოკვეთილი სენაკი, სამუდა-

ს. 221 x 77 კ. ცხმანი

მოდ ღამარხოს წარსული ჩვენი დიდება თვის ნანგრევ-
თა შორის, თორემ, როგორც ვხედავ, უთვისტომო მტე-
რი თვალგაქცეტილი თავს დაგვიჩხავის და მალე დაეპატ-
რონება უპატრონო ვარძიას და ისედაც დაავადებულს
გულს უფრო ძრიელ დაავადებს. განა არა სჯობს, და-
ინგრეს ვარძია, ეიდრე სხვას დარჩეს? თუ ნათელი და
ქეშმარიტება, გამოქვამულიდან აღმოხდილი, მოგვესპო,
ბარემ თვით გამოქვამულიც, ეს უტყვი მოწამე წარსუ-
ლისა და სიმბოლო ჩვენის ეროვნება-ქრისტიანობისა, გაჰ-
ქრეს ვითა სიზმარი ღამისა?

დაუსრულებელი არა არის-რა ქვეყანაზედ. ჩემს შწა-
რე ფიქრებსაც ბოლო მოეღო, ამ ეჟამდ მაინც. შუა
ღამეს აღარა უკლდა-რა, მამა არქიმანდრიტის თანამო-
სამსახურე მოძღვარნი დაბინავენას აპირებდნენ, თვით
არქიმანდრიტი კარგა ხანი იყო, რაც გამოგვემშვიდობა
და წავიდა სენაკს მოსასვენებლად. ვახმამი უნებებია. მეც
ვეპირებოდი თვალის მოტყუებას. უცებ შემომესმა ტკი-
ლი და სასიამოვნო წმინდა ქართლური სიმღერა. გამიკ-
ვირდა, ამ მიყრუებულ ხეობაში, არდაგანის ოლქის სამ-
ზღვარზე, სადაც ქართულის სახსენებელი ღამის ამოვარ-
დეს, რა უნდა ჩვენებურს სუფრულს? მერე რა სიმღერა!
ხომ იცით დღევანდელი ღზინი ქართლ-კახეთის დღეო-
ბებში, ადამიანს აღარ გაეველება იქა. გაღეწილი ლოთი
ბიკები დაეხეტებიან უგზო-უკვლოდ არღნის საზიზღარი
ქყვიტინით, მღერიან ხრინწიან, ჩახლეწილ, მამლაყინ-
წურ ხმით კინტოურ სიმღერებს უშვერის და უაზრო
სიტყვებით, ჯამბაზურად იპრანკებიან და იგრიხებიან,
ბუქნაობენ და ვირულად ტლინკებს ისერიან. არა, ასეთი
არ გახლდა, ჩემ სენაკამდის სიმღერამ რომ მოაღწია. იგი
იყო დარბაისლური, სევდა-ნალელიანი და თან ძლიერი. სწო-

რედ ასე მღეროდნენ ამ ოცდაათის წლის წინად დიდი და პატარა, თავადი თუ გლეხი, მღვდელი და ერი. ეშმაკმა და ტარტაროზმა წაიღოს ეს უკუღმართი დრო! სიმღერისა და ლხინის შნო და ლაზათიც კი დაგვეკარგა.

საოცრად იმოქმედა ჩემზედ საქშობლო სიმღერამ. „უცხოთაჲ შორის გადაკარგულს ხშირად ემართება ესაგულმა აღარ მომითმინა, ველარ გავძელ ჩამობნელებულ სენაკში და წაველ მომღერალთა დასათვალიერებლად. შუალამისას მათი მოძებნა ადვილი არ იყო. სენაკიდან სენაკამდე გზა ვიწროა, ბევრგან ჩახრამული, კლდე ჩამტვრეული და ადვილად შეიძლება გადაიჩიხო უფსკრულში. ლეპისის მამასახლისი ჩემს ახლო იყო და იმის შემწეობით მალე მივაგენ მომღერლების სენაკს. ხუთიოდექვსიოდე მამა-კაცი შემოსხდომოდა ლურჯ სუფრას, შავი ჩოხები ეცვათ და პატარა კახური ნაბდის ქუდები ეხურათ. მოსუფრალთა სამი დედაკაცი დასტრიალებდა თავსა, თავშალწაკრულები და მკირედად... კაბა-აწეულნი ეტყობოდათ, ფუსფუსი გაეთავებინათ და მამა-კაცებს გვერდზედ მოუსხდნენ. მოქეიფენი შეზარხოშებულიყვნენ და ბულბულივით თვითონვე სტკებოდნენ თავიანთის სიმღერით.

გზაში მამასახლისს ვსთხოვე — ჩემი ვინაობა არ გაემხილა, თორემ გულიან საუბარს დაგვიშლიდა. ამ „გადარჯულებულს“ მხარეს მთაფრობის კაცი, თუნდა ეს კაცი აღმინისტრაციის წევრი არ იყვეს, აგრე რიგად არ ეპიტნავებათ.

სალამ-ქალამის შემდეგ, სენაკში რომ შეველი, ერთმანერთის ვინაობა მოვიკითხეთ. დიდ-თონელები აღმოჩნდნენ, ტფილისის მისრიდან, ანუ ძველებურად რომ ვსტკვათ, საბარათიანოდან. დიდათ გაეხარდათ, როცა

შეიტყეს, რომ კოტე ყავრიშვილის ნაცნობი ვიყავი. ამ ნაცნობობამ ისე დაგვაახლოვა, თითქო განუშორებელი მეზობლები ვყოფილიყავით.

— აქ რამ გაგაჩინათ, ვარძიას როგორ მოხვედით? ნუ თუ საბარათიანოდან განგებ წამოხვედით სახლობით სალოცავედ?

— არა, ბატონო, განგებ იმ სიშორიდან ვინ წამოვიდოდა. ცხვარი აქ ახლოს გვიყენია, ჩალდირში, არღანის ოლქში. პასკევიჩმა გვიბოძა საძოვარი ადგილი და ყოველს ზაფხულს ცხვარი ამოგვიდის საბალახოდ; რაკი ასე ახლო ვდგევართ, ვარძიას ჩამოვდივართ ხოლმე ღამის სათევად ამ ბედნიერს დღეს.

IX

გენერალ-ფელდმარშალი ი. თ. პასკევიჩი მთავარ-მართველობდა საქართველოში 1827 წელს 27 მარტიდან 1831 წლის აპრილამდე. თ. ციციშვილიდან დაწყებული თ. ვორონცოვამდე საქართველოს მთავარ-მართებელნი ეომებოდნენ ოსმალეთსა და სპარსეთს „საქართველოს“ სახელით. ყირიმის ომის დროს ეს სახელი და საბაბი დავისა თითქმის აღარ იხსენიება, შემდეგ ხომ მისი სახსენებელი სრულიად წაიხოცა და გაქკრა. სწორედ ამ პასკევიჩმა გამოჰკლიჯა ხელიდან ოსმალეთს მესხეთის ნაწილი და დაუბრუნა საქართველოს მისი ძველი სამკვიდრო. ვარძიაც საქართველოს ამ სარდლის დროს შემოუერთდა.

დიდ-თონელებმა მიამბეს, რომ პასკევიჩმა ჩვენს მამა-პაპას უწყალობა, ეხლა რომ საძოვარი ადგილები გვი-

ქირავსო. გაგვიგონია, რომ პასკევიჩისათვის რალაცა დიდი სამსახური გაუწევიათ ჩვენებსაო.

ფრიად საყურადღებოა ეს მოთხრობა. მე მეგონა, რომ ქართველი კუტივით უძრავია და თვით არუსული მებიცა ვერ შეანძრევს მის ღუნცობასა-მეთქი. თონელეზის ისტორია კი წინააღმდეგს გვასწავებს. სჩანს, შესაძლებელი ყოფილა, ხელი რომ გაეძრია ვისმე, ან უნარი და ეროვნული წინდახედულობა გამოეჩინა, მთელი ახლად შეძენილი ნაწილი მესხეთისა, ჯავახეთი და ახალციხე, სულ ქართველობით მოგვეფინებოდა. ცოტაოდენი მართლმადიდებელნი ადგილობრივ მოიპოვებოდა, ნაწილი გამაჰმადიანებულთ ქართველობისა სიხარულით დაუბრუნდებოდა ქართველობას, რადგან სარწმუნოება გამოეცვალათ შიშისა და დევნისა გამო და ჯერ ქართველური გული არ გასცივებოდათ. მაშასადამე, ერთი ხუთასიოდე კომლი რომ მოგვეძებნა, ორთავე მაზრას დავიკერდით, მაგრამ მაგარი ის არის, რომ საქართველოს გულშემატკივარი პატრონი არ გამოუჩნდა და ერთი შეთხელეებულ კუთხისკენ არავინ გადმოასახლეს.

1829 წელს ახალციხის ოლქის უფროსად იყო დიდად ცნობილი ჩვენში ქართველი თავადიშვილი ვასილ იოსების ძე ბებუთაშვილი და, ჩემის ფიქრით, ამ ქართველ კაცის უფროსობის დროს სულ ადვილი იქნებოდა მესხეთის შევსება ქართველებით. მაშინდელი რუსის მთავრობა ამ კეთილის განზრახვის ასრულებისათვის მარტო „სისხლის ჯვრით“ არ დააჯილდოვებდა „მამულის მოყვარე“ ქართველ მოღვაწეს, კაი ზორბა რომელისამე გაქცეულის ბეგის მამულსაც უწყალობებდა. სწორედ სისიამოვნო იქნებოდა მთავრობისთვის ქართველთა კოლონიზაცია. რუსის მთავრობის მართვა-გამგეობის შესწავლამ

მეცხრამეტე საუკუნეში ამიერ-კავკასიასა და საქართველოში მათქმევინა აქ მოყვანილი მოსაზრება. ნურც იმაზე ამიხირდებით, რომ თ. ბებუთაშვილი, როგორც სომხის ჩამომავალი, თანაგრძნობით არ მოეკიდებოდა ქართველთა კოლონიზაციას, თუ კი უნამე ამ საქმეს ითავებდა და პასკევიჩს თვალს აუხეღდა. სომეხთა ტომის ქართველთა თავადიშვილებმა ყარაბაღელთა და ერევნელთა გავლენით დღეს დაიწყეს „აზგასერობა“, თორემ მაშინ, 1829 წელს, სად იყო ეს ახალი ხილი? წარსულ საუკუნის დასაწყისში დიდი და საპატიო იყო ქართველის სახელი. ვინ იფიქრებდა მაშინ, რომ ორმოც-სამოცის წლის შემდეგ ქართველის სახელი ვიგინდარების და ყვავე-ყორანთა საკორტნელად გარდაიქცეოდა!

ესეც კია მათქმელი, რომ მაშინდელის საქართველოს სოციალური წეს-წყობილება გულს დაუთუთქავდა, კიდევ რომ გამოჩენილიყო მადლიანი პატრიოტი. რუსობის დროს ჩვენებური პატრიარქალური ბატონ-ყმობა ფრთებს ისხავდა და, „ვარდივით იფურჩქნებოდა“. გაქცეულ ყმებს თავადები გამოუყენებდნენ ხოლმე წვრილფეხა აზნაურებს და იკერდნენ, საცა კი მოასწრებდნენ, როგორც იკერენ გარეულს ცხენს ქამანდით. რომელი თავადი გაიწყვეტდა „ლუკმა პურს“ და გაუშვებდა ნება-ყოფლობით თავის მარჩენალს ყმასა?

საეკლესიო და სახასო გლეხნი? არც ამათ უჭირდათ ისე, როგორც ეხლა და ადვილად არ აიბარგებოდნენ მამა-პაპეულიდგან. ჩვენ მაინც ვფიქრობთ, რომ თუმცა დაბრკოლება დიდი იქნებოდა, საქმე კეთილად დაგვირგვინდებოდა, თავი რომ ვისმე გამოედო. ოღონდ გლეხს ბლომად მამულს დაჰპირდი, შელავათი აღუთქვი და სად არ წავა? კარაპეტა ეპისკოპოსისთანა ან პოლკოვნიკ ლა-

ზარე იაკიმის ძის ლაზარევისთანა კაცი რომ გამოჩენილიყო ჩვენში, მაშინ ჰნახავდით, როგორ დაითრგუნებოდა ყოველი დაბრკოლება.

რაკი პასკევიჩმა თვით საქართველოში რმუშტარიი ვერ იშოვნა შესხეთის დასასახლებლად, სომხები წამოიყვანა არზრუმიდან. ბ-ნ ეზოვის ცნობით, მაშინ მოსულა 14,000 ოჯახი. დაბინავედა ზოგი ქ. ახალციხესა და ახალქალაქს, ზოგი—მაზრებში, ზოგი—გუმბრსა და მის მაზრაში და ზოგიც გაიფანტა ამიერ-კავკასიაში. აი სწორედ ეს შემოხიზნული სომხობა და ჩვენსავე დარჩენილი თარაქამა-ქურთობა რკინის რგოლივით შემოველო ვარძიას. უკვე მოგახსენეთ, რომ მხოლოდ ოთხი პატარა სოფელი: აფნია, გოგაშენი, აგარა და ზედათმოგვი ობლად შესცქერის ვარძიას-მეთქი. მაშინ ნულარ გეუცხოვებათ ჩემი გაკვირვება და სიხარული, ოდეს შემომესმა ვარძიობას შორიდან მშობლიური „სუფრული“ და სიამოვნებით ამიძგერა გული.

მეორე დღეს, 15 მარიაშობისთვეს, ძალიან ადრე დაიწყო ერმა დაშლა. ღვთის-მშობლის დიდ ეკლესიაში შეველი და მლოცველთა ფიზიონომიას ვაკვირდებოდი. სწორედ ბევრი რამ მეუცხოვა. მლოცველთა შორის ძალიან ბევრი შევამჩნიე ბერძნობა. რა ექნა, საიდან გაჩნდა ამოდენა ბერძენი აქ, ამ სიშორეზე? მთელ ახალქალაქისა და ახალციხის მაზრაში მხოლოდ ერთი პატარა სოფელია, სულ 18 კომლიანი, სახელად მიქელწმინდა, ქ. ახალციხის ახლო. კიდევ გორის მაზრის ს. ციხის-ჯვარი, ბერძნებით დასახლებული, ცოტათი ემხრობა ვარძიას. მორჩა და გათავდა. მაშ, საიდან მოზღვავედა ამდენი ბერძნობა? კითხვა-კითხვით გავიკვლიე, რომ ბერძნები მოსულან ბორჩალოდან, წალკიდან, რატეენიდან,

ბორჯომისა და ატენის ხეობიდან (მარტო ბორჯომიდან ვარძიამდე 110 ვერსია), უარსიდან, განჯიდან, და კიდეც, ვინ იცის, საიდან. ასე გაშინჯეთ, უურძენიკი კი მოეტანათ საკურთხეველად. ეს კიდეც არაფერი: ისე გულმოდგინედ ლოცულობდნენ, ისეთ დიდ კელაპტრებს ანთებდნენ, რომ სწორედ საკვირველი იყო. ეს რა ამბავია, — ვეკითხები ჩემს თავს, — რად ეტანება ასე გულმხურვალედ ეს სამშობლოს მოკლებული ერი ვარძიას? ხომ არა ჰსურს აქ, ვარძიაში, იპოვნოს ისრაელივით გაბნეულმა ერმა თვისი რწმიდათა წმიდა, დასდოს საფუძველი და ბერძენე... დაისაკუთროს? ექვების ბლანდების ბადეში გავები. კარგად ვიცი რომ დღევანდელს რგაოსმალოებულს ბერძენს, რომლის ძარღვებში კლასიკურის ბერძნის სისხლი ნაკლებად სჩქეფს, უფრო კი იმ ველურ სლავიანთა ტომისაა, ბალკანეთსა და პელოპონეზს რომ შეესია. ვარძიაზე ნაკლებ არ არიან განთქმულნი საქართველოში სხვა საყდარ-მონასტერნი უფრო სამხრო მათთვის, ვიდრე ვარძია, რატომ იქით არ მიიკლავენ თავსა ეს ჩვენი მეორე „პატივეცემულნი სტუმარნი“, თუ მართლა მარტოდენ რელიგიური გრძნობა აგულიანებს და აღფრთოვანებს? მე ჩემად გამოცანა გამოვიცანი და თქვენი რა მოგახსენოთ. მოისმინეთ.

შესანიშნავის და სახელ-მორკმულის აბაშეთის რაინდის აშინოვის თანამოდეაწე არქიმანდრიტ მამა პაისის დამკვიდრებ:მდე საფარას, „დიდებულ მესხეთის“ ამ მეორე ბურჯსა, დარაჯობდა მხოლოდ ერთად-ერთი ქართველი მწირი, სახელად ქრისტესია. ბევრჯელ მინახავს ყმაწვილობაში ეს თავგადადებული მამულისშვილი შუაგულ ქართლში, საზრდოს მოსაგროვებლად რომ დადიოდა. რა მათექრებიებდა მაშინ, პატარაობისას, თუ ეს

მათხოვარა შწირი ღირსი გახდებოდა ძეგლისა და ჩემის თვალით ვნახავდი ქრისტესიას ზგაპატიოსნებას. არქიმანდრიტი მამა პაისი რომ დაბინავდა საბოლოოდ რიცხვ-მრავალ კრებულით საფარას, სადაც მტრის მტარვალობას და ეამთა ვითარებას გადარჩა ცამეტი თლილის ქვის ეკლესია, სხვათა შორის წმიდა საბასი, სადაც დახატულია ფერადის საღებავით სარგისი, სამცხეს სპასალარნი: ყვარყვარე, შალვა და ათაბეგი-ბეჟა, მანდატურთ-უხუცესი, დამფუძნებელი და გამამშვენებელი ტაძრისა, — საწყალს ქრისტესიას, როგორც მეტ-ხორცს, აეკრიფნა გულა-ნაბადი და აბარგულიყო. ის კი აღარ ვიცი, დაიბერტყა გულ-დამწვარმა შწირმა ქრისტესიამ ფეხთა თვისთავან მტვერი და დასტოვა საფარას, თუ არა.

ბერი ქრისტესია უბერო საქმედ ვერ დარჩებოდა, როგორც თევზი უწყლოდ. თვის საყვარელს საფარას რომ განშორდა, დაიწყო თურმე ძებნა საქართველოს სხვა ნატამალისა, მალეც იპოვნა, რადგან ქართველს დიდხანს არ მოუხდება ძებნა წარსულის ნაშთისა. ბორჯომის ხეობაში გამოეძებნა ერთი გაოხრებული მონასტერი, შეჰკედლებოდა და დაეწყო მისი ჩვეულებრივი გამშვენიერება. სამუდამო განსვენებაც ქრისტესიას აქ უპოვნია: იგი გარდაცვლილა 30 მაისს 1892 წ.

ახალციხის ქართველობას კარგი უნებებია, რომ გაუხსენებია ღვაწლი თვისის მოამაგე ბერისა და მცირე ძეგლი დაუდგამს: საფარას ქვის ზღუდე ადგია. ძეგლი სწორედ ალაყაფის კარწინაა. მართალია, საფარას მოამაგე და მოქირნახულე ღირსი იყო, რომ ზღუდეთა შორის აეგოთ ძეგლი და არა გარედა, მაგრამ ესეც კარგია. აღბად ახალციხელმა ქართველებამ შიგნით ვერ მოა-

ხერხა ძეგლის აგება, ვინაიდან დღევანდელი ქართველი ძველებურად აღმართს ველარა ჰხნავს.

ძეგლს რუსულ-ქართული წარწერა აქვს. ქართულად ასეა: *ახალციხის ქართველთა საზოგადოებამ ნებართვით შეუფე საქართველოს ეგზარხოსისა აუგეთ ძეგლი 1893 წ. ბერს ქრისტესიას სახსოვრად მისის დაუღალავის შრომისა საფარის მონასტრისათვის. რუსულად: „Ахалцихское грузинское общество съ разрѣшенія владыки Экзарха Грузіи воздвигло памятникъ сей въ 1893 г. рясофору Христесію въ память неутомимаго труда его для Сафарскаго монастыря. Погребенъ 30 мая 1892 г.“*

საფარას ქრისტესია ბერი მაინც დარაჯობდა და გუშაგობდა, წელიწადში ორჯელ-სამჯელ მაინც აანთებდა სანთელს საბას ეკლესიაში და მტკერს მოაყოლიდა ამ ტაძრის ამშენებელს ბექას, მესხეთის ამ შესანიშნავს კანონ-მღებელს, — ვარძიისთვის ბედმა მშირიც კი (რიასოფორი) დაიშურა.

1854 წლამდე ვარძიის გამოქვაბული მონასტერი, მისი მშენებელი წარუხოცელ ფერადებით შემკული ეკლესია დიდებულ თამარის სურათით „ძაღლისა და ღორისა“ ანაბარად ყოფილა დაგდებული. ამ წელს ოსმალეთიდან გამოქცეულა ვიღაც ბერძენი, გვარად ჰაპანდოპულო. როგორც მომეტებული ნაწილი ოსმალეთიდან მოსულ ბერძენთა, ეს ჰაპანდოპულოც კვის მთელიყოფილა. შემთხვევით ვარძია უნახავს და ფიქრად მოსვლია მონასტრის აღდგენა. მაშინდელ ეგზარხოს ისიდორესაგან ნებართვა აუღია და საქმეს შესდგომია. ეკლესია გამოუგვია, ალაგ-ალაგ გზები შეუსწორებია, იაფ-ფასიანი კანკელი დაუდგამს, აი სოფლის ყავრით დახურულ ხის

ეკლესიებში რომაა ხოლმე, იმისთანა, ერთის სიტყვით, ღვთის მშობლის დიდი ტაძარი საკურთხეველად მოუმზადებია.

თურნალი „მწყემსი“, რედაქცია დეკანოზ დ. ლამბაშიძისა (იხ. Древний Вардзійскій монастырь, გვ. 14) გვიამბობს, რომ ვითომ არქიეპისკოპოსს ევსევის ვარძია დაუთვალა იერება 1857 წელს და უკურთხებია პაპანდოპულოს მიერ გამზადებული ეკლესია. კურთხევის შემდეგ მალე განუწყესებიათ წინამძღვარი კრებულით. ყოვლად სამღვდელო კირიონი კი თავის შესანიშნავ მეცნიერულ გამოკვლევაში, რომელიც აშენებულია საარქივო მასალასა და დოკუმენტებზე, ამბობს, რომ საქართველოს ეკლესიას განაგებდა მიტროპოლიტი ისიდორე 1844 წ. 12 ნოემბრიდან 1858 წლის 1 მარტამდე. (იხ. Краткій очеркъ исторіи грузинской церкви экзархата за XIX столѣтіе, გვ. 23). თუ მართალია, რომ ვარძიის დიდი ეკლესია უკურთხებიათ 1857 წელს, მაშინ ისიც მართალი იქნება, რომ იგი უკურთხებია ევსევის კი არა, — მიტროპოლიტ ისიდორეს, რომელიც მწყემსმთავრობდა საქართველოს ეკლესიას 1858 წელს 1 მარტამდე.

პიონერობა ვარძიის განახლებისა ეკუთვნის ოსმალოელ ბერძენ პაპანდოპულოს. ეს ქეშმარიტი ამბავი ქეშმარიტად დარჩება. „მწყემსის“ მიერ დაბეჭდილი ბროშურა (1—14 გვ.) სხვა ღირსებასაც მიაწერს პაპანდოპულოს. ღვთის მოშიში და სწორედ ნამდვილი ქრისტიანე იყო. სული შეუშფოთდა, ასე გავერანებულგაოხრებული რომ იხილა საქართველოს ძველი შესანიშნავი საქრისტიანო სახსოვარი და, აღტყინებული რელიგიურ გრძნობით, საქმეს შეუდგაო.

შორიდან პაპანდოპულოს ამბავი ისე გვეჩვენება, რომ მადლობის მეტი არა გვეთქმის-რა, საქმით კი ცოტა სხვა ელფერი ედება მის ხასიათსა. და ნამოქმედარს. პაპანდოპულო იმასაც კი ვერ ეღიროსა, რომ ვარძიაში დასაფლავებულიყო. სადღაც, ვარძიის გარეთ, მიუბარებიათ ცივ დედამიწისთვის პაპანდოპულოს გვამი. მთავრობას არ მოესურვა მისი „გაპატიოსნება“ და ღირსად არ ეცნო, რომ ვარძიის „განმაახლებელის“ გვამი ვარძიაშივე დამარხულიყო. ნამდვილი მიზეზი ასეთის სასტიკობისა არ ვიცი, ვაგონებით კი ეს გავიგონე, რომ ბატონი პაპანდოპულო ვითომც გაკრეკილი მღვდელი ყოფილიყოს, რაღაც ბოროტებანი ჩაედინოს სამშობლოში და, რომ თავიდან აეშორებინა ღირსეული სასჯელი, საქართველოში გამოქცეულა.

ამ ოცის, ოცდა ათის წლის წინად ხშირად შეხვედბოდით რუსეთსა და საქართველოში მაწანწალა მღვდლებს, რომელნიც გულ-უბრყვილო ერში ბლომად აგროვებდნენ ხორბალსა და ფულს. ჩვეულებრივ თავს იკატუნებდნენ, ოსმალებმა დაგვარბიეს, ეკლესია დაანგრიეს, სოფელი ამოაგდეს და მრევლი გაგვიჟლიტესო. ან კიდევ შესაწირავს აგროვებდნენ ათონისა და იერუსალიმის ტაძარ-მონასტრებისთვის. მათს ვინაობას არავენ იძიებდა და ისინიც თამამად ჰკრეკდნენ უბრალო ხალხსა და მღიღარ ვაქრების ცოლშვილს.

მთავრობამ რომ გამოიკვლია მათი ვინაობა, ვინ იცის, რა არ აღმოჩნდა. ზოგი კაცის მკვლელი გამოდგა, ზოგი სათოკე ყაჩაღი, ზოგი კიდევ ცრუპენტელა მატყუარა, გაიძვერა და ვერაგი. ეს კიდევ არაფერი. მართლ-მადიდებელ მღვდლობას ირქმევდა სომეხ-გრიგორიანი და კანდიერად ვაქრობდა მდაბიო ხალხის წმინდა

რელიგიურ გრძნობით. ამისთანა ლირფებს თვით სომხის ერმა კოხტა და მოხდენილი სახელი უწოდა, „ხაჩაგოვი“, ანუ ჯერისპარია. — ვარძიის განმაახლებელი პაპანდოპულო, ვინ იცის, ეგები, ხაჩაგოვის ჯურის მოღვაწე გახლდათ.


პაპანდოპულოს მიერ აგებული კანკელი ერთი რაღაც უშნო, უღაზათო ნათუთხნია. აფსუს, დიდებულო ტაძარო, რომ მარტო ასეთს „შეკეთებას“ ელირსე და მერე ვისგან? მაწანწალა, ოსმალეთიდგან მოთრეულ ბერძნისაგან!

კანკელის სიგრძეზე, ზედ აღსაელის კარზე, ბერძნული წარწერაა. სწორედ დიდი სირცხვილია და თავის მოჭრა, რომ თამარ დედოფლის მიერ აშენებულს ეკლესიაში დღეს წარწერაა გამოქიმული ვიღაცა უთვისტომო პაპანდოპულოსი აღსანიშნავად აღბად იმ ამბისა, რომ დანგრეული ტაძარი განაახლა და კანკელი ააგო ოსმალეთიდან ჩამოსულმა პაპანდოპულომ სადიდებლად ღვთისა, საოხად სულისა თვისისა და მისატყვებლად ცოდვათა. ცოდვათა მიტყვება რომ ექირებოდა პაპანდოპულოს, ეს გარკვევით ვიხილეთ, მაგრამ მაწანწალა კაცის ცოდვათა მისატყვებლად და საოხ ასპარეზად განა თამარის, ამ საქართველოს ღვთაების და ბრწყინვალეების ქმბლემის, ტაძარი უნდა გახდეს? გესლოანი ირონიაა, დაცინვა ბედისა, მაშ რა არის?

პაპანდოპულოს ჩხირკედელაობა, მისი სურვილი, რომ ვარძიაში დაკრძალულიყო, ბერძნული წარწერა კანკელზე — გარდაქცეულა იმ ანდამატად, რომელიც იზიდავს ბერძნობას ვარძიობას, თორემ კარელ, განჯელ და წალკელ ბერძნებს რა მოარბევინებს ამ სიშორეზედ სალოცავად? : განა კოტაა საქართველოს განთქმული

წმინდანები მათ ბინის ახლოს? ვარძიას თავისი საკუთარი „წმინდანიც“ კი არა ჰყავს, როგორც, მაგალითებრ, თითო-ოროლა ეკლესიას, სასწაულთ-მომქმედი ღვთის-შშობელი, ან სარკეს წმ. გიორგი, ილორისა და სხვა. ოღონდაც რომ არის, მაგრამ ეტყობათ, რომ ოხრად დატოვებული ქართველთაგან გამოქცეული მონასტერი, სადაც უცოდვილია პაპანდოპულოს, ნიშანში ამოუღიათ და ჰლამიან წარიტაცონ, ვინაიდან ადვილია მისი დაჩემება, და გარდაჰქმნან თვის ეროვნულ „სიწმინდედ“.

იქნება ბერძნებს იზიდავს ქვისა და ლოდის ტრფიალი? მოგეხსენებათ, რომ ბერძნებს დიდად ეხერხებათ ქვის და ლოდის ტეხა, გამოკუთხვა, დარგვალება და გალამაზება და, რადგან ვარძია კლდეშია გამოქცეული, იმისათვის გული აქეთ უფრო უწევთ. ქვა და ლოდი დიდის სიამოვნებით დაგვიტმია მათთვის, მაგრამ ჩვენს ისტორიულ ნაშთთან რა ხელი აქვთ? ნუ თუ ჩვენი სამღვდელოება ისე დაძაბუნდა, ისე დაკნინდა, რომ აღარ შესწევს ზნეობრივი ძალა მოსეულს ხმა-მალღა უთხრას-- შორს ჩვენგან, ეშმაკეულო და განვედი, კათაკმეველოვო? ალბად დაკნინდა, რომ მარტო მრევლთან დავიდარაბაში ამოსდის სული... ეროვნული ეკლესიის ინტერესის დაცვა და ზრუნვა სხვას ჩააბარა და თვითონ კი მარტოოდენ მსუქან ტაბლებისათვის ჰფიქრობს...



სამშობლო ქვეყანა

დღეა მიწის ზურგზე ბევრი ქვეყანაა და ბევრი სხვა და სხვა ტომის ხალხი სცხოვრობს. ჩვენი პატარა სამშობლო უძველესი ქვეყანაა და მისი წარსული ცხოვრება ათას წლობით ითვლება. ქირი და ვარამი იმოდენა უნახავს, იმოდენი უბედურობა და ტანჯვა დასტეხია თავსა, რომ ძნელად იქნება სადმე სხვა კუთხე და ხალხი, რომ ამოდენა განსაცდელი გამოეაროს და არ გამქრალიყოს. ქირსა და ვარამთან ერთად საქართველოს კარგი და ბედნიერი დღეებიც ბევრი ჰქონია, თამამად და გაბედულად უცხოვრია, სიკეთე უთესია, გონება გაუბრწყინებია და მეზობლობაში საპატიო სახელი შეუძენია.

ასე კირნახულია ქართველი ერი წარსულში და შეუძლებელია, რომ მომავალიც ბედნიერი არა ჰქონდეს. ფრიად საჭიროა მხოლოდ, რომ ვიცოდეთ, როგორ ყოფაშია დღეს ჩვენი კირნახული ქვეყანა, როგორ ცხოვრობს ქართველი კაცი და ცხოვრებისა რა საღსარი აქვს ხელში. საჭიროა აგრედვე ვიცოდეთ, ვინა სცხოვრობს ჩვენ მეზობლად, სადაურები არიან და როდის დასდეს ბინა ჩვენს მიწა-წყალზე.

ბუნება საქართველოსი მრავალ ფეროვანია, ერთი კუთხის ჰავა და ნიადაგი მეორისას არა ჰგავს. არც ცხოვ-

რება გვქონია და გვაქვს ერთ-ფეროვანი. ასე გასინჯეთ, სახელიც კი ერთი არა გვაქვს. სხვა და სხვა კუთხის ქართველი ტომი თავისებურ, საკუთარ, ადგილობრივ სახელს ატარებს. ალბად ეს გარემოება დაიხვია ხელზე რუსის მთავრობამ და ქართველის ტომის კაცი სხვა და სხვა ხალხად ჩასთვალა, ვითომც მათ საერთო არა აქვთ-რაო. ჩვენ ქვეყანას საქართველოს მაგიერ „გრუზია“ უწოდეს და ჩვენ, ქართველებს, კიდევ „გრუზინები“. მეზობლებიც ასევე უკუღმართად მოიქცნენ. ზოგმა ჩვენს სამშობლოს „გეორგია“ უწოდა, ზოგმა „ეეორეი“ და ზოგმა კიდევ „გურჯისტანია“. ამ გვარი არევ-დარევა სახელისა და ერთის ერის დანაწილება და დაწინაურება დიდი შეცდომაა და წინააღმდეგი როგორც მეცნიერებისა, აგრედვე ბუნებისა და კეშმარიტებისა.

არც სარწმუნოებითა ვართ ერთფეროვანნი ქართველები. არიან ისეთი ქართველები, რომელნიც ქრისტიანობას მისდევენ ბერძნულ მართლ-მადიდებლობის წესით, არიან ისეთებიც, რომელნიც აღიარებენ ქრისტიანობას კათოლიკობის წესით და ისეთებიც, რომელთაც მაჰმადიანობა უქირავთ. მოიპოვება ჩვენში ისეთი ქართველიც, რომელიც ქრისტეს აღიდებს წმინდა გრიგოლის წესით.

სხვადასხვაობა ადგილობრივ, თემურ სახელწოდებისა; სხვადასხვაობა სარწმუნოებისა და რჯულისა არა ნიშნავს სხვადასხვაობას ერისას. სარწმუნოება და თემური სახელები, მართალია, განსხვავდება, მაგრამ ქართველი ერი იყო და არის ერთი და განუყოფელი, თუნდა იმერელი და ქართლელი ერქვას, თუნდა გურული და კახელი, თუნდა მესხი და აქარელი.

მაშ შევეუდგეთ საქმეს და ნაწილ-ნაწილ გადავშა-

ლოთ და ეიხილოთ, თუ სად და როგორ ცხოვრობს ქართველი კაცი. გზა და გზა მეზობლებიც მოვიხსენიოთ ხოლმე, რადგან ეგენიც დიდი ხანია ჩვენს ქვეყანას შემოეხიზნენ და ჩვენთან ეწვევიან ცხოვრების უღელს და კაპანს.

I

სამცხე-საათაბაგო.

დღევანდელი ახალციხის მაზრა მესხეთის, ანუ ზემოქართლის ერთი საუკეთესო ნაწილია. მესხეთის ამ კუთხეს, ოსმალების ბატონობის დროს (1626 — 1828 წ.), ეძახდნენ ახალციხის საფაშოს, ან ფაშალიყს. წინად, ვიდრე ოსმალონი ჩაიგდებდნენ ხელში მესხეთს, ქართველები და თვით მესხნი ეძახდნენ ამ კუთხეს „სამცხეს“. რადგან აქაურმა მთავარმა, ესე იგი მესხეთის ჰატრონ-ბატონმა ათაბაგობის წოდება დაიჩემა, „სამცხეს“ სახელს საათაბაგოც მიუმატეს და ამ გვარად გაჩნდა ორპირი სახელი. ისტორიაში მოხსენებულია კიდევ ერთი სახელი მესხეთის ამ ნაწილისა. ესაა ოდრხე. ეს იმ დროის სახელია, როდესაც საქართველო საერისთავოებად იყო დაყოფილი და აქაურ მთავარ-ერისთავს უძახდნენ ოდრახოლის მთავარს.

ახალციხის მაზრა, იგივე სამცხე-საათაბაგო, პატარა ქვეყანაა. უქირავს სულ 2333 ოთხ-კუთხი ვერსი, ანუ 486,036 დღიური (243,018 დესიატინა). აღმოსავლეთით უდევს თრიალეთის მთა, დასავლეთით აქარისა, ჩრდილოეთით — ქართლ-იმერეთის უღელ-ტეხილი და სამხრეთით ჩალდირის მთები. ამ სამზღვართა შორის სცხოვრობს ამ ეამად სულ 78,100 სული, ქალი და კაცი.

სამცხე-საათაბაგო მთა-გორიანი და კლდიანი ქვეყანაა, დასერილი ხეობებით და ღელე-ღრანტეებით. უფრო დიდი ხეობანი ესენია: ბორჯომისა, აწყურისა, წნისისა და მუსხის ვიწროები, ოშორისა, ხერთვისისა, ურავლისა, ფოცხოვისა და ჯაყის-წყლისა, ქვაბლიანისა და აბასთუმნისა. ბლომადაა წყარონი და მდინარენი, დიდნი და ჩქარად მომდინარენი. დიდი მდინარე მტკვარი თითქმის შუაზე ჰყოფს სამცხეს და ძალიან ჩქარა მოდის. ხერთვისისა და ბორჯომის ვიწროებში ისე ჰქუხს, როგორც თერგი, ან რიონი რაჭაში. მშვენიერი და საამოსანახავია წყალდიდობას ჯაგარ-აყრილი, აზვირთებული მტკვარი. პოეტ ნ. ბარათაშვილს აქ რომ ენახა მჩქეფარე მტკვარი, ამოდუდუნეს“ აღარ დაუძახებდა.

მტკვარს გარდა შემდეგი მოზრდილი მდინარენია საათაბაგოში: ფოცხოვის-წყალი, ჯაყის-წყალი, ურავლისა, ქვაბლიანისა, აბასთუმნისა და წნისისა. მთის მდინარენი სავსეა კალმახით, იცის აგრედვე ციმორა და შურწა. შემოდგომა-ზამთარს მტკვარზე აკეთებენ ოჩხებს და ბლომად იკერენ თევზს. აქაური ოჩხის თევზი ისევე გემრიელია, როგორც გორისა.

აქაური წყარონი ტყბილია, მშვენიერი და კარგნი. ზამთარი ადგილ-ადგილ ცივი და დიდ თოვლიანია; ადგილ-ადგილ კი ფრიად თბილი და ზაფხულს შეხავებული. ჰავა ჯანმრთელობისთვის მარგებელია. რადგან აქ ქაობები და დაგუბებული წყალი არ მოიძებნება, ამიტომაც არ იცის ციებ-ცხელება, როგორც სამეგრელოს და ზღვის-პირის აფხაზეთმა.

ველ-მინდორი სამცხე-საათაბაგოს ძრვიელ ცოტა აქვს. ან კი საიდან იქნება აქ გაშლილი მინდორი, როდესაც მთელი ეს კუთხე მოფენილია მოსაზღვრე მთა-გრებილთა

ტოტებით *). ქართლ-იმერეთის უღელ-ტეხილზე, რომელსაც ეძახიან აგრედვე ვახტანგის მთას, ან სურამის ქედს, აქარისა და არსიანის მთის მწვერვალებზე ზაფხულობითაც არ ილევა თოვლი. მხოლოდ მკათათვის გასულს დნება ამ მაღლობებზე ძველი თოვლი. მარიაშობისთვის გასულს, ან ენკენისთვის დასაწყისში ხელ-ახლა მოდის ახალი თოვლი და თეთრ ბოხობა ქუდივით გადაეფარება ხოლმე მესხეთის ამ ნაწილს.

სამკურნალო წყლებითაც მდიდარია სამცხე-საათაბაგო. განთქმულია უფრო აბასთუმნის წყალი, პლატესი, ურაელისა და ასპინძისა. აბასთუმნის სამკურნალო წყალს ასე აგვიწერს ბატონიშვილი ვახუშტი **): მთის კალთას გამომდინარებს ფრიად დიდი და ცხელი წყარო, მდულარის მზგავსი. კლდეზე აშენებულია აბანო და ბანაობენ მრავალნი, რადგან არჩენს ქარით დახუთვილსა, მუწუქსა და ბუგრსა, მკურნალთაგან ძნელად საკურნებელსა.

სამცხე-საათაბაგო განთქმული იყო ძველად ბუნების სიუხვიით და ნაყოფიერებით. მრავალი ჯურის ხილი ხარობდა და მოდიოდა ყოველნაირი მარკვალი. მრავალი იყო ვენახი, ბალი და სავარდე.

დღეს, ევროპაშიც არ მეგულება, გარდა ბოლგარეთისა, ვარდის ბალები, ანუ სავარდენი. ეტყობა, ჩვენს წინაპრებს დიდად ჰყვარებიათ ვარდი, რომ ვარდის ბა-

*) ლეპისის ველ-მინდორი, ვარძიის შესანიშნავ მონასტერს რომ თავს დაჰყურებს, უფრო ჯაეახეთს წააგავს და მთავრობამ ტყვილად მიაკერა იგი ახალციხეს. ლეპისი უტყეო და მოტიტვლებულია, როგორც ჯაეახეთი.

***) ეს ის ისტორიკოსი და გეოგრაფია, რომელმაც დაგვიტოვა შესანიშნავი წიგნი: აღწერა საქართველოისა. წიგნი დაუსრულებია ვახუშტს 1745 წ. რუსეთს, სადაც გადახვეწილი იყო.

ღები უშენებიათ, აი სწორედ ისე, როგორც იაპონელს უყვარს თითქმის გაგიჟებით ვარდ-ყვავილი. უეჭველია, ზავარდებს მარტო სასიამოვნოდ არ გაიჩენდა მესხი და ისარგებლობასაც ნახავდა. ვარდის ფოთლიდან ზეთსა ჰხდიან და სამკურნალოდ ხმარობენ. ვარდის ზეთი ძალიან ძვირად იყიდება. რა ტურფა და მომხიბლავი იქნებოდა მაშინდელი მესხეთი მაისის თვეს, შემკული ვენახ-ბაღებით და სავარდევით! დღეს აღარც ვენახებია, აღარც სავარდენი. ამბობენ, ვაზი ველარ ხეირობსო, სუსხიანი ზამთარი სძრავს ვაზს და ნაყოფი აღარ მოაქვსო. უწინ რომ ვენახები ბლომად ყოფილა, იქიდანა სჩანს, რომ ხშირად პოულობენ მიწაში ჩაფლულ ღვინის ქვევრებს. მე თვითონ მინახავს 1891 წ. მუსხისა და ტობის ძირობებში, მტკვრის პირას, გამხმარ ვაზის ჯირკები. ეტყობა ვენახები გადაშენებულა ამ უკანასკნელ ოცდაათის წლის განმავლობაში. მთელ სამცხე-საათაბაგოს ეხლა აღარც ერთი ვენახი აღარაა და ვისაც ყურძნით პირის გასველება ჰსურს, უნდა იყიდოს აქარიდან, ან ქალაქიდან მოტანილი. ხილის ბაღები კი ბლომდაა და კარგი და გემრიელი ხილიცაა, განსაკუთრებით ვაშლი. აქაური საუკეთესო ჯიშის ვაშლი, „შაჰ-ალმას“, ან მეფის საკადრის ვაშლს რომ ეძახიან, განთქმულია მთელ საქართველოში და თვით რუსეთშიც. სადაც ბლომად გააქვთ გასასყიდად.

ტყითაც მდიდარია სამცხე-საათაბაგო. ბევრგან, როგორც საზოგადოდ საქართველოში, უგუნურად ექცევიან ქვეყნის მშვენება ტყეს და უწყალოდ სჩეხავენ, მაგრამ ჯერ-ჯერობით მაინც საკმარისადაა საშენი და საწვავი ტყე. მთა და მთის ტოტები შემოსილია ტყით, განსაკუთრებით ქვაბლიანისა და აბასთუმნის ხეობანი. შენა-

ხულია უფრო ის ტყეები, რომელიც ხაზინას ეკუთვნის. ხაზინა უფროსილდება და წესითა და რიგით სჩეხავს, ისე რომ ტყე არ დაილიოს. ორიოდ მამულის პატრონის გარდა, კერძო მემამულენი უწყალოდ ექცევიან ტყეს, ანადგურებენ და იმას აღარ დაგიღევენ, რომ უტყეო ქვეყანა უდაბნოს დაემგზავსება, სადაც ცხოვრება და წარმატება შეუძლებელია. განსაკუთრებით კარგადაა შენახული ტყე მთის მიუვალ ადგილებში. აქ შეგხვდებით ნაძვისა და ფიჭვის. დიდრონ-დიდრონი ხეები, რომელსაც ოთხ არშინიანი საბელი ვერა სწვდება, ისე სქელია ზოგიერთა ხე. სულ ცოტა, ასეთი სქელი და დიდ-ტანიანი ხე იქნება სამას-ოთხასი წლისა, მაშასადამე ამოსული იმ დროს, როცა სამცხეს პატრონობდა და უვლიდა ათაბაგი და ამ განათლებულ და ღონიერ ქვეყანას ჯერ არ ეხილა არც ოსმალოსა და არც რუსეთის მართვა-გამგეობა.

სამცხე-საათაბაგო მდიდარია ფრინველითაც. იცის აგრედვე ნადირი და გარეული ფუტკარი. მეფუტკრეობას მისდევენ მესხნი, მაგრამ უხალისოდ, თუმცა თაფლი ტკბილი და გემრიელია.

უწინ, ვიდრე ოსმალონი დაიპყრდნენ მესხეთს, აქაური მკვიდრი, ქალი და კაცი, ყოფილა ნელად და ენა-ტკბილად მოუბარი, ტანოვანი, მხნე, მშვენიერი და ცოდნა-ხელოვნების მოყვარე. შემდეგ ქრისტიანობა მაჰმადიანობაზე რომ შეუცვლიათ, მესხებს ეს თვისებადირსებანი დაუკარგათ.

პირველად რჯული გამოიცივალეს ათაბაგმა და თავად-აზნაურებმა. ვინც სარწმუნოებას იცვლიდა, იმას მამულ-დედულიც შერჩებოდა ხოლმე და სხვა წყალობასაც იღებდა ოსმალთა ფაღიშაჰისაგან, ანუ მეფისაგან.

თავად-აზნაურობის მაგიერ მისცეს ხარისხი და პატივი ბეგისა, ასე რომ, ესთქვათ წინად თუ დიასამიძე თავადი იყო, ოსმალთა ბატონობის დროს გახდა ბეგი დიასამიძე. ეს გვარი ეხლა ამოწყვეტილია, მაგრამ სხვა ქართველ კეთილშობილთა გვარები ბლომადაა დარჩენილი.

შემდეგში თავად-აზნაურობას გაჰყვა გლეხ-კაცობა და თუმცა კარგა ხანს ჯიუტობდა და ქრისტიანობას არა ლალატობდა, მაგრამ ძალდატანებას და გადამეტებულ ხარჯს ველარ გაუძლო და ახალი რჯული მიიღო. რჯულის გამოცვლას თან მოჰყვა ზნე-ხასიათის გამოცვლა, ჩვეულებისა და ტანისამოსისა. ამდენ ცვლილებასთან შერეული თათრულ-ოსმალური ენაც შეითვისეს, ასე რომ თუ ძველად, ოსმალების მოსვლამდე, მესხი საესებით წააგავდა ქართლელსა, შემდეგ, ამოდენა ცვლილების წყალობით, ასეთი მზგავსება დაიკარგა. რაც უნდა იყვეს, გაოსმალელებული და გამაჰმადიანებული მესხი მაინც ძალიანა ჰგავს ქართლელსა და კახელს. საკმარისია მცირედად დააკვირდე აქაურ ჩალმოსან მაჰმადიანს, და მაშინვე მიხვდები, რომ იგი ქართველია და არა ოსმალა. ზოგი კი პირწაყარდნილი ქართლელია გარეგნობით და სახით. შეცვლა სახისა და გამომეტყველებისა, უეჭველია, იმითი აიხსნება, რომ რამოდენიმე ოსმალა და თათარი, ქალი და კაცი დაბინავდა სამცხე-საათაბაგოს, დაუნათესავდა მკვიდრსა და ამ გვარად მოხდებოდა სისხლის შერევა.

სამცხე-საათაბაგომ თითქმის სამასი წელიწადი იცხოვრა ათაბაგების ხელში დამოუკიდებლად და საქართველოს მეფეებს არ ემორჩილებოდა. ჰქონდა მხოლოდ მეზობლური კავშირი და მისვლა-მოსვლა დანარჩენ ქართველობასთან. პოლიტიკურად დიდად გაძლიერდა საათაბა-

ზაგო, რის გამო ათაბაგებს ამაყად ექირათ თავი. ეს ძლიერებაა მიზეზი, რომ ათაბაგებმა მოინდომეს საკუთარის კათალიკოზის ყოლა და აღმოსავლეთ ბერძენ პატრიარქების ნებართვით კიდევ დააწესეს აწყურში საკათალიკოზო კათედრა, რომელსაც უნდა დამორჩილებოდა სრულიად ზემო-ქართლის სამღვდელოება. აღმოსავლეთის პატრიარქებს არ ესიამოვნებოდათ სიძლიერე სრულიად საქართველოს კათალიკოზისა, მცხეთაში რომ ჰქონდა კათედრა, და ამის გამო ხელს უმართავდნენ აწყურის მთავარ-ეპისკოპოსს, განდგომილიყო მცხეთის კათედრიდან და მის ნება-დაურთველად ემართა ზემო-ქართლის ეპარქია. მაგრამ ათაბაგების, აწყურის და აღმოსავლეთ ბერძენ პატრიარქთა მეცადინეობამ ფუჟად და ამაოდ ჩაიარა. სიმართლისა და საეკლესიო კანონების წინააღმდეგი იყო ასეთი სურვილი და მეცადინეობა და ბოლოს საქმე იმითი გათავდა, რომ მესხეთის ეკლესია ძველებურად მცხეთის კათალიკოზს დამორჩილდა.

შინაური ცხოვრების განვითარება და მოქალაქობა იმ ხარისხამდე ავიდა, რომ საათაბაგომ საკუთარი კანონები გაიჩინა, როგორც შექთერის ყოველ განათლებულ და განვითარებულ სახელმწიფოს. ასეთია კანონები ათაბაგ ბექასი და მისის შვილის-შვილის აღბუღასი. უფრო იმითია შესანიშნავი და საყურადღებო ამ კანონების დაწერა, რომ იმ დროს ჩვენ სამშობლოს შემოესია ლანგთემური, წინამძღვარი მონგოლთა და რამდენჯერმე ააოხრა საქართველო.

მეჩვიდმეტე საუკუნის დასაწყისს; ასე 1626 წელს, ოსმალებმა დაიპყრეს საათაბაგო და ფაშობა შემოიღეს ათაბაგობის მაგიერ. დიდი ზარალი და ზიანი მოუტანა საერთოდ ჩვენს ქვეყანას და კერძოდ საათაბაგოს ოსმა-

ლების ჩამოთესლებამ და დამკვიდრებამ ზემო-ქართლში. ჯერ ერთი საქართველო სრულიად მოსწყდა განათლებულ დასავლეთ ევროპას, რადგან ოსმალო უზარ-მაზარ კედელსავეთ აგვეყუდა წინა, მისვლა-მოსვლა გაგვიძნელდა ევროპასთან და დაერჩით გამომწყვედელნი, როგორც კარ-მიხურულ გაღიაში. მეორე კიდევ ისაა, რომ ოსმალონი გაუნათლებელი ხალხი იყო მაშინ; თვითონ რომ არა იცოდნენ-რა ომიანობის მეტი, ჩვენს ქვეყანას რას მოუტანდნენ. მას შემდეგ, რაც ოსმალონი გაბატონდნენ სამცხე-საათაბაგოში, სწავლა-განათლება, ხელოვნება და ვაჭრობა უკან-უკან წავიდა ამ კუთხეში. წინად რომ შესხეთს ებადებოდა შესანიშნავი მგოსნები, აი როგორც შოთა რუსთაველია, განთქმული მქადაგებელნი, ფილოსოფოსნი და სახელმწიფო მოღვაწენი და სარდალნი, ოსმალოს ბატონობის დროს ცხოვრება ისე დადუმდა და დაქვეითდა, რომ აღარც სარდალ-მოღვაწენი, აღარც ბრძენ-ფილოსოფოსნი და აღარც მგოსან მქადაგებელნი აღარა ჩნდებოდა ამ ქვეყანაში. ქალაქი ახალციხე შეიკმნა სხვა და სხვა ავაზაკთა ბრბოების საბუღრად. აქ იკრიფებოდა მოუსვენარი ხალხი, უფრო კი დაღესტნიდან ჩამოსული ლეკობა და ხანდა-ხანობით ხან ქართლს აწიოკებდნენ ახალციხიდან გამოსული ავაზაკები, ხან გურია-იმერეთს. ახალციხის ფაშები ხელს აფარებდნენ ამ ავაზაკებს და პატრონობას უწევდნენ. ბევრი ურჩი და აბეზარი კაცი ქართლ-კახეთიდან და იმერეთიდანაც გადადიოდა ახალციხეს და იქ აფარებდა თავსა. ასე მიდიოდა საქმე მთელი ორასი წელიწადი, მოკიდებული 1626 წლიდან 1828 წლამდე. ამ წელიწადს კი საქმის გარემოება შეიცვალა.

1801 წელს საქართველოს ნაწილს, ქართლ-კახეთს,

დაეპატრონა რუსეთი. მეფე ერეკლემ და დედოფალ ეკატერინე მეორემ ხელშეკრულება დასდეს 1783 წელს, რომლის ძალით რუსეთის მეფეებმა ვალად დაიდეს და იკისრეს სამცხე-საათაბაგოს დაბრუნება საქართველოსთვის. წარსულ საუკუნეში, 1828 წ. რუსეთის მეფეს ომი ჰქონდა ოსმალეთთან. რუსის ჯარის სარდალმა გრაფ პასკევიჩმა დაამარცხა ოსმალის ჯარი ახალციხესთან. ჯარი ჯავახეთიდან ჩამოვიდა, დილა აღრიან გასტოპა მტკვარი სოფელ ქვათახევეთან, შეებრძოლა ქოსა-მაჰომედ და მუსტაფა ფაშებს და წაართვა ოთხი გამაგრებული ბანაკი. ეს იყო 9 აგვისტოს. ზედ მარიამობა დღეს, 15 აგვისტოს, იერიშით აიღო პასკევიჩმა თვით ქალაქი. ქოსა-მაჰომედმა 16 აგვისტოს ჩააბარა პასკევიჩს თვით ციხე. ამ დროს ახალციხეში ითვლებოდა 50,000 სული მცხოვრები. სწორედ ამ დროიდან საქართველოს შემოღწერთდა ძველი მისი საუკეთესო ნაწილი, სამცხე-საათაბაგო.

გაოსმალეებულმა ქართველობამ იუკადრისა ქრისტეან რუსების ბატონობა და მათ ხელში ყოფნა. მაშინაც და დღესაც საფიქრებელად ესა ჰქონდათ და აქვთ: ჯარის კაცად წაგვიყვანენ და იმისთანა საკმელს გვაქმევენ, რომელიც რჯულით აღკრძალული გვაქვსო. ეგება სხვა მიზეზიცაა გადასახლებისა და სამშობლოს მიტოვებისა, მაგრამ საბაბად ეს დაიხვიეს ხელზე, იხუვლა მრავალმა მათგანმა და ოსმალეთს გადაიხვეწა. საზოგადოდ ბინის მოშლა და ოჯახის დაქცევა აღვილი არაა, მდიდარსაც უჭირს ახალი ბინის შოვნა, ახალი სახლ-კარის გამართვა და ოჯახის აშენება და აბა ღარიბ გლეხ-კაცობას რა მოუვიდოდა?

რუსის მთავრობა ხელს არ უშლიდა გადასახლებას.

ვისაც არ სურდა აქ დარჩენა, გზა მშვიდობისა უახრეს. აიკრიფეთ გულა-ნაბადი და საცა გნებავთ, იქ წადითო, ხოლო ვადად ორ წელიწადს გინიშნავთო. გადასახლების მსურველებმა ოხრად მიჰყიდ-მოჰყიდეს ოჯახის ნივთიულობა, საქონელი, მამულ-დედული, სახლ-კარი, ბოსტან-ბაღები, შეაბეს კრიალა ურმები, ჩასხეს შიგდედა-კაცობა და ქულფათობა და დაადგინეს ოსმალეთის გზას. წასული მესხები სახლდებოდნენ მცირე აზიის და ევროპის ოსმალეთში, ბევრი გაწყდა გზაში სიმშლისიცივისაგან. ვინც მიაღწია ოსმალეთს უვნებლად, იმანაც ვერ იხეირა. ათასი გაქირვება და ვაივავლახი ნახა ახალ ადგილზე, ვერ უძლებდა თავზე დატეხილ მრავალ უბედურობას, სნეულდებოდა და წუთი-სოფელს ესალმებოდა. მცირე აზია ერთ უშველებელ, ცივ და ყრუ სამარედ გადაიქცა ჩვენის ღვიძლის ძმებისათვის. ვინც ცოცხალი დარჩა, ვერც ისა ხეირობდა. სამშობლოს დარდი და სევდა ქვალივით აწევებოდა, უცხოობას ველარ იტანდა, უკან ბრუნდებოდა, მაგრამ ვაი ამ დაბრუნებას! სახლ-კარი დაქცეული, მამული გაყიდული უხვდებოდა შინა. ბინას ველარ სდებდა და დახეტიალობდა ასე უპატრონოდ, ეულად და ბოგანოდ. ხელის შემწყობი, ნუგეშის მცემელი და ქირისა და ღვინის მოზიარე არაიან იყო! მსწავლული მოგზაურები გვიამბობენ, რომ მცირე აზია და ევროპის ოსმალეთი მოფენილია მესხეთიდან გადასახლებულთა სოფლებით, სადაც დღესაც თურმე გაისმის წკრიალა ქართული ენა.

გადასახლებულთა მწარე ბედმა კეუა ვერ ასწავლა ჩვენში დარჩენილ გამაჰმადიანებულ მესხებს, გული ეთანაღრებათ და სულ სტამბოლისკენ უქირავთ თვალი. ასე ჰგონიათ, იქ სამოთხეა და ნაზუქის სულით დაიბნიდენ

ბიან. გახიზნა ოსმალეთს ჯერაც არ შეჩერებულა. ბერ-
რი ოჯახი დღესაც იყრება და მიდის მცირე აზიის, ან
ევროპის ოსმალეთს. მე ჩემის თვალით მინახავს ბაწარ-
ადებით მიმავალი ბათუმისაკენ ფურგუნები, დატვირ-
თულნი გადასახლებულთა ბარგი-ბარხანით და ცოლ-
შვილით. ქვას გული უნდა ჰქონდეს ადამიანს, დაინახოს
ეს სურათი და არ შესწუხდეს უზომოდ. სამშობლო ქვეყ-
ნის დაქცევა-დარბევა, ხალხით დაცლა დიდი ცოდვაა და
ვინც ხელს უწყობს ამ საცოდაეების აბარგვას და გახიზ-
ვნას, ის სწორედ მტერია ქვეყნისა, პირშავი და შეჩვე-
ნებული.

სამცხე-საათაბაგო დაიჭირა გრაფმა პასკევიჩმა 1828
წელს. აქაურ მკვიდრს მესხის მაგიერ თათარი დაარქვა
მათაგრობამ. ეს უდიდესი შეცდომაა და წინააღმდეგი
როგორც ბუნებისა, აგრედვე მეცნიერებისა. კაცმა რომ
რჯული გამოიცვალოს, განა ხალხოსნობას და ეროვნო-
ბას დაჰკარგავს ძველ რჯულთან ერთად? რჯული, რწმე-
ნა, სვინიდისის საქმეა, ეროვნობა-ხალხოსნობასთან რა
საქმე აქვს? კათოლიკეთა სარწმუნოებას (ჩვენში ფრან-
გობას ეძახიან) მისდევენ ფრანგები, ინგლისელები, გერ-
მანელები, პოლონელები, ესპანელები, ზოგი ქართვე-
ლები, სომხები და თვით თითო-ოროლა რუსი და განა
ყველა ესენი, რაკი ერთი. რჯული აქვთ, ლათინებად
და რომაელებად გადაიქცევიან? თავის დღეშიც არა.
ყველა მათგანი იმ ერად რჩება, რომელსაც ეკუთვნიან.
ბათუმის მხარე რომ დაიჭირეს რუსებმა 1877 წელს, კი-
დევ გაიმეორეს ძველებური შეცდომა და დიდძალ ქართ-
ველებს: აქარლებს, ქობულელებს და სხვებს თათრები
დაარქვეს და იმათ სამშობლო ენად ოსმალური გამო-
აცხადეს, თუმცა აქარლები და ქობულელნი ისევე სუფ-

თად და წმინდად ლაპარაკობენ ქართულად, როგორც შინა-ქართლელი და ისეთივე ქართველები არიან, როგორც ქართლელნი.

რაკი ახალი მთავრობა ასე გულცივად და უგულოდ მოექცა გამაჰმადიანებულ მესხებს, იმის მაგიერ რომ დაეყვავებინა და გაეადვილებინა უცხო და მიუჩვეველ მთავრობის ხელში ყოფნა, რაკი წასასვლელი გზა დაულოცა, ისინიც ადგნენ და გულმტკივნეულნი, სამშობლოს დარდისაგან შეწუხებულ-დაოსებულნი, გაემართნენ ოსმალეთისკენ. დაცარიელებით არ დაცარიელებულა მესხეთი, მაგრამ ბევრი სოფელი ვერანად გადაიქცა. წასულთა და გადახვეწილთა ნასოფლარებში მთავრობამ ჩააყენა აზრუმის საფაშოდან გადმოყვანილი სომხები. კარგა დიდი ნაწილი აზრუმელებისა დაბინავედა ახალციხის — წყლის მარჯვენა ნაპირზე, პირდაპირ ძველ ქალაქ ახალციხისა, სწორედ იქ, სადაც ძველად იყო ქართველთა სოფელნი: მარდა, ურიათ მარდა, ჯანიანთ მარდა და მლაშის-ხევი. ამ გვარად, დაახლოებით 1830 წელს, ქართველთა ნასოფლარებზე გაშენდა ახალი ქალაქი, დასახლებული აზრუმელ სომხებით, რომელსაც ეწოდება იგივე ძველებურა სახელი ახალციხე.

თვით მაზრაში შემდეგი ნასოფლარები დაიპირეს მოსულმა სომხებმა: კაქარაქი, გოგოთ-უბანი, სასძლო, სხვილისი, წინუბანი და ორთავე წყრუთი, არხის-ციხე, წყალთბილა, ნაობრები, დიდი და პატარა მამაჯი და ტამალა.

ამ გვარად ძველ მესხეთში, ანუ სამცხე-საათაბაგოს დღეს ბინადრობს: აზრუმიდან მოსული სომხობა წმინდა გრიგოლის სარწმუნოებისა და სომეხ-კათოლიკენი; ოსმალეთის ბატონობის დროიდან დარჩენილი თარაქამა და

თურქენი, ორთავე ტომი მაჰმადის სარწმუნოებას მისდევს, და ქართველობა, ძველ მესხების ჩამომავალნი: მართლ-მადიდებელნი, კათოლიკის სარწმუნოების მიმდევარნი და მაჰმადიანი ქართველები, ანუ გამაჰმადიანებული მესხები. ამათ გარდა ბინადრობენ სამცხე-საათაბაგოს ებრაელები, უფრო კი ქ. ახალციხეს, ცოტაოდენი ბერძნები და რამდენიმე ნასალდათარი რუსი.

როგორც ზემოდ მოვიხსენიეთ, სულ ახალციხის მაზრაში დღეს ითვლება 78,100 სული, ქალი და კაცი. ამ ეამად ქ. ახალციხეში ცხოვრობს 19,220 კაცი და ქალი. ამათში ქართველია 1075, რუსი—470, ბერძენი 116, ებრაელი—2322 და სომეხი—15,031. მაზრაში ცხოვრობს: სომეხი განურჩევლად სარწმუნოებისა—6852, ბერძენი—130, ქართველი, მართლ-მადიდებელი და კათოლიკე 8865, ებრაელი,---218, ქურთი—2400, რუსი—99, თათარი—32,564 და თურქი (ოსმალთა)—7752.

მიაქციეთ ყურადღება უკანასკნელ ორ ციფრს. სწორედ ესაა უკუღმართობა და შეცდომა, რომელიც მთაწერობამ ჩაიდინა. ამოდენა ქართველობას სახელი შეუცვალა და თათრად გადანათლა. განა ხერთვისელ გეგიძეს; ჯაყისმანელ ნემსაძეს და გეორგაძეს თათარი ეთქმის? შეიძლება კანტი-კუნტად იყვეს სადმე ჩასახლებული რაოდენიმე ტომით და ჩამომავლობით თათარი, თორემ ვის გაუგონია ახალციხეს მაზრაში ამოდენი თათრები? საჭიროა რიგიანი, კეშმარიტი და მეცნიერული აღწერა ერისა; რომ ნამდვილად ვიცოდეთ რაოდენობა თითოეულის ტომისა, მაგრამ ჯერ-ჯერობით ასეთი აღწერა არა გვაქვს. არც ოსმალთა იმდენი, რამდენსაც ზემოდ დასახელებული ციფრი 7752 აჩვენებს. ნამდვი-

ლი ოსმალთა ძალიან ცოტაა და ბევრი-ბევრი თარაქაზა, თურქმენი, ქურთი და ოსმალთა ოთხი ათასი, ან ხუთი ათასი იყვეს ახალციხის მაზრაში, ანუ სამცხე-საათაბაგოს.

არის ერთი მეცნიერება, სტატისტიკას ეძახიან, რომელიც იკვლევს, სხვათა შორის, ხალხის რაოდენობასაც. ამ მეცნიერების მაღლიანი ხელი ჯერ არ მოხვედრია ჩვენს ბედისა და მოხელეთაგან დავიწყებულს სამშობლოს და ამის გამო დანამდვილებით არ ვიცით — რამდენნი ვართ. მთავრობის მოხელეთაგან შეკრებილი ცნობანი უხეიროა, უაზროდ და გადარეულად შეკრებილი. მაგრამ, რას ვიზამთ, იოლად უნდა წავიდეთ იმითი, რაც მოიპოვება, ვიდრე ნამდვილი სტატისტიკა გაგვიჩნდება.

ქართული ენა, ეს სული და გული ყოველის ერისა, უტყუარი მოწამე კულტურისა და განათლებისა, შესანიშნავად განვითარებული მესხეთში, სადაც მზე და მთვარე პირველად იხილა დიდებულმა საერო მგოსანმა შოთა რუსთველმა, შევიწროებაში არა ყოფილა ოსმალთა ბატონობის დროს. ოსმალეთმა ევროპელივით ჩაქვივება არ იცოდა, — გინდა თუ არა, ჩემი ენა შეისწავლე, ჩემ ენაზე სწერე, იკითხე და ჩემ ენაზე ილაპარაკეო. ოსმალური ენა თავისით ვრცელდებოდა, ძალა დაუტანებლივ.

ყველაზე ადრე შეითვისა ოსმალური ენა მაღალმა წოდებამ, ესე იგი თავად აზნაურობამ, შემდეგ ბეგები რომ დაერქვათ. რაც ხანი გადიოდა, ქართული ენის ცოდნა თანდათან სუსტდებოდა და დღეს თითქმის აღარაინ იცის. თითოთ დაითვლება იმათი სახელი და გვარი, ვინც ამ ხანად ლაპარაკობს სუფთა ქართულს. ესენი არაან: ჰამიდ-ბეგი ავალიშვილი, რომელმაც ქართუ-

ლი წერა-კითხვაც იცის, ორიოდე თულაშვილი, ორიოდე წერეთელი, მორჩა და გათავდა. ერისთვიანთ, მახაბლიანთ, ხიდირბეგვიანთ სრულებით აღარ იციან ქართული. ზოგ-ზოგი მათგანი ამტკვრევს საყველბურო ქართულს, მაგრამ ასეთი ცოდნა ცოდნად არ ჩაითვლება. აქ ჩამოთვლილ ბეგებს კარგად ესმით, რომ ქართველები არიან, აღარ უარობენ და აღარა სწყინთ ქართველობა, მაგრამ უქართულობა დიდად უშლის ხელს საჭირო სულიერი კავშირი იქონიონ დანარჩენ ქართველობასთან.

გლებ-კაცობა უფრო მძიმედ ითვისებდა ოსმალურენას, დედა-კაცობა ხომ, რადგან კერას არა სცილდებოდა და სულ შინ იჯდა, სრულებით არ ეტანებოდა ოსმალურს, დღესაც ბევრია იმისთანა მიყრუებული სოფელი, სადაც თუმცა მაჰმადის რჯულია გამეფებული, მაგრამ ოსმალურმა ფეხი ვერ მოიკიდა მკვიდრად დედა-კაცობაში.

საოცარი ამბავია, მაგრამ შეუწყვეელი და ქეშმარიტი ისაა, რომ ქართული ენა დაიჩაგრა რუსების მოსვლის შემდეგ სამცხე-საათაბაგოს. არის იმისთანა სოფლები, როგორც თოღერთა, უთხის-უბანი და სხვა, სადაც მოხუცებულები კიდევ ლაპარაკობენ ქართულს, ხოლო ყმაწვილკაცობა სრულებით აღარ ეტანება ქართულს. მიზეზი ისაა, რომ ქართულმა დაჰკარგა ფასი ხალხის თვალში რუსების მართვა-გამგეობის დროს, აღარაა იგი ხმარებაში სკოლაში, სასამართლოში და პოლიცია-ადმინისტრაციაში. ამიტომ ქართული ენა აღარაფის ეპიტნავენა, ვითარცა პატივ-აყრილი და გამოუსადეგარი ცხოვრებაში.

მესხი მაჰმადიანი სუფთად ლაპარაკობს ქართულად აწყურისა, იღუმალისა და კლდის სამამასახლისოში.

ნარევ-ნარევად სხვა დანარჩენ სამამასახლისოებშიც მოიპოვება ქართულად მოლაპარაკე სოფელი, მაგრამ საერთოდ რომ ვთქვათ, თუ დროზე რიგიანი სკოლა არ მიეშველა ამ გვარ სოფლებს, ქართული ენა ძირიან-ფესვიანად ამოვარდება.

აქაური ებრაელები მტკიცედ ინახავენ ქართულ ენას. იგია მათი სამშობლო, ღვიძლი ენა და ამ ენაზევე აქვთ მიწერ-მოწერა. უხსოვარ დროიდან დაბინავებულან ებრაელები ახალციხეს, ქართული იერი, ზნე და ჩვეულება შეუთვისებიათ და აღარ ღალატობენ არც ერთსა და არც მეორეს, თუმცა ორას წელიწადზე მეტს ქართველებთან ერთად ოსმალების ბატონობას იტანდნენ. სწორედ საკვირველია მათი ასეთი სიმტკიცე. ქართულ ენის შენახვა-პატრონობაში მესხეთის ებრაელობას დიდი ღვაწლი მიუძღვის და ესეთი მისი სამსახური არასოდეს არ უნდა დაგვავიწყდეს. დღევანდელ ახალციხეს თუ კიდევ ქართული იერი ცოტათი მაინც შერჩენილი აქვს, ეს ებრაელების წყალობაა. მათი ბავშვები ხარბად ეტანებიან ახალციხის ქართულ საქალებო სკოლას, მაგრამ სამწუხაროდ სკოლის გამგენი ხშირად უარს ეუბნებიან ხოლმე მსურველთ უადგილობის გამო. მაინც ოცი, ოცდა ხუთი ებრაელი ქალი მუდამ სწავლობს ამ სკოლაში და სწავლას იძენს ქართულად. — აქაურ ებრაელებს ჩვეულებად აქვთ იერუსალიმს წასვლა და იქ დაბინავება, სიბერის ეამი რომ მოაწევს. ამ ჩვეულებას უფრო შეძლებულები მისდევენ.

სოფლად გლვხკაცობა ცხოვრობს ზოგან არეულად, განურჩევლად სარწმუნოებისა, ზოგან კი ერთი ტომისა და სარწმუნოების ერია შეჯგუფული. არის ისეთი სოფლები, როგორც მაგალითად ვაღე, სადაც ბინადრობენ

ქართველი მართლ-მადიდებელი, ქართველი კათოლიკე, სონები გრიგოლიანი და ქართველი მაჰმადიანი. შულღი და მტრობა არავის გაუგონია. სოფელ უღეს უმრავლესობა ქართველი კათოლიკეა, უმცირესობა მაჰმადის რჯულისა. ქრისტეანეთა მოძღვარი ამ სოფლისა და მაჰმადიანთა მოღლა ორთავე ქალაშვილები არიან. გამოდის რომ სახლიკაცები აღიდებენ ღმერთსა სხვა და სხვა ენით და სხვა და სხვა წესით. ამ გეარისაქმე მეზობლობას არა შხამავს და არც უნდა მოშხამოს, რადგან რჯულისათვის კინკლაობამ და თავში ცემამ დიდი ხანია თქვენი ქირი წაიღო. ამას გარდა ქართველი კაცის ბუნება ხალვათია, მოსიყვარულე და არ ეხერხება გულში ჩადება შურისა და მტრობისა. სხვა რჯულისა და ტომის კაცსაც ძმასავით ვუცქერით. სამეზობლოდ ქართველი ერი საუკეთესოა ერია, რადგან სხვისი დაჩაგვრა არ იცის. თვითონ რომ ხშირად სხვას ეჩაგვრინება, ეს კი სრულებით არ ვარგა. საჭიროა თავის დაცვა და გაფრთხილება.

უნდა მოვიხსენიოთ, რომ მესხეთის ქართველი კათოლიკენი ისტორიის უკუღმართ მსვლელობის გამო იძულებულნი გამხდარან, ქრისტეანობის შესანახად, სომხის ტიბიკონი მიეღოთ, ესე იგი სომხების წირვა-ლოცვის წესი და რიგი. ამის გამო წირვა-ლოცვა სომხურად აქეთ და არა ქართულად, როგორც სტამბოლში. ეს გარემოებაა მიზეზი, რომ ბევრს ქართველ კათოლიკეს სომხური გვარი და სახელი აქვს, მაგალითებრ პოლოს მათეოზოვი. არის მხოლოდ ერთი პატარა ეკლესია ძველ ახალციხეს (რაბათი), სადაც უმთავრეს ღვთის მსახურებას (მესსა) ლათინურად ასრულებენ, ხოლო ზოგიერთ წვრილმან ღვთის მსახურებას და გალობას ქართულად.

დაც. დიდი ხანია მთავრობასთან ამ საგნის გამო მიწერ-
მოწერაა გამართული, მაგრამ ჯერ ბოლო არ მოღებია
ამ გაქიანურებულ საქმეს.

დღევანდელი მესხი, გადაგვარებულ-გადაკეთებული,
ხასიათით მშვიდი და წყნარია, აურზაურს ერიდება და
ძნელად თუ ხმას აიმაღლებს, თუ მეტის მეტად სიციცხ-
ლე არ გაუმწარა უსამართლობამ. ძველებური სიკვირცხ-
ლე, თავმოწონება, ვაეკაცობა და სილამაზე სადღაც
გამქრალა, ფერფლად და მტვრად ქცეულა. ჩაცმულობ-
აც ულაზათოა, განსაკუთრებით ქალებისა, რომელთაც
გაგიყებით უყვართ წითელ ფერის სამოსელი. საზოგა-
დოდ დღევანდელი მესხი დაჩაგრულია, წელში მოხრი-
ლი, თავი მალა ვერ აუღია და ყველაფრისა ეშინიან.
წარსულის მოგონება, როდესაც იგიც ადამიანად ითვ-
ლებოდა და მსოფლიო ისტორიაში მონაწილეობას იღებ-
და, არ ახალისებს, დიდებულ და ბრწყინვალე ისტო-
რიის ნაშთს გულგრილად უყურებს, თითქოს ეს ტერ-
ფა ხელოვნების ნამოქმედარი მისი წინაპრების აგებული
ქი არაა, არამედ ვიღაც გადამთიელისა. ხალისით, სიმ-
კვირცხლით და სითამამით ისევ ქვაბლიანელები სჯლ-
ბიან დანარჩენებს, ჩაცმა-დახურვით ესენი ძრიელ წააგა-
ვენ აქარლებსა. იარაღის ტარებაც ამათ უფრო უყვართ.
დაჩაგრულობისა და სიმხდალის სენი ჯერ ისევ ბატო-
ნიშვილ ვახუშტის დროს შეჰპარვია მესხეთს და მას
შემდეგ ხომ უფრო უმატნია ამ სენს. ბევრჯელ დავს-
წრებივარ სოფლად გლეხის მუწაობას, ხენას, თესვას,
მკას, თიბვას, ლეწვას, სიმინდის თოხნას და ერთხელ არ
გამიგონია წკრიალა, იმედიანი სიმღერა, გუგუნე ვაეკა-
ცური, ან ტკბილი, ნაზი და სევდიანი კილო ქართლე-
ლისა. საერო, საჯარო სიმღერა სამუდამოდ გამქრალა.

ამის მაგიერ დღეობა-ქორწილებში მოისმენ სპარსულ კილოზე ერთხმიან სიმღერას, ბალა-ბალას მზგაესსა. მომღერალნი უფრო ქურთები არიან. მხოლოდ ერთხელ მოვისმინე სოფ. ოშორაში სევდიანი სიმღერა ქართველ მაჰმადიანისა ქართულადვე. მომღერალს საზი ეკირა და ამ უბრალო სამუსიკო იარაღზე დამღეროდა. სამწუხაროდ, უბის წიგნი, სადაც ლექსი მქონდა ჩაწერილი, დაიკარგა და საშუალება აღარა ჰქვს იგი აქ მოვიყვანო.

მესხის სოფელი სასიამოვნოს არას წარმოადგენს. საშინელი ვიწროობაა სოფელში, სახლები ზედი-ზედაა მიყრილი, მომეტებულად მიწაშია ჩადგმული ხის შენობანი. ხის გაშლილი კარაპნები რომ არ ედგათ წინა, ვერც კი შეატყობთ, რომ აქ სახლებიაო. სინათლე ერდოდან ჩადის. სივიწროვის გამო სოფელში უსუფთაობაა და სიბინძურე. ნებვი და ნაგავი ხშირად ზედ გზაზეა დაყრილი. ამ მხრივ ისევ ქვაბლიანის ხეობა სჯობიან, ხეობის ფერდობებზე კოხტად გამოიყურება ხის სახლები. აქაური მღებარეობა და მოწყობილობა სოფლებისა ძალიან წააგავს გურია-აქარისას.

როგორც ჯავახებს, მესხებსაც უყვართ სუქანი, ერბოიანი საკმელი. სისუქნის სიყვარული აიხსნება იმითი, რომ ჰაეა გრილია და ზამთრობით ხომ კარგი ლაზათიანი სიცივეები იცის. მთა-გორებში და მთიან ტრიალ მინდვრებზე, როგორც მაგალითად ლეპისის გაშლილი ველია, სიცივე და ყინვა ისეთი ძლიერია, რომ ნამდვილი ტეხვრაა. ეს ყინვა-სიცივეა მიზეზი, რომ მესხები ძრიელ ეტანებიან ერბოს. უერბოდ მწვადსაც კი არ შესწვამენ. მოხრაკულ და შემწვარ ბატკანს და ცხვარს წკურწკურით ჩამოსდის ერბოს წვეთები და ამ გვარად

მომზადებულ საქმელს ვერ დაეკარება იმერტლი. კერძოდ მე, როგორც შინა ქართლელს და ჩამომავლობით იმერტელს, ხშირად მომშლია მადა და უსადილობა მიმჯობინებია მსუქან და ერბოთი გაელენთილ მოხრაკულის შექცევას.

უმთაერესი წყარო . სამცხე-საათაბაგოს მკვიდრის ცხოვრებისა ხენა-თესვას, ბალოსნობა და საქონლის მოშენება. გარედ გასვლა და ცხოვრების შექცენა არ უყვარს მესხსა, მოუკალათნია შინა და ფათურობს თავისთვის. ვაქრობასაც არ ეტანება. ძველად ახალციხის ვაქარსოვდაგარნი ვაქრობის უნარით იყვნენ განთქმულნი. დასავლეთ ევროპასთან და სტამბოლთან გაჩაღებული მისვლა-მოსვლა ჰქონდათ. დადიოდნენ ართვინზე და ბათუმზე. ამ გზით შემოვიდა ჯერ მესხეთს და შემდეგ დანარჩენ საქართველოში შესანიშნავი მოგზაური შარდენი, რომელმაც (მეჩვიდმეტე საუკუნის პირველი ნახევარი) ფერად-ფერადი სურათებით ასწერა მაშინდელი საქართველო. მესხების მისვლა-მოსვლას ევროპასთან ისიც უწყობდა ხელს, რომ საქართველოს ამ კუთხეში ადრე გავრცელდა ფრანგობა და ევროპა ხომ ფრანგებითაა სავსე. ჩვენებურ კათოლიკე მესხებს ნათესავეები ჰყავთ სტამბოლს და ხშირად მათ სანახავად მიდი-მოდიან. ერთი მათგანი დიდ თანამდებობას ასრულებს ოსმალეთში რკინის გზაზე. ასე რომ თუ ოდესმე მგზაერობა მოგიხდეთ რკინის გზით სტამბოლიდან ქალაქ ვენაზე და კუპეში წმინდა ქართულით გამოგელაპარაკოთ ოსმალოს მოხელე, ნუ გაგიკვირდებათ, იცოდეთ რომ ეს მოხელე თქვენი სისხლი და ხორცია. ერთი საუკეთესო თანამედროვე ისტორიკოსი მღვდელი მიქაელ თამარაშვილი,

იტალიაში რომ ცხოვრობს, მკვიდრი მესხია, დაბადებულ-
აღზრდილი სამცხე-საათაბაგოში.

ორმოცი წლის წინად ახალციხის მაზრა ქუთაისის
გუბერნიაზე იყო მიწერილი. მისვლა-მოსვლა მესხებს ქუ-
თაისთან ჰქონდათ ზეკარის უღელ-ტეხილით. მაშინ მეს-
ხები ჩალვადრობას მისდევდნენ და მიჰქონდ-მოჰქონდათ
სხვა და სხვა საქონელი. დღეს ეს ხელობა სრულიად
გაჰქრა. უკანასკნელ ომამდე (1878 წ.) ოსმალეთის სამ-
ზღვარი ზედ ეკრა ახალციხის მაზრას. ბადელას ხიდთან
საბაეოები და საყარაულოები იყო დამართული. დიდის
სიმარდით და გაბედულობით შემოჰქონდათ მესხებს
სამზღვარ გარეთიდან ბაჟ-გადუხდელი საქონელი და ამ
ხელობით კარგ სარფაში იყვნენ. ეს ხელობაც გაჰქრა,
რადგან ჩვენი სახელმწიფო სამზღვარი ოსმალეთთან ძა-
ლიან დაგვიშორდა.

ამ ბოლოს დროს მესხეთში თავი იჩინა ახალმა ხე-
ლობამ. ესაა მეტივეობა. ეს ხელობა შეიტანეს ხეობის
(ბორჯომისა) ქართველებმა. მეტივეობენ აგრედვე სო-
ფელ მეტეხისა და გომის მცხოვრებნი შინა ქართლიდან.
მესხებში უფრო ეტანებიან მეტივეობას ქართველი მაჰ-
მადიანები. მეტივეობა გაჩაღდა აწყურისა და იღუმალის
სამამასახლისოებში და ქვაბლიანში.

რადგან სამცხე-საათაბაგო მთა-გორიანია და ველ-
მინდორი ცოტაა, ამიტომ სახნავეი მამული ნაკლები აქვს
მესხსა. მთის კალთებზე და ფერდობებზე უხეირო მოსა-
ვალი იცის, ძირობებში და ხევის პირებზე კარგი. ძი-
რობის ყანები ბევრი ირწყვის მთის ნაკადულებით. სა-
კუთარი მოსავალი ძლივ-ძლივობით ჰყოფნის მკვიდრსა,
გარედ გასაყიდად ვერას გაიტანს ნაკლებობის გამო. მი-
წის ნიადაგი თიხიანია, კირნარევი. ასეთი ნიადაგი ხელს

უწყობს ბალოსნობას და ხილის მოყვანას, რომელსაც ხალისით მისდევენ. ხეხილის გაშენება-მოვლაში მესხები დიდ მუყაითობას იჩენენ და კარგ ოსტატებად ითვლებიან. ხენა-თესვისა და ბალოსნობის გარდა საქონლის მოშენებასაც მისდევენ, უფრო კი იქ, სადაც საზაფხულო იალაღები მოიპოვება. საქონლის ჯიში უხეირო და წერილია. ტყიანსა და ჩირგვ-ძეძვიან ადგილებში თხებს ინახავენ. საქონლის ჯოგები თვით მესხებს არა ჰყავთ. ზაფხულობით მთის საძოვრებზე მეგრელებს ამოუღით სხვილფეხი საქონელი.

მესხეთს რომ დაეპატრონენ ოსმალები, ბატონ-ყმობა არ შემოუტანიათ, რადგან მუსულმანების ქვეყნებში არსადაა წესად მიღებული ბატონ-ყმობა. ადამიანი პირადად თავისუფალია, ხოლო რაც მამულია სახელმწიფოში, ეკუთვნის მეფეს, ანუ სულთანს, ფადიშაჰს. სახელმწიფოს სასარგებლოდ გლეხ-კაცი იხდის მიწის მოსავლის განსაზღვრულ ნაწილს, უფრო კი მეფათედს.

ოსმალეთის მთავრობა ამ შემოსავალს ხან სავსებით, ხან ნაწილს, მოხელეებს უთმობდა ჯამაგირის მაგიერად და ამასთანავე დაავალებდა ხოლმე, ქვეყანას უპატრონე, მოუარე, იზრუნე და გაუფრთხილდი, რომ მტერმა არ წაახდინოს მობარებული კუთხეო. ერთი სიტყვით მაშინდელი მოხელე ჯამაგირის მაგიერ მიწის შემოსავალს ჰკრიფდა, ზოგს თვითონ იტოვებდა, ზოგს სულთანის ხაზინაში ჰგზავნიდა. შემოსავლის განაწილება მოხელესა და ხაზინას შუა, ან სავსებით აკრეფა მოხელის სასარგებლოდ იმაზე იყო დამოკიდებული, თუ რა პირობით ჰქონდა ჩაბარებული მოხელეს რომელიმე სოფელი, ხეობა, კუთხე, ან მთელი ქვეყანა და ოლქი. მხენელ-მთესველისთვის სულ ერთი იყო, როგორ ინაწი-

ლებდნენ მიწის შემოსავალს სულთანნი და მოხელენი და ვის რამდენი მიჰქონდა, რადგან გლეხის გადასახადს ამ განაწილებით არაფერი ემატებოდა და არც აკლდებოდა.

მოხელეებად უფრო ხშირად ბეგები იყვნენ, ჩამომავალნი ქართველ თავად-აზნაურებისა. რუსები რომ დამკვიდრდნენ მესხეთში, ბეგების მომეტებული ნაწილი ოსმალეთს გადიხვეწა და თავიანთი ნაქერი სოფლები მიჰყიდეს როგორც საკუთრება მოქალაქეებს, აზრუმიდან მოსულ სომხებს და ქართველ თავად-აზნაურებს. ბევრი უკანონობა დატრიალდა ამ სყიდვა-გაყიდვის დროს, მაგრამ რადგან ახალმა მთავრობამ ვერც თავი გაუგო და ვერც ბოლო ამ დახლართულ საქმეს, ბევრის კვლევადიების შემდეგ საქმე სასამართლოში მოსპეს და გასყიდული მამულები საკუთრებად დარჩათ მყიდველებს. ბეგებსაც, ვინც აქ, საჩვენოში, დარჩნენ, საკუთრებად დაუმტკიცეს მათი ნაქერი და დაჩემებული სოფლები. ასე გაჩნდა კერძო საკუთრება მამულისა სამცხე-საათაბაგოში, რუსების მოსვლის შემდეგ.

14 მაისს 1870 წ. გამოვიდა საბოლოო კანონი, რომლის ძალით გლეხობას მიეზომა სასარგებლოდ და სახმარად ის მამული და სახლ-კარი, რაც ხელში ეჭირა. ბეგებისა და მამულის პატრონთა სასარგებლოდ გლეხი იხდის შემოსავლის მეთედს, ან ათში ერთს.

სამცხე-საათაბაგოს გლეხ-კაცი შედარებით ქართლისა, კახეთისა და იმერეთის გლეხობასთან, შეღავათიან პირობებში ცხოვრობს, რადგან იხდის მამულის პატრონის სასარგებლოდ მოსავლის მეთედს, ქართლელი, კახელი და იმერი კი მეოთხედს. შეშა-ფიჩხითაც უფასოდ სარგებლობს, სადაც ასეთი ჩვეულება იყო. ჩვეულებისავე

ძალით წველელ ფურზე იხდის წელიწადში გირვანქა ნახევარ ერბოს და ამდენსავე თაფლს თითო ფუთკრის სკაზე.

ქართლსა და იმერეთში გლეხ-კაცობა ძალიან ეტანებოდა ძველად მამულის შექმნას საკუთრებად. ამიტომ ეს კუთხენი საესეა მესაკუთრე გლეხებით. ხოლო ასე არ არის სამცხე-საათაბაგოს. ამ ქვეყანაში სრულებით არ მოიპოვება ისეთი გლეხი, რომ საკუთარი მამული ჰქონდეს. მართა ამ ბოლო დროს შეუდგნენ მამულის სყიდვას თითო-ორიოლა სოფელში.

სამცხე-საათაბაგოს ყოველ ყანას და ხნულს, ხეცა და ღელეს, მთასა და გორას, ტყესა და ქალას წმინდა ქართული სახელი ჰქვიათ. მართა თითო-ორიოლა ადგილას ძველი სახელი უთარგმნიათ ოსმალურად, მაგალითად ოქროს-ციხეს ეხლა ალტუნ-ყალას ეძახიან. შემოხიზნულ სომხებს და იმ ქართველ მაჰმადიანთ, რომელთაც დაივიწყეს სამშობლო ქართული ენა, არ ესმით მნიშვნელობა სხვა და სხვა სახელწოდებისა, მაგრამ სახელი კი მაინც ხმარებაშია. ამ გაუგებლობის მიზეზია, რომ ზოგიერთა სოფლის სახელი საშინლადაა დამახინჯებული და გადაგვარებული. მაგალითად სოფელ ძველს ეძახიან „ზურზელსა“, სოფელ სასძლოს უწოდებენ „სად-ზელსა“.

ძველად სამცხე-საათაბაგო, საქართველოს ნაწილს რომ შეადგენდა და აგრედვე ათაბაგების დროს, მკიდროდ ყოფილა დასახლებული. მას შემდეგ ამ ქვეყანამ ბევრი მწუხარება გამოიარა, ბევრჯელ. შემოესია მტერი და უწყალოდ ააოხრა. მრავალი სოფელი გაჰქრა და დღეს მხოლოდ მათი კოხტა სახელი-ლა დარჩენილა ერის ხსოვნაში.

ნასოფლარებს ეხლა ვერანას ეძახიან. ამისთანა ვერანა ამ ჟამად ასზე მეტია. იქნება მეტიც იყოს, მაგრამ ჯერ-ჯერობით მათი სახელები არ ვიცით. აი რამდენიმე ვერანის, ან ნასოფლარის სახელი. გოგოთ-უბანი, გაყინულა, თეთრი-ქალა, თათლა-ხევი, თავის-ჯვარი, მამაქიხელი, მარიაშ-წმინდა, საყვეარი, სამეფო, სალორე-ხევი, საწერეთლო, ქორის-ხევი, შუა-კარაი, კოკები, ჯინქველა-ხევი და სხვა. ყოველ ვერანას საკუთარი ეკლესია აქვს, ზოგი კარგად შენახული, ზოგი კი დანგრეულ-დაქცეული.

სამცხე-საათაბაგოს ველ-მინდორი უხვადაა მოფენილი შესანიშნავ ისტორიულ ნაშთებით. არსად საქართველოს სხვა ნაწილში იმდენი ციხე და ეკლესია-მონასტერი არ მოიპოვება, როგორც აქა. ეკლესია-მონასტრების სიუხვით ამ ქვეყანას თუ შეედრება მდინარე ქოროხის ხეობა. ციხე-მონასტერთა სიმრავლე და სიუხვე ცხადად ამტკიცებს, რომ ძველად ამ კუთხეში სიკოცხლე სდულდა და გადმოდიოდა, რომ მესხი სულიერად და ნიეთიერად ღონიერი ყოფილა. დიდად საწყენი და დასალონებელია, რომ მესხეთის ბედი უკულმართად წავიდა. წინ წასვლისა და წარმატების მაგიერ უკან დაიხია, გაღარიბდა, სულით დაეცა და წარსულის დიდების ნიშან-მოწამეს პატრონობას ველარ უწევს და ეკლესია-მონასტრები და ციხენი თავზე ენგრევა. ქარი და წვიმა, ადამიანის უგუნური ხელი თითქოს ერთმანეთს ეჯიბრებიანო, სწიწქნიან და ჰგლეჯენ უწყალოდ ჩვენ წინაპართაგან დატოვებულ განძსა. კულტურითა და სწავლით განთქმული ევროპელები დიდის მოწიწებით და მოკრძალებით ეკიდებიან ისტორიულ ნაშთებს, უვლიან და ჰპატრონობენ. დღევანდელ ქართველებს თითქოს სამუ-

დამოდ გაუქრათ გულში წარსულის სიყვარულით, სწორედ ისე იქცევიან. უბრალო ქვის ღობე რა არის, საც კი არ უკეთებენ იმისთანა შესანიშნავ ტაძარს, როგორცაა ქულები და შიგ თავისუფლად ბინას იკეთებს ხან ნადირი, ხან მწყემსი, ავსებენ უსუფთაობით და კედლებს სკვარტლავენ. ბევრგან ეკლესიათა თაღის სურათები თოფის ტყვიითა დახვრეტილი.

ბორჯომის ხეობაში სამი ციხეა: პეტრესი, ტიმოთისა და აწყურისა. ამ რამდენიმე წლის წინად ზარბაზანი უსროლიათ აწყურისა და ტიმოთის ციხეთათვის, უნდოდათ თურმე გამოეცადათ სიძლიერე ზარბაზნისა. რკალივით შენგრეული კედლები, მტკვრის ნაპირზე მიმავალ ქვაფენილ გზას, რომ დაჰყურებენ, ცხადად მოწმობენ, რომ წარსულის სიყვარული არა გვაქვს და არ ვიცით მისი პატივისცემა.

დღევანდელი სოფელი აწყური ძველად ყოფილა ქალაქი და დასახლებული მესხებით, ურიებით და სომხებით. ეხლა აწყურელები გამაჰმადიანებულები არიან, ხოლო ქართული არ დავიწყებიათ. არის სამინისტრო სკოლა, მაგრამ ქართულს არ ასწავლიან. ჭამ სკოლაში ისეთი მასწავლებელიც ყოფილა, რომელიც ამბობდა, რომ აწყურელები თათრები არიანო. მტკვრის მარცხენა ნაპირზე მოსახლობენ მართლმადიდებელი ქართველნი, სომეხნი და ურიანი. ქართველებს აქვთ სამრევლო სკოლა, სადაც ქართული ენაცაა. აწყურში იჯდა მიტროპოლიტი და კათედრად ჰქონდა მშენიერი გუმბათიანი ტაძარი. გუმბათი ჩამონგრეულა, ინგრევა აგრედვე კედლები. ამ ეკლესიის გალავანში დასაფლავებულია ქაბუკი ბატონიშვილი ლევან იულონის

ძე, რომელიც ლეკებმა მოჰკლეს 1811 წელს პეტრეს ციხესთან.

სოფელი აწყური იმითიცაა შესანიშნავი, რომ რუსის მხედრობის სარდალმა გრაფ ტოტლებენმა უდალათა აწყურთან 1770 წ. აპრილის თვეში მეფე ერეკლეს. ეს გენერალი რუსეთიდან იმისთვის გამოგზავნეს, რომ ქართველების დახმარებით ოსმალები დაემარცხებინა. ბრძოლა რომ უნდა დაწყებულიყო, სწორედ მაშინ გამობრუნდა ტოტლებენი, დასტოვა მარტო ერეკლე ძლიერ მტრის წინაშე და თვითონ აბასთუმნის გზით ზეკარის უღელტეხილზე გადაიარა და იმერეთს ჩავიდა. ერეკლემ მაინც აწყურთან გაიმარჯვა და 21 აპრილს ხომ სავსებით დაამარცხა ოსმალების ჯარი სოფ. ასპინძასთან.

✓ ეხლანდელ ახალციხის მაზრაში კიდევ შემდეგი დიდი ციხეებია: რაბათისა, აბასთუმნის ხეობის შესავალში; ოქროს-ციხე *), ქვაბლიანში; ჯაყისმანისა, სადაც მდინარე ჯაყის-წყალი ერთვის ფოცხოვის წყალს; ასპინძისა, სადაც ერეკლემ დიდად დაამარცხა ოსმალონი 1770 წელს, თვით ქალაქ ახალციხის ორპირი ციხე და საკირესი. უკანასკნელი ციხაბო და განმარტოებულ გორაზეა აშენებული, როგორც გორის ციხე. საკირეს ციხე თავს დაჰყურებს ს. ტაძრისს, სადაც ძველად შესანიშნავი დედათა მონასტერი ყოფილა, ეხლა კი ცარიელი ნანგრევებია.

*) ლალა-ფაშა რომ შემოესია საქართველოს 1578 წელს, ათაბაგ ქაიხოსროს ცოლი დედის-იმედი დიდხანს გამაგრდა ამ ციხეში. დედის-იმედის შვილმა მანუჩარმა პირველმა მიიღო მამადის რჯული და სახელად დაერქვა მუსტაფა-ფაშა. მისი ძმა ბექა დანიშნა ახალციხის ფაშად, სახელად დაარქვეს საფარ.

აქ ჩამოთვლილ ციხეების ნახვა ძალიან ადვილია, ქართველებს რომ უყვარდეთ ევროპელებსავე მოგზაურობა და სამშობლო ქვეყნის მიმოხილვა და შესწავლა. პატარ-პატარა გუნდები რომ შეადგინოს ახალგაზდობამ, ზურგზე წამოიკიდოს პარკუქანებით საგზალი და ჩაიყვას საგზაო ქალაქები, სულ ორ კვირეს მოივლის ფეხით მთელ სამცხე-საათაბაგოს, დაათვალიერებს ისტორიულ ციხეებს და ეკლესია-მონასტრებს და დასტკება სულიერად მათის ხილვით და აგრედვე იმ დიდებულ ბუნებით, რომლითაც ასე უხვადაა დაჯილდოვებული ჩვენი საწყალი ქვეყანა.

ეკლესია-მონასტრები ხომ აუარებელია დიდებულ მესხეთის ნაწილ სამცხე-საათაბაგოში. უფრო შესანიშნავია ზარზმა, საფარა, ქულე, ანუ ქულები, შორეთი, გავეთი, კარზამეთი, ჯაყისმანი, საკუნეთი და კლდეში გამოქვაბული მონასტერი ვარძია.

ზარზმა აგებულია მეთვსაუკუნეს ქრისტეს დაბადების შემდეგ დავით კუროპალატის დროს. მაშასადამე მონასტერი არსებობს ცხრაასი წელიწადი. ახალციხიდან ზარზმამდე 35 ვერსია, გზა მშვენიერია და ქვაფენილი. ასე ლამაზი, კოხტა და ტურფა საყდარი ორი არ მეგულება მთელ საქართველოში. ზარზმა აშენებულია ამაღლებულ ადგილზე და თავს დაჰყურებს ქვაბლიანის ხეობას. გარემო მთები ტყითაა შემოსილი, ძირს ხეობა საესეა ხეხილის ბაღებით და საამურად მიიკლავება მთ შორის მდინარე ქვაბლიანი. სილამაზე ბუნებისა და სიტურფე ტაძრისა უნებურად ჰხიბლავს და ათრობს მაცქერალს და არ იცი, რას უყურო — ტურფა შენობას, თუ თვალ წარმტაც ბუნებას. სწორედ უფალს უხვი თვისი კალთა აქ, ზარზმაში, დაუბერტყია.

ზარზმას დიდი ბედი ეწვია. განსვენებულმა დიდმა მთავარმა გიორგი ალექსანდრეს ძემ თვისის ხარჯით და საფასით განაახლა ტაძარი, გაასუფთავა და გაამშვენიერა. ზარზმაშია დახატული ათაბაგნი: სარგისი I, შვილი მისი ბექა I, და შვილიშვილები სარგისისა: სარგისი II და ყვარყვარე.

✓ ზარზმის სიახლოვეს, სოფ. აღიგვენის თავზე, მეორე მონასტერი ქულეა, ზარზმასავით მშვენიერი. სამრტკლო ისეთი ლამაზია, რომ მისი ბადალი არ მოიპოვება მთელ საქართველოში. ქულები უპატრონოდ გდია, თუმცა ის მამული, სადაც აგებულია ქულები, ეკუთვნის მდიდარ მებატონის ფეიზულა ბეგ ქვაბლიანელის მემკვიდრეებს. მონასტერი აგებულია 1308 წლამდე. კედლებზე ათაბეგებია დახატული.

მესამე შესანიშნავი მონასტერი საფარაა. ახალციხიდან მონასტრამდე სულ შვიდი ვერსია. მონასტერში თორმეტი თლილის ქვის ნაგები ეკლესია ყოფილა. თერთმეტი დღესაც კარგადაა შენახული, მეთორმეტე კი დაქცეულა. ამ ეკლესიათა შორის შესანიშნავია წმინდა საბას ეკლესია. ქვა საყდრისა მოწითალოა, აშენებულია ხრამის პირას. კარი და ფანჯარა წმ. საბას ეკლესიისა დიდებულადაა შემკობილი ჩუქურთმით. ეკლესიის ქვებზე მრავალი ხუცური წარწერებია. მონასტერი აშენებულია მეთორმეტე საუკუნეში.

საფარაში დაბინავდნენ უვიცი ბერები და სულ გააოხრეს ეს შესანიშნავი და ტურფა მონასტერი. კედლები კირით შელესეს და გააფუჭეს ძველი მშვენიერი მხატვრობა. მას შემდეგ რაც აქ ბერები დასახლდნენო, ამბობს ერთი ისტორიის მკოდნე სწავლული, საფარას ნახევარი ფასი დაეკარგაო.

ახალციხისავე მაზრაშია მეოთხე შესანიშნავი და ისტორიაში განთქმული, კლდეში გამოქვაბული მონასტერი ვარძია. ს. ხერთვისიდან ვარძიაჲდღე მტკვრის ვიწრო ხეობით იქნება 18—20 ვერსი. მონასტერში მრავალი გამოქვაბული სენაკია ბერებისა, რამდენიმე სართულად გამწკრივებული. ეკლესიებიც ბლომდაა, სულ კლდეში გამოქვაბული. უმთავრეს ეკლესიაში დახატულია თამარ-მეფე იმ სახით, როგორც ჰხატავენ ამ მეფეს სურათებზე. მეთოთხმეტე საუკუნეს მონგოლებმა აიკლეს ვარძია, ხოლო მეთექვსმეტე საუკუნეს ყიზილბაშებმა.

ამ ქამად მცირედად განახლებულ ვარძიაში ცხოვრობს მოხუცი არქიმანდრიტი სიმონ წულუკიძე და დარჯობს მონასტერს.

ამბობენ ძრიელ უყვარდა თამარ-მეფეს ვარძიაში ცხოვრება და დროს გატარებდაო. გამოქვაბულია ერთი დიდი დარბაზი, რომელსაც ეძახიან სახელმწიფო საბჭოს დარბაზს. თამარის თავმჯდომარეობით დიდებულნი საქართველოსნი აქა სწყვეტდნენ ქვეყნის საქმეებს.

დღეს ამ დარბაზში თავისუფლად მხოლოდ ღამურანი დაფრინავენ.

II.

ჯ ა ვ ა ხ ე თ ი.

ჯავახეთი მეორე წარჩინებული ნაწილია დიდებულ მესხეთისა, ანუ ზემო ქართლისა. ისტორიული ჯავახეთი კარგა მოზრდილი ქვეყანა იყო. დღევანდელ ახალქალაქის მაზრის გარდა ჯავახეთს ეკუთვნოდა აგრედვე არტანი, ეხლა რომ არდაგანს ეძახიან. ამ ქამად ჯავახეთს

ვედახით საქართველოს იმ კუთხეს, რომელსაც რუსებმა ახალქალაქის მაზრა უწოდეს და ოსმალონი კიდევ ახალქალაქის სანჯაყად იხსენიებდნენ.

მართალია ჩვენს მთავრობას არ უყვარს ძველი ისტორიული სახელები და, თუ კი შესაძლებელი და მოსახერხებელია, ყველგან და მუდამ ჰსპობს ძველის ნიშანწყალს, მაგრამ ერის ხსოვნა აგრე ადვილად როდი ივიწყებს ძველ სახელს. ისტორიული სახელი ცარიელი სიტყვა ნუ კი გგონიათ. იგი სავსეა ნეტარისა და პოეტურის მოგონებით, ჩაქსოვილია ხალხის გულსა და ხსოვნაში. ისტორიული სახელი ტკბილი და საამო ნანაა, რომელიც მუდამ და განუწყვეტლივ აახლებს და აგონებს ადამიანის მამა-პაპათა ქველობა-ვაჟაკობას, ქირსა და ლხინსა, ბედნიერებას და უბედურებას. კაცს არ შეუძლიან დაივიწყოს ერის თავგადასავალის გამომხატველი ისტორიული სახელი, როგორც არ შეიძლება დავიწყება სიკაბუჯე-სიყმაწვილისა. ისტორიის დავიწყება თავის თავის დავიწყებაა, ანუ ზნეობრივი და ფიზიკური სიკვდილი.

დღევანდელი ჯავახეთი, ან ახალქალაქის მაზრა, როგორც საათაბაგო, პატარა ქვეყანაა და უკირავს სულ რაღაც 2407 ოთხ-კუთხი ვერსი, ან 250,729 დესეტინა (501,458 დლიური). ამ მცირე ადგილზე ცხოვრობს 84,183 სული მამრი და მდედრი.

აღმოსავლეთით დღევანდელ ჯავახეთს უდევს ბორჩალოს მაზრა (ჯავახეთის მთანი), დასავლეთით ახალციხის მაზრა (მდინარე მტკვარი), ჩრდილოეთით გორის მაზრა (თრიალეთის მთანი, კოდინის მთის ტოტი) და სამხრეთით ყარსის ოლქი (ნიალის ყურის მთა).

ისტორიული ბედი და თავგადასავალი ჯავახეთისა

ისევე მოუსვენარი და შფოთიანი იყო, როგორც საზოგადოდ საქართველოს დანარჩენ სხვა ტომთა. მარტო წისკვილი არ დატრიალებულა მის თავზე, თორემ სხვა უბედურება, კირი და ვაგლახი ბევრისაგან ბევრი უნახავს. აღმოსავლეთში არც ერთი ძლიერი ტომი და ერი არ დარჩენილა, რომ არ გაეთელოს ჯავახეთის ფართო და კალოსავითა გაშლილი ველ-მინდორი. საუბედუროდ ზოგჯერ თვით ქართველებიც შეესევოდნენ ხოლმე ჯავახეთს და ზარალს აძლევდნენ.

ვიდრე საქართველოში მეფობას შემოიღებდნენ, ჩვენი სამშობლო საერისთავოებად იყო დაყოფილი. ჯავახეთს განაგებდა და კპატრონობდა წუნდის ერისთავი. წუნდა მაშინ ქალაქი იყო და მდებარეობდა მტკვრის ვიწრო ხეობაში, თმოგვის ციხის პირდაპირ და გამოქვაბულ მონასტერ ვარძიის სიახლოვეს. ამ ეამად წუნდას ნაქალაქევს ეძახიან და წარსულის დიდებისა აღარა ეტყობა-რა. ნაქალაქევი პატარა და უხეირო სოფელია.

წუნდას გარდა ჯავახეთში სხვა ქალაქებიც იყო, მაგალითად ხერთვისი, ბარალეთი, გოკია და არტაანი. ხერთვისი დღეს კობჯა სოფელია, შემკული ბალ-ვენახებით. ხერთვისელებმა ქრისტიანობა შესცვალეს მაჰმადის რჯულზე და მტკიცედ ადგანან ამ სარწმუნოებას. ხერთვისში თავი გვარი ყოფილა ძველად ვაჩნაძე. ვაჩნაძიანი დღესაც არიან და ამ გვარიდან ინიშნებოდა მაჰმადის რჯულის პირველი სამღვდლო კაცი - ყაზი. ნაქალაქევსა და გოკიაში სრულდებოდა აღარ არიან ქართველები. იმათ მაგიერ დასახლებულან თარაქამები, რომელთაც ერთი სიტყვა ქართული არ იციან. ბარალეთში მართლ-მადიდებელი ქართველობაა დღეს და აზრუმიდან მოსული სომხები გრიგოლის სარწმუნოებისა.

ჯავახეთი, ან წუნდის საერისთავო საქართველოს სამეფოს განუყრელი და განუყოფელი ნაწილი იყო დიდ ხანს. ხოლო ოდეს სამცხის ბატონი გაძლიერდა და საქართველოს მეფეს თავს აღარ უკრავდა, დაეპატრონა ჯავახეთსაც.

ჯავახეთსაც ისევე, როგორც სრულიად მესხეთს, ან ზემო-ქართლს, თავისუფალი ცხოვრება და არსებობა მოუხსო ოსმალეთმა მეჩვიდმეტე საუკუნის დასაწყისში (1625 წ.). ორას წელიწადზე მეტი იბატონეს ოსმალეთის მთავრობის მიერ დადგენილმა ფაშებმა. ხეპრე და უწიგნო მთავრობამ მარტო ის მოახერხა, რომ მრავალმა ჯავახმა რჯული გამოიცვალა და ქრისტიანობის მაგიერ მაჰმადის რჯული იწამა. ამის გამო თითქმის სავსებით დაეცა ძველი მამა-პაპეული სარწმუნოება, შესანიშნავი ტაძარი კუმურდოსი უპატრონობისაგან წახდა და ეხლა ბან-ჩამონგრეული დაღვრემილი შესცქერის უცხო ტომით დასახლებულ არე-მარეს.

საერთოდ საქართველოს ისტორია სისხლის მელნი-თაა დაწერილი. განსაკუთრებით ილექებოდა მტრისაგან განაპირა კუთხენი, იგინი ნელ-ნელა იცლებოდნენ სისხლიდან და ღონე-მიხდილი ქართველობის იერს და ელფერს ჰკარგავდნენ. ქართველების ნასოფლარ და ნაქალაქე ადგილებზე სხვა უცხო ტომი სდებდა ბინას და ჩვენ წინაპართა სისხლით გაპოხიერებულ ნიადაგს სხვა ისაკუთრებდა. ჩვენ მიერ ნაამაგდარი მშობელი მიწა სხვას უჩენდა სარჩო-საბადებელს, ხოლო ჩვენ, მისი კანონიერი მემკვიდრენი, იძულებული ვხდებით უცხო ქვეყანას შევაფაროთ თავი და იქ ვეძებოთ სარჩო-საბადებელი.

გამუდმებულმა მტრის შემოსევამ ძარღვი მოუღუნა

ჯავახს, გაალარობა, გაალატაკა და რაოდენობით შეაშკი-
რა. სადღაა ჯავახეთის ძველებური სიმრავლე ერისა?
ქართველთა სოფლები დღევანდელ ჯავახეთში აქა-იქა
კიეკიუბონ, როგორც აზვირთებულ ზღვა-ოკეანეზე
აფრა-ჩამოშვებული და საქეებ მომტვრეული ნავი.
ბევრი-ბევრი დღევანდელ ჯავახეთში ქართველობა საზ-
თავე წესისა: მართლ-მადიდებელნი, კათოლიკენი და მაჰ-
მადიანნი მეექვსე-მეშვიდე ნაწილს შეადგენდნენ.

მოკლედ რომ მოვკრათ სიტყვა, აი რა აოხრება
და დარბევა განიცადა ისტორიულმა ჯავახეთმა. მერვესა
და მეცხრე საუკუნეს, ქრისტეს დაბადების შემდეგ, არა-
ბებმა გალენეს ჯავახეთი. ადვილად არ ემორჩილებოდნენ
მაშინდელი მხნე და გმირი ქართველები შემოსეულ
ბტერსა, მუღჯივ ებრძოდნენ და ამასობაში ბრძოლის
ველი—ჯავახეთი სულთ-ხორცამდე ილუპებოდა ასევე
დღემართა ამ პატარა ქვეყანას, ბერძნების იმპერატორი
ვასილი რომ შემოესია საქართველოს. პირავე ლიპარიტ
ორბელიანის და მეფე ბაგრატ IV ბრძოლის დროსაც
სიკეთე არ დაჰყრია ჯავახეთს.

სულთან ჯალალ-ედინის და საერთოდ მონგოლ-
ების შემოსევამ მთლად აამტუტა ჯავახეთი. ამბობენ,
ერთი შენობაც აღარ დარჩენილა დაუნგრეველიო. დანგ-
რევა-დაქცევას გადარჩენია მხოლოდ ციხენი და გამაგრე-
ბული ადგილები.

მეთხოუმეტე, მეთექვსმეტე და მეთვრამეტე საუკუნე-
ობებში რამდენჯერმე შემოესივნენ ჯავახეთს ყიზილბაშ-
თა განთქმულნი შაჰნი. თმოგვი, ვარძია და სხვა მაგარი
ადგილები სულ დაანგრიეს. ნადირ-შაჰმა რაც ქონება
ჰქონდათ ჯავახებს, სპარსეთს წაიღო, თანვე წაასხა სა-
ქონელი. ტყვეები არ წაუყვანიათ, ამბობს მართანე.

აღბად ყველას სიცოცხლეს უსპობდა, ვინც ხელში ჩაუვარდებოდა და დახოცილთა გვამნი რალაში ეპრიანებოდა გამძვინვარებულ სპარსეთის უგუნურ ბატონს.

ოსმალებმა რომ მოიკალათეს ჯავახეთში მეჩვიდმეტე საუკუნის დასაწყისში და შინ დაბრუნებას აღარ აპირობდნენ, ქართლ-კახეთის მეფენი, მამა-შვილი, თეიმურაზი და ერეკლე, სულ იმის ფიქრში იყვნენ, თუ როგორ დაეუბრუნოთ ჯავახეთი საქართველოსათ. ოსმალების ჩამოთესლება საათაბაგოს და ჯავახეთს გულში ლახვარივით მოჰხვდა თეიმურაზსა და ერეკლეს. როგორც თითის ნუნაში შესობილი ხიკვი არ ასვენებს კაცს, ისე ეს მეფენი ვერ ისვენებდნენ ოსმალების ახლო მეზობლობით. ორჯელ თეიმურაზი და ორჯელ ერეკლე შეიქრნენ ჯავახეთს, გამარჯვებითაც გაიმარჯვეს ოსმალოს ჯარებზე, თან ქვეყანაც დაზარალდა ომიანობით, მაგრამ ჯავახეთ-სათაბაგო ვერ დაიბრუნეს. ჯავახეთ-სათაბაგოს დაბრუნების სურვილი იყო ერთი უმთავრესი მიზეზი, რომ მეფე ერეკლე მიეყვდლა რუსეთს და პირობა დაუდო, — უთუოდ ეს ორი ქვეყანა დაუბრუნეთ საქართველოსათ.

ასრულებით აასრულეს პირობა რუსის მხედართმთავრებმა, მაგრამ დღევანდელ ქართველს გაუქირდება თამამად და გადაქრით სთქვას, — რა ეჯობინებოდა, ასრულება პირობისა, თუ აუსრულებლობა მისი.

23 ივლისს 1828 წელს გრაფ პასკევიჩმა დაიმორჩილა ახალქალაქი და 2 სექტემბერს ქ. აღრიანოპოლში ხელმოწერილ სამშვიდობო ტრაქტატის ძალით ჯავახეთი შემოუერთდა რუსეთს და მაშასადამე საქართველოსაც, როგორც რუსეთის იმპერიის ნაწილს.

ამავე დროს მოხდა საოცარი და სამწუხარო ამბავი. გამაჰმადიანებული ჯავახობა ოსმალეთს გადიხევნა და

დაცარიელდა ჯავახეთი მკვიდრისაგან, რომელიც ათას წლობით თავს დასტრიალებდა ქვეყანას, ავი იყო თუ კარგი, უვლიდა და ჰპატრონობდა. დარჩა მხოლოდ მცირეოდენი ჯავახობა. გრაფ პასკევიჩმა დაცარიელებულ ჯავახეთის სოფლებში ჩააყენა აზრუმიდან წამოყვანილი 6,000 კომლი სომეხი და რაოდენიმე ოჯახი ბერძენი. შემოხიზნულ სომეხებს დაურიგეს დაცარიელებული სოფლები, მიუზომეს ადგილ-მამული, ოჯახისა და მეურნეობის მოსაწყობად მისცეს ფული, ხოლო ხელოსნებს სახელოსნო იარაღი. ერთი სიტყვით რაც შეეფერებოდა მაშინდელ დროს სტუმართ მოყვარე რუსის მთავრობას პატივისცემა არ დაუკლია ახალშენელებისთვის.

გაზართლდა ჯავახის თქმული: „ოთხმოცჯერ წახდენილა ჯავახეთი, ოთხმოც და ათჯერ აღშენებულაო“. აღშენებით აღშენდა ჯავახეთი, მაგრამ სხევანირად, უკულმა. ქართველების გასაგისი თითქმის ამოვარდა და მათ ნაოხრებზე სხვა დამკვიდრდა.

მეფე ბაგრატ IV (1027 — 1072 წ.) ააშენა ქალაქი ახალქალაქი, რომელიც ამ დროიდან ითვლება ჯავახეთის უპირველეს ქალაქად. ამ ეამად ახალქალაქშია (1897 წლის აღწერილობით) სულ 5410 სული მამრი და მდედრი. სომეხია 4024 სული, ქართველი 297, დანარჩენი სხვა ტომისაა. აქედან სჩანს, რომ ჯავახეთის დედა ქალაქს ქართულ ქალაქის იერი და ელფერი დაეკარგა.

ჯავახეთი უხილო, უვენახო და უტყეო ქვეყანაა, მაგრამ ამასთანავე ყვავილიანი და წყაროიანი. მამული ღონიერი და ნაყოფიერია და იცის მოსავალი მოუცდენელი. ხნული კუპრით შავია და ალაგ-ალაგ სიღრმე შავ მიწისა თითქმის არშინ ნახევარია. ნაადრევი ყინვე-

ბი, გვალვა და ხშირი სეტყვა რომ არ იცოდეს, ჯავახეთი მთელ საქართველოს დააპურებდა მოსავლით. რაც უნდა იყვეს, მაინც ისე არ მოსცდება, რომ ხორბალი შორიდან მოსატანი გაუხდეს ჯავახს. მოსავლიან წელიწადს ხომ პური და ქერი ბლომად გააქვთ აქედან გასასყიდად.

ველ-მინდორი ჯავახეთისა ფართოდაა გაშლილი. ამირანის გორიდან *) რომ დაჰყურებ, გეგონება უზარმაზარი ზღვა-ოკეანე გაქიმულაო. კოდინის მთის კალთაზე შეფენილ სოფელ ბურნაშეთიდან თითქმის მთელი ჯავახეთი მოსჩანს. ზაფხულობით, სწორედ საამო სანახავია ზურმუხტის ფრად აბიბინებული და ამწვანებული მინდორი. გაზაფხულის გასულს სურათი იცვლება: შემოსული ყანები ოქროს ფერს იღებს და თვალ გადუწვდენელი მინდორი მცირეოდენ სიოსაგან ირხევა ლერწამსავით და ჰღელავს ზღვასავით. თუ ბარს ბურუსი არ აყრია, ცა მოწმენდილია და კარგი დარია, ამ დიდებულ სურათს ბუნების მოტრფიალე ადამიანი თვალს ვერ მოაშორებს. გინდა უყურო სიკვდილამდე ბუნების სიკეკლუცეს და ამაგს ღონიერ ადამიანისას.

ბევრჯელ დამტკბარვარ უზომოდ ამ დიდებულის სურათის ცქერით, ბევრჯელ უნებურად ამიღია ხელი საქმიანობაზე და ბევრჯელ უნებურადვე გონების თვალნიწარსულისთვის მიმიცია, იმ წარსულისთვის, ოდეს ბილწი ყმობა-მონობა გეძაგდა და თავისუფალ ცხოვრებისთვის სიციცხლეს არ ვზოგავდით.

ეხლა ხომ სულ სხვაა. სანთელსავით დნება ჩვენი

*) თურქები „თავშანს“ — კურდღლის გორას ეძახიან; რუსებმა ეს სახელი „თავშანკად“ გადაწოდეს.

სახელი და ვითქვიფებით უცხო ტომთა და ერებში როგორც მაწონი საღვებელში. შედარებანი წარსულისა და აწმყოსი, მოგონებანი, ზოგი ტკბილი და ზოგი მწარე ფუტკარსავით ირევა გონებაში. გარინდებული, გაქვაებული დგებარ სვეტივით და იტანჯები გამოუთქმელ სევდა-ვარამით. აზრი და გონება, მთელი სულიერი არსება ძლიერად კვნესის და სწუხს, რომ ეს დიდება ბუნებისა, მისი მშვენიერება, ეს მობიბინე ველ-მინდორი ხომ ჩვენი იყო და რატომ აღარაა ჩვენი? რად დაგვემართა ასეთი საქმე? რად დატრიალდა ასე უკულმართად ბედი ჩარხისა, რომ ჯავახი, ჩვენი სისხლი და ზორცი, საუკუნოებით ამ ქვეყნის მომვლელ-პატრონი, მისი დამცველი, მოამაგე და მოპირნახულე, ზოგი გაწყდა მტრის ხელით და ზოგი გადიხვეწა ოსმალეთს? რად მოხდა ისე, რომ ჩვენ ჩვენს ქვეყანაში სტუმრებს დავემგზავსეთ და შემოხიზნული უცხოელი დაეპატრონა ქვეყანას? ისეთი რა დავაშავეთ, რომ ქვეყანა გაგვიოხრდა და გაგვივერანდა? მთასა და გორას, ველსა და მინდორს, დაბასა და სოფელს მხოლოდ სახელი-და შერჩა ქართული, თორემ სახრავი დიდი ხანია სხვამ მიითვისა. ესეც არ იქმარეს და ცარიელ სახელსაც გვედავებთან. ქვის-ჯვარს (სოფ. ქოთელიას და ხანდოს შორის) ხაჩ-კარი უწოდეს, ნიალის-ყურს გეგ-დალი და სხვა.

ეს ხომ ასეთა, მაგრამ მე მაინც მგონია, რომ შემოხიზნულნი ვერ შეიყვარებენ ახალ სამშობლოს და პირს იქით იზამენ, საიდანაც მოსულან, ან სხვაგან მოსძებნიან ბინას. სამშობლოს მოწყვეტილი ადვილად ვერ დასდებს ბინას უცხო ქვეყანაში. საბაბად უბრალო მიზეზი ეყოფა, აიყრება და წავა ან სხვაგან, ან ძველ სამშობლოს მიადგება. ამისი მაგალითი ბევრია. ათას წელიწად-

ზე მეტია, რაც გაიბნა ებრაელობა, და მაინც თვალი იერუსალიმისკენ უჭირავს. სამასი წელიწადი სრულდება რაც ქართლ-კახეთიდან ყიზილბაშებმა წაასხეს ქართველები თავიანთ ქვეყანაში, მაგრამ მათ ჩამომავლობას მაინც გული ეთანადრება და ძველ სამშობლოსკენ მოიწევს.

წარსულის მოგონებით გამოწვეული სევდა-ვარამი, გულს რომ უთუთქამს ხოლმე ადამიანს, არ გეგონათ, რომ ბოროტება და სიძულვილია ხიზან-სტუმრისადმი. სევდა სამშობლოსი ბუნებითი გრძნობაა, დაბადებით დაყოლილი. აბა ნაამაგდარ შვილის დაკარგვას როგორ აიტანს მოსიყვარულე დედის გული, თუ ზოგჯერ მღუღარე და ანკარა კრემლი არ დაღვარა და გული არ მოიფონა!

ჯავახეთის მდებარეობა მაღალია, ზღვის პირიდან თითქმის 5,000 ფუტს უწევს სიმაღლე. ეს მაღალი მდებარეობაა მიზეზი, რომ ჯავახეთში ზამთარი დიდ-თოვლიანი და ყინვიანია. მარიამობისთვის ნახევარს ჯავახეთის მთის წვეროებზე: აბულსა და სანსარზე უკვე თოვლი მოდის. შემდეგ თოვლს ჩამოჰყრის ხოლმე კოდინასა და ნიალის ყურეზე. ასე რომ შემოდგომის პირზე ჯავახეთის მთაგრეხილნი სამის მხრით თოვლით იმოსება და ლაზათიანს სუსხს იჭერს. იმერელი, ან მეგრელი თავის თხელი და სიფრიფანა ტანსაცმელით გაფიჩხდება აქა, ისე საგრძნობელი და ძლიერია შემოდგომის სუსხი. სიცივესა და ყინვას მიჩვეული ჯავახი კი არხენიდაა, გაეხვევა ტყაეში და მხნედ მუშაობს ხოლმე.

ბარში თოვლი გიორგობისთვეში მოდის; ქრისტიანობისთვის პირველ დღეებში გაჩაღებული ზამთარი დგება. ამ დროს სამარხილო გზა ჩინებულია.

დღისით აგრე რიგად არა ცივა ზამთარში, ღამ-ღამობით კი დიდ სიცივეს იჭერს. ხშირად სიცივე 10 — 15 გრადუსია რეომიურისა. უფრო დიდი ზამთარი ტბის ყურის და ფარვანას ტბის არე-მარემ იცის. ამ ადგილებში თოვლი მოდის ასე ენკენისთვის ნახევარს და ძლიერ-ძლიეობით დნება აპრილის თვეში.

გეოგრაფი ვახუშტი ამბობს, რომ ჯავახეთი უტყეო ქვეყანაა. დღევანდელ ჯავახეთში მართლაც ტყეები აღარაა, აქა-იქ მოიპოვება მხოლოდ ჯაგნარი, მაგალითად სანსარის მთის და ციხის-ჯვრის ფერდობსა და ძირაობებზე. ჯავახეთზევეა მიწერილი კობარეთის ტყე, მაგრამ იგი საათაბაგოს სამზღვარზე დევს და ჯავახნი სიშორისა და უგზოობის გამო ვერა სარგებლობენ ამ ტყით. კობარეთი უფრო ბორჯომს, გორის მაზრას (ქართლს) ეკუთვნის, ვიდრე ჯავახეთს.

ღიახ, ჯავახეთში ეხლა აღარაა ტყეები, მაგრამ ეტყობა, რომ ძველად დიდი ტყეები ყოფილა. სოფელ სანსარს დღესაც კარგადაა შენახული მშვენიერი მოზრდილი ეკლესია-მონასტერი. მონასტრის კედლიდან გადმოვარდნილა უშველებელი თლილი ქვა, ალბად მიწის ძვრის დროს, და ზედ ასეთი ხუცური წარწერა აქვს: ოდეს ეს წმიდისა ღვთის მშობლის ეკლესია აღშენდა, მაშინ ესე ადგილი ტყისაგან არა ჩნდაო. ეს წარწერა ნათლად გვიჩვენებს, რომ ძველად ჯავახეთში დაბურული და ხშირი ტყეები ყოფილა.

მე მგონია, რომ ტყეები თვით გეოგრაფ ვახუშტის სიკოცხლის დროსაც (18 საუკუნე) იქნებოდა ჯავახეთში. შეიძლება ულრანი და გაუტეხელი ტყე აღარ ყოფილიყოს, მაგრამ ალაგ-ალაგ გატეხილი მაინც შეჩიბებოდა. მე ჩემი თვალით მინახავს ს. იხტილაში თავზე,

იქვე სოფლის ახლო მდებარე შეთხელებულ ფრთონის ტყეში მოკრილი. კოთელიელები ამბობენ, რომ ტყეებოჯავახეთში აზრუმიდან მოსულმა სომხებმა ამოაგდესო. რაკი სამშობლოში ტყის მოვლა-პატრონობა არ იცოდნენ და თვალითაც კი არ ენახათ, აქ რომ დაბინავდნენ, მიესივნენ ტყეებს და სულ გაანადგურეს... ჯირკვებს და დიდრონ ხის ფესვებს ეხლაც ვპოულობთ ხენის დროსაო.

რადგან საწვავი შეშა-ფიჩხი არ მოიპოვება ადგილობრივ, ჯავახნი იძულებულნი არიან ხის მასალა შორიდან მოიტანონ სახლკარის ასაშენებლად. ხის მასალა გამოაქვთ ბორჯომისა, ოთისა და ზემო ოშორას ტყეებიდან. ბორჯომის ტყე მდებარეობს გორის მაზრაში და ოთისა და ოშორისა ახალციხისაში. დიდ შრომასა და ჯაფას ალევს ჯავახი ხის მასალის მოტანას; ერთი ხის მოტანას ყვეარი ხარით და ურმით ექვსსა და რვა დღეს უნდება ხოლმე. უშეშობა და ზამთრის მკაცრი სიცივეა მიზეზი, რომ ჯავახი მიწურ სახლებს იკეთებს. ღრმად ამოთხრილ დედამიწას ტალახისა და ქვის კედლებს გაუვლებს, ზედ თავხეებს დააწყობს და ბანს სქლად მიწას აყრის. ზოგჯერ დაყრილ მიწის სიღრმე-სიმაღლე არშინ ნახევარს უწევს ხოლმე. ზამთარში კიდევ ამოდენა მიწას ერთი-ორი არშინი სიღრმე თოვლი დააწვება და ამგვარად ჯავახის სოფელი ზამთრობით მიწისა და თოვლისაგან აკოკოლავებულ ბორცვების გროვას უფრო ჰგავს, ვიდრე ჩვეულებრივ სოფელს.

შეშის მაგიერ ჯავახეთში ხმარობენ პურის გამოსაცხობად, საკმლის მოსახარშად და სახლის გასათბობად წივას. წივას აკეთებენ ასე: სხვილფეხა საქონლის ნაკელს შეაქუჩებენ გაზაფხულზე, ან ზაფხულში სახლის

წინ, ან კალოზე, დაზელენ ნიჩბებით და შემდეგ ამოსკრიან აგურივით, გაჰფენენ კალოებზე, კალოს ლობეებზე და სახლის ბანებზე. როცა გამოხმება მზეზე, მწკრივად დაალაგებენ, როგორც საეენის შემას, ან ბჯას. ჯაეახეთის სოფლები სავსეა ასეთი სასაცილო ბჯებით. ზოგიერთა ოხუნჯი კაცი, შორიდან მოსული, თუ სასაცილოდ აგდება უნდა ჯაეახისა, იტყვის ხოლმე: ჯაეახეთი სავსეა ყინვარე შაქრის კეცებითო.

ერთი საეენი წივისა ფასობს 8—12 მანათი. ცხერის ნაკელიდან ამოღებული წივა უფრო ძვირია, რადგან მეტი სიციხოველე აქვს და ღირს 14—16 მანათი საეენი. წივის კეთება უფრო ქალების მოვალეობაა. მამაკაცები ეშველებიან ნაკელის დაზელაში და ალიზებად ამოღებაში. გაშრობა, გამწკრივება კალოებზე, შემდეგ ბჯად დადგმა სულ ქალების საქმეა.

წივის კვამლი ძალიან ავი ასატანია და თვალებს ძრიელ სწვავს. სიმყრალით სქარბობს ცხერის ნაკელისაგან მომზადებული წივა. რაც უნდა ბევრი წივა მოამზადოს ჯაეახში, მაინც იოლად ვერ წავა ცივსა და გრძელ ზამთარში. ამის გამო ჯაეახი სარგებლობს საქონლის სითბოთი. თავლა-ბოსლის ერთ ნაწილს გადალობამენ დარაბებით, ან ქვის კედლით (უკიროდ) ნახევრად და ერთ მხარეზე რომ საქონელია დაბინაეებული, მეორეზე ჯაეახის ჯალაბი. ამ ოთახს ოდას ეძახიან. ოდაში და თავლაში სუნი მძიმეა და შეუჩვეველ კაცისათვის ძნელი ასატანი. პირველად ამისთანა ბინაზე ხამი ადამიანი დიდად იტანჯება. საქონლის ფშვინვა, საქმლის ხრამუნი, მოცად საქონლის ზმუილი, ნეხვისა და პირუტყვის შარდის სუნი, საერთოდ შეხუთული და აშშორებული ჰაერი სულს უხუთავს ხამ ადამიანს. გაფუტებული ჰაერი

დიდ ზიანს აძლევს თვალს და ამის გამო ხშირია თვალის ავადმყოფობა ჯავახეთში და თუ სხეულით ჯანსაღია ჯავახი, იმის მადლობელი უნდა იყვეს, რომ ბინის გარედ მეტის მეტად სუფთა ჰაერია და ცივი ანკარა წყაროები უხვად მოიპოვება.

თავლასა და ოდას ზედ მიდგმული აქვს საბძელი, სათორნე, იარაღის საწყობი, შენობანი და სხვა. შეძლებულ ჯავახს ხშირად ექვსი-შვიდი თვალი შენობა აქვს და ამოდენა ოთახებს ერთი კარი აქვს, საიდანაც შედის და გამოდის ადამიანი და პირუტყვი. თუ მიჩვეული არა ხარ, კისერს მოიტეხ, პირველად რომ შედიხარ ამ დაუსრულებელ ბნელ ოთახთა ლაბირინტში, ან ცივ კედელს მიახლოი ცხვირსა და პირს, ან საქონელს წააწყდები. შეიძლება ზორბა ქოფაკსაც წამოჰყრა ფეხი და ვაი შენი ბრალი მაშინ! მე მუდამ შიშითა და კრძალვით შევსულვარ ჯავახის სახლ-კარში. ფეხის გადადგმას ვერ გავბედავდი ხოლმე, ვიდრე ხელს არ მომკიდებდნენ და წინ არ გამიძღვებოდნენ.

შეძლებული ჯავახნი ნელ-ნელა ამოდიან თხუნელისებურ სოროებიდან და სახლ-კარს რიგიანს იკეთებენ. განსაკუთრებით დიდ ყურადღებას აქცევენ სასტუმრო ოთახს, ანუ ოდას. ხიზაბავრას, ხერთვისს და ბარალეთს ბლომად მოიპოვება მიწაზე დადგმული ქვიტკირის შენობანი.

ერთი კარგი თვისება აქვს ჯავახს, — ძალიან უყვარს სიუხვე ლოგინისა. რაც უნდა ღარიბი იყვეს, ორი-სამი ხელი ლოგინი მაინც ექნება სასტუმროდ შენახული.

მთელ საქართველოში არ მოიპოვება იმისთანა საღი ჰავა, როგორცაა ჯავახეთში. რა ხილია ციებ-ცხელება, აქ არავის გაუგონია. ან საიდან გაჩნდება ციებ-

ცხელება ამ მაღალ ველ-მინდორზე, სადაც ქვაპი და ქაობიანი ადგილები არაა. ზაფხულობით ბარში წყალი დუბელაა და სასმელად მაწყინარი, ჯავახეთში კი ისეთი ცივი წყაროებია, რომ კბილსა ჰკვეთს,

ტბანი და მდინარენი. მთელ საქართველოში არ მოიპოვება იმდენი ტბა, რამდენიც პატარა ჯავახეთშია. ტბათა სიუხვით ჯავახეთი წააგავს ფინლიანდიას. ჯავახეთის ტბებს უქირავს 8,558 დესეტინა ადგილი, ან 17,116 კართული დღიური. ყველაზე დიდი ტბა ფანავრის ტბაა, რომელსაც უქირავს 6,744 დღიური. ამ ტბას ჯავახი დღეს ფარვანას ეძახის, რუსები კი ტოპარავანს. მეორე -- ტბის-ყურის ტბაა, უქირავს 2,620 დღიური. ამ ორ ტბას გარდა ექვსი დიდი და პატარა ტბაა კიდევ ჯავახეთში. ზოგიერთი ტბა განთქმულია გემრიელი თევზით და კალმახით, მაგალითად ტბის-ყური და საღამოს ტბა. ბატონიშვილი ვახუშტი ასე აგვიწერს საღამოს ტბას: „ტბა საღამოსი, დიდი და აღესილი თევზითა გემოიანითა, ამისთვის რამეთუ არს ანკარა და ქვიანი...“

ხალხი ამბობს, რომ ტბის-ყური თამარ-მეფემ მდინარე ქციადან აღინაო. „არხი, ნარჟალი დღესაც ეტყობა“. თუ ხალხის გადმოცემა მართალია, ალბად „არხს იმ აზრით გასკრიდნენ, რომ მდ. ქციას გემრიელი კალმახი ამ ტბაშიაც მოშენებულყო“.

მდინარენი შედარებით. ცოტაა ჯავახეთში. დასავლეთით ჩამოუდის მტკვარი და ისე ღრმა ხეობაში მოდის, რომ შეუძლებელია რუების გამოყვანა ხეხილის, ან ყანების მოსარწყავად, ან-და წისქვილის დასაბრუნებლად. მხოლოდ ხერთვისელებმა მოახერხეს პატარა რუს გამოყვანა და სოფლის ბოლოს დიდი რუს გაყვანა სა-

წისქვილედ. წყაროს-თავიდან *) მოყოლებული გომამდე (ახალციხისა და ახალქალაქის მზრათა სამზღვარზეა) მტკვარი ძრიელ ჩქარა მოდის და სრულიად არ წააგავს „მოდულუნე“ მტკვარს, რფილისს რომ შუაზე ჰყოფს და ზღაზენით მიდის კასპიის ზღვისაკენ. მეორე მოზრდილი მდინარე გამოსდის ფარვანის ტბას, გაივლის სალამოს ტბას, ჩაუვლის ქ. ახალქალაქს გვერდზე და შეერთვის არტაანის მტკვარს სოფ. ხერთვისთან. ფარვანის წყალს ოსმალონი ეძახდნენ თოფარავან-ჩაის, რუსები ეძახიან ტოპარავან-კას, ქართველები კიდევ ჯაეახეთის მტკვარს. ქ. ახალქალაქიდან ვიდრე ხერთვისამდე ამავე მდინარეს ეძახიან ახალქალაქის წყალს. დანარჩენ მდინარეთა შორის უფრო საყურადღებოა ბარალეთის წყალი და ყულასისა. ანუ ორმოცი წყარო, თათრულად ყირხ-ბულახ.

ხენა-თესვა. ხეილი. ჯაეახეთში ხენა-თესვა ისეთივეა, როგორც დალოცვილ ქართლ-კახეთში. იგივე მამა-პაპური გუთანი, ორხელა, გუთნის დედა, ღამისა და დღის მეზრენი, ფარცხი და სხვა. განსხვავება ისაა მხოლოდ, რომ ჯაეახის გუთანზე ისეთი მხიარულება არაა, როგორც ქართლისაზე. აქ ვერ გაიგონებ საქონლისა და მეზრის გამამხნეველ ოროველას. ოსმალთა ბატონობამ ჯაეახსაც გული დაუთუთქა და მოსპო ეროვნული სიმღერა, როგორც ბევრი რამ სხვა.

ჯაეახეთში დოღს ნაკლებად სთესავენ. ეშინიანთ სიცივისა. მომეტებულად ითესება დიკა. ქერშიც უფრო ახალთესლი ითესება, ვიდრე ძველთესლი. რადგან ჯაეახეთის ჰავა სასტიკი და სუსხიანია, ქერი და პური

*) წყაროს-თავი არტაანის ოლქშია. აქ შესანიშნავი ქართული ეკლესიაა, ქართველები კი აღარ არიან.

გვიან შემოდის. ქერებს სთიბავენ 15 აგვისტოდან, დოღს (შემოდგომის ნათესი პური) პირველ აგვისტოდან, ახალ თესლს აგვისტოს გასულს. მკა სრულებით არ იციან და მაშასადამე აქ ვერც ჰოოპუნას გრიალს მოისმენ. მარტო სოფელ ეშტიაში ეხერხებათ ნამგლის ხმარება. ეშტიღლები გადმოსახლებული სომეხ-კათოლიკენი არიან.

რაკი მოსავალი გვიან შემოდის, კალოობაც გვიან იციან. თუ აედარმა უსწრო, ბჯები გაულეწავი რჩებათ და როცა ყინვებს დაიქერს, ესე ნოემბრის შუა რიცხვებში, კალოობა ხელახლად გაჩაღდება ხოლმე, მაგრამ ვაი ამ კალოობას. კევრზე ქურქსა და ტყავში გახვეული კაცი დგას და წამდაუწუმ ხელებზე პირით ორთქლს უბერავს. საცოდავი სანახავეები არიან გოგოები, საღამოობით ხეავს რომ აცხავენ. პირისახე და ხელები სიცივისაგან დალურჯებული აქვთ, ტანი უძაგძაგებთ და მაინც ცხავს ახანხალებენ. თუ ყინვა კარგა ხანს გაგძელდა, ლეწვას მორჩებიან, მაგრამ თუ თოვლმა მოუსწრო, კალოობა გაზაფხულის გასულს, ან ზაფხულის პირზე თავდება.

საუკეთესო მხენელ-მთესველები ჯავახეთში ქართველები არიან. ამათ არც მოსული სომხები ჩამოუყვარდებიან. საქონლის მოშენება უფრო ეხერხებათ თარაქამებს, ქურთინებს და თურქმენებს, ხოლო მებალობაში ხეხილის მოვლა-პატრონობაში ქართველ—მაჰმადიანს (სუნის მიმდევრები) ვერაფერს შეედრება.

ხეხილის ბაღები მარტო მტკვრის ღრმა ხეობაშია. ხენა-თესვის გარდა მისდევენ ხეხილის გაშენებას ხიზაბავრელები, საროელები და ხერთვისელები. ვარძიის პირდაპირ მდებარე ქართული სოფლები აფნია და გოგაწენიცი მისდევენ ამ საქმეს, მაგრამ ნაკლებად. სარგებლო-

ბას დიდს ვერასა ხედვენ, უფრო გულს აყოლებენ და ხალისობენ. საროსა და ხიზაბავრას (მართლ-მადიდებელი და კათოლიკე ქართველები) ვენახებიც აქეთ, მაგრამ აქაური ღვინო კაკკაქს დააჩხავლებს.

ხეხილიან ბალებით განთქმულია ჯავახეთში და მთელ სამხრეთ საქართველოში ხერთვისი და მის გვერდით მდებარე პატარა სოფელი შადრევანი. თუთა იცის იმისთანა, რომ კამით ვერ გაძლები. მარტო თუთის საკმელად ღირს რომ ესტუმროს კაცი ხერთვისს და შადრევანს.

ხერთვისი დიდი სოფელია და ტურფა, თვალწარმტაცი მდებარეობა აქვს. შეფენილია ტიტველ კლდის ფერდობზე, კოხტა სახლები კიბე-კიბეა აშენებული და ამფითეატრივით მალდა, კლდის წვეროსკენ მიღის. წყლის პირიდან დაჰყურებს ამაყად სოფელს ძველი ციხე. სოფელსა და ციხეს ორის მხრით ჩამოურბის მტკვარი არტანისა და ჯავახეთისა. ჯავახეთის მტკვრის ზვირთები ზეცასა სწვდება, ქუხს და გრგვინავს გააფთრებულ ლომივით. უზარ-მაზარ ლოდებზე ხათქა-ხუთქისაგან წყალი თეთრადაა აქაფებული და მისი შხუილისაგან ყურთა სმენა აღარაა. აქ, ისტორიულ, პირნახულ მტკვართა შესართავის პირას მოსვენება და განცხრომა ზაფხულობით, კარავში, ფართო თუთის ქვეშ, სახელოვან ციხის გვერდით, სწორედ რომ ნეტარება და ბედნიერებაა! განა ბევრია ქვეყანაზე ასე შემკული კუთხე, მაგრამ აბა ისიც მითხარით, ბევრია იმისთანა ქართველი, რომელსაც ენახოს ხერთვისი?

ადამიანი განცვიფრდება, ხერთვისის ბალებს რომ ჰნახავს. ბალები კლდე-კლდე მიდიან და გარეგანი სახით ძველ ბერძენთა ამფითეატრს წააგავან. ბალებს ასე აშე-

ნებენ: ჯერ მოსჩეხავენ კლდეს, მერმე ქვემოდან გაუფლებენ კედელს ისეთ დიდრონ-დიდრონ ლოდებით, რომ ზოგის წონა 10,000 ფუთი იქნება. სწორედ გასაოცარია, რა ხელმა და მარჯვენამ მიაგორა ეს უშველებელი ლოდები კედლის ამოსაყვანად? ზღაპრებში რომ მდევების და ციკლოპების ნაშენობაზეა ლაპარაკი, სწორედ ეს შენობანი მოგაგონდება.

როცა კედელს გაავლებენ და ადგილს მიასწორ-მოასწორებენ, ზურგით აზიდავენ მიწას, მოჰფენენ, შემდეგ დააყრიან პატივს და მხოლოდ ამის შემდეგ დარგავენ ხეს, ან დასთესენ თესლს. დიდი ჯაფა და შრომაა საკირო ამისთანა ბალის გაშენებისთვის, მაგრამ რა გაუქირდება გლეხის კურთხეულ მარჯვენას.

ხერთვისი სახაზინო სოფელია, მცხოვრები ორას კომლ კაცზე მეტია. სახელმწიფო მიწა ისე ცოტა აქვთ, რომ სათქმელადაც არა ღირს. თითო სულ ადამიანზე მოდიოდა ამ ოცდა ორის წლის წინად სამი მეთადი დესეტინისა, ან 720 ოთხ-კუთხი საყენი, ესე იგი ნახევარ დლიურზე ცოტა მეტი. ხერთვისელები ცხოვრობენ ხილის მოსავლით. აქა ხარობს ვაშლი, სხალი, თუთა, ალუბალი, კაკალი, ატამი, შინდი, ქლიავი. ხერთვისში სკოლაც არის, სადაც ჩვეულებრივ ქართულს არ ასწავლიან. ხერთვისელებს ძალზე აქვთ დავიწყებული ქართული.

ხერთვისი ისტორიული სოფელია, ძველად ციხე-ქალაქად ითვლებოდა. იგი იხსენიება ალექსანდრე მაკედონელის დროს როგორც მაგარი ციხე. 1588 წელს ათაბაგ მანუჩარ II ხერთვისი დაუთმო შაჰ-აბასს, მაგრამ შესანიშნავმა ქართლის მოურავმა გიორგი სააკაძემ წაართვა სპარსელებს 1624 წ. 1636 წ. თურქები დაე-

პატრონენ ხერთვისს, ჩააყენეს რაზმი ენგიჩართა, ხოლო 26 ივლისს 1828 წ. პასკევიჩმა დაიპირა ხერთვისი უბრძოლველად და მას აქეთ ხერთვისის საქართველოს შემოუერთდა.

ხერთვისის ლამაზ ციხეს ორი დიდი კოშკი აქვს, აღმოსავლეთისა და დასავლეთისა. კოშკების აშენების ამბავს ხერთვისელები ასე მოგვითხრობენ: თამარ მეფემ უბრძანა ორ კალატოზს აეშენებინათ ორი კოშკი. ერთი იყო ოსტატი და მეორე მისი შეგირდი. ოსტატს უნდა აეშენებინა აღმოსავლეთის კოშკი, ხოლო შეგირდს დასავლეთისა. მეფე დაჰპირდა, — უხვად დაეაჯილდოვებ, ვინც უფრო კობტა და ლამაზ კოშკს ააგებსო. ოსტატი და შეგირდი გულმოდგინედ შეუდგნენ საქმეს. ჯერ არ დაემთავრებინათ ხელოსნებს მუშაობა, რომ ხალხმა ყაყანი დაიწყო, — შეგირდის ნაშენობა სჯობია ოსტატისასო.

მართლაც, თამარს შეგირდის კოშკი უფრო მოეწონა და წინდაწინვე უხვად დააჯილდოვა ხელოსანი. საშინლად გაბრაზდა ოსტატი, იხელთა დრო და თავის შეგირდს კიბე გამოაცალა სწორედ მაშინ, როდესაც შეგირდი კოშკის თავს ასრულებდა. რა ექნა შეგირდს? რაკი უკიბოდ ძირს ველარ ჩამოვიდოდა, ადგა და გაიკეთა ფთები ურიოდე დარჩომილ ფიკრიდან. ცული წელში გაირქო და გადაფრინდა ჯავახეთის მტკვრის მარჯვენა ნაპირზე. ეს მანძილი ბარე ოცი საყენია დასავლეთის კოშკიდან. ძირს ისე უხერხულად დაეშვა, რომ დაიპრა — ცულით და გარდაიცვალა. ამ ადგილს ეხლა ეძახიან ხერთვისელები მსხვერპლის ადგილს. იგი გზის პირადაა *).

*) ეს ლეგენდა დაბეჭდილია ივ. პ. როსტომაშვილის წიგნში.

საქონლის მოშენება. საქონლის მოშენებას დიდის ხალისით მისდევენ ჯავახნი, რადგან იალალები საქმარისად მოიპოვება. საქონლის ხელი უფრო იციან ქუთინებმა და თარაქამამ. ქართველები, სომხები და დუხობორები კი უფრო მუშა საქონლის მოშენებას მისდევენ. თუმცა ესენიც, სადაც კი ადგილის მდებარეობა ხელს უწყობს, არ ერიდებიან ცხვრის ფარის და ცხენის ჯოგების გაჩენას. ცივი ქვეყანაა ჯავახეთი, მაგრამ კამეჩობასაც არ იღევენ, ცხენები ხომ ბლომადაა, განსაკუთრებით დუხობორიაში. აქ უშველებელი ტანის ცხენი იცის, ძრიელ ღონიერია, მაგრამ საჯდომად არ ვარგა, რადგან ტლანქია და ნელად მოსიარულე. იმაზე სასაცილო არაფერია, როცა ახმახი დუხობორი ბოხობა ქუდით და უშველებელ წალებით გადააჯდება ჯზარმაზარ ტანიან ცხენს და გააქენებს, თითქოს მიწის ძვრააო, ისე ზანზარებს ხოლმე დედა-მიწა, როცა ხუთი-ექვსი ამისთანა მხედარი ერთად მიაქენებს ცხენებს. აბა სად ეს სურათი და სად კობჯა, ტან-წერწეტა, გძელ ჩოხაში გამოკვაწრული მეგრელი, როცა იგი ჯირითობს, ან სხვის სანახავად ცხენს გააქენებს.

თითო ცხვარი ჯავახეთში იძლევა ესე ორ მანათს წმინდა შემოსავალს წელიწადში, ხოლო ძროხა 11 მანათს. დუხობორებს სხვილი ჯიშის საქონელი ჰყავთ, ადგილობრივ მკვიდრს კი უფრო წვრილი.

ჯავახეთის იალალებზე შორიდანაც მოუდით ცხვარი. ფშავ-თუშნი, ქიზიყელები, მთიულნი ხშირი სტუმარნი არიან ნიალის ყურისა, სამსარისა და აბულისა. ორ-სამ თვეს რჩება აქ მათი ცხვარი და აგვისტოს გასულს, ან ენკენისთვის ნახევარს უკან ბრუნდება. ათათასობით ამოდის ნიალის ყურეზე შირაქიდან თუშები-

სა და ფშავლების ცხვარი და მრავალი მწყემსი. ტიტ-ველა ნიალის ყური და ქაჩალ-გორა, უნადირო და უფრინველო, სამარესავით ჩუმი ზამთარ-შემოდგომით, ზაფხულში ცოცხლდება და ერიამულით ივსება მისი ხევხუენი. ქართული სიტყვა-პასუხი, სიმღერა მწყემსისა მოგაგონებს შუაგულ საქართველოს და გავიწყდება, რომ ეს ქვეყანა სხვისაა და არა ჩვენი.

გზები. ჯავახეთი უგზობას ვერ დაემდურება. მშვენიერი შარა გზები მიდის ახალქალაქიდან ერთი ახალციხეს, მეორე არტაანს, მესამე ბაკურიანსა და ბორჯომს და მეოთხე გუმბრს (ალექსანდროპოლი). ძველი გზა ახალციხიდან ახალქალაქს ხიზაბავერაზე რომ აღიოდა და რომლითაც გაიარა 1837 წელს იმპერატორმა ნიკოლოზ პირველმა ეხლა გაუქმებულია. აღარც ის გზაა პატივში, რომელიც ტბის-ყურის ტბასთან მიდიოდა კოჯორზე და რომლითაც დაბრუნდა ტფილისში ერეკლე II, ასპინძასთან რომ სასტიკად დაამარცხა 1770 წ. 21 აპრილს, ზედ აღდგომა დღეს, ძრიელი ჯარი ოსმალოსი და ლეკებისა.

ხალხი. თურქების შემოსევამდე, მეჩვიდმეტე საუკუნის დასაწყისს, ჯავახეთი მარტო ქართველებით იყო დასახლებული. რაკი თურქებმა (ოსმალონი) დაიპირეს საქართველოს ეს კუთხე, ხალხიც აირია და აკრელდა. ყველაზე უწინარეს ჯავახეთს შემოეპარნენ ოსმალეთიდან ქურთები და თარაქამანი. როგორც ქურთი, აგრედვე თარაქამა მომთაბარე და ეული იყო, ესე იგი მოხეტიალე და ერთ აღგილას დიდხანს არა ჩერდებოდა. რაკი მოსწყინდებოდა ხოლმე რომელსამე აღგილს დგომა, აიყრებოდა, აიკრებდა ბარგ-ბარხანას და გასწევდა სხვა-

გან. თარაქამა და ქურთი უსწავლელი, ხეპრე, ტლანქი და გაუთლელი იყო.

როგორც ძველ სამშობლოში, ისე ჯავახეთში ეს ველური ხალხი მწყემსობას დაადგა. სადაც საქონელს მირეკავდა და დროებით ბინას დასდებდა, იმის სოფელიც იყო. სახლების აშენებით თარაქამა და ქურთი თავს არ იცხელებდა. წამოსკიამამდა ალაჩუყს და შიგ არხეინად მოიკალათებდა. ესე სახელდახელოდ წამოდგმული ალაჩუყი, ანუ კარავი სავსებით აკმაყოფილებდა ქურთსა და თარაქამას და სხვას არას დაგიდევდა. ხენა-თესვას, ხეხილის გაშენებას, ან ბოსტნის მოყვანას თურქები და თარაქამანი სრულებით არ მისდევდნენ. წლითი-წლობით ასე უგემურად და ველურად ცხოვრობდნენ და მკვიდრ ქართველობაზე არავითარი გავლენა არა ჰქონიათ.

სამაგიეროდ ოსმალეთის მთავრობისაგან განწესებულ მოხელეებს დიდი გავლენა ჰქონდათ ჯავახეთის ქართველობაზე. ოსმალონი ფიქრობდნენ, ჯავახი მაშინ იქნება ჩვენი ერთგული და ჩვენგან განშორებას აღარ მოისურვებს, უკეთუ სჯულს გამოიციკლის და მაჰმადის სარწმუნოებას მიიღებსო. ეს ყალბი და შემცდარი აზრი და ფიქრი გახდა მიზეზად იმისა, რომ ოსმალოს მოხელეებმა სასტიკი ძალმომრეობა იხმარეს და ჯავახეთი გაამაჰმადიანეს. რაკი რჯული შეუცვალეს ჯავახს, სახელიც გამოუცვალეს და ქართველის მაგიერ დაუძახეს თათარი. ამის გამო დღევანდლამდე რჯული და ეროვნობა დომხალივით არეულია ჯავახეთში და საერთოდ გამაჰმადიანებულ საქართველოში.

რუსებმა რომ დაიპირეს ჯავახეთი 1828 წელს, ეს ძველის-ძველი კუთხე საქართველოსი თითქმის სრულე-

ბით იყო გადარჯულებული. მალეულად, ჩუმად, თითო-
ორი სოფელი თულა მისდევდა ქრისტიანობას. გა-
დარჯულებულ, ანუ გამაჰმადიანებულ ჯაეახს, როგორც
ზევით იყო მოხსენებული, არ მოეწონა რუსობა და მისი
ბატონობა, მოშორდა სამშობლოს და გადიხვეწა ოსმა-
ლეთს. დარჩნენ მხოლოდ ჩუმი მართლ-მადიდებელი
ქრისტიანენი, ქართველი კათოლიკენი სომხის ტიბიკო-
ნისა, ქურთნი, თარაქამანი და სულ მცირე ნაწილი გა-
მაჰმადიანებულ ქართველობისა. დაცარიელებულ ჯაეა-
ხეთში რუსის მხედრობის სარდალმა პასკევიჩმა მოიყვანა
1830 წ. აზრუმიდან დიდძალი სომხობა და დააბინავა
ქართველების ნასოფლარებში.

ათის წლის შემდეგ, ესე იგი 1840 წ. რუსის მთავ-
რობამ კიდევ მოუმატა ხალხი ჯაეახეთს. რუსეთში სდევ-
ნიდა ღუხაბორებს, ანუ მწვალებლებს, თავისუფალ ცხოვ-
რების ნებას არ აძლევდა და ადგა და შინ დაწუნებულ-
ნი დაასახლა ჯაეახეთს.

ამ გვარად დღევანდელ ჯაეახეთში ცხოვრობენ: 1)
ოსმალეთის ბატონობის დროიდან დარჩენილი ქურთე-
ბი; 2) თარაქამანი; 3) აზრუმიდან მოსული სომხები; 4)
რუსეთიდან გადმოსახლებული ღუხაბორები*) და 5)
მკვიდრი ქართველნი: მართლ-მადიდებელი კათოლიკე და
მაჰმადიანი ქართველები. მართლ-მადიდებელი ქართველები
სცხოვრობენ სოფ. საროს, აფნიას, გოგაშენს, ქილდას,
ფრტენას, კოთელიას, ბარალეთს, ბალანთას, ქიხარულას,
ვარევანს, ჩუნჩხელს, მურჯახეთს, თოკს და ვარგავს.

*) ჩვენში მთავარ-მართებლად თ. გოლიცინი რომ იყო, იმის
დროს დაიწყეს ჯაეახეთში მართლ-მადიდებელ რუსების დასახლე-
ბა. ჯერ-ჯერობით ორი პატარა სოფელი გააშენეს.

სომხის ტიბიკონზე მდგომი ქართველი კათოლიკენი ცხოვრობენ ს. ხიზაბავრას, ხულგუმოს, ბავრას, კართიკამს და ტურცხის. სომხის ტიბიკონს რომ ვახსენებთ, ეს იმას ნიშნავს, რომ ტომით და ჩამომავლობით ქართველი, აი თუნდ ხიზაბავრელი, სომხურ ენაზე ისმენენ წირვა-ლოცვას. ესაა მიზეზი, რომ ამ ტიბიკონის ქართველს ხშირად სახელი სომხური აქვს, მაგალითად პავლეს მაგიერ ტერტერა (მლედელი) პოლოსას არქმევს, გიორგის მაგიერ გეურქას და სხვა. მთავრობაც ხელს უწყობს ამ სიღუბეჭირეს და მახინჯობას. ამ რამდენიმე წლის წინად ხიზაბავრელებმა ქვის ეკლესია ააშენეს და ზედ წარწერა გაუყეთეს ლათინურად და ქართულად. ვილამაც შეატყობინა მინისტრს, ხიზაბავრელები ქართველობას ჩემულობენ და საყდარზე ქართული წარწერა გააკეთესო. ფიცხელი ბრძანება მოვიდა პეტერბურგიდან: წაშალეთ ქართული წარწერაო. მეტი რა ჩარა იყო, ქვაზე ამოქრილი წარწერა კირით გაგლისეს.

ქართველი მაჰმადიანები სუნნის აღსარებისა ბინადრობენ ს. ხერთვისის, შადრევანს, თოკს და სხვაგანაც. სოფელ ხერთვისს შერჩენია ქართული გვარები: ვაჩნაძე, გეგიძე. ს. თოკს*) აბაშიძე და ხოსპიოს—ფალაევანდიშვილი. საზოგადოდ ჯავახეთის ქართველი მაჰმადიანი ან სრულიად აღარ ლაპარაკობს ქართულად, ან თუ ლაპარაკობს ისე ცუდად, რომ ძლივს მიხვდები მის ლაპარაკს აზრსა.

ჯავახეთის სხვა და სხვა აღსარების ქართველები

*) ამ სოფლის ქართველობა ნახევარი მართლ-მადიდებელია, ნახევარი მაჰმადიანი. უკანასკნელები სუფთად ლაპარაკობენ ქართულად.

ერთის შეხედვით დიდად განირჩევიან ერთმანეთისაგან. ჩაცმულობით, მიხვრა-მოხვრით, ზნე-ხასიათით მართლმადიდებელნი წააგავან ქართლელებსა და კახელებს. განსხვავება მხოლოდ ისაა, რომ ჯავახი უფრო ეტანება განიერ შარვალს, ვიდრე ქართლელი. ცხვრის ტყავისაგან უშნოდ შეკერილი ქუდიც სილამაზეს ვერა ჰმატებს ამ ქვეყნის შვილს. არც წინდა-პაიჭი უვარგა ჯავახს, უშნო, ულამაზო და შეუღებავია.

ქართველი მაჰმადიანი ჩაცმულობით, ზნე-ხასიათით და ჩვეულებით დიდად წააგავს თათარს. ქალები კარჩაკეტილები არიან და თუ სადმე მოუხდათ წასვლა პირს იბურავენ ჩადრით, ერიდებიან უცხო მამა-კაცთან საუბარს და შეხვედრას. დიდი სირცხვილია და თავის მოკრეა ქალისათვის, უცხო კაცმა რომ დაინახოს პირახდილი. ქალი ვალდებულია უცხო მამა-კაცს რომ შეეფეთება, ან პირი დაიფაროს ჩადრით, ან უმაღ ზურგი მიაქციოს და ჩაქუქდეს. ნასწავლ კაცს უნებურად გაელიმება, ამ უცნაურ და სასაცილო სურათს რომ წააწყდება. როგორღაც არა გჯერა, რომ ჩადრში გახვეული, პირ-უკულმა ჩამჯდარი გზის პირას მანდილოსანი ქართველი ქალია. ქართველი, ქალია თუ კაცი, სითამამით განთქმულია, არავის ერიდება და აგერ აქ კი, ამ გამაჰმადიანებულ საქართველოში, სარწმუნოებამ ასე შესცვალა ჩვენი ზნე და ხასიათი. მარტო ბებერი დედა-კაცი და პატარა გოგოები არა ჰმალავენ თავიანთ სახეს. კვირაობით ვყოფილვარ ქართველ მაჰმადიანის ოჯახში და ქალისთვის თვალი არ მომიკრავს. უქალოდ კი ოჯახურ ცხოვრებას და სიამოვნება-მხიარულობას აჩრდილივით თან დასდევს ერთფერობა და უგემურობა, თითქოს ხალხში კი არა, სადღაც უდაბურ კუნძულზე ხარ მარტოდ-მარტოვო-

ვიდრე ქართველ მაჰმადიანის ოჯახში ქალი არ გამეფდება, როგორც ყველგან განათლებულ ქვეყნებშია მიღებული, მანამდისინ ქართველ მაჰმადიანის ოჯახს შნო და ლაზათი არ მიეცემა. რაც უნდა კარგად შეაზავოს საქმელი, თუ მარილი აკლია, მაინც უგემური იქნება. სწორედ ასე ემართება ქართველ მაჰმადიანის ოჯახს, სადაც ქალი ეს მარილი ოჯახისა კარჩაკეტილია და მოკლებული თავისუფლებას.

თარაქამა და ქურთი, ანუ ქურთინი. ესენი ჩაცმადახურვით ძრიელ წააგავან ქართველ მაჰმადიანებს სუნნის აღსარებისას, ითვლებიან მაჰმადიანებად, მაგრამ არც თუ აგრე დიდად იხეთქავენ თავს რჯულისათვის. როგორც თარაქამანი (ყარა-ფაფახი, შავქუდა), ისე ქურთინები მწყემსობას მისდევენ. ამ ბოლო დროს დაიწყეს მკვიდრად დაბინაგება პატარ-პატარა სოფლებად და ხვნათესვას მიჰყვეს ხელი. ქურთინების სოფლებში სულ ორისამი კომლია. რაც უნდა დიდი სოფელი იყვეს ქურთისა, ათ კომლზე მეტი მაინც არ იქნება. მომეტებული ნაწილი ყარა-ფაფახებისა ცხოვრობს ლეპისის გაშლილ ველ-მინდორზე, არტაანის ოლქის გვერდით*). ლეპისში მშვენიერი საძოვარი მინდვრებია და იცის ნოყიერი ბალახი. აქაა აშენებული მოწითანო თლილის ქვის საყდარი გავეთისა და დაუსრულებელი უზარ-მაზარი ეკლესია კარზამეთისა. ეკლესიის შენობა დაუწყვია აწყვერის მღვდელ-მთავარს და კედლები რომ ამოუყვანია შესავალ კარის სიმაღლეზე, ლეპისი თურქებს დაუქერიათ და შენობაც შეჩერებულა. კარზამეთისა და გავეთის

*) ეს კუთხე შეკლამი ი ახალციხის მაზრაზეა მიწერილი.

მშვენიერ ეკლესიებს ვინ უპატრონებს დღეს? თარაქამამ რა იცის მისი ყადრი და ფასი? საქართველოს ეკლესიას რაკი საკუთარი მამული და ქონება ჩამოართვეს, სიღარიბის გამო, თავი აღარა აქვს რომ პატრონობა გაუწიოს და უამთა ვითარების წყალობით ორივე შენობა ოხრდება და ტიალდება.

ლეგენდა ამბობს, რომ თამარ დედოფლის ძროხის ჯოგი ლეპისის მინდვრებზე სძოვდაო და აქ მოწველილი რძე მილებით და ღარებით პირდაპირ ვარძიის გამოქვაბულ მონასტერში ჩადიოდაო. ისტორია მოგვითხრობს, რომ ვარძია დიდად უყვარდა თამარს და ხშირად აქ ატარებდა დროსაო.

სომხები. როგორც ზემოდ იყო ნათქვამი, სომხები გადმოსახლდა რუსის მთავრობამ 1830 წელს ჯავახეთში. უფრო დიდი ნაწილი გადმოსახლებულ სომხებისა აღიარებლ წმინდა გრიგოლის სარწმუნოებას, ხოლო მკირე ნაწილი კათოლიკობის მიმდევარია. სომეხ კათოლიკენი დგანან ს. ალასტანს, ეშტიას, კულიკამს და კიდევ რამდენსამე სხვა სოფელს. ორთავე რჯულის სომხები მშვენიერად ლაპარაკობენ თათრულად. ქართულიც იციან იმათ, ვინც ქართველებთან დაბინავდა. მაგალითად ბარალეთის სომხობა ისევე კარგად ლაპარაკობს ქართულს, როგორც ქართველები. ისიც სათქმელია, რომ ჯავახეთის და საათაბაგოს ქართველობა კარგად ლაპარაკობს თათრულს. იციან აგრედვე სომხური თუ სომხებთან ერთ სოფელში ცხოვრობენ. ერთ კუთხეში მოქცეულ სხვა და სხვა ტომის ხალხს შუღლი არ მოსდით და მშვიდობიანად ეწევიან ცხოვრების ქაპანს.

გრიგოლის სარწმუნოების სომეხს არ უყვარს სომეხი კათოლიკე. იმათაო, ამბობენ გრიგოლელები, სტუ-

მარი არ უყვართ, სისუფთავეს არ ეტანებიან, ზნეობის სიტაქიზეს აგრე რიგად არ აფასებენ და საერთო, მეზობლურ ცხოვრებას გაურბიანო. ყველა თავის კერიისაკენ მიიწევსო.

ბავრისა, ხულგუმოს და კართიკამის და ტურცხის კათოლიკეთ სომხური არ იციან. ზოგნი ამბობენ, რომ ეგენი ქართველები არიან და გადმოსახლდნენ არტაანის ოლქიდან (ველი), ზოგნი კი უჩვენებენ სომხეთის მუშს, საიდანაც ვითომ იგინი მოსულან. ველი ძველად ქართული პროვინცია იყო.

სომეხ-კათოლიკეთ წირვა-ლოცვა სომხურად აქეთ და რომის წმ. პაპას ემორჩილებიან საეკლესიო საქმეებში. აი სწორედ ქართველი კათოლიკენი ამ სომეხ-კათოლიკეთა ტიბიკონზე დგანან, ქართული წირვა-ლოცვა მოსპობიათ და გაუგებარ სომხურ ენაზე ისმენენ ღვთის მსახურებას.

ჯავახეთს მოსული სომხობა განთქმულია შრომის მოყვარეობით. ტანთსაცმელი სომხისა ისეთივეა, როგორც ქართველ ჯავახისა, ხოლო სომეხ ქალის ჩასაცმელი ცოტათი განსხვავდება ქართველ ქალის საცმელისაგან. სომხის ქალი იცვამს ლურჯ კაბას; კაბას წინიდან წითელი წინსაფარი აქვს აკრული. თავზე იხურავენ გასათხოვარი ქალები ოსმალურ ფესსა, ხოლო გათხოვილები ამავე ფესსა, მაგრამ ზედ ახვევენ შალ-ლეჩაქებს, შუბლზე იკეთებენ ჩვენებურ ჩიხტს, ოქროს ფულეებით ახუნძლულს.

დუხაბორები. ჩამომავლობით დუხაბორები რუსები არიან (ველიკაროსი). ამათ უარჰყვეს წეს-რიგი რუსეთში გაბატონებულ მართლ-მადიდებელ ეკლესიისა, ხელი

აიღეს ბერებზე და მღვდელ-ღიაკენებზე, ნათლობა-
ქორწინებაზე ეკლესიურის წესით და თავისებურად და-
იწყეს ღვთის სამსახური. ღუხაბორებს დიდად სწამთ და
უყვართ ღმერთი. მთავრობა გაუწყრა, როგორ თუ ბე-
რები, მღვდლები, ეკლესია და ეკლესიური წესები არ
გინდათო და აიღო და გადმოასახლა 1840 წ. ჯავახეთ-
ში. მაშინ ჩვენი საქართველო რუსებს ისე მიაჩნდათ,
როგორც დამლუპველი ქვეყანა, საიდანაც რუსი კაცი
შინ ველარ დაბრუნდებოდა ცოცხალი. ეხლა რუსები ისე
ეტანებიან საქართველოს როგორც ბუზი თაფლს და
ბაწარ-ალებით მოდიან ჩვენში, სადაც ჩვენც ველარ ვე-
ტვეით და სივიწროვით გული გვიწუხდება.

ღუხაბორები დაასახლეს ჯავახეთის თოვლიან-ყინუ-
ლიან მთის კალთებზე იმ განზრახვით, რომ გაწყვეტი-
ლიყვნენ. მთავრობას სძულდა ურჩი, პირქუში და შეუ-
პოვარი ღუხაბორი, მწვალბეგლი და უარის მყოფელი
ეკლესიის გარეგან წესებისა, იმ წესებისა, რომელთაც
დაჰფარეს და სავსებით ჩანთქეს სული და არსება კაცთ-
მოყვარე ქრისტეანობისა. მთავრობას იმედი გაუცრუვდა,
ღუხაბორები არ გაწყდნენ, გაუძლეს სასტიკ ბუნებას და
დღეს ისე კარგად ცხოვრობენ, რომ ქართველი დიდხანს
ვერ მოესწრობა ამგვარ კეთილ ცხოვრებას. მთავრობა-
მაც ამ ეამად აზრი შეიცვალა და ღუხაბორებს დღეს
თავზე ხელს უსევამს, რაც უნდა იყვეს მაინც რუსები
არიან და მაშასადამე ჩვენი სისხლ-ხორცნიო.

ღუხაბორებმა რვა სოფელი გააშენეს ჯავახეთის აღ-
მოსავლეთ-სამხრეთის ნაწილში: ბოგდანოვკა, გორე-
ლოვკა, ეფრემოვკა, არლოვკა, როდიონოვკა, სპასკაია,
ტამბოვკა და ტროიკაია. ნაწილი მათი გადასახლდა ამე-

რიკაში რამდენიმე წლის წინად, მაგრამ არც ერთი დასახელებული სოფელი სავსებით არ დაცარიელებულა.

სასიამოვნო სურათს წარმოადგენს ღუხაბორების სოფელი. ქუჩები სწორე და განიერია; კოხტა, თეთრად შეღებილი სახლები ლაწაზად გამოიყურებიან. ეზო და კარმიდამო დიდია, სადაც ყოველგვარი ოჯახისთვის საკირო შენობაა მოთავსებული. ასე გასინჯეთ ჯავახეთის ნაზუქი—წივა, ესეც კი კოხტად და მწყობრად დალაგებული. ღუხაბორთა სოფლები სისუფთავეთ, რიგიანი შენობებით და საერთო კეთილდღეობით დიდად განირჩევიან ქართველ და სომეხ სოფლებიდან. იქ რომ სიმდიდრე და კეთილი ცხოვრებაა, აქ სიღარიბე და სიდუხჭირეა.

ღუხაბორები შრომის მოყვარე ხალხია. მუშაობა, ამბობენ ღუხაბორები, სხეულს აპატიოსნებს, ხოლო სულს ამხანაგობას უწევსოა. ქალი და კაცი ყველა მუშაობს. ღუხაბორმა ათასგვარი ხელობა იცის, წადებსაც თვითონ იკერავს, ურემსა, ფურგუნს, გუთანს სულ თვითონ აკეთებს. სახლის აშენებაშიაც არავის იშველიებს. სოფლისათვის ყველა საკირო ხელობა გამოუვა ხელიდან ღუხაბორს, ამის გამო მარტო ნემსისა და მარილის საყიდლად თუ წავა იგი ბაზარში.

ღუხაბორები ზნეობით ძალიან მალლა დგანან, არ იციან რა არის ქურდობა, მრუშობა-გარყენილობა და სხვა. ერთმანეთს ხალისით ეხმარებიან მუშაობაში. გაჭირვებულსა და ღარიბს სასოფლოდ ეხმარებიან: მოუხნავენ, დაუთესენ ყანას, მოუთიბავენ ბალახს, უყიდნიან საქონელს და ამ სახით დაძაბუნებულ კაცს თებზე დააყენებენ ხოლმე.

ღუხაბორები მისდევენ ხენათესვას და საქონლის.

მოშენებას. ძვითონ რომ ზორბა ტანისა არიან, ცხენებიც უშველებელის ტანისა ჰყავთ. ტვირთის საზიდად ღუხაბორის ცხენს არაფერი შეედრება. რუსებს 1877—1878 წ. ომი რომ ჰქონდათ ოსმალებთან, ღუხაბორები ჯარისთვის ტვირთსა ზიდავდნენ ფურგუნებით და დიდძალი ფულიც იშოვნეს. აქედან დაიწყო მათი დაუშრეტელი კეთილდღეობა. ღუხაბორებს მთავრობამ დიდი მამული და სათიბი ადგილები მიუზომა. პური და ქერი აგრე რიგად არ მოდის ღუხაბორებში, მაგრამ თივა აუარებელი აქვთ.

III

ფოცხოვის, ერუშეთი, არტანი, ჩუღურეთი, კოლა.

საქართველოს ეს ნაწილები დიდხანს ეკირა ოსმალეთს. ოსმალეთის ბატონობამ არც ამ კუთხეებს დააყარა ხერი, აქაც ისევე ამოვარდა ქრისტიანობა და ქართული, როგორც სამცხე-საათაბაგოს და ჯავახეთში. განსხვავება მხოლოდ ისაა, რომ ჯავახეთსა და საათაბაგოს დღევანდლამდე შერჩა ალაგ-ალაგ ქრისტიანობა და ქართული ენა. ჯავახეთის და განსაკუთრებით საათაბაგოს გამაჰმადიანებულმა ქართველებმა ჯერ კიდევ იციან ქართული ლაპარაკი და თუ მალე არ მივეშველეთ და კარგი ქართული სკოლები არ დავმართეთ სოფლებად, მალე აქაც დაივიწყებენ სამშობლო ენას. ფოცხოვისა და ჯაყის-წყლის ხეობაში, კოლასა, არტანსა და ერუშეთს სრულებით აღარ იციან ქართული. დაბა-სოფლების სახელები, მთისა და გორაკებისა, ველ-მინდვრებისა, მდინარეებისა და ხეებისა ისევ ქართულია, მაგრამ გა-

დარჯულეზულ აქაურ ქართველს აღარ ეყურება მათი მნიშვნელობა. სახელწოდება სოფლებისა: საიხვე, ზეგანი, ნაქალაქევი, ცხრაწყარო, სამღერეთი, წურწყაბი, ალი, ყველი, არსიანი (მთა), ჯაყის-წყალი, და სხვანი უცხო და გაუგებარი სიტყვებია აქაურ ქართველისთვის. იგი ვერ მიხედება, რომ ეს სახელები და სიტყვანი ქართულია და შექმნილი ქართველი კაცის გენიოსობით და კკუა-გონებით. ბუნდოვანად ახსოვს მარტო, რომ ოდესღაც იყო ქართველი და ქრისტიანი, მაგრამ დღეს თავის თავს უწოდებს თათარს, იცის თათრული ენა და ქართული და ქართველობა აღარაფრად ეპრიანება.

საქართველოს ეს ოთხი პატარა ნაქერი, ანუ კუთხე: ფოცხვისა და ჯაყის-წყლის ხეობანი, ერუშეთი, არტანი და კოლა, ანუ გოლა რუსეთმა შემოიერთა უკანასკნელ რუს-ოსმალოს ომის გათავების შემდეგ 1878 წელს. ამ დროიდან ეს კუთხენი დაუკავშირდნენ საქართველოს გარეგნობით. მართვა-გამგეობა და სამართალი ქართულ ენაზე რომ შემოელო მთავრობას, უეჭველია, რომ არტანის ქართველები ამ ოცდა ათი წლის განმავლობაში ძრიელ დაუახლოვდებოდნენ მტკვრისა და რიონის ხეობათა ქართველებს. შეისწავლიდნენ ძველ სამშობლო ენას და ერთმანეთისას გავიგებდით რასმე. ეხლა კი სულ სხვაა. არტანელებმა ვერც რუსული ისწავლეს და ქართულზედაც ძველებურად მოწყვეტილები არიან. მაშასადამე ვერც ჩვენ და ვერც რუსებმა ვერ გამოვიყენეთ უკანასკნელი გამარჯვებული ომიანობა და მკიდროდ ვერ შემოვიერთეთ სამასი წლის წინად მოწყვეტილი ქართველობა.

რუსის მთავრობამ დასახელებული ოთხი ნაქერი საქართველოსი შეაერთა ერთ ოლქად და დაარქვა არ-

დაგანის ოლქი. ამ ოლქში ოთხი საპოლიციო ნაწილია: არდაგანისა, ფოცხოვისა, ჩილდირისა და ღელისა. ამ გვარად ძველი ქართული სახელწოდება საქართველოს ამ კუთხისა შეიცვალა და ერუშეთ, არტან, კოლა და ფოცხოვის მაგიერ არდაგანის ოლქი გაგვიჩინეს. ასე ნელ-ნელა იშლება და იფხიკება კავშირი წარსულსა და აწმყოს შორის. არ უნდათ, რომ გაიღოს შემაგროებელი ხიდი წარსულსა და აწმყოს შორის.

არდაგანის ოლქი დიდი ქვეყანა არ არის, უჭირავს 4924.90 ოთხ-კუთხი ვერსი, ან 513010.42 დესეტინა (ქართული 1026020.84 დლიური), ესე იგი ტფილისის გუბერნიის თითქმის მეშვიდედის ოდენა ადგილი.

წინა წერილებში გვქონდა მოხსენებული, რომ ქართველმა კაცმა ძრიელ ნაკლებად იცის სამშობლო ქვეყნის ვითარება, როგორც წარსული, აგრეთვე დღევანდელი. მართლაც საოცარია, რომ არ გვიყვარს მოგზაურობა და ჩვენი ბედნიერი თვალით ნახვა სამშობლოს სხვა და სხვა კუთხისა, არ გვიყვარს გავიგოთ და ვიცოდეთ, თუ რანი ვიყავით გუშინ, ვინ ვიყავით, რას ვშერებოდით და რას ვაკეთებდით. რაკი წარსული ნაკლებად ვიცით და დღევანდელ ვითარების გაგებასაც ნაკლებად ვეტანებით, ალბად ამითი თუ აიხსნება, რომ დღევანდელ ქართველს ღვთიური ცეცხლი არ უღვივის გულსა და მკერდში სამშობლო ქვეყნისადმი. აბა როგორ შეიძლება ადამიანს უყვარდეს კეთილშობილურ სიყვარულით ის, რაც არ იცის, რაც თვალით არ უნახავს. ამიტომ დიდად საჭიროა ზედმიწევნით ცოდნა სამშობლოს ყოველი კუთხისა და გაგება მისის თავგადასავალისა. სამშობლოს სიყვარულის ბუნებრივ გრძნობას მხოლოდ მაშინ მიეცემა ღრმა საფუძველი, როცა შევიტყობთ და

გავიგებთ ყოველ მის წვლილს. სწორედ ასეთ საფუძვლიან ცოდნა-სწავლის შემდეგ იბადება და იზრდება ეროვნული სიამაყე, რომლითაც ასე მოაქვთ თავი დასავლეთ ევროპის ერებს. ევროპელმა მამაო ჩვენოსავით ზეპირად იცის თვისის სამშობლოს წარსული და დღევანდელი ვითარება, მისი ბედი და უბედობა, ავი და კარგი, ამაყოფს კარგით და ამის გამო მხნედ და იმედიანად უყურებს მომავალს.

ჩვენ, ქართველები, დიდად ჩამოვრჩებით განათლებულ და კვიან ევროპელებს სამშობლოს სიყვარულსა და სამშობლო ქვეყნის სამსახურში. რადგან ქართველობა დაჩაგრული ერია, ამიტომ ერთი ათად მეტი მხნეობაა საჭირო წარსულისა და აწმყოს შესასწავლად, თუ ერს ეროვნული თავმოწონება აკლია, იგი დიდხანს ვერ იბოვინებს ქვეყანაზე, გაქრება და ამოვარდება.

უკანასკნელ რუს-ოსმალს ომიანობის შემდეგ (1877--1878 წ.), რუსეთმა შეიძინა: ბათუმისა, ართვინისა, ოლთისისა და არდაგანის ოლქები, ანუ ძველი ქართული სახელწოდება რომ ვიხმაროთ: ქობულეთი, აკარა, შავშეთი, ლივანა, ნაწილი ქანეთისა, კოლა, არტანა, ერუშეთი, ფოცხვის და ჯაყის-წყლის ხეობანი. ოსმალები ამ ნაწილს საქართველოსას ეძახდნენ და დღესაც ეძახიან ოსმალეთის საქართველოს. კარგა მოზრდილი ნაწილი ქანეთისა ქალაქ ტრაპიზონამდე და მდინარე ქოროხის სათავე დღესაც ოსმალეთის იმპერიის ხელშია. ქოროხის ხეობის სათავეში მცხოვრებმა ქართველობამ სრულებით დაივიწყა ქართული და გადაგვარდა და მისი გამოტრიალება ძალიან ძნელია. მარტო ზღვის პირას დაბინავებული ქანები, ანუ ლაზები ისევე ლაპარაკობენ, როგორც მეგრელები, ესე იგი ქართულად.

მაგალითად ქართველი იტყვის: მამამ იმას ცხენი მისცა; მეგრელი იტყვის: მუმაქ (ბაბაქ) თის ცხენი მეჩუ; კანი (ლაზი) იტყვის: ბაბაქ ემუს ცხენი მეჩუ. განა ეს განსხვავებაა? სრულიადაც არა. თვითოეულმა ხეობამ და კუთხემ იცის საერთო ენის გადახრა და მცირედი შეცვლა; მაგრამ დედა-ენას მაინც ამითი არა უშავდება-რა და დგას საღ კლდესავით მაგრად.

რაკი კანეთი (შავ ზღვის პირადაა გაქიმული ტრაპიზონიდან მოყოლებული ქ. ბათუმამდე, კოროხისა და მტკვრის სათავეების საქართველო და არსიანის მთის კალთებზე დაფენილი საქართველოს ნაწილები იყო მოწყვეტილი, ამის გამო ქართველი ნასწავლი კაცები აგრე რიგად არ ეტანებოდნენ ოსმალეთის საქართველოს. რაკი ჩვენები არ მიდიოდნენ იქითკენ, იქიდანაც არავინ შემოდოდა საჩვენოში. შესწყდა ამნაირად მეზობლობა, ჩვენ იმათი აღარა ვიცოდით რა და იმათ ჩვენი და ვიყავით ასრე გაუგებრობით მოცულნი.

ბოლო მოვლო ამ გაუგებრობას 1873 წელს. ამ წელს იმოგზაურა ოსმალეთის საქართველოში პოლკოვნიკმა გიორგი ნ. ყაზბეგმა და დიმიტრი ზ. ბაქრაძემ. ამათ გვიამბეს ნახული და გაგონილი. მაშინ გავიგეთ, რომ მდინადე კოროხის ხეობა ისეთივე წმინდა საქართველოა, როგორც მტკვრისა და რიონისა. რუს-ოსმალს ომის შემდეგ იმოგზაურეს ოსმალეთის საქართველოში ე. გ. ვეიდენბაუმმა და თ. სახოკიამ. ამათ ნაწარებიდან ხომ სრულებით დავრწმუნდით, რომ კოროხელები ჩვენი ღვიძლი ძმები არიან, ხოლო სარწმუნოება აქეთ შეცვლილი და ქრისტეს მაგიერ მაჰმადს აღიდებენ. დღეს კოროხის ხეობის და მტკვრის სათავის ნახვა და იქ მოგ-

ზაურობა ადვილია და მგზავრს არაფრის შიში არ მოე-
ლის.

პროფესორი ნ. ი. მარტი და ისტორიკოსი ე. ს. თაყაიშვილი ხშირად ეწვევიან ხოლმე როგორც კოროხის ხეობას, აგრედვე მტკვრის სათავეს, სწავლობენ და იკვ-
ლევენ შესანიშნავ ეკლესია-მონასტრებს, ციხე-ქალაქებს და ნახულსა და გაგონილს უზიარებენ ქართველობას.

აქ ჩამოთვლილ სწავლულთა და მოგზაურთა ნაამ-
ბობიდან ნათლად სჩანს, რომ ქართული ენა სუფთად შენახულა ქობულეთში, აქარაში (აქარის წყლის ხეო-
ბა), ლივანში და კანეთში. კოროხის სათავეს აღარ ეს-
მის ქართული. შავშეთი ზედ აკრავს არტანს, მაგრამ ქართული აღარ იცის თითო ოროლას გარდა. ერუშეთი, არტანი, კოლა ჯავახეთის მოსამზღვრეა, მაგრამ აქაც აღარ იციან ქართული. ფოცხვისა და ჯაყის წყლის ხეო-
ბამაც, თუმცა ზედ აკრავს საათაბაგოს, დაივიწყა სან-
შობლო ენა.

ა) ფოცხვისი.

ფოცხვის ხევს, ერუშეთს და კოლა-არტანს (არდა-
განის ოლქი) ითვლება 67.575 ქალი და კაცი. რადგან მთავრობამ ქართველ მაჰმადიანებს ეროვნული სახელი შეუცვალა და ხან თურქებს, ხან თათრებს უწოდებს, ამიტომ ძნელი გამოსაცნობია ჯერ-ჯერობით, თუ რამდენი ქართველი ცხოვრობს არდაგანის ოლქში მაჰმადის რჯულისა და რამდენია სხვა ტომისა. თითქმის ნახევარი ამ კუთხის მცხოვრებთა—28,823 ნაჩვენებია როგორც თურქი. მაშ უნდა ვიფიქროთ, რომ ეს ოცდა რვა ათასი რეაას ოცდა სამი ადამიანი ან სავსებით ჩამომავლობით

ქართველები არიან, ან მცირედად შერეულნი. რასაკვირ-
ველია, ამათში ნამდვილი თურქები, უფრო კი ოსმალ-
ნიც ერევან.

არა ქართველთა შორის ყველაზე ბევრნი არიან
ქურთები—11,317 ქალი და კაცი; ბერძნები—10,136;
ყარა-ფათახნი (შავ-ქუდიანები)—9,108; თურქმენები—
4711; რუსები—1702; სომხები—519 და აქარლე-
ბი—25.

სხვა და სხვა ტომის ხალხი ძრიელაა აქრელებული
არდაგანისა, ჩილდირისა და ღელის საპოლიციო ნაწი-
ლებში, ხოლო ფოცხოვში, სადაც ითვლება 14,366 სუ-
ლი, მარტო მაჰმადიანი ქართველობაა. ქურთები სულ
რადაც 389 სულია, რომელნიც აქაც თავიანთ საყვარელ
ხელობას ადგანან, ესე იგი მომთაბარობენ და საქონელს
მწყემსავენ.

ფოცხოვი მთა-გორიანი ქვეყანაა, სწორედ ისეთი-
ვე, როგორცაა ქვაბლოვანი საათაბაგოსი (ახალციხის
მაზრა). ჰავა და ბუნება მშვენიერია, მთის კალთები და
ფერდობნი შემკულნი ტყითა: ფიქვით, ნაძვით, წიფელით
და რცხილით. სოფელ ბადელადან მოკიდებული არსია-
ნის მთაზე, საიდანაც იწყობა შავშეთი და აქარა, ტყე
ხშირია, ხოლო მთის მწვერვალნი სდგანან ტიტვლად. აქ
ზაფხულობით ერეკებიან სხვილფეხ საქონელს და ცხვარს
საბალახოდ.

ფოცხოვში ორი უმთავრესი წყალია, ფოცხოვისა და
ჯაღისა. ამათ ერთვის მრავალი ტოტი, გამომდინარე
ერთსეულის და რასიანის მთებიდან. წყლის პირებზე, ხე-
ვებსა და ღელეებში სახნავი მიწებია და ხეხილის ბაღე-
ბი. აქ მოჰყავთ ზღრი, ქერი და სიპინდი. ხილეულობა-
ში ყველაზე კარვად ხაბობს ვაშლი.

ხენა-თესვა, საქონლის მოშენება ისეთივეა, როგორც ქვაბლიანში. ფოცხოველი აბეზარი არაა, მშვიდობიანი ზასიათისაა და ძალზე ეტყობა დაჩაგრულობა. ქვაბლიანელის სითამამეს და სიამაყეს აქ ვერ იპოვნით.

ფოცხოვეს სიგრძეზე სკრის ქვით დაფენილი გზა. იგი იწყობა ქ. ახალციხესთან, გაივლის ს. ვალეს, ბადელას, დამავლეს, მხარს აუქცევს დიგურს და ხანიორის ქედით გაემართება არტანისკენ. ხანიორის ქედს იქით ტყეები აღარ მოიპოვება. ძველად ფოცხოვიდან გზები გადადიოდა ერუშეთს, შავშეთს და აქარას. დღევანდელ ქვა-ფენილ გზას ცუდად ინახავენ, თუმცა ეტლები დადიან და ჯარის მიმოსვლაც საძნელო არ არის.

უფრო თვალსაჩინო დაბა-სოფელნი ფოცხოვისა ესენი არიან: დამავლე, აგარა, დიგური, ჯუმათელი, წურწყაბი, ზედა-წმინდა, სტეფან-წმინდა, ბადელა, არილა, პეტრუბანი, ქალის-წყალი, ყველი, ალი, გიორგის-უბანი, საკირე, ვარხანი, სათლელი, კანკახი, კილვანა, შუაწყალი, ობოლა, საიხვე, ხეოთი, ღვინია, მერე, წინსათიბი და სხვა.

ს. დამავლეში ზის ფოცხოვის ნაწილის უფროსი და აქვეა მოთავსებული საპოლიციო, სამოსამართლო და საადმინისტრაციო დაწესებულებანი. დამავლედან ახალციხემდე ძლივს იქნები ოცდა ათი ვერსი, ამ სიახლოვის გამო აქაურებს ღიდად ეადვილებათ ახალციხესთან საქმის დაკერა, მგრამ რაკი ფოცხოვი ადმინისტრატიულად არტანზეა მიწერილი, იქ უნდა იარონ და იქიდან ქ. ყარსს. ეს კიდევ რაა, ვისაც საქმე გაუჩნდება საოლქო სასამართლოში, ერევანს უნდა წავიდეს.

დამავლედან ს. დიგურამდე სულ ხუთი-ექვსი ვერსია. ეს პატარა სოფელი (62 კომლი) იმითია შესანიშ-

ნავი, რომ აქ არსებობს მაჰმადიანთა სკოლა, საიდანაც ღვთის მსახურნი გამოდიან. სკოლაში ასწავლიან არაბულს და სამღრთო-რჯულს. მოწათენი დიდხანს სწავლობენ და ზეპირობენ ყორანს, მაგრამ რიგიანად და საფუძლიანად ვერ ითვისებენ ვერც არაბულს და ვერც ყორანს. ხუმრობით დიდვირის (ასე ეძახიან ახალციხელები) სკოლას აკადემიას უწოდებენ, მაგრამ ვაი ამ აკადემიას, ათი-თორმეტი წლის სწავლის შემდეგ შევირდები მიდიან სტამბოლს და იქ ამთავრებენ სწავლას. საათაბაგოს, ფოცხოვისა, ერუშეთის და კოლა-არტანის მოლები დიდვირის აკადემიკოსები არიან, თითო-ოროლას გარდა.

შევირდები მასწავლებლებს ფასს არ აძლევენ. ათასში ერთხელ მათი დედ-მამანი მცირე ძღვენს თუ მხარტმევენ ოსტატებს. შევირდები შინიდან მოტანილ საგზლით საზრდოობენ, ან არა და მათხოვრობით გამოდიან. ასევე ირჩენენ თავს თვით სტამბოლშიაც. კვირის-კვირამდე დადიან სოფლად, მღერიან სამღვთო საგალობლებს, ცოტა რამ სანოვაგეს შოულობენ და ამ საგძლით ბრუნდებიან სტამბოლში. როცა გამოეღვეათ საქმელი, ხელ-ახლა გაემგზავრებიან ხოლმე სოფლად საზრდოს მოსაკრებად. ადვილად მიხედვით, რომ ამ გზით შეძენილი მეცნიერება აგრე რიგად ხელსაყრელი არ იქნება. ეს კია სათქმელი, რომ ამ სახით აღზრდილი მოლლა რჯულის დიდ და შეურყვევლ სიმტკიცეს იჩენს ცხოვრებაში. მაჰმადის რჯულზე უკეთესი არა მიაჩნია-რავერ დააჯერებ, რომ ცხონება სხვა რჯულის შემწეობითაც შეიძლება.

დიდვირში (დიგური) ცხოვრობდა მდიდარი და გავლენიანი ბევი შაქირი, ნათესაეი ფეიხულა-ბეგ ათაბაგ-

ქვაბლიანელისა *) ამ რაპდენიმე წლის წინად შაქირ-ბევმა მიყიდ-მოყიდა თვისი ქონება, ყველაფერი ფულად აქცია და სახლობით გადასახლდა სტამბოლს. ღონიერნი და ხმის ამომღებნი უცხოეთში მიდიან და შინ აღარავინ რჩება. დაჩაგრულსა და უმწეო ქვეყანას ვინლამ უნდა უპატრონოს, თუ ძლიერნი ამა ქვეყნისანი უცხოეთში გადინებებიან?

ფოცხოვის ხეობანი სავსეა ციხე-კოშკებით და ეკლესიებით. კარგად შენახულან ეკლესიები: სათლელში, ზეინდარში, მერეში და აღში. მრავალი მათგანი დანგრეულია. ვერანა ხეოსმანის ეკლესიას ისე აქვს მოხევეული ბუჩქები, რომ სულ აღარა სჩანს პატარა ეკლესია და ვერა გზით ვერ მიუდგები შენობას. დანგრეული ეკლესიები არიან: ორტელში, ლვინიაში, პეტუბანში, ქაბორიაში, ჯაჯუნში, მარცვალეთში, სეჯაში, ხეოთში, ვარხანში, ხანუმისში და აგარაში.

ციხე-კოშკებითაც მდიდარია ფოცხოვი. დიდ-ქარალის მაგარი ციხე ფოცხოვეშია, მაგრამ ეს სოფელი ეხლა მიწერილია ახალციხეზე. აგრედვე მიწერილია საათაბაგოზე ს. ჯაყისმანი, სადაც შესანიშნავი ციხეა და თლილი ქვით ნაგები ბან-ჩამონგრეული ეკლესია ქართულის წარწერით ხუცურად.

ციხეთა შორის შესანიშნავია ყალა-ბოინი და კანქახი. ისტორიაში განთქმული ყველის ციხე სულ გავერანებულა და ოხრად გდია **).

*) განსვენებულ ფეიზულა-ბევს თავი მოსწონდა თავის ჩამომავლობით, უყვარდა ქართველობა, ქართული თეატრი და არ ერიდებოდა ქართველობას. ქართველი საზოგადოება კარგად იცნობდა ფეიზულა-ბევს.

**) 1080 წელს მეფე გიორგი II თავის ჯარით იდგა ყველის-ციხეში. თურქები დაეცნენ მეფეს და დაამარცხეს. მეფე ყველიდან აპარას გადავიდა.

ყალა-ბოინი (კლდის თავი) ამართულია ჯაყის-წყლის ორთავ ნაპირას, იქ სადაც იგი ერთვის ფოცხოვს. ციხე ამაყად დაჰყურებს ორთავ ხეობას და წარსულში, როცა განუწყვეტელი ომი და მტრის თავდასხმა აოხრებდა საქართველოს, ალბად ეს მაგარი ციხე ერთგულ სამსახურს და დარაჯობას უწევდა ფოცხოვს. ვახუშტის აზრით ეს ციხე ეკუთვნოდა ჯაყელებს, შემდეგ მესხეთის და საათაბაგოს ათაბაგთ.

ყალა-ბოინის სიახლოვეს მეორე უფრო დიდებული ციხეა ს. კანკახში. ზემო და ქვემო ციხე მდინარის ერთ პირზეა, ხოლო მესამე წყლის მეორე ნაპირზეა. მათ შორის უეჭველია ასაწევ-დასაწევი ხიდი იქნებოდა. კანკახის ახლო-მახლო მრავალი დანგრეული ეკლესიებია: სოფელ საკირეში, ენგიქევში (ახალსოფელში) და სხვა.

ს. საკირეს ახლო სოფელ ალში დღევანდლამდე გადარჩა მშენიერი ეკლესია, ნაგები თლილის ქვით, მაგრამ მალე ხელიდან გამოგვეცლება, რადგან სოფლებმა მოხსნეს თლილი ქვები და წაიღეს ჯამეს სახლების საშენად. ზოგი ქვა წყლის მიღებად უხმარიათ. დასუსტებული კედლები და სვეტები გუმბათის სიმძიმეს ვეღარ გაუძლებენ და გუმბათი მალე ჩამოწევა. წარსულის დიდების ნაშთი—ალის კოხტა ეკლესიაც მალე დაინგრევა უპატრონობით და უზრუნველობით. ეკლესიას მხატვრობაცა აქვს. დახატულია დედოფალი და ქაბუკი მხედარი.

ყველის ციხის სიახლოვეს არის სოფელი წურწყაბი. ბატონიშვილი ვახუშტის სიტყვით, წურწყაბში ყოფილა ეკლესია გუმბათიანი, კეთილ-მშენიერად ნაგები .

და დიდი. აქა მჯდარა ეპისკოპოზი, რომელიც განაგებდა სამწყსოს ახალციხის წყლიდან არსიანის და ერუშეთის მთებამდე და მდ. მტკვრამდე.

ამ მშვენიერ საკათედრო ეკლესიისა დღეს კვალიც აღარ მოსჩანს. წურწყაბელებს დაუქცევიათ და თლილი ქვით ჯამე *) აუშენებიათ — აღმოსავლეთის კედელი ჯამესი აშენებულია ეკლესიის კედელზე. ამ ცოდვის გასაქარწყლებლად წურწყაბელები ამბობენ, რომ არც ჩვენ წინაპრებს არ ახსოვთ, რომ აქ ოდესმე ეკლესია ყოფილიყვესო. ჩვენ იმ ოსმალთა ჩამომავალნი ვართ, რომელთაც ეს ქვეყანა დაიმორჩილესო...

თურქ-ოსმალების შემოსევამ მეჩვიდმეტე საუკუნის დასაწყისს ასე წაახდინა ზემო-ქართლის ეს მშვენიერი კუთხე. ფოცხოვეს დაუკარგა ქართული ენა, ეს უპირველესი განძი ყოველის ერისა და დღევანდელი ფოცხოველი, შეუგნებელი და ბნელით მოცული, წარსულ დიდების ამავსაც და ნაშთებსაც აღარ ინდობს. მაგრამ მოხდება ის რაც მდინარეს ემართება ხოლმე, იგი ნარუალს არა ჰკარგავს. კოტაოდენი სიმზნევე და დაფერფლილი ეროვნული აზრი ხელ-ახლა აყვავდება.

ბ) შრუშეთი, არტანი, კოლა, ჩულუჩხეთი.

მტკვრის სათავის ქვეყნება, ან ზემო ქართლი, ერუშეთი, კოლა და არტანი ძველის-ძველად ერთ საერისთოს შეადგენდა. ამ საერისთოს ეკუთვნოდა აგრედვე ჯაეახეთი. ბაგრატიონთ გვარი რომ გამეფდა საქართველოში (VI საუკუნე), ზემო ქართლი გაიყო ორ საერის-

*) ჯამე მუსულმანთა სამლოცველოა.

თოდ: წუნისა და არტანისად. ერუშეთ-კოლა-არტანის თაჲი ქალაქი იყო არტანი, დღევანდელი არდაგანი. სამშობლო ისტორია ამბობს. რომ არტანი ააშენა მცხეთის მამასახლისის შვილმა ჯავახმა.

ერუშეთს ეკირა მტკვრის მარცხენა ნაპირი არტანიდან მოყოლებული მონასტერ ვარძიის სირონამდე. მტკვრის მარცხენა ტოტი სამღერეთის, ან ერუშეთის წყალი შუაზე ჰყოფს ერუშეთს. რუსულ ქარტაზე სამღერეთის სახელით არც ერთი მდინარე არაა მოხსენებული. გაჰქრა ეს წმინდა ქართული სახელი, როგორც ბევრი რამ ქართული. სოფელ ნაქალაქევის ახლოს აღნიშნულია რუსულ ქარტაზე მდინარე ხანის-წყალი (ხანიჩაი) და ალბად ეს მდინარე თუა ისტორიული სამღერეთის, ან ერუშეთის წყალი *).

ერუშეთის სამზღვრებია: აღმოსავლით მტკვარი, დასავლით არსიანი, ჩრდილოთ ერუშეთის მთა და სამხრით არსიანის შტო.

არტანისა: აღმოსავლით ყარსის მთის შტო, დასავლით არსიანი, ანუ კვა-ყრილი, ჩრდილოთ მცირე შტო არსიანისა და სამხრით მცირე მთა ფოსოს (ჩულურეთი) და კოლას შორის.

კოლასი: აღმოსავლით ყარსის მთა, დასავლით კვა-ყრილი, ჩრდილოთ მცირე მთა არტანსა და კოლას შორის და დასავლით იგივე ყარსის მთა, რომელიც იწყობა კვა-ყრილიდან და მიემართება ჯავახეთის ნიალის-ყურამდე.

*) კარგს იზამენ არდაგანის რეკში მცხოვრები ქართველები, თუ აიღებენ ვახუშტისა და რუსულ ზუთ ვერსიან ქარტებს და შედარების შემწეობით აღადგენენ ძველ ქართულ სახელწოდებას მთებისას, მდინარეთა და დაბა-სოფელთა და გამოუგზნენიან ამ ძვირფას ცნობებს „ნაკადულს“ ჩვენთვის გადმოსაცემად.

არტანს და კოლას მტკვარი ზედ შუა წელზე ჩამოუდის. ყარსისა და ქვა-ყრილის მთებიდან მრავალი დიდი და პატარა ხეობანი ერთვის მტკვარს. მტკვარი აქ მჩქეფარე და მარდია, მოდის ღრმად დაცემულ ხრამში. ალაგ-ალაგ შევიწროებული კლდეთაგან ისე ჰქუხს, როგორც განთქმული თერგი და ზვირთებს ისე მალა ისვრის, გეგონება ზეცას უნდა ააწვდინოს ქათად ქცეული ზვირთებო. მშვენიერი სანახავია გაზაფხულზე ადიდებული მტკვარი! სიციოცხლით სავსე იგი წააგავს მაშინ ფაფარაყრილ ლომს.

წინად, საქართველოს მეფეების დროს და შემდეგ ოსმალების ბატონობის დროს, ერუშეთ-კოლა-არტანს საქმარისი გზები ჰქონდა. არსიანის მთით ერუშეთიდან გზები მიდიოდა შავშეთს და ტბეთს, ხოლო ერუშეთის მთით ფოცხოვს და სამცხეს. არტანიდან გზა გადადიოდა ბანას და არტანუჯს (რუსები არდანუჩს ეძახიან) ქვა-ყრილის ქედით. კოლიდან გზა მიდიოდა ყარსის ადგილებში.

დღევანდელ არდაგანის ოლქს ორი ქვაფენილი (შოსსე) გზა აქვს. ერთი მიდის ქ. ახალქალაქიდან და გაივლის სულდას, კარწახს, ზურზუნას და შედის არტანში, ხოლო მეორე იწყობა ქ. ახალციხესთან, გაივლის ფოცხვის ხეობას, გადალახავს ხანიორის უღელტეხილს და შემდეგ ჩადის არტანს. აქედან გზა გადადის ქ. ოლთისში, რომელიც ზედ ოსმალების სამზღვრის პირზე სდევს.

ბუნება ერუშეთ-კოლა-არტანისა ისეთივეა როგორც ჯავახეთისა. რადგან ამ ქვეყანას მაღალი მდებარეობა აქვს, ზამთარში დიდი თოვლი მოდის და ძრიელ დიდ სიცივეს იჭერს. აქაური ყინვა არაფრით ჩამოუვარდება რუსეთის მკაცრ სიცივესა და ყინვა-ტეხვრას. მაღალ მდე-

ბარეობის წყალობით ზაფხულში ჰავა გრილია, ხოლო ზანდაზანობით დიდი მწვევი სიციხეები იცის. საზოგადოდ აქაური ჰავა საღი და მარგებელია. ციებ-ციხლება გაგონითაც არ გაუგონიათ აქაურებს.

ჯავახეთსავეთ აქაც მოიპოვება ტბანი. ყველაზე დიდი ტბა ჩილდირისაა, რომელსაც უჭირავს 11.953 ლესეტინა, ან 23,906 ქართული ლიური. ჩილდირის ტბა განთქმულია კალმახით. აქაური კალმახი დიდი ტანისაა და მეტის-მეტად გემრიელია. სანახავიდაც საამურია, რადგან ბლომად აყრია ზურგსა და გვერდებზე დიდი წითელი წინწკლები. ჩილდირის ტბაში დაჭერილი კალმახი ქალაქშიაც კი მოაქვთ გასასყიდად.

ქართულად ჩილდირის ტბას პალაკაციოს ტბა ჰქვიათ. ერუშეთ-კოლა-არტანი უვენახო და უხილო ქვეყანაა. ვერც იხეირებს აქ ვაზი და ხეხილი, კიდევ რომ გააშენონ, რადგან მდებარეობა ქვეყნისა მაღალია და ზამთარში სასტიკი სიციხეები იცის. ხვნა-თესვის გარდა მცხოვრებნი მისდევენ საქონლის მოშენებას. ამ ხელობას ხელს უწყობს უხვი იალაღები. არტანისა და კოლის ვაკენი და ველ-მიდორნი, აგრეთვე უტყეო მთანი გაზაფხულსა და ზაფხულში უხვად იმოსება ნოყიერის ბალახით, ყვავილით და დიდძალ საქონელს აპურებს და ასაზრდოებს. საბალახოდ ცხვრის ფარები ამოჰყავთ არტანის მთებზე თუშებს, ქიზიყელებს და დიდ-თონელებს. სოფ. დიდ თონეთს (მანგლისის ახლოა) საკუთარი საბალახო აქვთ არდაგანის ოლქში. გენერალ პასკევიჩს უწყალობებია ეს საძოვარი თონელებისთვის და დღევანდლამდე მაგრად უჭირავთ თავისი საკუთრება და არავის ანებებენ.

გადარჯულებულ და გადაგვარებულ არტანს რომ

ეწვევიან ხოლმე ზაფხულობით თუშნი და ფშავნი, ქიზი-
ყელნი და დიდ-თონელები, მარტო მაშინ ედება ამ ქვე-
ყანას ცოტაოდენი ელფერი ქართველობისა. სხვა დროს,
შემოდგომა-ზამთარს და გაზაფხულს აღარსად მოისმის.
ქართული ხმა და მარტოოდენ თურქ-ოსმალური სიტყვა-
პასუხია ყველგან გაბატონებული.

ერუშეთ-კოლა-არტანის საქონელი დიდი ტანისაა..
აქაურ საკლავ საქონელს გასასყიდად ტფილისში ჰგზავ-
ნიან და ძალიან ხშირად იმერეთსაც ახალციხის გზით,
ზეკარის უღელტეხილით და ბაღდადით.

კოლა-არტანს სრულებით აღარაა ტყეები, არც ის-
ვიცით, იყო როდისმე აქ ტყეები თუ არა. ალაგ-ალაგ,
ისიც წყლის-პირებზე მოიპოვება არყნალის ბუჩქები. ერუ-
შეთში დღესაც არის ტყეები, მაგრამ ძალიან ცოტა.
ასორმოცდა ათის წლის წინად აქ ბლომად ყოფილა.
ტყეები, მაგრამ გაუჩეხიათ და ქვეყნისათვის დაუკარგავთ
დამამშვენებელი სამოსელი.

უტყეობის და უშეშობის მიზეზით აქაურები პურის
გამოსაცხობად, საქმლის მოსახარშად და სახლის გასათ-
ბობად ხმარობენ წივას. როგორც ჯავახეთში, ისე აქ
თვითოვეულ სახლის წინ ამართულია წივის ზეინები, რო-
მელნიც ისედაც ულაზათო მიწურ სახლებს უფრო მე-
ტად აუშნოებენ და ლაზათს უკარგავენ.

ერუშეთ-კოლა-არტანის უფრო შესანიშნავი დაბა-
სოფელნი და ქალაქნი ესენი არიან. ერუშეთისა: სამლე-
რეთი, ნაქალავევი, ერუშეთი*), ველი, წყაროსთავი,
ვაშლობი, კანარბელი, კართანაყევი და სხვა. ისტორიულ
სამღერეთის სახელი აღარ შენახულა. ჩენის ფიქრით
სამღერეთის ადგილზე სოფელი ველი უნდა იყვეს. კარგა-

*) ერუშეთი და სამღერეთი რუსულ ქარტებზე აღარაა.

ხანია ამ სოფლიდგან გადმოსახლდნენ აქაური ქართველები ჯავახეთს და დასახლდნენ ოთხ ნასოფლარში: ბერაში, კართიკამში, ხულგუმას და ტურცხს. სარწმუნოებით კათოლიკენი არიან და უჭირავთ სომხის ტიბიკონი. შინ თათრულად ლაპარაკობენ, მაგრამ ვაი ამ თათრულს, ნახევრად ქართული სიტყვებია, რასაკვირველია დამახინჯებული. ურევია აგრედვე სომხური სიტყვები. აქაური ახალგაზდობა ძრიელ ეტანება სომხურს. ს. კართიკამის მოძღვარი მამა იგიოხანოვი კარგი ქართულის მცოდნეა.

ნაქალაქევი ძველად ქალაქი იყო. ბატონიშვილი ვახუშტის სიკოცხლის დროს, მეთვრამეტე საუკუნის შუა წელს, დაბად ქცეულა. დღეს უბრალო, უხვირო სოფელია, სულ რაღაც 70—80 კომლიანი. ქართულს სულ აღარავენ ლაპარაკობს. ნაქალაქევს ყოფილა ეკლესია მშვენიერი, გუნბათიანი, აშენებული, საქართველოს მეფე მირიანთან ბიზანტიის მეფე კოსტანტინე დიდის გამოგზავნილ ელჩისაგან. ელჩს დაუსვენებია ეკლესიაში სამკვალავი ქრისტესი (ლურსმანი). ნაქალაქევს იჯდა ეპისკოპოზი ერუშეთისა და არტანისა. ვახუშტის დროს ეკლესია მთელი და დაურღვეული იყო, ხოლო ცარიელი. მაშასადამე მეთვრამეტე საუკუნის ნახევარს ოსმალებს ქრისტიანობა ამოუგდიათ და ღვთისმსახურნი გაუწყვეტიათ.

ს. წყაროსთავი ჯავახეთს ზედ აკრავს კარგად შენახული კოხტა ეკლესია აშშვენებს ღარიბსა და უსუფთაობით სავსე თურქებით დასახლებულ წყაროსთავს. რუსულად აქაურებს თურქები ჰქვიან. შეიძლება ბევრი მათგანი ქართველის ჩამომავალი იყვეს.

არტანის ნაწილში უფრო საყურადღებოა თვით არტანი და შემდეგი დაბა-სოფლები: ჯინქრობი, მაქუეთი,

ნუნუსი, დუდუნა, ბაღდადი, ახაშენი, ჯარის-ხევი, ორუ-
შეთი (აღბად ეს ძველი ერუშეთის ნაშთია). სახელები
ქართულია, მაგრამ შიგ ქართული აღარა ყრია-რა.

არტანი პატარა ქალაქია და არც ძველად ყოფილა
დიდი, აშენებულია მტკვრის დასავლით კიდევად და ჰქონ-
და მაგარი ციხე. არტანს იჯდა ერისთავი არტანისა და
კოლისა. აქვე იყო ეკლესია გუნბათიანი, დიდ-შენი,
მშვენიერი და როგორც სხვა მრავალი ეკლესია მტკვრის
სათავისა დასარიელდა მეთვრამეტე საუკუნეს.

არტანის ახლოს რუსებმა გააშენეს ორი სოფელი:
მიხაილოვკა და ნიკოლაევკა.

ძველებური კოლა გაჰქრა, ამ სახელით არც ერთი
დაბა სოფელი არაა დღის ნაწილში. ქართულ სახელია-
ნი სოფლები აქაც მოიძებნება, მაგალითად: დადენი,
ოთხი საყდარი, ხევა, ოკამი (დუშეთისა და ახალ-ქალა-
ქის მაზრებშიაც არის), პანკისი (თიანეთის მაზრაშიაც
არის), დადაშენი.

როცა საქართველოს საკუთარი მეფენი განაგებდნენ
და უვლიდნენ, კოლა მცირე ქალაქი ყოფილა. ამ უამად
ნასოფლარიც აღარ მოიძებნება კოლას ადგილას. ეს სა-
ხელი მოიპოვება ოვსეთში, ქეშელთის სამამასახლისოში,
გორის მაზრაში.

ოსმალონი რომ გაბატონდნენ საქართველოს ამ ნა-
წილში კოლაში დასვეს ფაშა და სახელად უწოდეს კო-
ლას ფაშა. იგი ემორჩილებოდა ახალციხის ფაშას. კო-
ლას ზევით, მტკვრის კიდევად ს. დადენს იყო დიდ-
მშვენიერი და გუმბათიანი ეკლესია. აქ იჯდა ეპისკოპო-
ზი სრულიად კოლისა (დადაშენელი). ტახტი დადაშენ-
ლისა გაუქმებულა ვახუშტის დროს. მოხსენებული აქვს
ბატონიშვილ ვახუშტის სოფელი ქუმურლო, სადაც ყო-
ფილა მაგარი და შეუვალი ციხე. ბატონიშვილის აზრით
ქუმურლოს ციხე ბეჭის-ციხეა.

კოლელები იგივე ჯაეახები არიან. მეთერამეტე საუკუნის ნახევარს ნახევარზე მეტს რჯული გამოუცვლია. მას შემდეგ გაიარა 150 წელიწადმა და კოლაში სრულიად ამოვარდა როგორც ქართული, აგრედვე ქრისტიანობა.

არტანსა და ჯაეახეთ შორის იყო პატარა კუთხე ჩულურეთი, ვაკიანი და ტიტველი, როგორც არტანი და ჯაეახეთი.

მაშ ასე, ზემოდ ნაამბობიდან სჩანს, რომ უცხო ერის, თურქ-ოსმალის შემოსევამ მოსწყვიტა საქართველოს ხუთი პატარა კანტონი (თემი, მაზრა, ხეობა): ფოცხოვი, ერუშეთი, არტანი, კოლა და ჩულურეთი. ორას წელიწადზე მეტი ბატონობდა აქაურობას ოსმალთა და თვისი ტლანქი ხელით აამტუტა ეს ხუთი პატარა კუთხე. ამოვარდა ენა, დაიღუპა რჯული, შეიცვალა ზნე, ჩვეულება, ჩაცმა-დახურვა. მარტოდენ სახელწოდება ზოგიერთა სოფელთა, ეკლესიანი და მათი ნანგრევები და შოაგონებს ადამიანს, რომ ფოცხოვი, ერუშეთი, არტანი, კოლა და ჩულურეთი ისეთივე საქართველო იყო, როგორიცაა ქართლი, კახეთი, იმერეთი, და სამეგრელო.

როგორც თავში მოვიხსენიეთ, ფოცხოვი, ერუშეთი, არტანი, კოლა და ჩულურეთი შემოიერთა რუსეთმა 1878 წლის ომის შემდეგ, ერთ არდაგანის ოლქად შეაკოწიწა, მაგრამ ამ შემოერთებით ვერც არაფერი ხიერი რუსეთმა ნახა, ვერც არაფერი ჩვენ ქართველებმა.

სულ სხვანაირად დატრიალდებოდა საქმე, ქართული ენა რომ გამხდარიყო საადმინისტრაციო ენად. ძველი ქართველი ადვილად შეითვისებდა ქართულს და ამ ენის შემწეობით ჩაერეოდა ევროპულ კულტურის ფერხულში.

ს ა რ ჩ ე ვ ი:

I.

- დიდებული მესხეთი გვ. 5
ეურნალი „მოამბე“, 1912 წ., № III.

II.

ნახული და გაგონილი.

1. მიხეილ მეფის შვილის გარდაცვალება, გვ. 41
„ივერია“, 1902 წ. № 15.
2. მაჰმადიან ქართველების გადასახლება, გვ. 44
„ივერია“, 1903 წ., № 97.
3. მთავარ-დიაკონი ჯვარიძე, გვ. 52
„ივერია“, 1903 წ., № 107.
4. შოთა რუსთველი, გვ. 59
„ივერია“, 1903 წ., № 187.
5. ვარძია, გვ. 67
„ივერია“, 1904 წ. №№ 134, 141, 146,
150 და 159.

III.

სამშობლო ქვეყანა.

1. სამცხე-საათაბაგო, გვ. 114
ეურნალი „ნაკადული“, 1908 წ., №№ 2, 3,
4 და 6.
2. ჯავახეთი, გვ. 143
ეურნალი „ნაკადული“, 1908 წ., №№ 8, 10,
11, 12, და 1909 წ. № 1.
3. ფოცხოვი, ერუშეთი, არტანი, ჩულურეთი,
კოლა, გვ. 174
ეურნალი „ნაკადული“, 1909 წ., № 4, 5, 6.

ა ლ მ ქ ს ა ნ დ რ ე ფ რ ო ნ ე ლ ი .

1. მთიულეთი 1914 წ. ისტორიული ამბავი	40	კ.
2. ამბოხება კახეთისა, ისტორიული ამბავი	70	"
3. მთის არწივი შამილი, ისტორ. ამბავი	25	"
4. დიდებული მესხეთი, კრებული	15	"

დაისტამბა და უკვე იყიდება საქართველოს ყველა წიგნის გამყიდველებთან:

№ 1. აჭარის მთავარი ახმედ-ფაშა ხიმ- შიაშვილი, თხზ. აბესაძისა, ფასი	5	კ.
№ 2. ისტორიული სურათები, განყ. 1) ქართული ეკლესიის გამოყოფა საბერძნეთის ეკლესიიდან და 2) ქართველი ქალები, თხზ. დიმ. ჯანაშვილისა ფასი	75	"
№ 3. ელგუჯა, რომანი ალ. ყაზბეგისა ფასი	10	"
№ 4. ვინ იყო ილია ჭავჭავაძე? ამოღებული ჟურ. „მიწიდან“ ფასი	3	"
№ 5. დიდებული მესხეთი, ალ. ფრონელისა, ფასი	15	"

მ შ ა დ დ ე ბ ა გ ა მ ო ს ა ც ე მ ა დ :

1. ქართველი პოეტების საუკეთესო ლექსთა კრებული.
2. სამი პატარა წიგნაკი ქართველ მაჰმადიანთათვის: ა) ქართული ანბანი; ბ) ქართულ-არაბული ანბანი,
3. ლექსები ქართველ მაჰმადიანებში მოკრეფილი.
4. ძველი ქართველები ხეთი და ნაირი, თხზ. სიმონ ქვარიაძისა.
5. აჩრდილნი წარსულისა, მოთხრობა ნიკო ლომოურისა ამბავი საქართ. წარსულიდან.